

9

Not in use



Rs











# ANATOME ARMINIANISMI

Seu,

ENVCLEATIO CONTRO-  
VERSARVM QVAE IN BELGIO  
*agitantur, super doctrina De Providentia: De  
Praedestinatione, De morte Christi, De natu-  
ra & Gratia.*

Authore PETRO MOLINÆO Pastore  
Ecclesiae Parisiensis.



LVGDVNI-BATAVORVM.  
Apud BONAVENTVRAM ELZEVIR.

M. DC. XIX.





ILLVSTRISSIMIS AC  
POTENTISSIMIS DOMINIS

D. D. ORDINIBVS GENERA-  
LIBVS FOEDERATARVM  
*Prouinciarum Belgij.*



Nnumera sunt, Illustrissimi  
& Potentissimi Domini, be-  
neficia quæ prouinciis ve-  
stris Dei beneficio contige-  
runt, & vobis quasi virgulâ  
diuinâ suppeditantur. Iam hæc magna  
sunt, quòd vestra Respublica florens opi-  
bus, aucta pomœriis, terrâ marique po-  
tens, belli pacisque artibus clara, hostis  
potentissimi sic retudit impetum vt in  
hostili solo semper bellum gereretis, &  
vrbes vestrę in medio bellorum æstu age-  
rent Halcyonia. Quæ omnia gesta sunt  
sub auspiciis vestri Senatus amplissimi, &  
ductu Principum Auraicorum, de quo-

rum laudibus præstat tacere quam pauca dicere. Illi ipsi qui successibus vestris inuident, virtutem tamen vestram admirantur. Denique talis Senatus & Principes Reip. vestræ contigerūt, quales Deus dat, quotiescunque res tenues & afflictas vult extollere ad summum potentiæ & gloriæ fastigium.

Sed inter Dei beneficia facilè eminet, quod cum puteus abyssi fumum densum euomat, qui totum fere orbem densa ignorantiae caligine inuoluit, apud vos Sol veritatis cælestis puro orbe nitet, & ignorantiae tenebras discussit. Vnde factum vt regio vestra vnâ cum seruitute ciuili, iugum conscientis impositum excusserit.

Hunc rerum secundarū cursum Satan vt sisteret, vires externas per multos annos expertus est. Quo conatu excussus, ad technas & ad intestinas dissensiones conuersus est: Nactus homines qui sub obtentu pietatis studentes rebus nouis, patriæ & Ecclesiæ suæ viscera laniarunt. Miseranda erat facies prouinciarum ve-

strarum : Inimicus nostræ salutis funestæ  
dissensionis apud vos facem ventilabat:  
Tumultuosum drama super Belgij thea-  
tro agebatur spectantibus multa cum  
voluptate aduersariis. Denique vidimus  
nutantem vestram Remp. & res prope-  
modum conclamatas, nisi imminentem  
perniciem Deus apparens <sup>ὁ θεὸς παρελθὼν</sup>  
tempestiuus remediis auertisset : vsus ad  
eam rem vestra autoritate, sapientia, &  
prudenti constantia. Quantâ patientiâ  
pertuleritis turbulenta ingenia, quantâ  
vigilantia occurreritis grassanti conta-  
gioni, si nemo diceret, magnitudo tamen  
morbi, & res in integrum restitutę abun-  
dè testarentur. Quo in conatu Celsissimi  
Principis Auraici virtus emicuit, in quo  
habemus singulare documentum quid in  
summa fortitudine summa possit indu-  
stria: & qui tot bellica facinora cumula-  
uit laude ciuilis prudentiæ. Hoc factō,  
Amplissimi viri, maiorem ex restituta  
quàm ex aucta Repub. laudem estis affe-  
cuti. Plus enim intestina hæc pestis pau-  
cis annis attulit detrimenti quàm externa

bella, per multa sæcula, afferre potuissent. Cuius quidem vestrae virtutis quotquot sunt totâ Europâ Orthodoxæ Ecclesiæ fructum capiunt maximum: quippe ad quas iam volabant scintillæ istius incendii; Iamque apud exteros super his controuersis fluctuabant multorum iudicia. Nam in quæstionibus de prouidentia & prædestinatione, solet esse acceptissima in vulgus sententia quæ diuina consilia ex humanis metitur, Deumque humanis affectibus induit.

Sed inter cætera à vobis prudēter & feliciter gesta, conuocatio Synodi Dordracenæ, primas, meo iudicio, obtinet. Qua Synodo nulla alia à multis retro sæculis, nec celebrior, nec sanctior, nec Ecclesiæ vtilior: Ad quam vt vocaretis lectissimos viros diuersis ex partibus, nec pepercistis sumptibus, nec labori. In qua omnia sic compositè & grauiter acta sunt, vt populos in admirationem traxerit, & voluntates nutantes confirmauerit: cerebroso verò & contumaces solo aspectu sic perturbauerit, vt qui antehæc gestire in pu-



gnam, & certamen auidè pōscere videbantur, conuersis artibus *φυροδοχείῳ*, lucemque odisse, & moras nectere cœperint, siue illos percussit metus, siue perculit conscientia. Ad rem tam præclaram cum alii Principes viri vos hortabantur, tum præcipuè Iacobus Serenissimus Rex Magnę Britannię, qui ad profligandos quorumlibet nouatorum errores acerrimam semper facē prætulit. Qui quidem vt Defensor Fidei meritò audit, ita oculos in omnem partem circumfert, prospiciens ne vsquam fides Christiana aliquid detrimenti capiat.

Ego verò, qui ad tam sanctum opus operam non potui, saltem vota contuli. Dici non potest quam cupidè optauerim interesse venerandę vestrę Synodo, ad quam me Ecclesię Gallicę cum aliquibus ex meis fratribus destinauerant. Quæ impedimenta institutum iter abruperint non opus est commemorare. Absens tamen quod potui præstiti. Mihi enim ad Synodum sententiam meam super quinque capitibus controuersiarum quę in

Belgio agitantur, camque fultam locis & probationibus ex sacra scriptura. Cùm verò me multi, iique boni, & pollentes apud vos autoritate & prudentia hortati essent vt aliquid scriberem in has cōtrouersias, parui non illibenter. Idque non tam perficiendi spe quàm recusandi pudore, & experiundi voluntate. Malo enim à viris piis & doctis desiderari meam prudentiam, quam incusari negligentiam. Ergo schedas meas excussi, & quę erant à me in has quæstiones meditata recognoui: quæ quidem concepisti stilo simplici & incompto, vt quasi in macilento corpore eminent veritatis tori: Et conatus sum inferre lucem his tenebris, in quibus perspicacissimi quique sæpe prætentant viam.

Non me latet quam sit periculosum subire aleam tot iudiciorum: quàm multi sint ambitiosè tristes, superboque fastidio: quàm pauci hæc capiant, quàm pauciores capiantur: quàm difficile sit confligere cum hominibus versipellis & acutis, qui etiam cum capti sunt sic loquuntur

quantur quasi ceperint: & qui in deplo-  
rata causa sicutamen agūt quasi tacti com-  
miseratione: qui orsa à se detexunt; &  
sensus suos vltro inuoluunt metuentes  
intelligi, stellionum instar qui ex aperto  
se in spineta proripiunt. Nec me fugit  
quam sit difficile homini occupato, cuius  
animus aliis curis & occupationibus vn-  
dique pulsatur scribere enucleatè de re-  
bus ad quas vix sufficiunt liberrima studia  
& tranquilissima ingenia.

Sed mihi vestra humanitas & sapien-  
tia subdit aculeos, & ad audendum inui-  
tat. Scitis enim in rebus arduis conatum  
esse laudabilem, etiam cum successus de-  
fuit. Nec dubitavi vobis consecrare meas  
lucubrationes, vt opus factum ad defen-  
sionem causæ quam feliciter tuemini in  
vestro nomine appareat. Mihi videbor  
non lusisse operam, si laudis expers ve-  
niam impetrauero: Aut si meo exemplo  
aliquem excitauero ad aliquid perfe-  
ctius elaborandum, quo possit veritas sta-  
re inconcussa aduersus nouatores impro-  
bè acutos, & prauæ ac infelicitis audaciæ.

Interea pro vestra sapientia obseruabitis ex quibus initiis ad quanta incremente lues ista peruenerit : vtque sub specie libertatis prophetandi immissæ sint habentæ ingeniis petulantibus, quæ libertatis nomine prætexunt licentiam ; Nam dum quasi ad exercitationem & ingenij specimen disputatur de ipsis fidei fundamentis, de quibus inter nos antea nulla erat concertatio, sanctissima quæque & certissima cœperunt vocari in dubium : & scholastica velitatio in seriam pugnam statim exarsit. Hæc enim licentia cum à scholis, vt fit, transisset in sacra pulpita, & inde in plateas, tabernas, tonstrinas, tota regio mutata est in quoddam pelagus tumultibus æstuans : Vnde odia in populo, & pietas in contentionem versâ, & erga Magistratus segnius obsequium : Ad quæ mala cum accessisset ambitio quorundam res nouas affectans, quæ flatu & fomitibus adhibitis suscitauit hoc incendium, paruo tempore hæc flamma in immensum excreuit. Sed Dei beneficio, & vestra, Illustrissimi Domini, autoritate.

& prudenti vigilātia tanti incendij flamma resedit: recuperata est libertas, Respublica constituta, Academia repurgata, veritasque quæ multis in locis vix hiscere audebat, aut aduersis clamoribus obturbabatur, perrupit obstantia, & vt fit in collisione silicū, ex ipso conflictu clarioremicuit. Enimuero ex eo non obscura apparuerunt in populo incrementa pietatis, maior ex eo ad audiendum Dei verbum concursus, maior attentio. Nam Deus, quæ est eius bonitas, vtitur ipsis viriis ad suscitandas virtutes torpentes in otio. Crescit enim zelus & pietas irritata, non secus ac fornacum ignis languens affusa aqua succenditur. Tum qui experimento didicerunt quas insidias Satan struat dormientibus & incautis, ad agendas in posterum excubias instigantur.

Supersunt quidem adhuc aliqua reliquæ huius morbi, necdum planè detumuerunt odia partium. Sed spes est fore vt breui coalescant labra huius vulneris, & concilietur animi: dummodo in Academia vestra, ex qua hæc contagio in to-

tam regionem serpsit, nefas sit deinceps  
*ἐπεσθιδασκαλεῖν*, & vocare in dubiū quæ in sa-  
cra vestra Synodo ex Dei verbo sunt piè  
& prudenter constituta, & deinceps ne-  
mo ad sacrum Ministerium admittatur,  
cuius non sit fides explorata, & cum fra-  
tribus cognita consensio: Synodisque sua  
reddatur authoritas, vsusque frequen-  
tior: vt nascentium malorum occurratur  
initiis, veluti cum scorpius pungens su-  
per ipso vulnere illico eliditur. Sed &  
prudenter à vobis cautum est ne hæc de-  
inceps iactetur in vulgus, vt populus non  
tam doceatur disputare quam viuere: &  
assuescat cum suis potius vitiis quàm cum  
alienis opinionibus configere. Difficilli-  
mum enim hoc est certamen & peruti-  
le, quod vnusquisque piorum indicit ipse  
sibi. Contrà, dum lis ex lite seritur, &  
quæritur non veritas sed victoria, inter  
altercantes primò quidem charitas, mox  
etiam veritas amittitur.

Præcipuè verò danda opera, ne pax &  
diuitiæ inducant obliuionē crucis Chri-  
sti: & ne populus beneficiorum Dei im-

memoreius iudicia denuo attrahat. Non  
defunt exempla populorum quibus cum  
ipsa religio opes & res secundas peperis-  
set, mox eadem illæ opes & res secundæ  
suffocauerunt religionem, & turpi parri-  
cidio peremerunt matrem. Quo maior  
cura adhibenda est vt his documentis  
populorum vestrorum aures perfonent,  
per quæ calamitatum à ceruicibus vestris  
depulsarum refricetur memoria, & ani-  
mi eminus prospicientes futura pericula  
& Satanam imminentem, pio horrore  
contremiscant.

Quam ad rem non leue est incitamen-  
tum, quod his nouissimis tumultibus ex-  
perti estis, Reip. pacem integritate reli-  
gionis constare: nec posse veræ religionis  
quæ apud vos obtinet puritatem violari,  
quin labefactentur columnæ quibus stat  
Respublica, & Supremi Magistratus au-  
thoritas sustentatur. Hæc enim duo mu-  
tuo inter se nexu ita continentur, vt non  
possit alterum euerti quin alterum cor-  
ruat. Per religionis latus petebatur vestra  
authoritas; & in fundamentis Ecclesiæ,

fundamenta Reip. subruerant. Ergo tunc erit facta tecta vestra potestas, quando obsequium debitum Principibus putabitur pars esse pietatis: & Pastores Ecclesiæ ad obedientiam vobis exhibendam populos verbo Dei imbuunt. Vicissim florebit Ecclesia quādo Principes erunt eius nutritij, & putabunt se admotos à Deo gubernaculis rei publicæ, ut Deus per eos regnet, & sub umbra potestatis ciuilis religio adolescat, & sedulo excolatur: Id quidem, Illustrissimi Domini, præstatis sedulò & feliciter. Dicitur non potest quantum vobis debeat populus vester: Idemque deinceps plura debet. Profectò, quotquot sunt in orbe Christiano boni, tam prosperos successus vobis gratulantur, vestramque sapientiam admirantur: & precibus à Deo contendunt ut vos quibus usus est ad seruandam Remp. & Ecclesiā, diu seruet Reip. & Ecclesiæ: vosque suo spiritu sic regat & curā tueatur, ut omnes conatus vestri optatum finem consequantur, habeatisque Remp. feliciter constitutam, res in



tuto collocatas , domesticam concordiam , opes affluentes , exercitus fortes , frequentes victorias , populum dicto audientem , & qui vos Dominos ne appellet an patres , alternis iudiciis ambigat.

*I. V. A.*

*Observantissimus*

*Petrus MOLINÆVS.*



# INDEX CAPITVM

## HVIVS LIBRI.



*Uam sobriè sit agendum in hoc argumen-  
to.* CAP. L.

*Non si qui doctrina prouidentia & præde-  
stinationis ad curiositatem abutuntur  
idcirco ea prorsus abstinendum esse. Et*

*ad quid sit uilus.*

CAP. II.

*Docetur quid sit Prouidentia Dei. Quàm latè pateat. Deum  
non esse authorem peccati. Tum quid sit permissio. Quid  
excecatio & induratio.*

CAP. III.

*De voluntate Dei.*

CAP. IV.

*De Voluntate Antecedente & Consequente*

CAP. V.

*De Peccato Adami.*

CAP. VI.

*Totum genus humanum infectum esse peccato originali.*

CAP. VII.

*Quid sit peccatum originale, & an verè & propriè sit pec-  
catum.*

CAP. VIII.

*Quomodo peccatum Adami pertineat ad posteros, & quot  
modus ad eius sobolem transeat: & primò quidem de im-  
putatione: & an auorum & proauorum peccata poste-  
rus imputentur.*

CAP. IX.

*De propagatione peccati Adami in posteros, ubi & de tra-  
ductione animæ, & ipsius peccati.*

CAP. X.

*An peccato Adami amissæ sint vires credendi Euange-  
lio.*

CAP. XI.

*Deum ex genere humano corrupto & maledictioni obnoxio*

saluare quos ex mera sua gratia elegit. Quid sit prædestinatio. Eius partes. Arminium non intellexisse quid sit Decretum Prædestinationis, & funditus sustulisse electionem.

CAP. XII.

De Obiecto Prædestinationis: id est an Deus eligens & reprobans consideret hominem vi lapsum, an vi non lapsum.

CAP. XIII.

Paulum Apostolum Massæ nomine corruptam massam intellexisse.

CAP. XIV.

Arminium verbis Pauli clavis & disertis vltro tenebras offundere.

CAP. XV.

Sententiæ partiū super doctrina prædestinationis.

CAP. XVI.

Arminianos facere præuisā fidē causā electionis.

CAP. XVII.

Excutitur decretum electionis generalis, qua Arminius vult omnes homines esse electos ad salutem sub conditione fidei.

CAP. XVIII.

Conuelliur electio singulorum ex fide præuisa auctoritate scripturæ. Probatur homines non eligi ex fide sed ad fidem.

CAP. XIX.

Electio ex fide præuisa refutatur locis petitis ex Euangelio Iohannis.

CAP. XX.

Idem probatur ex octauo & nono & vndecimo capitulis ad Romanos.

CAP. XXI.

Eadem electio ex fide præuisa refutatur ratione.

CAP. XXII.

Sententiæ Augustini de electione ex fide præuisa.

CAP. XXIII.

Excuiuntur argumenta Arminianorum quibus conantur stabilire electionem ex fide præuisa.

CAP. XXIV.

An Christus sit causa electionis & fundamentū.

CAP. XXV.

De Reprobatione.

CAP. XXVI.

Quatenus & quo sensu Christus sit pro omnibus mortuus.

*Sententia parium.*

CAP. XXVII.

*Christi morie non esse omnibus & singulu acquisitam nec impetratam reconciliationem, nec remissionem peccatorum.*

CAP. XXVIII.

*Diluuntur obiectiones Arminianorum quibus impetrationem salutis pro omnibus hominibus astruere conantur.*

CAP. XXIX.

*Olim disputatum esse an Christus sit mortuus pro omnibus, sed sensu longe diuerso.*

CAP. XXX.

*An Deus amet omnes homines equaliter & omnium salutem ex aequo cupiat.*

CAP. XXXI.

*De libero arbitrio sententia parium.*

CAP. XXXII.

*Hominem irregenitum planè destitutum esse viribus & libertate arbitrij in iis quæ ad fidem & salutem pertinent probatur ex sacra Scriptura.*

CAP. XXXIII.

*Excutiuntur rationes Arminianorum quibus astruunt liberum arbitrium in homine irregenito circa spiritualia, & pertinentia ad salutem.*

CAP. XXXIV.

*Soluntur obiectiones quas Arminiani à Pelagianis & Pontificiis mutantur. An homo irregenitus necessario peccet. Et an necessitas excuset peccatum, & an Deus iubeat quæ non possunt ab homine praestari.*

CAP. XXXV.

*De Vocatione externa & interna: & an vna possit esse sine altera.*

CAP. XXXVI.

*De distinctione gratiæ in sufficientem & efficacem.*

CAP. XXXVII.

*De Vniuersali gratia, quæ & sufficiens, Arminianorum sententia.*

CAP. XXXVIII.

*Conuelliur locis Scriptura gratia sufficiens vniuersalis.*

CAP. XXXIX.

Eadem gratia sufficiens rationibus impugnatur. CAP. XL.  
Refelluntur argumenta quibus Arminiani gratiam vniuersalem sufficientem tuentur. CAP. XLI.

Arminianorum cum Semipelagianis consensus demonstratur. CAP. XLII.

Sententia Arminianorum super modo operationis gratia. Et de vi qua Irresistibilis ab eis dicitur. Tum de suasionem morali. Nec non de viribus & actu credendi. CAP. XLIII.

Sententia Ecclesiae Orthodoxae super conuersione hominis, & conuersionis modo & certitudine. CAP. XLIV.

Ventilatur quaestio de suasionem morali, & an omni suasioni possit resisti. CAP. XLV.

Probaturn certitudo conuersionis electorum, & finalis insuperabilitas gratia. CAP. XLVI.

Augustini de hac controuersia iudicium. CAP. XLVII.

Ipsos Arminianos Irresistibilitatem, quam impugnant, aperte stabilire. CAP. XLVIII.

Obiectiuncula Arminianorum aduersus Irresistibilitatem; id est certitudinem infallibilem conuersionis, diluuntur. CAP. XLIX.

Additamentum ad caput XIII. continens loca quaedam excerpta ex Confessione Ecclesiae Gallicanae & ex principibus huius aui doctoribus, super obiecto praedestinationis, & Iudicium Synodi Dordracenae.

ANATOT



# A N A T O M E ARMINIANISMI.



*Quam sobriè sit agendum in hoc argumento.*

## CAPVT L.



I in vlllo alio argumento , in hoc præcipuè quod aggredimur tenendum est illud Pauli , *ne quis sapiat ultra quam par est , sed sapiat ad sobrietatem.* Rom. 12. vers. 3. Op-  
posuit enim Deus arcanis suæ sapientiæ Prou. 25. multam caliginem , in quam nefas est irrupere , ne dum scrutamur maiestatem opprimamur à gloria. Sati-  
us est tuta sapere quam sublimia , & obseruare Dei mandata , quam scrutari consilia. Hæc curiositas ge-  
nus humanum pessumdedit. Adam enim dum vult si-  
milis esse Deo cognitione boni & mali , bonum qui-  
dem amisit , malum vero suo damno didicit , dum pœ-  
nas luit. Inde natæ hæreses , dum homines prurigare  
ingenij correpti ultra verbi diuini metas excurrunt. In-  
de turbæ quas Satan excitauit hoc sæculo fertili dispu-



tationum, sterili pietatis; vsus ad eam rem hominibus qui acumine improbo & temeraria præsumptione aucti vocare Deum ad calculos, eiq; leges præscribere, florentissimas Belgij Ecclesias grauiter affligerunt. Turbissimum ergo sequi Deum ducem, & tantum sapere quantum verbo suo nobis patefecit, & vbi Deus tacet, ipsi nobis imperare silentium. Maximè vero cauedum est, ne dispendio iustitiæ Dei patrocinemur eius sapientiæ aut prouidentia: vicissim verò ne dum tuemur eius iustitiam, configamus oculos eius prouidentia. Nec putandus est Deus iniustus, si quid agat quod regulis mète nostra cõceptis vsquequaquè non respondeat. Hæc duo cum sint vitanda sedulò, ceu duo scopuli infames & periculosi, longè tamen peius est inurere Deo notam iniustitiæ, quam limites figere eius prouidentia. Minori enim periculo Deus statuitur otiosus spectator peccati, quàm si credatur peccati author aut instigator. Nec vlla capitalior peltis, quàm in Deum humanorum scelerum causam transcribere: Ita enim fit vt homines ruptis repagulis impunè lasciuiant, quippe habentes Deum patronum sui sceleris & authorem.

Ad cohibendam verò curiositatem & incutendum animis religiosum metum, non parum conferet consideratio nostræ tenuitatis, si ad Diuinam Majestatem conferatur. Enimuero si quis nostrum formicam pede obtruerit, nemo ei ob hoc iniustitiæ actionem intendit, quamuis formica eum non offenderit, & formicæ vitam non dederit, & alienum opus destruxerit quod ab homine non potest restitui, & inter homi-



nem & formicam non sit infinita inæqualitas, sed certa quædam & finita proportio. At homo Deum grauius offendit: & Deus homini vitam dedit; & inter Deum & hominem nulla est proportio, sed infinita distantia, vt inter rem finitam & rem infinitam. Si ergo Deus homines peccatores, quos seruare poterat, obtriuierit; si vasa iræ præparata ad interitum patienter tolerans, fecerit illa materiam suæ gloriæ, an poterit quisquam cum Deo expostulare, aut desiderare in eo bonitatem, aut inculcare eius iusticiam?

*Non si qui doctrina prouidentia & prædestinationis, ad curiositatem, aut ad impietatem abutuntur, idcirco ea prorsus esse abstinendum:  
Et ad quid sit utilis.*

## CAP. II.



VNT qui pertasi contentionum quæ ex doctrina de prouidentia & prædestinatione nascuntur, putant tutissimum esse ad pacem Ecclesiæ & ad tranquillitatem conscientia, has quæstiones non attingere, neque de ijs verba facere ad populum pro suggestu: His sermonibus infigi animis scrupulos, subnasci dubitationes, & infirmorum fidem labefactari. Doceatur (inquiunt) populus, non quid Deus agat aut decernat, sed quid nobis agendum sit. Instilletur animis doctrina bonorum ope-

A ij,

rum, Deo vero relinquuntur arcana electionis & reprobationis.

Hæc sanè oratio honestior est quàm verior. Hi enim dum præ se ferunt studium pietatis & amorem concordie, Christum & Apostolos tacitè insimulant imprudentiæ, quòd doctrinam electionis in Nouo Testamento tam frequenter inculcauerint: Et dum præposterâ religione attinentur, authores sunt Pastoribus Ecclesiæ vt portionem recidant de Dei verbo, nec proponant populo integram doctrinam Euangelij. Et dum voluntaria ignorance affectant laudem modestiæ, in Deo ipso desiderant prudentiam.

Quid quod absq; hac doctrina, non potest tribui Deo honor qui debetur, nec fides nostra constabili? Nam per doctrinam de prædestinatione ingerit se mentibus nostris cumulus ille immensus bonitatis & amoris Dei erga nos, per quem nos amauit & nobis prospexit ante jacta mûdi fundamenta. Tum quicquid nobis lucis aut gratiæ Deus admetitur, agnoscitur esse riuiulus promanans ab amore illo æterno. Per eandem doctrinam concidunt humana merita, & euanesceat imaginaria facultas liberi arbitrij in rebus quæ pertinent ad salutem. Quin & vacillaret salutis fiducia, nisi immutabili Dei decreto, non verò humano arbitrio niteretur. Est quoq; hæc doctrina grande leuamentum ærumnarum, & mitigatio omnis acerbissimæ: dum cogitamus, omnia, etiam acerbissima, cedere in bonum ijs qui ex Dei proposito sunt vocati. Nec vllus est stimulus acrior ad bona opera quàm agnitio amoris illius æterni quo Deus nos ante sæcula in Christo complexus


est. Deniq; per hanc doctrinam docemur ipsi nos excutere & explorare conscientias nostras, ad inueniendâ in nobis & suscitandâ testimonia electionis nostræ: Gnari studium nostrum & curam debere subseruire electioni Dei, & viâ inferni, id est impœnitentiâ & incredulitate, non posse ad cœlum perueniri.

Potest ergo, duce scriptura, hæc doctrina vtiliter proponi, tenendo mediocritatem inter affectatam ignorantiam, & temerariam curiositatem, sequendo tale temperamentum, vt non abstinemus licitis, dum vitamus illicita.

Hoc opere nobis res est cum hominibus, qui vtro-  
bique peccant, & impingunt in vtrumque extremum.  
Nam Arminius, si quisquam alius, ingerit se in arcana  
Dei, & decretum electionis scrupulosa curiositate in  
frusta concidit. Idem tamen totam doctrinam de  
electione *ἐκφρασίς* vt rem quæ si ignoraretur non  
perid minueretur Dei erga nos amor, nec eius gratiæ  
fieret iniuria. *In ver-  
kinsum  
pag. 84.* Hanc electionem qui negant, negant  
(inquit) *quod verum est, sed citra gratiæ & misericordiæ  
iniuriam.*

*Docetur quid sit Prouidentia Dei : Quam latè pateat.  
Deum non esse authorem peccati. Tum quid sit  
permissio, Quid excacatio, & induratio.*

## CAP. III.

I.  ROVIDENTIA est virtus diuina, rerum omnium gubernatrix, per quam Deus fines, & media ad fines, ab æterno præsciuit & præordinauit.

II. Omnia cum sint Deo præsentia, nihil est quod ab æterno Deus non præuiderit. An verò de singulis euentibus fecerit peculiare decretum dubitari potest. Nam vt Deus ab æterno decreuerit, quot herbę capillamenta debeant hoc anno in Neapolitano agro succrescere, aut quot de attrito mendici centone fila dependeant, non videtur consentaneum: quia hæc non habent rationem boni aut mali, nec faciunt ad Dei gloriam aut perfectionem vniuersi. Idcirco Thomas censet Dei decreto numerum hominum esse definitum: at non numerum culicum aut vermium. Non quòd minutula ista Dei cognitionem effugiant, aut quod Deus non possit ad ista extendere suam prouidentiam: sed quia non videtur conueniens summæ sapientiæ aliquid decernere, quod nihil conferat ad suam gloriam aut ad perfectionem vniuersi. Nempe Deus omnia vel minima ab æterno præsciuit: at ea demum præordinauit & decreuit, quæ habent rationem aliquam boni, & quibus gloria Dei fit illustrior vel mundus perfectior.

*Summa  
Theol.  
I. Parte  
Q. 23.  
Art. 7.*

III. Dei voluntati resisti non potest. Rom. 9. vers. 20. ipse de se sic loquitur Esaïæ 46. vers. 10. *Consilium meum ratum est Et quicquid volo facio.* Et Paulus Ephes. 1. *Deus omnia efficit ex consilio voluntatis suæ.* Non placet hoc Arminio; Cenlet enim Arminius in Perkinsum p. 60. Deum posse frustrari particulari sine quem sibi proposuit. Et p. 198. posse resisti voluntati Dei antecedenti. Quàm verè, postea videbimus.

IV. Deus nullatenus est author peccati nec instigator. Ps. 5. vers. 5. & Psal. 45. vers. 8. Deus enim non modo est iustus, sed etiam est ipsa iustitia. Qui autem est ipsissima iustitia, nihilo plus potest peccare, aut peccati author esse, quàm albedo denigrare parietem, aut calor frigefacere. Nec tantum facit iusta Deus, sed & idcirco aliquid iustum est, quia Deus illud facit. Ac plane explodendum est quorundam commentum, qui dicunt, Deum etsi impellat ad peccatum, non tamen peccare, quia non est peccatum ubi non est lex, Deum autem nullis legibus adstringi. Fateor quidem Deum nulli legi esse obnoxium: Certum est tamen, cum nihil posse agere quod pugnet cum sua natura. Non potest mentiri qui est ipsa veritas: nec peccare qui est ipsissima iustitia. Omnino illæ voces, *Peccatum fit Deo procurante, aut adiuvante*, ex Theologia exterminandæ sunt.

V. Homo suâ culpâ ipse sibi perniciem attulit. Nec potest Deo imputari lapsus hominis. *Perditio tua ex te Israel, sed in me auxilium tuum:* Osee 13. Quemadmodum in generatione embryonis Sol & homo simul

agunt: quod si monstrum generatur, id non adscribitur Soli, sed homini: Nempe ideo monstrum nascitur, quia causa vniuersalis agens abducta est à consuetō trāmite per defectum organorum, vel malam affectionem materię. Ita ad actiones humanas Deus & voluntas humana concurrunt: quod si quid inest prauitatis in actione, non debet ea ascribi Deo, sed dispositioni voluntatis humanę.

VI Veruntamen Scriptura vtitur interdum locutionibus, quę ansam præbent profanis imputandi Deo sua peccata, quasi commissā Deo volente & impulsore. Notum est, quo scelere filij Iacob moti inuidia fratrem Iosephum vendiderint. De hoc factō sic loquitur ipse Ioseph Genesios 50. *Vos cogitauistis aduersus me malum, at Deus cogitauit id ipsum in bonum, ut seruaret in vita populum multum.* Quasi hoc factum fuisset Deo autore. De filiis Samuelis scriptura dicit, eos non obtemperauisse commonefactionibus patris, *quia Deus eos volebat occidere.* 1. Sam. 2. vers. 25. Et primo Regum, cap. 22. Spiritus malignus sistit se coram tribunali Dei, operamq; suam offert Deo ad seducendos Prophetas: Cui Deus, *Decipies, & praualebis, egredere, et fac.* Semei Dauidem fœdis imprecationibus execratur. 2. Sam. 26. Quod Dauid accipit quasi factum impulsore Deo. *Maledicat (inquit) dixit enim ei Iehoua, maledic Dauidi.* Eiusdem dauidis adulterium in Bersabea, & necem Vrię, grauissimę calamitates sunt consecutę, per rebellionem filij Absalonis, qui patrem regno expulit, vxoresq; eius palam constuprauit. Hęc euentura Nathan à Deo missus dauidi denunciat

tiat his verbis. *Tu quidem hæc fecisti in occulto, ego vero hæc faciam in conspectu totius Israelis.* 2. Sam. 12. Satan Iobum affligit, Chaldaei eius fortunas diripiunt: Quid adhuc Dei seruus? *Dominus* (inquit) *dedit, Dominus abstulit, laudetur nomen Domini.* Actorum 4. Petrus sic loquitur. *Coacti sunt aduersus sanctum filium tuum Iesum quem vnixisti, Herodes & Pontius Pilatus, cum gentibus & populo Israel ut facerent quacunque manus tua & consilium tuum prius definiuerat facienda.* Paulus ad Romanos cap. 1. loquens de populis idolorum cultoribus, & ad omne scelus projectis, dicit *Deum eos tradidisse fœdis affectibus & nefandis ut facerent enormia.* Ipse Deus Exodi 10. & Rom. 9. testatur se indurauisse cor Pharaonis. Denique quis non ad Dei verba contremiscat quæ habentur Esaia cap. 6. *Crassum reddito cor populi huius, & aures eius fac hebetes, & oculos eius obline, ne forte oculis videat, vel auribus audiat, & corde intelligat, & sic conuersus saluti restituatur.*

His ne quis profanus abutatur ad laxandam fibulam intemperantiæ, & ne quis cuius cor ad verbum Dei occalluit, Deo suam duritiem imputet, quasi impulsus à Deo cui resisti non potest, ut adolescens ille in Aulularia sic se excusans, *Deus mihi impulsor fuit, is me ad illam illexit*, afferenda sunt quædam quibus enodetur hæc quæstio, & lux his tenebris inferatur.

VII. Ante omnia monemus tenendam esse mediam viam inter duo extrema, quorum alterum est facere Deum authorem peccati, alterum statuere aliquid fieri Deo inuito, aut inscio, aut non curante, quasi in specula sedens expectaret euentos fortuitos, penden-

tes ex casu vel ex humano arbitrio. In neutrum horum incurreret qui agnosceret Dei prouidentiam sine dispendio iustitiæ, nec Deum suis peccatis inscribet: & qui ad defensionem iustitiæ non aduocabit ignorationem rerum aut negligentiam.

VIII. Principio igitur statuendum est peccatum non fieri nisi Deo permittente. Nec debet quenquam offendere vox illa *permittendi* quasi derogans Dei curæ & prouidentię, cum Paulus hac voce utatur Acto- rum 14. vbi Lycaonas sic affatur, *Præteritis atasibus Deus Etas permisit gentes in suis ipsarum vijs incedere.* Ergo permisit Deus peccatum. Permittere peccatum est non impedire cum possis: Inde fit vt totidem sint modi permittendi quot sunt impediendi. Impedit Deus peccatum duobus modis, vel per iustitiam suam, vel per potentiam. Impedit peccatum per suam iustitiam iubendo, vitando, monendo, minando, promittendo. Impedit autem per suam potentiam, quando adimit vires, vel amouet occasionem peccandi, vel efficacia Spiritus sui voluntates propensas ad peccatum, flectit ad pietatem & immutat. Illud est impedimentum morale, hoc verò naturale, aut etiam supernaturale. Pro varietate horum modorum impediendi varij quoq; sunt modi permittendi; Permittitur enim peccatum vel relaxando legem, & dando licentiam peccandi: vel non exerendo vires quæ poterant actu impedire ne peccaretur. Priori modo Deus nunquam permittit peccatum: posteriori verò permittit. Quod facit non impediendo ne homo tentetur, & non dando certum auxilium & mensuram gratiæ quæ si adf-



fer, peccatum impediretur.

IX. Hæc permissio est actus quidam voluntatis diuinæ, est enim voluntaria: Deus enim nihil facit inuitus, nec insciens. Ergo permittit peccatum quia voluit permittere. Nec permisisset nisi bonum fuisset ut permitteretur. Nam si malum non esset, nequidem cognosceretur quid sit bonum: non secus ac ignoraretur quid sit lux, nisi esset nox. Nec iustitia Dei qua punit, nec misericordia qua ignoscit fuisset cognita. Nec sapientia per quam ex malo elicit bonum. Nec infinitus amor per quem misit in mundum Filium suum ut pro nobis moreretur. Non quidem quod Deus scelere hominis egeat ad illustrandam suam gloriam, sed quia alioqui non potuisset homo peruenire ad plenam illam felicitatem ad quam creatus erat. Non enim potest perfectè Deus cognosci ac proinde nec perfectè amari dum ignoratur eius iustitia & misericordia. Ipso igitur lapsu hominis Deus gradum struxit homini ad perfectiorem conditionem. Ac quanquam respectu multorum singularium pereuntium, optabile fuisset ut homo non peccasset, respectu tamen vniuersalis boni, cuius potius fuit habenda ratio, non debuit Deus potentiam suam adhibere ad impediendum ne peccatum committeretur.

X. Porro etsi Diabolos & homines Deus permittit peccare, non tamen eis ita habenas immittit quin teneantur constricti vinculis diuinæ potentiae: ac dum euagantur extra tramitem iustitiæ, includuntur tamen limitibus providentiæ, ne noceant eis quos Deus amat. Nam etsi se voluntas humana corruperit, non ta-

men idcirco imminutum est Dei imperium, cui subiectæ sunt voluntates humanæ, quantumcunq; aduersentur eius mandato, & spiritu rebellionis impulsæ frendant aduersus eius imperium.

XI Principes animæ facultates duæ sunt, intellectus & voluntas, ille per quem homo cognoscit, hæc per quam se mouet. Per intellectum sumus docti aut indocti, per voluntatem boni aut mali. Quod in intellectu est affirmare aut negare, illud est in voluntate vel le vel nolle. Præua quidem desideria Deus non indit voluntati: at menti sæpè tenebras offundit, & intellectum iusto suo iudicio excæcat, vertigine percutiens rebelles, & spiritu soporis inebrians. Enimuero non secus ac herus seruo candelam meritò exufflat quæ ad pernoctem aleam abutitur: sic Deus adimit lucem cognitionis suæ, quando homo ea abutitur ad Dei contemptum & peccandi licentiam. Veruntamen adempta luce, voluntas errans cæspitat, & duriter impingit, Deo tamen non impellente. Sed cæcitatem mentis ultro sequitur obduratio cordis. Hæc enim vt cohærentia Iohannes jungit cap. 12. com. 40. *Excæcauit oculos eorum & obdurauit corda.* Hoc pacto posteriora peccata fiunt pœnæ peccatorum præcedentium, vt docet prolixè Augustinus lib. 5. aduersus Iulianum cap. 3. Eo enim ipso quo homo per peccata posteriora fit improbius, fit quoq; miserius. Non quia peccatum sit à Deo quatenus pœna, sed quia peccato quod non est à Deo, Deus vtitur ad pœnam. Atq; hinc nudæ & otiosæ permissionis doctrina euanesceat: quia iudex nunquam punit permittendo per incuriam, sed decernendo per iustitiam.

XII. Ad obdurationem quoque facit subministratio mediorum externorum ad salutem, qualia sunt verbum & Sacramenta. Nam nisi Deus efficaci gratia Spiritus corda permoueat, humana prauitas externis illis adiumentis magis irritatur, & molesto hoc iugo excusso fertur per devia, & majori se ruina præcipitat: Tunc impletur quod dicitur Psalmo 81. *Tradidi eos libidini suorum cordium, ut irent iuxta consilia sua.* Veruntamen ut scias duritiem illam cordis ab homine ipso proficisci, Scriptura non tantum dicit Deum obdurauisse cor Pharaonis, sed & ipse Pharaon dicitur obdurasse cor suum Exodi 8. com. 15. Nec aliter intelligendum illud Pauli Rom. 1. Deum tradere improbos eis *αὐδοκίμων ἔν* & fædos affectus. Hæc enim mens reprobæ, hi fædi affectus non sunt à Deo improbis inditis sed cum iam essent in improbis, Deus extincta luce passus est hos fædos affectus in eos imperium exercere: ut docet Thomas 1. 2. Quæst. 79. Art. 1.

XIII. Porro eorum qui obdurantur duo sunt genera: Nam præter obdurationem omnibus reprobis communem, qua homo sibi ipsi relinquitur, vnde fit ut semper in peius ruat, quidam sunt *ἀλάστορες* eximie improbitatis præter cæteros, quos Deus peculiari & extraordinaria ultione tradit Sathanæ, ut Pharaonem, Saulem, Iudam.

XIV. Omne ens positium à Deo pendet ut à prima entitate, nec potest se mouere creatura, nisi Deo assistente & sustentante. Nam per ipsum uiuimus, et mouemur et sumus, Act. 17. Neque tantum influit in creaturas aut eis assistit virtute & influxu generali, sed etiam

assistentia peculiari qua singulas actiones sustentat & dirigit. Indicio sunt euentus qui ex singulis actionibus consequuntur, quas Deus ipse testatur non accidere casu, sed ex destinato, & Deo sic volente. Si elapsa securis manu lignatoris viatorem occidit, Deus asserit id  
*Deut. 19*  
*verf. 5.*  
*Exod. 21*  
*verf. 13.* à se factum esse. *Sortes mittuntur in sinum, euentus vero pendet à Domino.* Prou. 16. 33.

XV. Porrò etsi Deus suo concursu in actiones humanas influit, agentem sustentans & actiones dirigens, metas figens, euenta ordinans, è malo bonum educens, non tamen idcirco putandus est hominem ad malas actiones instigare, aut Euam ad esum vetitæ arboris impulsisse. Cui assertioni vt lux afferatur, dicimus Deum non tantum agere per creaturam, sed etiam agere cum creatura, & Deum ac creaturam esse causas concurrentes ad vnum *συντέλεσμα*, seu vnius effectus productionem. Et hæc duo simul sumpta, causam esse totalem actus alicuius. Quæ creatura si voluntariè agat, potest concursu suo inquinare actionem Dei, & eam determinare ad malum. Hoc pacto culpa tota residet penes creaturam. Deus enim efficaciter influens in creaturam non adimit ei liberam contributionem virtutis suæ. In actione humana si quid peccatur ab homine, Dei concursus naturalis est, creaturæ vero moralis. Quod in esu illo pomi vetiti naturale fuit, à Deo fuit: quod morale & deuium à tramite iustitiæ, ab homine fuit. Quemadmodum Deus dat animali claudicanti vim incedendi, non tamen à Deo est claudicatio: ita etsi Deus dedit homini facultatem volendi, & sustentat motum naturalem voluntatis, actumq; volendi,

non tamen si quid prauum accessit quod actum illum inquinat, à Deo esse dicendum est. Sed homo est peccari effector, Deus vero permissor. Atque ille cui inest deformitas naturaliter quidem bonus est, quatenus à Deo est: quatenus vero est ab homine, moraliter malus est.

Nempè aliud est actio in qua est peccatum, aliud deformitas actionis in qua formaliter est peccatum: Ad actionem ipsam Deus cum homine concurrir, at non ad peccatum.

XVI. Neque verò Deus culpari debet, quod concurrat cum creatura, quam scit illo suo concursu & assistentia abusuram ad peccandum. Vitium enim hominis non potest arctare limites virtutis diuinæ, nec refingere legem illam æternam per quam stat vniuersa natura: nec conuellere necessitatem naturalem per quam creatura non potest se mouere nisi Deo assistente: Sic anima etsi scit corpus abusurum virtute sua motrice ad claudicationem, non idcirco cohibet vim suam motricem, aut sibi temperat à motione corporis. Nec si in moralibus voluntas humana est contumax aduersus legem Dei, idcirco in naturalibus imminuetur Dei imperium, aut Dei influxus cessabit. Immo verò non posset Deus exigere à creatura obsequium, nisi eam sustentaret, eiq; daret vim sese mouendi.

XVII. Quemadmodum Sol non est causa tenebrarum, quamuis absentiam eius tenebræ necessario consequantur: Sic Deus cum sit ipsissima iustitia non est causa peccati, quamuis negationem gratiæ Dei, affectus inordinati, cæcitas mentis, & prauitas voluntatis

necessario consequantur. Hoc volunt qui dicunt Deum non esse causam efficientem peccati, sed deficientem: quo tamen loquendi genere malim abstinere.

XVIII. Quantumvis liberè agant improbi, & suopte motu ad peccatum ferantur, Deo non illiciente, nec impellente: certum est tamen euentus qui inde accidunt dirigi & gubernari Dei prouidentia. Nam vt aquæ fluentis pronus lapsus & ad inferiora inclinans, ducto canali potest auerti, & lapsus eius dispensari, a quilegis indultu: sic quauis improbi proni sint suopte ingenio ad peccandum, Dei tamen prouidentia arcanoq; consilio inclinatur ad hoc potius patrandum quam illud: vt seruiant executioni iudiciorum Dei, quando vult illis vt i vel ad puniendâ alicuius scelera, vel ad explorandam fidem piorum, aut stimulantem socordiam. Hoc simili vtitur Solomon Prouerbiorum cap. 21. *Sicut deriuationes aquarum ita cor regis est in manu Domini quocunq; vult inclinat illud.* Hoc pacto, vt ait Petrus Actorum 4. *improbi faciunt quacunq; manus Dei, & consilium prius definierat. faciendâ.* Inde est quod deus Esaiæ 5. gentes remotas, ad vastandam Iudæam sibilo euocat: Et cap. 10. Assyrios vocat virgam furoris sui. Iam studebat Ieroboam rebus nouis, iam defectionem à Solomone meditabatur, cum Ahias Propheta à deo missus, voluntatem dei super huius facinoris successu ei declarauit. Non instillauit deus animo eius rebellionem iam ante præconceptam. Sed voluntatem eius iam malam, ad audendum hoc facinus obfirmavit, vt homine scelerato ad ultionem peccatorum Solomonis & Roboami vteretur.

Quemad-

Quemadmodum ergo hircines faucibus ægri applicatæ dum satiant suam ingluuiem seruiunt intentioni medici, ita improbi dum læuiunt in bonos, seruiunt præter suam intentionem Dei consilio: vt docet Esaias cap. 10. vbi Deus dicit se quidem decreuisse vt i rege Assyriorum ad puniendam hypocrisim Israël; sed non fore isti regi hunc animum, quippe qui sola ambitione & prædæ cupiditate ageretur. Sic vsus est scelere fratrum Iosephi ad depellendam famem à suo populo: & proditiōe Iudæ ad mortem Christi, & per hanc ad nostram redemptionem. Et ambitione Cæsaris Augusti censum agentis totius imperij, ad euocandam Mariam à Galilæa Bethlehemum vt ibi pareret, & sic prophetia Michæ impleretur. Illi ipsi qui resistunt mandato Dei seruiunt eius prouidentia, & remigum instar eo tendunt quo obuertunt terga. Deus per insipientiam hominum perficit consilia suæ sapientia; vtitur hominibus iniustis ad exercendam suam iusticiam. Non secus ac si quis obtorto baculo rectum ictum infligat.

XIX. Quandoq; Deus immittens Satanæ habenas, ei permittit hominem tentare, potest quidem Satan propositis objectis illicere appetitus, aut alteratione humorum corporis turbare phantasiā, voluntatem vero cogere non potest: alioqui non peccaret homo sed Satan. Nec Deus posset iuste hominem punire ob peccatum, ad quod à causā externa, præter suam inclinationem esset compulsus.

XX. Quia autem Deus cōtumaciam hostium vlturus, aut in peccata suorum animaduersurus, vtitur aliquan-

do Satana administro, Scriptura sacra vnum eundemq; euentum tribuit Deo & Satanæ. Sic primò Samuelis cap. 16. spiritus malus turbans Saullem, dicitur esse à Deo. Et 1. Paralip. cap. 21. dicitur Satan insurrexisse in Israël, & dauidem ad numerandum populum impulsisse. At illud idem 2. Sam. cap. 24. Deo tribuitur. Ibi Deus vt iustus iudex, Satan vt instigator sceleris considerandus est.

Per hæc documenta probè concepta, facilè inuenitur ratio excusandi Augustinum, cui aliquando quædam excidunt quæ officiunt teneris auribus, nisi commoda interpretatione leniantur. Quale est illud quod dicit de Semei maledicente dauidi, libro de Gratia & libero arbitrio cap. 20. *Quomodo dixerit Dominus huic homini maledicere Dauid quis sapiens intelligit? Non enim iubendo dixit vt obedientia laudaretur, sed quod eius voluntatem proprio vitio suo malam in hoc peccatum iudicio suo iusto & occulto inclinauit, ideo dictum est, dixit ei Dominus.* Et cap. 22. *Operatur Deus in cordibus hominum ad inclinandas eorum voluntates quocunque voluerit siue ad bona suâ misericordia, siue ad mala pro meritis eorum.* Et contra Iulianum Pelagianum lib. 5. cap. 3. *Multa alia commemorare possemus in quibus liquido appareat occulto iudicio Dei fieri peruersitatem cordis, vt non audiasur quod verum dicitur, & inde peccetur, vt sit ipsum peccatum præcedentis etiam pœna peccati.* Immo & ibidem aduersus Iulianum contendit, eos qui desiderijs suis traditi sunt, diuina potentia in peccata esse compulso. Nec his absumilia docet Thomas, commentario in Epistolam ad Romanos cap. 9.



*De Volvntate Dei.*

## CAP. IV.

**V**OLVNTAS in homine est <sup>opereis vocat</sup> appetitus rationalis, quo homo sponte sua & cum cognitione se mouet ad bonum assequendum, siue illud sit verè bonum, siue specie tenus & opinione humana. Sed interdum voluntas sumitur non pro facultate qua volumus, sed pro actu volendi seu volitione. Interdum etiam pro re ipsa quam volumus, eodem modo quo Paulus 1. Thessal. cap. 4. dicit *Dei voluntatem esse sanctificationem nostram.*

II. In Deo voluntas non est appetitus rationalis, nam in Deum non cadunt appetitus, immo nec ratio. Sed voluntas Dei est actus ille volendi quo aut iubet, aut ordinat & decernit.

III. Est enim duplex Dei voluntas, altera est eius decretum, altera eius mandatum. Decretum Dei pertinet ad dei providentiam, <sup>1oh. 6.<sup>2</sup></sup> mandatum verò ad eius iu- <sup>39. &</sup> <sup>40.</sup> stitiam. <sup>Hebr.</sup> Decreto disponit & ordinat euentus, <sup>10. 36.</sup> mandato regit nostras actiones. Priori voluntate Deus statuit quid ipse acturus sit, posteriori quid nos velit agere. Priori parent omnes creaturæ, etiam ipsi diaboli, posteriori fideles, quanquam ne id quidem perfecte.

IV. Hi fideles iusti censentur non quia dei decreto obsequuntur, sed quia eius legi & mandato morem

Cii

gerunt. Sic filius improbus optans mortem patris ægotantis, peccat in Dei voluntatem, quantumvis eius scelerata mens cum Dei decreto conspiret: vicissim filius qui pro ægri patris valetudine Deo supplicat, parat Dei voluntati, quantumvis per Dei decretum certa sit mors ægri, & votum filij probi Dei consilio aduerfetur. Deus vetuit homicidium: idem tamen decreuit vt Iudæi Christum morte afficerent: quò facto in Deum peccauerunt, vt cunq; impleuerint eius decretum. Act. 2. 23. Ipse Vorstius agnoscit *Deum non voluisse populum suum tam subito à Pharaone dimitti*; Nempe quia Deus decreuerat cor Pharaonis tam subito ad obedientiam non inflectere. At quod ad mandatum, non dubium est quin Deus Pharaoni edixerit vt sine mora populum dimitteret: Nam ob id ipsum Deus ei tot plagas inflixit, quia Deo iubenti obsequi cunctabatur. Nec tamen per hoc Vorstius vult Deum reum peragere hypocrisicos, aut simulationis dolosæ, vt falso nobis impingit.

*Amice  
collatio-  
nem cū  
visi-  
tatore.  
pag. 34.*

V. Has duas voluntates scriptura aliquando miscet, & promiscuè accipit. Sic cum Iohannis 6. Christus dicit se cœlitus descendisse vt faceret non quidem voluntatem suam, sed voluntatem eius qui eum miserat, certum est vtramq; voluntatem intelligi, quia Christus iisdem actionibus, & implebat omnem iustitiam, & Dei decretum exequabatur. Ideoq; vtraq; voluntas Consilium Dei appellatur. Es. 46. 10. Luc 7. 30. Act. 20. 27.

VI. Hoc Decretum *uoluntas* vocatur voluntas Dei, lex vero Dei minus propriè voluntas Dei appellatur.

Lex enim potius est documentum quam voluntas, & potius declaratio qua Deus homini patefacit qua ratione possit Deo placeri, quàm quid absolutè fieri constituerit. De sola enim voluntate Dei propriè dicta verum est id quod dicitur Ps. 115. *Quicquid Deus vult id facit.*

VII. Promissiones Dei & minæ adhuc magis impropriè voluntas Dei appellantur : quippe quibus Deus nihil nec iubet nec absolutè decernit : sed sunt declarationes per quas Deus declarat quid euenturum sit si homo legi paruerit vel non paruerit : si Evangelio crediderit vel non crediderit. An fortasse promissiones & minæ sunt decretum Dei conditionale, & pendens à præstatione conditionis per humanum arbitrium ? At neque hoc dici potest : Nam si ita esset, hoc decretum non esset certum per Dei voluntatem, utcunq; à Deo euentus certò prævideatur : & eius impletio penderet ab humano arbitrio. Tum nihil fingi potest absurdius, quam statuere Deum aliquid decernere sub conditione quam eo ipso momento quo decernit scit nunquam impletam iri. Cum herus dicit seruo, si feceris hanc mercedem feres, declarat se post conditionem impletam demum voliturum dare mercedem. At Deus nihil vult quod ab æterno non voluerit. Nempè Deus vitam promittit sub conditione obedientiæ : At nihil decernit sub dubiâ conditione. Non eligit Petrum si crediturus est, sed eum eligit ad fidem ut saluetur : Nec tantum Niniuitas voluit conseruare si conuerterentur, sed & dedit eis pœnitentiam qua conuersi sunt.

VIII. Qui dicunt decretum esse voluntatem Dei

C iij



occultam, mandatum verò voluntatem reuelatam mihi videntur loqui parùm consideratè. Nam de Dei decretis plurima nobis nota sunt, non modo ea quæ ipso euentu patefacta sunt, sed & multa alia quæ euentura esse Deus in verbo suo nos docuit: vt aduentus Christi, resurrectio, &c.

IX. Thomas & Scholastici, voluntatem Dei distinguunt in voluntatem beneplaciti, & voluntatem signi, id est significatam: Cuius distinctionis membra coincidunt: nam de voluntate beneplaciti multa nobis significata sunt. Nec vox *beneplaciti* quæ Græcè est *βουλή*, satis hîc est accommodata: *βουλή* enim seu beneplacitum amorem & beneuolentiam vt plurimum includit: vt Lucæ 2. vers. 14. *ὅτι ἦν εἰρήνη, καὶ ἀγαθή βουλή*. Vide Ephes. 1. vers. 5. & 9. At Decretum Dei etiam adiudicia Dei & improborum pœnam extenditur.

X. Improbè faciunt qui has duas voluntates inter se committunt, voluntq; esse contrarias. Sane si Deus hominem impelleret ad ea facienda quæ ipse fieri vetuit, aut si conantem legi obsequi opposito obice ab obedientia reuocaret, vellet Deus pugnàtia, & ipse aduersaretur suæ voluntati: At non pugnat decretum Dei cum mandato, quando ab homine exigit quæ vires eius excedunt, nec suppeditat homini vires quibus possit implere quod iubetur: Homo enim ipse sibi causa est impotentia: Nec Deus tenetur homini reddere vires quibus ipse se suâ culpa exuit. Nec qui est in ære alieno minùs debet, quamuis fortunas dilapidauerit. Nec creditor iniustè facit, qui à decoctore reposcit:

quod debet, quia non eum considerat vt pauperem sed vt debitorem. Fallitur ergo Arminius, aduersus Perkinsum sic differens: *Qui (inquit) vult negare alicui auxilium necessarium ad fidei actum præstandum, ille idem* <sup>In reth. p. 61. & 62.</sup> *vult vt istetalis non credat.* Sanè qui non dat pecunias pauperi, qui sua culpa incidit in paupertatem, non idcirco vult eum esse pauperem, aut eius paupertate delectatur. Nec meliora quæ subjungit. *Quemadmodum (inquit) dici nequit Deum velle vt ille porro sit, cui conseruationis suæ actum denegat, ita quoque dici nequit velle vt ille actus præstetur ab aliquo, cui concursus suum & auxilium præstando actui necessarium negat.* Hæc & alia eiusmodi perperam inculcat. Adhibet enim simile plane dissimile; nam ad *esse* nemo tenetur, nec potest exigere Deus ab eo qui non est vt sit; At ad obsequendum Deo, homo naturaliter tenetur: Quapropter Deus potest iure exposcere ab homine quod debet; nec tamen idcirco tenetur dare ei vires obsequendi & implendi quod iubet: vires enim semel datas & culpa hominis amissas Deus non tenetur homini restituere. Hic tamen velim vti vocibus quam commodissimis; & malim dicere Deum decreuisse non dare alicui gratiam qua conuertatur & credat: quam dicere eum decreuisse vt homo sit incredulus & impenitens. Vox enim decernendi aptior est ad ea designanda quæ Deus statuit facere, quam ea quibus statuit non mēderi.

XI. Porro sub voce obsequij fidem quoque in Christum comprehendendo: quandoquidem & ipsa species est quædam obsequij, ad quod ipsa lege astringimur,

quæ iubet Deum amari toto corde & totis viribus, ac proinde & Deo pareri, eiusque verbo credi, quodcunque tandem fuerit quod iussurus est. Vnde fit vt non possit reijci doctrina Euangelij per incredulitatem, quin peccetur in legem inobedientiâ. Quod si ita est, quamuis fides in Christum lege diserte non iubeatur, nec Adam ante lapsum teneretur credere in Christum, certum est tamen Deum iubentem exhiberi assensum & reuerentiam suo Euangelio, exposcere vt sibi exhibeatur amor ille qui lege præcipitur, & qui naturaliter debetur.

Hæc omnia eo pertinent vt doceamus inter has duas Dei voluntates nullam esse discordiam. Legatur Augustini Enchiridium ad Laurentium cap. 101. vbi docet quomodo de eis fiat voluntas Dei qui non faciunt Dei voluntatem. Et non fieri præter Dei voluntatem, quod etiam fit contra eius voluntatem.

*De voluntate Antecedente & Consequente.*

C A P. V.



A M A S C E N V S libro 2. Orthodoxæ fidei cap. 29. duas ponit Dei voluntates, alteram *προηγμένην* seu antecedentem : alteram *ἐπὶ αὐτῇ* i. consequentem.

Hanc distinctionem Arminius arripuit, & in ea præcipuum ponit doctrinæ suæ firmamentum

mentum: & quotiescunq; vrgetur à nostris, in hanc latebram vt lacertus in dumeta correpit.

I. • Voluntatem antecedentem dicit esse *qua Deus vult aliquid creaturæ rationali, ante omnem illius actum,* <sup>In Perk: 194.</sup> seu ante aliquem actum creaturæ illius. Consequentem vero *qua aliquid vult creaturæ rationali post actum aliquem, sine post multos actus creaturæ,* At cuius distinctionis explicationem hæc affert exempla. Voluntate (inquit) antecedente Deus voluit Saulis regnum stabilire & confirmare in sæculum, voluntate consequente <sup>1. Sam.</sup> voluit ipsum regno deturbare, & virum illo meliorem <sup>12</sup> ipsius in locum substituere. Voluntate antecedente voluit Christus Iudæos congregare vt gallina pullos: consequente verò voluit illos spargere per omnes nationes. Antecedente voluntate citantur ad nuptias qui consequente declarantur indigni, Matth. 22. Antecedente vir fordidatus inuitatur, consequente eiicitur. Antecedente dantur talenta, consequente aufertur seruo talentum.

II. Harum altera vocatur antecedens, altera consequens, non quod hanc illa præcedat: hoc enim sensu hæc distinctio admitti potest: nam inter Dei consilia certus est ordo: Sic prior est ordine voluntas hominem creandi, quàm eundem vestiendi aut alendi. Sed Damasceno & Arminio voluntas Dei dicitur antecedens, quia antecedit actum humanę voluntatis: voluntatem verò Dei vocant consequentem, quæ posterior est humana voluntate & ab ea dependet. Hoc Arminius clare docet definitionibus supra positis.

III. Inter has voluntates ponit hoc discrimen quod

D

antecedenti Dei voluntati resisti potest, consequenti non potest. Illa sæpe Deum vult frustrari, & proposito sine excidere; At voluntatem consequentem frustrari non posse, quippe quæ necessariò impletur. Cæset enim Deum non semper assequi quod intendi, & sine particulari quem sibi proponit aliquando frustrari. Et Deum paratum esse ad faciendum quod ab æterno scit se non facturum, vnde fit vt frustra se parauerit: & voluntate consequente, quæ æterna est & certa ac immutabilis, decreuerit obdurare reprobos, quos voluntate antecedente paratus est mollire & conuertere. Et sic paratus sit facere, quod decreuit non facere.

I V. Inter has duas voluntates (si fides Arminio) intercedit voluntas humana, quæ efficit vt Deus rescindat volutatem antecedentem longè optimam, & à proposito sine depulsus, aliò se conuertat quàm ad id quod primitus intèderat: vsque adeo vt Vorstius disputationis de Deo p. 65. dicat, *Deum postmodum quadam nolle facere, quæ antea facturum se receperat, immo iurauerat.*

V. Hæc doctrina, si quæ alia in Deum est contumeliosa, eumq; accusat insipientiæ, & humanis affectibus induit, eiq; affingit imbecillia vota, & desiderium inefficax: ac si Deum sic inducerent loquentem: Sero quidem cupio vos seruare, sed obstat ne fiat quod cupio: vellem si vellentis: itaq; cum per vos frustrer mea intentione, mutabo consilium meum de vobis seruandis, & aliorum flexa voluntate, constitui vos perdere in æternum. Certè planum est, voluntatem illam antecedentem, non esse voluntatem: sed desiderium & votum, quod Deus precariò tantum obtinet, & quan-



rùm licet per humanum arbitrium. Quocirca sæpe Arminius vocat voluntatem illam, desiderium & affectum naturalem, & frequens est sectarijs accipere loca Psal. 81. vers. 14. & Es. 48. 18. vbi Deus inducitur loquens quasi optans & desiderans & voto suo frustratus, quasi propriè dicta, cum hæc αἰδέομαι παῖδας & humano more dicantur.

Arm.  
in verk.  
p. 196.

VI. Porro quàm graue sit fraudari desiderio suo & affectu naturali, & quàm parum Deo hoc conueniat, nemo non videt, nisi qui vult vltro decipi: Cum enim Deus sit summè bonus, immo ipsa bonitas, oportet vt affectus & desideria eius naturalia si quæ sunt, sint summæ sanctitatis, iustitiæ ac perfectionis, ac proinde nihil sit tam optadum, quàm vt affectus ille naturalis impleatur, & optatum finem Deus consequatur. Est ergo, quod doleamus vicem Dei, qui sine longè optimo exciderit, & qui potuisset fieri voti compos, si ei per hominem licuisset. En quò recidat nouatorum acumen, & quàm honorificè de Deo sentiant. Huc pertinent impiæ Vorstij locutiones, qui asserit, Deo aliquid verè inexpectatum euenire, & quod ei triste est & perquam acerbum, & quod ei (licet impropriè loquendo) dolorem maximum attulerit, & quod non ab eius antecedente voluntate, sed à consequente, tandem omnibus frustra tentatis, profluerit. Quæ sane oratio Deum infra hominem abijcit. Nam etiam inter homines, si quid tale acciderit conatusq; alicuius, frustra omnibus tentatis, fuerit elusus; argumentum est aut imprudentiæ, aut imbecillitatis, aut infelicitatis. Est ergo quod Dei sortem lamétemur qui vsus succes su improspero, rem tam malè gesserit.

Affectus  
quo  
Deus de  
siderat  
omnium  
homi-  
num &  
singula-  
rum sa-  
lutem,  
est in  
Deo sim-  
plex na-  
turalis,  
et extra  
cōditio-  
nem.

Colla-  
tionis  
amicæ  
cū vi-  
sæ.  
scilicet. 27.

VII. Tum illud absurdum immo impium, asserere Deum, cui ab æterno omnia non tantum sunt præuisa, sed & prouisa, aliquid intendere quod ab æterno cognouit non futurum, & sibi proposuisse finem ad quem sciebat se non peruenturum; vt si quis collineet in scopū qui nec est nec vnquam erit. Nam si ab æterno Deus scit hunc hominem damnatū iri, ab æterno inutiliter opat vt feruetur: & scit ab æterno se desiderij sui naturalis, voluntatisque antecedentis non fore competentem.

VIII. Quid quod inducitur pugna inter duas Dei voluntates, quarum posterior priorem corrigat? Nam per hanc antecedentem voluntatem Deus cupit agere, quæ ab æterno certus est non agere. Et fingitur Deus aliquid faciens ægrè & inuitus contra finem quem primitus intenderat. Nempe quia intercessit voluntas humana, per quam factum est vt Deus absteret sine illo sibi proposito, eoque longè meliori, vt quasi per δὲ τεογν πλαιῶν aliquod secundarium bonum assequeretur. Id sanè Arminius non dissimulat, cuius hæc sunt verba: *Deus vult serio omnes homines saluentur, at com-*

*In Per-  
kinsum  
p. 4. 195.*

*pvlsvs pertinaci & incorrigibili malitia nonnullorum, vult illos iacturam facere salutis:* At Deus nihil facit inuitus, nec ab homine compelli potest ad mutationem suæ voluntatis.

IX. Quod si affectus eiusmodi debiles, & desideria inefficacia Deo tribuuntur, quibus frustretur per intercessionem humanæ voluntatis, non dubium est quin creauerit hominem fluctuans inter voluntatem antecedentem & consequentem: vt pote non sine do-

lore prauidentis hominis lapsum, & gnarus se creare creaturam, quæ certò esset peritura. Veruntamen noluerit absolvere ab eius creatione, quia decretum de homine creando non poterat rescindi, ita ut ipse se arctauerit angustiis quibus se non potuerit expedire.

X. Id quoque non ferendum, quod Dei voluntas antecedens pendet incerta, donec conditio sub qua Deus aliquid vult antecedenter, vel impleatur vel infringatur. Nam etsi affectus Dei generalis erga omnes homines non statuatur pendere ab humana voluntate, incertus tamen est, juxta Arminium, eius effectus, donec Deus consequenti voluntate hunc & illum seruare decreuerit: At hanc voluntatem consequentem seruandi hominem Arminius ab humano arbitrio suspendit, & facit posteriorem fide & recto vsu gratiæ. Quocirca Vorstius homo ingenio acer, sed infelicitis audaciæ, ausus est scribere, voluntatem Dei aliquo modo esse mutabilem, & in parte aliqua decreti diuini fieri aliquam mutationem.

*Vorstius  
mi  
mica  
Colla-  
tionu  
cui  
Piscato-*

XI. Cum autem omnia Dei consilia sint æterna & immutabilia: nec possit dici Deus aliquid velle de nouo quod ab æterno non voluerit, voluntatem tamen Dei consequentem quisquis accuratè perpenderit, comperiet eam non modo ordine, sed tempore esse posteriorem voluntate antecedente: Nam ut simul Deus velit omnes homines seruare, & aliquos damnare impossibile est. Ac planè necesse est, desinat voluntas antecedens, quasi expuncta & inducta à consequente, antequam locus esse possit voluntati consequenti.

*re.  
Sect. 79.  
C. 217.*

XII. Cum autem Apostolus Rom. 9. asserat, non pos-

*se resisti Dei voluntati*, per hanc distinctionem statuitur quædam Dei voluntas cui resisti potest, & cuius executio ab homine potest impediri.

XIII. Hic verò si alibi vspiam, perspicere est, quàm parum sibi consent Arminiani. Nam nono capite ad Romanos pertendunt agi de voluntate antecedente, per quam Deus miseretur qualium (sic enim loquuntur) id est credentium, non verò de voluntate consequente, qua statuit præcisè & absolutè huius aut illius misereri. At iidem sui immemores dicunt huic voluntati antecedenti posse resisti: cum tamen ibidem Paulus dicat, *Voluntati eius quis potest resistere?* Nempè agit de voluntate cui resisti non potest: agit autem hoc capite (si fides Arminio) de voluntate antecedente, ergo voluntati antecedenti resisti non potest. Aut igitur neget Arminius volūtatem antecedentem esse voluntatem, sed potius vocet eam votum, desiderium aut affectum. Aut si pertendit esse voluntatem, fateatur ei resisti non posse.

Quam in rem præclarè Augustinus Enchiridij cap. 95. *Deus noster in celo sursum, & in celo & in terra omnia quæ voluit fecit. Quod vtrique non est verum, si aliqua voluit & non fecit. Et quod est indignius, ideo non fecit, quoniam ne fieret quod volebat omnipotens voluntas hominis impediuit.*

XIV. Fatetur quidem Arminius Deo non deesse vires, quibus posset implere voluntatem illam antecedentem, qua seriò vult omnes homines seruari: sed (inquit) *non verum est quod quis OPTAT seriòq; vult, idem effectum daturum quibuscunq; potest modis, sed iis modis*

J<sup>n</sup> Per.  
pag. 195.

quibus decet ut id effectum det. Pater optat & vult serìò ut Filius suus ipsi obediat, at non violenter trahit illum ad obediendum: Et paulo post, Similitudo à mercatore merces saluas cupiente, & tamen in mare proijciente, optimè quadrat proposito. Deus vult serìò, ut omnes homines saluentur, at compulsus pertinaci & incorrigibili malitia nonnullorum, vult illos iacturam facere salutis. Nempè etsi Deus serìò velit & intendat salutem omnium & singularium hominum, non vult tamen omnipotentiam suam hic exerere, ne vim faciat libero arbitrio. Respondeo, his similibus nihil effici: sunt enim planè dissimilia. Vtitur Arminius exemplis hominum qui non possunt fieri compotes voti, nisi per media non conuenientia; & qui frequenter intentione sua frustrantur. At Deo nunquam defunt media iusta & conuenientia, per quæ assequatur id quod intendit. Neque potest intentione sua frustrari. At, inquis, si in conuertendo homine exerceret suam omnipotentiam, vim inferret libero arbitrio hominis, & cogeret eius voluntatem. Id verò per nego; Potest enim sine coactione sic flectere voluntatem, ut vltro sequatur. Sine coactione subitò immutauit animum Esau Genes. 33. Et Saulis 1. Samuelis 19. com. 23. Et Ægyptiorum Psalmo. 105. commate 25. Et regum, Prou. 21. 1. Hanc immutationem voluntatis illibata libertate humani arbitrij si Deus facit in improbis, quantò magis in probis & fidelibus? Absque coactione Deus immutauit cor latronis in cruce, & omnium quibus adimit cor lapideum & dat cor carneum, Ezech. 36. 26. & eorum quos, cum essent in peccatis mortui, suscitauit resurrectione spiritua-

li Ephes. 2. vers. 5. Videbimus suo loco Arminium censere intellectum à Deo irresistibiliter luce imbui, & Deum omnibus quibus Euangelium prædicatur, dare irresistibiliter vires credendi Euangelio, eorumque affectus trahere: At ubi mens firmam persuasionem penitus imbibit & affectus voluntatem extimulant, impossibile est quin volūtaseorū se moueat quò dicat mens à Deo instructa, & quò appetitus impellit, hæc enim sunt sola incitamenta voluntatis, nec vlllo alio mouetur impulsu. Sed & Arminij schola censet electos trahi à Deo gratia efficaci, cuius effectus sit certissimus, quia Deus eos trahit tempore & modo congruo quo scit eos infallibiliter secuturos vocantem: Nec tamen per hæc Arminiani volunt vim inferri voluntati humanæ, sed morali & suaui suasionem tam vehementer, affici, vt spontè sequatur. Eximium præ cæteris mihi videtur exemplum latronis: cuius cor tam subitò immutatum, tempore tam aduerso, quo ipsorum Apostolorum vacillabat fides, insigne est documentum quanta sit efficacia Spiritus sancti erga eos qui ex proposito vocati sunt Rom. 8. 28. Sed de hac vocationis efficacia fusius agetur suo loco.

XV. Nempè hinc apparet, quàm præpostera sedulitate Arminius ad defensionem liberi arbitrij acumen suum conuerterit. Via enim certissima ei patebat qua Deus potentiam suam exereret in conuersione hominis, sine imminutione nostræ libertatis. Nec debuerat dum patrocinator libero arbitrio in Dei sapientiam & perfectionem impingere, quem vult frustrari suo fine, & desiderio naturali: & optare quæ scit se non  
consecu-

consecuturum, & finem sibi proponere qui nunquam futurus est.

XVI. Interea lector prudens facile agnoscat quo pertineat simile illud de mercatore jacturam faciente & suis manibus merces proijciente in mare. Nam non solum Arminius disertè dicit, Deum COMPELLI ad aliquid faciendum quod non intenderat ( neque enim mercator hoc facere intendebat, sed hoc facieἀναγκάσει & medius inter volentem & nolentem) Sed etiam per hæc innuit Deum depulsum meliori fine quod sibi proposuerat, ad sequiorem & minus oprabilem sese conuerisse. Quæ sanè seu à prudentibus ad Dei contumeliam, seu ab imprudentibus per inscitiam dicuntur, horrorem tamen pijs animis incutiunt.

XVII. Illud verò in hac distinctione voluntatis Dei in antecedentem & consequentem, quarum illa antecedit hæc consequatur voluntatem humanam, longè est pessimum, quod per eam statuitur voluntatem humanam præcedere electionem diuinam. Nam iuxta Arminium Deus voluntate antecedente vult omnes homines seruare, & dare eis vires credendi in Christum, voluntate verò consequente eligit aut reprobatur singulos prout eorum vel fidem vel infidelitatem præsciuit: Capitalis profecto doctrina per quam ab humana voluntate electio hominis suspenditur: & fides nostra causa fit electionis nostræ, non fructus: Et homo eligit Deum, Deoq; se applicat antequam à Deo eligatur: vnde fit vt hinc quidem quasi follibus infletur humana superbia, inde verò quasi cuniculis subruatur fides, & labefactetur fiducia. Nam quæ potest esse certitudo

E

salutis si electio nostra à re tam instabili dependeat? Sed de his plenius suo loco. Nunc excutienda sunt exempla quibus Arminius geminam istam Dei voluntatem fulcire conatur.

XVIII. Voluntate (inquit) antecedente Deus voluit in perpetuū stabilire solium Saulis in perpetuum, consequente verò voluit euertere, vt habetur Samuel primo libro cap. 13. v. 13. At ibi nihil tale habetur: Samuel non dicit Deum voluisse stabilire Saulis regnum. Sed *Deus stabiliuisset regnum tuum in perpetuum*: quæ quidem toto cælo distant. Si Deus stabiliuisset, voluisset stabilire, at quia non stabiliuit, certum est noluisse.

XIX. Nihilo plus momenti est in altero exemplo. Christus (inquit) voluntate antecedente voluit congregare Iudæos, vt gallina pullos, consequente voluit spargere per nationes: Matth. 23. v. 37. Sed locus hic aliud planè sonat. Christus alloquitur Ierosolyma, aitque se voluisse congregare eius filios, ipsa autem Ierosolyma toto conatu obstitrisset. Nempe aliud sunt Ierosolyma, aliud eius filij, qui hic disertè ab ipsa vrbe distinguuntur. Per Ierosolyma intellige Sacerdotes, Levitas, Scribas, denique Principes populi, hi enim maxime Christo aduersabantur: per filios Ierosolymorum intellige populum. Christus dicit se voluisse hos filios colligere, nec dubium est quin collegerit multos, quanquam inuitis primoribus. Nihil ergo facit hic locus ad voluntatem antecedentem quam hi volunt non impletam, cum re vera impleta sit, quantum Deo visum est. Tum illud *Quoties volui* malè intelligunt de



voluntate antecedente quæ est decretum Dei , cum velle hic nihil aliud sit quàm inuitare & iubere. Sic sensit Augustinus Enchiridij cap. 97. *An potius* (inquit) & illa quidem filios suos ab ipso colligi noluit, sed eâ quoq; nolente filios eius collegit ipse quos voluit.

XX. Cætera exempla indigna sunt quibus immoremur. Antecedente, inquit, voluntate vocantur ad nuptias, qui consequente declarantur indigni. Antecedente ~~ô c's p'p'ia p'p'is~~ inuitatur, consequente eiicitur. Antecedente offertur Euangelium Iudæis, consequente aufertur. In his omnibus velle illud Dei quo homines vocantur, nihil est aliud quàm iubere & inuitare, non vero antecedente voluntate decernere quod postea consequente voluntate resciderit.

XXI. Neque verò inquirendum scrupulosè cur Deus vocauerit quos sciebat non secuturos. Finis Dei est euidens, nempe petere ab eis quod debebant. Scrutari ultra intentionem Dei est Deum facere ~~cardi d'uror~~, & in eius arcana irrumpere.

XXII. Non est prætermittendum, Arminium velle Deum ex æquo cupere omnes homines seruare voluntate antecedente; at eundem cum ad effectû & executionem istius volûtatís accingitur, ea facere quæ pugnant cum hac volûrate. Nam longè pessimis vt Capernaitis annuntiat Euangeliû: minus malis eandem gratiam negat, vt Tyrijs & Sydonijs: & multos populos feros, & barbara feritate stupentes, patitur mersos esse tenebris. At cur? quia (inquit) eorû proavi respuerûnt Euangeliû. Ridiculè. An qui æqualiter cupit salutem omnium, impediretur tam leui impedimento, & quod pugnat cum

eius iustitia, vt postea docebitur ? Sic cum Arminius doceat Deum velle voluntate antecedente omnes & singulos homines seruare , experimento tamen constat Deum negasse per multa sæcula , & ad huc negare, plurimis gentibus media sine quibus non possunt seruari, & ea tantum suppeditare media, quibus solis nemo vnquam bene vsus est.


XXIII. At (inquit) Deus cum per naturam sit optimus , non potest non bene velle antecedente & primaria sua voluntate omnibus hominibus ; quippe quos ad imaginem suam creauit. Hæc quidem meritò & conuenienter cum Dei natura ab eis diceretur, si nasceremur absq; peccato originali ; At cum imago Dei sit propemodum obliterata , & eius in locum imago Satanae successerit, nulla ratio cogit nos credere, Deum velle omnes & singulos seruare : Sed Sacra scriptura docet quosdam seruari ex mera Dei gratia , & per electionem secundum propositum: reliquis in perditione naturali relictis , & damnationi destinatis ob peccata quæ spontè sunt commissuri.

XXIV. Hæc omnia non eò pertinent vt reiiciamus hanc distinctionem voluntatis Dei in antecedentem & consequentem : Scimus enim inter decreta Dei quædam esse priora ordine, quædam posteriora. Sed nec negamus posse dari duo decreta Dei inter quæ voluntas humana intercedat , quemadmodum inter decretum de creando homine & decretum de certis hominibus damnandis peccatum hominis intercedit. Sed negamus voluntatem humanam sic intercedere inter duo decreta Dei, vt prius seu antecedens decretum à volun-

rate hominis rescindatur, & Deus sine sibi proposito & quem seriò intendebat, abistere compellatur: Negamus quoque in negotio electionis voluntatem Dei præcisam de seruandis certis quibusdam hominibus, inniti præuisioni virtutis alicuius aut actionis humani arbitrij, aut Dei voluntatem consequentem ab humana voluntate suspendi. Qua de re pertractatè agetur suo loco.

## DE PECCATO ADAMI.

## CAP. VI.

I.  **D**EVS creans hominem illustrauit eius mentem luce supernaturali, & ornauiť eius voluntatem iustitia & sanctitate: Ita tamen vt esset mutabilis: Alioquin enim Deus creauisset Deum, non hominem. Nam mutari non posse, est Deo peculiaris prærogatiua, qua ab omnibus rebus creatis distinguitur.

II. Arminius, cui semper via trita displicuit, Articulorũ perpendendorũ p. 18. censet *inclinationem ad peccandum ante lapsum in homine fuisse, licet non ita vehementem & inordinatam, vt nunc est.* Hoc si verum est, oportet Deus indiderit homini istam inclinationem ad peccandum: quę cum sit res mala, Deus erit author mali: & hominem ad peccandum inclinauerit: quod sine scelere dici non potest.

III. Leuissimum est quod Adam peccauit gulâ: Sed illud longè grauius quod serpenti maluit credere quàm Deo, & quod stimulatus ambitione, voluit esse similis Deo, cognitione boni & mali. Et quod dum serpenti obtemperat, calumnijs in Deum jactis fidem adhibuit. Denique quod rem tantillam antehabuit Dei mandato: Itaq; quòd esus pomi res est leuior, eò peccatum fuit grauius.

IV. Incepit hæc labes ab intellectu, cui Satan offudit nebulam falsæ opinionis, & objecit imaginem falsi boni. Ad cuius suasionem cum homo se facilem præbuisset, obtenebrationem mentis secuta est auersio voluntatis, & appetituum inclinatio ad peccatum.

V. Hic lapsus accidit Deo non quidem impellente, sed tamen permittente. Omnipotentix eius non deerant vires quibus hunc lapsum posset impedire, nec bonitatem eius auertit inuidia. Permisit ergo quia voluit permittere, & quia bonum erat vt permetteret. Summè bonus non permisisset malum, nisi bonum fuisset vt malum in mundum ingrederetur: enimvero ista permissione viam sibi fecit ad illustrationem suæ gloriæ, & homini ipsi viam aperuit ad statum longè præstantiorem. Nam absq; peccato non fuisset nota Dei misericordia qua ignoscit, nec iustitia qua punit. Nec missione Christi in mundum ad abolenda nostra peccata, & nos euhendos ad cœlestem gloriam, amorem suum infinitum erga Ecclesiam suam patefecisset. Nec verò hæc eò pertinent, vt censeam Deum egere scelere hominum ad illustrationem suæ gloriæ: sed dico Deum creauisse hominem vt ad maiorem perfectionem per-

ueniret quam ea erat in qua creatus est. Non poterat autem ad istam perfectionem peruenire, sine cognitione iustitiæ & misericordiæ quæ ex hoc lapsu & ex remedio quod lapsui isti parauerat elucescit. Quam in rem concinna sunt Augustini verba libro de correptione & gratia cap. 10. *Qui creauit omnia bona valde, & mala ex bonis exoritura esse præsciuit, sciuit magis ad suam omnipotentissimam bonitatem pertinere, etiam de malis bona facere, quàm mala esse non sinere.* Similia dicit Enchiridij cap. 96.

VI. Causam permissionis istius non aliam afferunt Arminiani quàm quia Deus noluit vim inferre libero hominis arbitrio, nec cogere eius voluntatem, nec putauit sibi conuenire ut sua omnipotentia in re quæ est humani arbitrij: At illi nimis negligenter rem tantam attingunt: nec satis ponderant momenta rerum, & circumstantias lapsus Adami. Deus enim poterat sine imminutione humanæ libertatis cohibere Satanam, & impedire ne hominem tentaret. Poterat præmonere hominem ne serpenti crederet. Poterat non proponere homini arborem, cuius esu sciebat hominem peccaturum. Poterat dare homini plus virium & plus lucis. Poterat dare extraordinarium auxilium in ipso tentationis puncto. Nec tamen his fuisset vis illata hominis voluntati, aut eius violata libertas. Exemplo sint Angeli, quos obfirmat in bono, sine vlla coactione. Ex his sanè liquet lapsum hominis accidisse Deo non quidem impulsore, sed tamen dispensante, & sua prouidentia euentum quem ab æterno præsciuerat vertente ad finem quem apud se ab æterno constituerat.

VII. Neque verò dicendum est Deum subtraxisse homini gratiam, hoc enim esset impellere; veluti cum subductis columnis domus necessariò corruit: nec libertatem voluntatis ei abstulisse, sic enim attulisset necessitatem peccandi: sed noluit impedire ne à Satana tentaretur, nec voluit eum iuuare extraordinario auxilio. Et cum homo liberè peccauerit, accidit tamen quòd Deus ab æterno futurum esse præsciuerat, & quòd euenturum esse ipsæ creaturæ ante hominis creationem testabantur. Iam enim ante quàm Adam peccasset, Deus indiderat plantis vires salutes ad depellendos morbos, jam vestiuerat oues velleribus & iumenta formauerat ad vsum humanum, quæ sanè sunt leuamenta humanæ infirmitatis, & quæ frustra creata fuissent, si homo in integritate perstitisset.

VIII. An verò ingerere cibum & egerere, recreari somno post laborem, *συνουσία*, crescere statura, habere carnem vulnerabilem, & combustibilem (quibus omnibus homo ante lapsum erat obnoxius) sint eiusmodi quæ possint perpetuò conuenire creaturæ perfectè beatæ, an verò tacitè testarentur quæ futura esset hominis conditio, prudentibus iudicandum relinquo.

IX. Non est autem dubium quin Adam absque auxilio extraordinario habuerit vires ad resistendum Sathanæ: Neq; enim credibile est Deum legem dedisse homini primitus condito, ad quam præstandam vires non dederit. Respectu tamen præscientiæ diuinæ certus erat hominis lapsus. Nam illibata & integra libertate voluntatis humanæ, potest actus voluntatis certus


certus esse coram Deo, atq; definitus. Sic non dubium est quin tortores habuerint vires & facultatem frangendi crura Christi, cum tamen respectu præscientiæ & prouidentia diuinæ impossibile esset vt frangerentur. Potest humana voluntas certò & spontaneo motu ad vnum aliquid se determinare, & tamen facere quod Dei vel scientia certò præsciuit, vel prouidentia certò præordinauit.

X. Hæc sunt tenenda ne in Deum hominis culpa transferatur. Nam quantumcunq; ex lapsu Adami Deus eliciat bonum, nunquam tamen facit mala vt eueniant bona. Nec putandum est Deum voluisse hominem ad peccandum impellere quantumcunq; inde eius gloria elucescat. Non debet promoueri Dei gloria dispendio iustitiæ. Sed miro & ineffabili modo sic Deus disponit euentus rerum & temperat, vt ineuitaliter accidant quæ ipse damnat & improbat: & diuina prouidentia teneat cursum inter iniustitiam & negligentiam. Quapropter inuertit naturam rerum qui dicit Deum decreuisse vt Adam peccaret quia constituerat Christum mittere qui Adami peccato mederetur, cum potius Deus decreuerit Christum mittere quia Adam erat peccaturus. Homo non peccauit vt Christus aboleret peccatum, sed Christus venit vt peccatum aboleret.

Hic sane nihil est quod debeat officere teneris auribus, aut quod Deum faciat culpæ participem. Quæ tamen si quis aut non capit aut non concoquit, præstat accusare suum stuporem, quam incusare Dei iustitiam, & abstinere licitis quàm attentare illicita.

*Totum genus humanum infectum esse  
peccato originali.*

C A P. VII.

- I.  ECCATVM aliud est originale aliud actuale; vtor enim consuetis vocibus, ad euentiam sermonis. Nam si quis strictè vellet agere, abstineret his vocibus: cum certum sit peccatum originale esse actū, ac proinde esse actuale. Sed vsus obtinuit vt peccatum actuale vocetur quod actione seu opere committitur, originale vero quod habemus ab ortu, labesq; hereditaria à parentibus in nos transmissa.
- II. De Peccato originali agit Paulus cap. 5. ad Romanos, & capite 7. Et quinto quidem capite quatenus in totum genus humanum peruasit, capite vero septimo quatenus in eo etiam manet cuius menti lex diuina penitus inscripta est.
- III. Ab hac labe neminem esse immunem clamat scriptura, & testatur experientia. *Quicquid genitum est ex carne caro est*, ait Christus Iohannis tertio. Atq; ibidem perspicuè docet omnes homines inquinatos esse peccato originali, dum dicit necesse esse renasci, & de integro reformari. *Sumus natura filij iræ* Ephes. 2. vers. 3. *Quis proferet purum ex immundo? Ne vnus quidem* Iobi 14. Hac se contagione infectum Dauid agnoscit Ps. 51. *En (inquit) in iniquitate formatus sum, & in pec-*



*cato concepit me mater mea.* Non inculcat patrem, nec cum matre expostulat, sed se quantumvis insignibus prerogatiuis ornatum, & beneficijs cumulatum, fateatur vniuersali contagione inquinatum esse: peccatiq; sui causam ab ipsa origine repetit, & in communi sorte suam lamentatur. Id significabat circumcisio: hoc enim symbolo externo Ecclesia monebatur esse in homine primulùm nato quod debeat amputari & corrigi. Idem finis Baptismi, qui est sacramentum mundationis nostræ in Christi sanguine, per quem naturales nostræ sordes eluuntur.

IV. Infecta hoc peccato originalinafcitur non modo soboles Ethnicorum aut infidelium, aut malorum Christianorum, sed etiam proles piorum & fidelium. Non secus ac circumciscus generabat præputiatum, & quemadmodum granum tritici probe mundatum, & terræ gremio exceptum, postea herbesccens, producit triticum cum palea. Iam erat iustificatus Adam, iam promissioni de semine obtrituro caput serpentis fide adhæserat, quando genuit Cainum, hæredem prauitatis naturalis, at non fidei nec pœnitentiæ. Pietas non est hereditaria. Nec sanctitas nobis euenit naturâ sed gratiâ. Non facit pios & sanctos generatio sed regeneratio. Eodem planè modo quo formas artificiales, vt formam statuæ, non propagari, sed solas naturales docet Aristoteles initio secundilibri Physicorum. Ergo in optimi cuiusq; liberis, simul ac incipiunt proloqui, videas ingenium subdolum & mendax, & pronum in ultionem, & aduersus monitores contumaciam, & gloriolæ stimulos, & ludibundam vanitatem: tum ho-

nor impensior quo prosequuntur suas pupas & sigilla sunt semina non obscura procliuatatis ad idololatriam. Nam vt pupæ sunt idola infantium, sic idola sunt pupæ adulatorum. Quocirca si cui contigerunt liberi prauis moribus, debet suam *ἐμψύχισιν* in ijs agnoscere; si probi, debet in eis Dei opus admirari. Hi enim sunt de quibus Iohannes cap. 1. *Qui non ex sanguine, neq; ex libidine carnis, neq; ex libidine viri sed ex Deo sunt geniti.*

V. In hanc rem disertus est Canon secundus Concilij Mileuitani. *Placuit vt quicumq; paruulos recentes ab uteris matrum baptisandos negat, aut dicit quidem in remissionem peccatorum baptisari, sed nihil ex Adamo trahere originalis peccati quod regenerationis lauacro expietur, unde fit consequens vt forma baptismi in eis non vera sed falsa intelligatur, anathema sit.*

V. I. Vnus Christus ab hac labe immunis, peccatum originale à matre non traxit. Paulus quidem Rom. 5. vers. 10. dicit omnes homines in Adamo peccauisse, nec dubium quin Christus fuerit in Adamo, quippe vnus de Adami posteris. Non tamen axioma illud Apostoli Christum attingit, quia Christi persona non fuit in Adamo, sed tantum eius humana natura. Nec est ab Adamo vt à principio agente, & à vi seminante, sed inde traxit materiam quæ illapsu Spiritus sancti à communi contagione vindicata est.

VII. Iam si quæras an peccatum originale expungatur Baptismo: tum an regeneratis Spiritu sancto labe ista naturalis ad huc inhæreat, promptum est respondere ex scriptura & experientia, quæ hic tam certa est vt dubitationi nullus locus relinquatur. David

erat circumcīsus, & donis Spiritus sancti liberaliter instructus, se tamen fatetur non immunem ab hac labe, sed pari cum cæteris contagione inquinatum. Et Paulus Rom. 7. agens sub sua persona de omni homine cuius mentilex Dei fideliter impressa est, agnoscit in se peccatum habitare, quod vocat *legem peccati* quia ad peccandum instigat. Videmus infantes modo baptisatos mori: mors autem, teste Apostolo Rom. 6. *suspensum est peccati*. Quæro ob quod peccatum infantes isti baptisati moriantur. An ob actuale? at nihil dum peccati commiserunt: Ergo ob originale? Vnde apparet manere adhuc peccatum originale post baptismum: quo quidem remittitur peccatum quoad reatum, etsi manet actu, vt docret Augustinus prolixè in Iulianum, & libro 1. de nuptijs & concupiscentia cap. 25. & 26. *Dimittitur* (inquit) *concupiscentia carnis in Baptismo, non vt non sit, sed vt in peccatum non imputetur.*

VIII. Cum autem regenerati subinde peccent, unde hæc peccata nisi à corruptione interna? Illa enim sublatâ tollerentur quoq; effectus qui ab hac sola causa promanant.


IX. Quid quod optimi quique generant filios hac labe contactos, eoq; egentes Baptismo? At si parentes creantes liberos carent peccato originali, quo modo possunt hanc labem ad suam sobolem transmittere, & dare liberis quod non habent?

X. Ergo (inquies) matrimonium malum est, vtpote per quod generantur filij iræ, & peccatum propagatur, quod potius debuerat stirpis euelli, & in ipso se-

mine suffocari. Respondeo matrimonium antiquius esse peccato, & à Deo esse institutum; Peccatum vero quod superuenit, non impedire quin matrimonium sit res naturaliter bona. Non secus ac cibus & potus sunt res bonæ & expectandæ quamuis inde vita impiorum sustentetur. Adde quod matrimonium creat Deo filios, & implendo numero electorum subseruit. Mirro quod coniugati fideles iungunt preces, instigant se inuicem ad bona opera, medentur alter alterius incontinentiæ, & lubricis in locis sibi inuicem manum porrigunt. Nec desunt exempla improborum quibus Dei beneficio contigerunt filij probi & pij: veluti cum seminibus furto ablati, & à fure in terram sparsis, Deus pluuiam tempestiuam immittit.

*Quid sit Peccatum originale & an verè ac propriè sic peccatum.*

#### C A P. VIII.

I.  E C C A T V M originale est deprauatio naturæ humanæ ab ipsa generatione contracta, & ab Adamo in totum genus humanum deriuata; constans priuatione iustitiæ originalis, & procliuitate ad malum.

II. Duo hæc, nempe priuatio iustitiæ originalis, & procliuitas ad malum insunt in peccato originali. Nam vt morbus non est tantum priuatio sanitatis, sed etiam

est mala affectio corporis, ex humorum intemperie, ita hæc labes hæreditaria, non tantum est carentia iustitiæ, sed etiam proclivitas ad iniustitiam.

III. Horum posterius nascitur ex priori. Anima enim quæ per peccatum originale desijt esse bona, necessario mala est. Et cum anima sit instructa voluntate quæ otiosa esse non potest, amissâ sanctitate & iustitia, necesse est ut in contrariam partem vergat.

IV. Hæc corruptio affert menti cæcitatem, voluntati prauitatem, appetitibus perturbationem, denique amissionem donorum supernaturalium, & corruptionem naturalium.

V. Etsi autem in Adamo mens prius fuit errore imbuta quam voluntas prauitate infecta, longè tamen tetrior est voluntatis corruptio, & fœdior labes; quia non per intellectum sed per voluntatem sumus boni aut mali, quicquid enim mali committitur peccatum est voluntatis. Commisione sceleris gravius peccatur quàm ignorance veritatis.

VI. Reatus seu obligatio ad pœnam non potest esse de definitione peccati originalis, cum sit eius effectum.

VII. Lombardus & Thomas cæterique scholastici qui peccatum originale dicunt esse concupiscentiam, naturam concupiscentiæ non satis assequuntur. Nam peccatum originale omnes animæ rationalis facultates infecit, ac concupiscentia morbus est voluntatis & appetitus. Tum concupiscentia vni legis præcepto repugnat, ac peccatum originale toti legi: nec per illud magis in secundam legis tabulam quam in primam peccatur. Quid quod concupiscentia lege pro-

*Lombard.  
lib. 2.*

*Dist. 30.*

*E. Thom.  
1. 2.*

*quest.  
82. art. 3*

hibetur: peccatum verò originale lege vetari haud scio an dici possit. Neque enim Deus iubet nos generari puros & sine peccato. Sic enim Deus alloqueretur hominem nondum natum. Sanè homo non tenetur obsequi legi antequam sit homo. Cumque lex non alloquatur nisi eos qui possunt audire & sunt rationis compotes, velle vt lex iubeat adultum nasci sine peccato, res est ridicula & propior somnio: sic enim lex iuberet de nasci iam natum, & adultum generari. Lex non iubet iustitiam originalem sed præsупponit, alloquitur enim hominem vt consideratum in statu in quo erat ante lapsum, exposcens vetus illud debitum, & naturalem obedientiam. Vnde liquet peccatum originale lege quidem damnari, non tamen prohiberi.

VIII. De hoc peccato, cum scriptura tam disertè loquatur, & sensus ipse ac experientia id abundè testetur, non defuerunt tamen qui hoc peccatum negarent, & genus humanum à stirpe & prima origine esse peccato infectum non agnoscerent. Cyrillus Ierosolymitanus, seu quis alius author est Catecheseon quæ sub eius nomine circumferuntur Catechesi quarta hæc habet, *ὅτι καὶ γένεσιν ἀμαρτάνης ὁ καὶ τυχεὶς πορνείας*, & paulo post *ἐλθόντες ἀναμαρτίτοι τὴν ἐκ πατρὸς αἰσέως ἀμαρτάνου.*

*Non per  
genera-  
tionem  
peccas,  
non per  
fortunā  
scortā-  
ris.  
Veni-  
mus  
per pec-  
catum, & ut  
per ele-  
ctionem  
peccā-  
mus.*

IX. Augustini ævo Pelagius & Celestius negabant peccatum originale, & solo exemplo ac imitatione peccatum à patribus transire in prolem contendebant. Baptismo negabant remitti peccata paruulis, quippe quæ nulla sint, sed tantum eis aperiri regnum cælorum asseriebant. Quorum hæresis pridem explosa est & ab

& ab Augustino strenuè confutata.

X. Hieronymus vel quisquis est auctor commentariorum breuiorum in Epistolas Pauli quæ sunt inserta operibus Hieronymi, Pelagio fauet: Nam verba illa Apostoli ad Romanos cap. 5. *in quo omnes peccauerunt*, ad exemplum restringit, & accipit vt dicta de imitatione peccati Adami.

XI. Chrysostomus plusculis in locis videtur *περι* in hunc errorem. Homilia in Neophytos negat Baptismum conferri ad solam remissionem peccatorum. *Nam (inquit) etiam infantulos baptisamus quamuis non sint inquinati peccato, vt eis addatur sanctitas, iustitia, adoptio, hereditas, &c.* Et Homilia 10. in Epistolam ad Romanos, explicans illud Pauli Rom. 5. *Per vnius inobedientiam multos peccatores exiuisse*, per peccatores vult intelligi *pæna obnoxios & mortales*, non vero maculatos labe peccati.

XII. Lombardus lib. 2. dist. 30. littera E, ait fuisse qui dicerent peccatum originale in nobis non esse culpam, sed tantum reatum pænæ, etiam æternæ, quæ nobis propter Adami peccatum debetur, nisi per Christum liberemur. Ab hac sententia non multum abscedunt Arminiani, quibus nihil pensi est quos imitentur, dum aliquid inueniant quod faciat ad præsidium erroris sui. Arnoldus post Arminium docet *peccatum originis nullam culpæ propriè dictæ rationem habere*, non enim esse *in illo peccatum nec culpam nisi quod libero arbitrio committitur.* pag. 388. in Tit. num.

Ibidem negat *peccatum originis pænam mereri*, sed ait *pænam esse.* Et fatetur Arminium negare peccatum originale esse peccatum propriè dictum: Ipse Arminius pag. 389. & 390.

Repl. ad 9. questiones p. 174. hæc habet *Perversè dicitur peccatum originis reum mortis facere.*

XIII. Concidit ergo ratiocinatio Pauli Apostoli Rom. 5. commate 13. & 14. vbi agens de peccato quod ab Adam in posteros fluxit, cum dixisset *peccatum fuisse in mundo usq; ad legem*, mox id probat morte paruulorum qui ante Mosis sæculum sunt mortui : *regnauit* (inquit) *mors ab Adam usque ad Mosem, in eos quoq; qui non peccauerunt ad similitudinem transgressionis Adam*, id est in infantes qui actualiter non peccauerunt. Nempe inde probat peccatum fuisse in istis infantibus quia mors est fructus & pœna peccati. Cum ergo mors infantium sit pœna peccati originalis, si hoc peccatum originale non est verè peccatum, sed tantum pœna peccati, hæc mors infantium erit pœna pœnæ, non pœna peccati. Dicere autem Deum punire pœnas non peccata, dedecet eos imprimis qui se assertores diuinæ iustitiæ profitentur.

XIV. Quod si labes originalis infantium non est peccatum, sed tantum pœna peccati, frustra baptizantur. Non enim confertur baptismus ad eluendas pœnas sed peccata. Frustra abluuntur qui sunt sine sordibus peccati. Cur autem opus est renascantur nisi quia sunt in peccato mortui? Vnde illa prauitas per quam naturaliter sunt propensi ad malum nisi ex vitio? hoc autem vitium quid est nisi peccatum?

XV. At (inquis) peccatum non est nisi sit voluntarium. Fateor, si de peccatis actualibus agitur. At si de labe naturali, non necesse est hanc labem naturalem esse singulorum voluntate contractam : Satis est si pu-




gnat cum lege. Nam hæc optima est definitio peccati quam ponit Iohannes, peccatum esse *ἀνομία*. Quin autem pugnet cum lege quod hominem instigat ad rebellandum legi dubitari non potest. Nam etsi peccatum originale nondum actu instigavit infantem ad peccandum, aptum est tamen & proclive ad instigandum. Non secus ac coluber qui nondum quenquam venenato morfu infecit, habet tamen insitum virus & propensionem naturalem ad nocendum. Potest etiam dici peccatum originale esse voluntarium, quia per illud peccamus voluntariè: tum quia in Adamo peccavimus, ac proinde in eo voluimus hanc corruptionem. Denique potius credendum est Paulo docenti peccatum inesse infantibus, quam his hominibus qui suis se compungunt aculeis, & ipsi sese implicant.

XVI. Enimuero cum Arminiani doceant, morte Christi totum genus humanum esse reconciliatum Deo, & omnibus hominibus impetratam esse remissionem peccatorum, quæro ob quod peccatum parvuli afficiantur pœnis, & incidant in cruciatus corporis, & dæmonum insultus aliquando patiantur? An ob peccatum Adami? at hoc iam eis esse remissum Arminiani asserunt. An ob peccatum aliquod actuale? at nullum adhuc commiserunt. Restat ergo afficiantur pœnis ob peccatum originale: nisi volumus Deo inuerrere notam iniustitiæ, quippe qui cruciet infantes, & nullius peccati reos.

*Vide  
Armin-  
se Con-  
cil. se-  
cundum  
cap. 21*

*Quomodo peccatum Adami pertineat ad posteros, & quos  
modis ad eius sobolem transeat. Et primò quidem de  
imputatione, & an auctorum & proauctorum  
peccata posteris imputentur.*

## CAP. IX.

I.  VOBIS modis peccatum Adami  
ad posteros transit, imputatione &  
propagatione.

II. Peccatum Adami nobis im-  
putari arguunt pœnæ quas hoc no-  
mine omnes homines patiuntur. Id

Apostolus docet Rom. 5. v. 12. ubi dicit, *mortem tran-*  
*sisse in omnes homines per unum hominem, in quo omnes pec-*  
*caverunt*, vel quia omnes in eo peccaverunt. Non enim  
peccatum Adami tantum fuit personale, nec peccauit  
ut singularis persona, sed ut referens totum genus hu-  
manum in stirpe & origine: non secus ac Christus in  
cruce pro nobis satisfaciens, non passus est ut priuata  
persona, sed ut sustinens & representans totam Eccle-  
siam in capite. Paulus 2. Corinth. 5. v. 15. sic loquitur,  
*Si unus pro omnibus mortuus est, omnes quoque sunt mortui:*  
& Rom. 6. asserit nos cum Christo esse mortuos & cru-  
cifixos. Si ergo in Christo moriente moriebamur, &  
cum eo crucifigebamur, non dubium quin pariter dici  
possit nos in Adamo peccauisse. Nam si secundi Ada-  
mi satisfactio & iustitia nobis imputatur, cur prioris

Adami peccatum nobis non imputabitur? cum ob id ipsum iustitia Christi nobis imputetur, ne peccatum Adami nobis imputetur?

III. Ratio ipsa conspirat: Nam cum Adam bona accepisset non sibi tantum, sed etiam posteris, non mirum si exutus his bonis ea sibi & posteris amiserit. Si quis ob crimen perduellionis capite minuatur, & ad ærarios redigatur, cum eo liberi quoque nobilitate excidunt. Nec quicquam æquius est quam ut filij æ alienum à patre contractum dissoluant, & ut fortunarum ita & debitorum sint hæredes.

IV. Vnum hic tamen est idque insigne discrimen, quod cum æ alienum hæreditatem exhaurit, & plus est in debitis quam in bonis, filius potest eiurare hæreditatem, & ultro cedere bonis paternis: at hic eiusmodi cessio fieri non potest: quia ad reatum ex peccato Adami accedit insuper labes & contagio naturalis: veluti cum quis creatus est parentibus lepra infectis, quæ contagio non potest ad libitum exui.

V. Hæc quantumlibet nixa Dei verbo, & ipsa iustitiæ regula, videntur tamen magnis incommodis vergeri. Primò, occurrit illud Ezechielis 18. v. 20. *Anima quæ peccaverit morietur: filius non feret iniquitatem patris.* Cui consona est lex Dei Deuter. 24. quæ vetat filios plecti ob peccata parentum. Cur ergo morimur ob peccatum alienum? Cur peccatum Adami nobis imputatur? An est credibile eum qui nobis condonat nostra peccata, velle cuiquam imputare aliena? Quid quod pœna grauior est peccato? Cum enim potentia tantum peccauerimus in Adamo, punimur tamen

actu: Illud vero durissimum videtur, quod Adam qui actu peccauit seruatus est, at ob idem peccatum multi damnantur, qui potentiâ tantum in Adamo peccauerunt.

Respondeo, locum Ezechielis sic debere accipi: filium insontem non luiturum pœnas peccati paterni: Sic cum in lege Deus dicit se visitare iniquitatem patrum in filios, loquitur de filiis qui vestigijs paternis insistant, & sunt eiusdem culpæ participes. At filij Adami non possunt dici insones; vtpote qui non solû peccauerunt in Adamo vt in stirpe & radice generis humani, sed & ipsi nascuntur eadem labe contacti, & proni ad idem peccatum. Dico secundò, locum Ezechielis nihil facere ad rem presentem: loquitur enim de peccatis patrum quorum peccata sunt personalia, & qui peccando non sustinent personas filiorum. Fallitur enim Arminius, causam assignans cur reprobentur *in Perk.* infideles qui Euangelium non repudiauerunt. Nempè *pag. 92.* quia in parentibus, auis, abauis, tritauis Euangelij gratiam repudiauerunt, quo actu meruerunt vt à Deo desererentur. Velim enim solidam mihi offerri causam, cur cum omnes in Adamo contra legem peccauerint posterius eius, atque eo ipso pœnam meriti sint & desertionem, etiam infantes in parentibus quibus gratia Euangelica est oblata, at repudiata, non peccauerint contra Euangelij gratiam. Perpetua enim est fœderis Dei ratio quod filij in parentibus comprehendantur.

VI. Discat ergo Arminij schola causas istius discriminis, & cur peccatum Adami posteris imputetur, aliorum vero patrum peccata liberis non imputentur. Dico igitur causas discriminis esse. 1. Quia peccato Ada-

mi amissimus puritatem originalem, peccatis verò auorum aut proauorum eam non amissimus. 2. Quia Adam acceperat dona quæ & sibi haberet, & ad posteros transmitteret, quibus cum excidit, meritò factum est ut eius posterij isdem donis priuarentur. At auus meus & proauus nulla acceperant à Deo dona supernaturalia quæ hæreditario iure ad posteros transmitterent.

3. Tum aui & proai mei peccata erant personalia, nec in peccando posterorū suorum personas sustinebant: quod de Adamo dici non potest. Sanè non puto dici posse Ezechiam aut Iosiam regis Davidis posteros, Vriam in Dauide occidisse.

4. Dicam aliquid amplius; *Vide Thomā* Nempe cum Adam dum vixit plurima peccata commiserit, puto tamen solum primum illud peccatum Adami posteris eius imputari, quia hoc solo peccato violauit fœdus quod cum eo ut cum authore generis humani contractum fuerat. *1. 2. q. 81. art. 2*

5. Quod si quis hodie priuatur luce Euangelij quia aliquis ex eius maioribus ante annos mille repudiauit Euangelium, ut censet Arminius, nulla est causa cur non vicissim aliquis vocetur efficaciter ad salutem quia aliquis ex eius maioribus Euangelio credidit. Nam cur infidelitas proai imputabitur pronepoti, fides verò eius non imputabitur? Fidem vero vnus alteri imputari ne Arminius quidem censet cum dicat Habakuk *2. iustum viuere ex fide sua*, non verò ex aliena. Nec quia Adam credidit promissioni de semine obtrituro caput serpentis, idcirco hæc eius fides cuiquam posterorum imputata est. Id quidem videtur innuere Arnoldus: sed ut *In Titellum.* credam ceteros sectarios idem credere adduci non *pag. 232*

possum. 6. Credere vero quinquam reprobari quia Euangelium repudiavit in suis tritauis & proauis, planè aduersum est sententiæ Pauli 2. Cor. 5. v. 10. ubi ait *unumquemque reportaturum quæ in corpore suo fecerit, siue bonum, siue malum*: Non ergo secundum ea quæ in alieno corpore fecerit. 7. Mitto absurda in quæ Arminius hoc pacto se præcipitat. Potest enim fieri ut proauus alicuius paternus crediderit Euangelio, maternus vero repudiauerit Euangelium. Potest fieri ut auiorum, ab auiorum, tritauorum, & sic porro, pars crediderit, pars non crediderit. Quæro quorû nam in Dei consilio potius habebit ratio? Horum ne fides, an vero illorum infidelitas posteris imputabitur? Tum quotiescunque alicui genti aut vrbi offertur Euangelium, nihil est tam consentaneum, quam de illo populo quosdam esse prognatos maioribus infidelibus, quosdam vero fidelibus: omnibus tamen sine discrimine Euangelium offertur. Quinetiam accidet, ut aliquis ortus maioribus fidelibus repudiet Euangelium, aliquis vicissim ortus maioribus infidelibus conuertatur. 8. Quod si quis potest esse infidelis aliena infidelitate, & dicendus est Euangelium repudiasse in maioribus, quia aliquis progenitorum eius ante annos mille respuit Euangelium, vix erit quisquam piorum qui hoc modo non repudiauerit Euangelium. 9. Quid quod experimento compertum est, pessimorum maiorum pessimam & profligatissimæ improbitatis profapiam, ad fidem esse conuersam, & (ut ait Apostolus Rom. 5. 20.) *ubi abundauit peccatum ibi abundasse gratiam*? Quid erant veteres Romani nisi latrones populantes & vastantes orbem, &

orbem, & flagellum in manu Dei? Quid erat Corinthus nisi lupanar totius Græciæ, & fœdissimarum libidinum emporium? Nihilò secius tamen in istis vrbibus crexit Deus per prædicationem Euāgelij florentissimas Ecclesias, & in illa fæce erant plurimi qui ad electionem Dei pertinebant. 10. Quod si aliquando posteriluunt maiorum peccata, id Arminius non debuit extendere ad tam multa sæcula, cum visitationem iniquitatis patrum super filijs lex non extendat ultra tertiam & quartam generationem. Idque quia vix quisquam potest tamdiu esse superstes vt sobolem suā videat ultra tertiam aut quartam generationem. Nam ideo puniuntur filij inspectantibus patribus, vt patribus inde accrescat dolor, & per ærumnas filiorum patres puniantur. Quæ mihi causâ est suspicandi visitationem hanc peccati patrum in filios, de temporalibus pœnis, non vero de æternis debere accipi.

VII. Ad id vero quod dicebatur grauiorem pœnam esse peccato, quia qui peccauerunt tantum potentiâ in Adamo, ob eius peccatum puniuntur actu, facile est respondere: Sic enim peccauius potentia in Adamo, vt etiam peccatum nobis infit actu, nec tantum luimus alienum peccatum sed & nostrum. Nec mirum est si Adamo Deus ignouit, multis verò ex eius posteris non ignoscit, nam Adam credidit & tactus est pœnitentia, at hi respuunt gratiam Dei oblatam, & perstant in impœnitentia.

H

*De Propagatione peccati Adami in posteros, ubi &  
de translatione animæ: & ipsius peccati.*

C A P. X.



**D**IXIMVS peccatum Adami duobus modis ad posteros transmitti, imputatione & propagatione. De imputatione actum: dicendum porro de Propagatione.

I. Peccatum Adami infecisse hæreditaria labe totum genus humanum, & luem hanc latè serpsisse iam abundè probatum est ijs locis quibus omnem hominem concipi & nasci in peccato demonstrauimus. *Sicut per unum hominem peccatum in mundum introiit, & per peccatum mors: ita in omnes homines mors transit, in quo omnes peccauerunt.* Rom. 5.

II. Quod si quis modum & circumstantias peccati Adami accuratè contempletur, comperiet in singulis hominibus altè impressum esse characterè istius primi peccati, & non obscuram imaginem. Nam insita est singulis hominibus *πολυπρασμιότης*, & cupiditas cognoscendie ea quæ ad se nihil attinent: nec non hæsitatio diffidens verbo Dei; Ac quemadmodum Adam reiecit culpam in uxorem, vxor verò in serpentem, ita insitum est omni homini alterius culpam suæ obtinere. Tum fuga & trepidatio ad Dei occursum, &



mendacium ac simulatio, & sensus nuditatis indecentis insunt omnibus hominibus à natura, & ab illo fonte deriuata sunt in posteros. Ad hæc non docti, sed facti, non instituti sed imbuti sumus. Ad hæc non modo non opus est magistro, sed etiam inuito omni magisterio ac disciplina ruptis obicibus ad ista reditur, vitrice natura.

III. Quemadmodum igitur oua aspidis merito franguntur, & serpentes modo nati merito necantur, quamuis neminem adhuc infecerint morsu, ita infantes iure sunt pœnis obnoxij, Nam etsi nondum actu peccauerint, inest tamen illis lues illa tabifica, & ad peccandum naturalis propensio.

IV. Hinc vero emergit quæstio enodatu difficilis, qua ratione peccatum à parentibus ad posteros traducatur, & quomodo animæ hanc labem contrahant. Cum enim bona sint quæcunque Deus facit, non est credibile nec consentaneum Deum indidisse animabus peccatum originale. Nam quomodo puniret animas quas ipse corrupisset? Quod si creauit quidem puram animam & iustam, sed quæ inclusa corpori, eius contagione inquinata sit, alia subnascitur incommoda non leuiora. Nam animam puram & innocentem includere olido carceri, & quasi in ergastulum compingere vt ibi corrumpatur, non videtur conuenire iustitiæ Dei & bonitati.

V. Accedit, quod peccatum labes est animæ non corporis, est enim peccatum res spiritualis & vitium voluntatis. Non potest ergo corpus dare animæ quod

H ij

non habet. Et cum corpus non peccet nisi quatenus animavitur corpore ut organo ad peccandum. Rom. 6. vers. 13. apparet peccatum ab anima transire in corpus, non vero a corpore in animam. Quam ad rem ipsum Adamæ peccatum nobis est luculentum testimonium: Prius enim Adam peccavit voluntate, quam nanum ad vetitum pomum extenderet: Hoc vidit Caluinus, qui cap. 1. libri secundi Institutionis hæc habet. *Neque enim in substantia carnis aut animæ causam habet contagio: Sed quia a Deo ita fuit ordinatum, ut quæ primo homini dona contulerat, ille tam sibi quam suis haberet simul ac perderet.*

VI. Hic quidem via obscura est & lubrica, & in qua suspenso gradu incedendum est. Non mihi propositum est satisfacere cerebrosis, aut improbé auctis: tantum exponam quæ mihi videntur verbo Dei & rationi magis consentanea: Quam ad rem ut via complanetur, quædam de origine animæ eiusque traductione dicenda sunt.

VII. Origenes secutus Platonem, censuit omnes animas primitus simul cum Angelis creatas, postea in corpora detrusas esse. Hæc disputat lib. 1. *Ὅτι ἀρχαῖν* cap. 7. Tertullianus vult animam traduci cum femine, & animam filij esse ab anima patris. Quod non mirandum est in eo qui animam corpus esse perterritus. lib. de anima cap. 5. In eadem sententia fuisse maximam partem Occidentalium testatur Hieronymus Epistola ad Marcellinam & Anapsychiam. Augustinus scripsit quatuor libros de origine animæ, in quibus hanc quæstionem indecisam relinquit, nec au-

det temerè quicquam definire. Eumque in hac dubitatione fuisse vsque ad mortem testatur liber secundus Retractionum cap. 56. Epistola tamen 157. Terullianum exagitat, & in contrariam sententiam est pronior.

VIII. Nos vero statuimus animam rationalem infundi in embryonem, non quidem *ὑποαὖτον ἐκπαισίσκειν*, vt vult Aristoteles lib. 2. de Generatione Animalium cap. 3. Sed putamus à Deo in ipso fœtu & humani corporis rudimento formari, ducti autoritate scripturæ, cui consonat ratio, & animæ ipsius natura.

IX. Moses Numerorum cap. 27. v. 16. Deum sic affatur, *Iehoua Deus spirituum omnis carnis sibi dispiciat virum quem cœtui præficiat.* Et Apostolus ad Hebræos cap. 12. com. 9. Si (inquit) *corporum nostrorum patres habuimus castigatores, & eos reueriti sumus, annon multò magis subiiciemur patri spirituum & viuemus?* Non temerè est quod Deus peculiari elogio nuncupatur pater spirituum, vt opponatur patribus carnis. Nā si anima esset ex traduce, iidem qui sunt patres carnis essent quoque patres spirituum. Nec Deus hoc titulo à patribus carnis distingueretur, si perinde vtroque ageret, nec aliter animas formaret quam corpora.

X. Quocirca Ecclesiastes cap. 12. dicit *Corpus quidem solui in puluerem, spiritum vero redire ad Deum qui illum dedit:* quod sanè parum appositè diceretur, si Deus non aliter daret spiritum quam corpus. Profecto ista voce *reditionis* animæ ad Deum Solomo innuit animā a Deo esse profectam, & eò redire vnde habet originem: quod sanè de corpore dici non potest.

H iij

XI. Eidem sententię fidem astruit conceptio Christi in matris utero: Cum enim secundū carnem non habuerit patrem, planum est eius animam a Deo immediatē creatam. Quod si ut sis de stirpe Adami necesse est habere animam traductam per paternum semen, Christus non poterit filius Adami nec Davidis appellari.

XII. Putidum est quod pro traductione animę assertur ex initio Exodi, *Septuaginta animas egressas ex femore Iacob*: notum enim est Hebræorum idiomate per animas personas intelligi.

XIII. Sed & verbo Dei ratio ipsa suffragatur. 1. Anima enim quę est aliquid supra naturam, non potest lege communi cum cæteris rebus naturalibus generari. 2. Nec quod est immateriale potest educi de potentiā materię. 3. Ac omnino si anima non generaretur nisi per corpus, non posset existere extra corpus, nec per se sola subsistere. 4. Tum qui volunt animam traduci per semen sese cogunt in angustias quibus impossibile est se expediant. Nam cur anima matris non traducetur quoque in filium? Aut si anima filij ab anima tam matris quam patris traducitur, necesse erit ut duę animę in vnam coalescant & misceantur. 5. Quid autem fiet tot seminibus irritis, quę vel per *ἐξορίσθησαν* cadunt, vel inhonestē amittuntur, vel matrice recepta non perueniunt vsq; ad conceptum? an totidem animę humanę intercident, aut in utero suffocabuntur? an solę permanebunt extra materiam, cum certum sit eas ad numerum hominum non pertinere? 6. Tum necesse est, vel totam animam patris

traduci, & sic pater fiet examinis: vel portionem animæ, & sic anima erit diuisibilis. 6. Nec vero potest anima tota transmitti, veluti cum lumen accenditur de lumine: nam talis propagatio fit transmutatione ad motum materiæ; & sic materia admota animæ generantis in animam verteretur. 7. Quod si vera est definitio animæ ab Aristotele posita lib. 2. de anima c. 1. & passim recepta, qua definit animam esse *Primum actum corporis naturalis organici vitam habentis in potentia*, non video quomodo anima rationalis possit informare semen in quo nulla sunt organa.

XIV. Nec vero homo idcirco dicendus est non generare hominem, etsi animam eius non generet, nec educatur anima de potentia seminis. Satis enim est ad generationem hominis quod generans etsi non dat totam substantiam, dat tamen subsistentiam personæ, & non tantum suppeditat materiam fœtus, sed insuper suggerit dispositiones & aptitudines ad recipiendam formam per quam homo existit. Nam cum, teste scriptura, virgo Maria sit mater Christi, quantumvis Spiritus sancti vis extraordinaria conceptionem Christi perfecerit, quis dubitet affirmare hominem vulgò creare hominem, quando modis ordinariis & legibus naturæ omnia geruntur?

His spinis euulsis via ad cognoscendum modum translationis peccati, à parentibus in liberos facta est planior.

XV. Principio peccatum non transire à corpore in animam, certis rationibus puto à me esse demonstratum. Vicissim vero, Deum indidisse animæ propen-

sionem ad peccandum, nefas est credere. Veruntamen peccatum originale inesse animæ Deo nolente, aut fusque deq; habente, & otiosa permissione permittente, sine scelere dici aut credi non potest. Nam cum peccatum originale sit pœna peccati Adami, qui dicit infligi hanc pœnam homini, sola Dei permissione, non vero voluntate, Deum iudicis munere abdicat. Iudices enim non puniunt permittendo sed decernendo.

XVI. Explicationi huius doctrinæ, sex hæc axiomata, & veritatis firmamenta substernimus.

1. Etiam si ab Adamo non essemus prognati, tamen quia bona supernaturalia suo & nostro nomine acceperat, quando istis bonis suæ culpa excidit, meritò iisdem priuamur. Veluti cum de multis fratribus, vnus acceptam suo & fratrum nomine pecuniam suo & fratrum damno decoquit & dilapidat.

2. Deus indidit animæ has facultates, intellectum voluntatem, sensum, & appetitum, quæ naturaliter feruntur ad obuiâ & cognita, non vero ad ignota & longè summotâ.

3. Homo non potest cognoscere & amare supernaturalia & diuina, sine luce diuina & supernaturali.

4. Nequidem obuijs & naturalibus homo potest iuste & conuenienter vti & ad Dei gloriam, nisi ei aliquid lucis supernaturalis affulgeat.

5. Deus unicuique homini ad conseruationem sui ipsius indidit amorem sui, qui quidem naturaliter bonus est: incipit vero esse moraliter bonus, quando amor Dei subseruit.

6. Mores

VI. Mores animi vt plurimum sequuntur temperamentum corporis.


XVII. His positis dico Deum creare animas hominum bonas, sed destitutas donis cœlestibus & luce supernaturali, idq; meritò, quia dona quæ Adam sibi & posteris acceperat sibi & posteris amisit. Non dare autem lucem supernaturalem menti, non est inde re peccatum voluntati, etsi cæcitatem mentis auersio voluntatis postea consequatur. Nam voluntas destituta hac luce & cognitione bonorum supernaturalium non potest se mouere ad ignora, sed tantum ad præsentia & nota, qualia sunt voluptates corporis, opes &c. Quæ quidem cum naturaliter bona sint, auertunt tamen voluntatem à studio rerum supernaturalium. Tum amor nostri qui naturaliter bonus est & necessarius incipit esse moraliter malus, quia locum qui debebatur amoris Dei inuadit. Hinc propensio illa ad malum, quæ existit ex inordinato amore sui ipsius, quem lux supernaturalis non dirigit. Quam lucem Deus non dans animæ, non idcirco ei indit peccatum. Non secus ac si quis Solis lucem interposita caligine viatori subtrahit, non impellit viatorem in errorem, nec auertit à recta via: sed tantum adimit id sine quo recta via dignosci non potest.

XVIII. Hanc labem auget temperamentum corporis: Nam experimento compertum est, sanguineos esse hilares & libidinosos, biliosos esse temerarios & iracundos: melancholicos suspicaces & tenaces propositi, altè recondentes odia. Bilis atra aur flaua sunt quasi scintillæ & fomites subiecti appetitui per quos

flammas concipit & inardescit. Ac prout est temperamentum corporis, alius ridet inter flagella, alius flet sub colapho. Sunt ergo humores corporis non quidem causæ sed irritamenta peccati: nec cogunt voluntatem sed alliciunt: Nec imprimunt animæ peccatum, sed animam peccatricem exstimulant, & cum multæ pateant viæ ad peccandum, eam horsum potius quam illorsum inclinant.

*An peccato Adami amissæ sunt vires  
credendi Euangelio.*

C A P. XI.

- I.  VERITVR an peccato Adami amissæ rimus vires credendi Euangelio. Arminius mirus fingendi artifex id negat. Nam vt euincat Deum teneri dare omni homini vires credendi in Christum, & fidem adipiscendi, pertendit Adamum ante lapsum non habuisse vires credendi in Christum, nec ei opus fuisse: ac proinde nos non potuisse amittere in Adamo quod ipse Adam non habuit. Idem dicit fidem non præcipilege, ideoq; Adamum non fuisse obligatum ad fidem, quia lex ei sola data erat. Addit, neminem posse credere nisi qui peccator est. Quod si Adam non accepit vires quibus si laberetur posset resurgere, nec accepit vires credendi Euangelio, per quod resurgimus ex lapsu.
- II. Hæc cum eo pertineant vt sibi Arminius viam

*Vide Ar.  
noldi in  
Tilenio*

*cap. 14.*



sternat ad impium dogma quo asserit Deum teneri dare omnibus hominibus vires credendi, & Deum paratum esse dare fidem omnibus dūmodo velint, quæstio hæc non est parui momenti, nec tractanda perfunctoriè.

III. Nos ergo contra Arminium pertendimus, genus humanum Adami peccato vnà cum originali puritate & iustitia, vires quoq; credendi in Christum amisisse: Adami enim lapsu amisimus potestatem amandi Deum, eiq; obsequendi. Fides autem amorem Dei includit, & species est quædam obedientiæ.

VI. Adam quidem ante lapsum non tenebatur credere in Christum quia non ei fuit annuntiatus, nec tunc erat opus; at tenebatur credere omni verbo Dei quodcunque illud tandem futurum esset: Hæc obligatio ad posteros transijt: Non transiisset autem nisi Adam pari obligationi astrictus fuisset. Sic Israëlita tempore Davidis non tenebantur credere Ieremiæ prædicanti instantem captiuitatem Babylonicam, quia Ieremias nondum erat, nec ipsis erat opus hoc scire: Nihilominus tamen Iudæi cōtemnendo prophetiam Ieremiæ, violarunt legem qua idem populus Davidis tempore attinebatur. Ineptus esset qui diceret aliquem qui ex vidente factus est cæcus, non amisisse potestatem videndi domum quæ quadriennio post ædificata est. Aut eum qui sua culpa oculis captus est non amisisse facultatem videndi collyria quæ ei post aliquot menses medicus afferet. Habuit sanè Adam ante lapsum potestatem credendi Christo, eodem modo quo iam tunc habebat potestatem succurrendi ægris & miseris,

quamuis ante lapsum non esset miseria, nec esse posset. Erat Adam in potestate remota ad credendum Evangelio, quemadmodum sanus est in potestate remota ad adhibenda morbi aut futuri aut possibilis remedia. Quod autem non credidit in Christum, non id factum est quia id vires ei à Deo datas excederet, sed quia non erat opus. Denique cum Adam sua incredulitate amiserit potestatem credendi verbo Dei, necesse est amiserit quoq; potestatem credendi verbo per quod Deus huic malo remedium erat allaturus.

V. Frustra ergo Arminius censet ineptum esse si dicatur Adam potestatem habuisse credendi cum non opus erat, quæ ei tunc demum ablata sit cum cœpit ea opus habere. Nam nec Adamo potestas credendi defuit, nec ei ablata est, sed eam ipse ultro amisit, dum amittit vires obsequendi Deo. Et eandem Deus ex mera sua gratia restituit quibus vult, non quidem si velimus, sed ipse efficit ut velimus.

VI. Ridiculum vero est quod Arnoldus cap. 14. dicit Adamum ante lapsum non accepisse vires quibus posset resurgere si laboretur. Non enim dantur vires ante lapsum quibus resurgatur post lapsum, cum ipso lapsu vires amittantur: sed post lapsum reparantur. Nec dubium est quin Adam ante lapsum habuerit vires quibus potuisset resurgere, nisi lapsu eas amisisset. Perinde ergo loquitur Arnoldus ac si dicerem, cum cui Deus dedit oculos sanos & perspicaces, non accepisset vires per quas iisdem oculis videret postquam cæcus factus est.

VII. Deniq; quotquot sum Adami posterit tenentur implere legem: hoc debitum naturale est. Lex autem iubet amare Deum, & ei obtemperare, ac proinde & credere loquenti. Quodcumq; ergo Christus annuntiatur, non potest Euangelij doctrina respui quin contemptu Euangelij lex quoq; violetur. Is vero cui Christus nunquam annuntiatus est non damnabitur quod Christum respuerit; sed iudicabitur per legem: quæ quidem eum astrinxisset ad credendum Christo, si Christus ei annuntiatus fuisset.

VIII. Ac planè allucinatur Arnoldus quando asserit aliam esse potentiam qua Deo creditur, aliam qua Christo, quia (inquit) verbum legis & verbum Euangelij toto genere differunt & sunt opposita: Hoc sanè parum considerate homini acuto excidit. An quia album & nigrum sunt opposita, idcirco alterius est potentia videre album alterius nigrum? nonne eiusdem est facultatis cognoscere contraria? Quanquam non video quomodo lex & Euangelium possint dici contraria, cum lex sit pædagogus ad Christum, & Euangelium suggerat media quibus legi satisfiat. Sanè inter creditorem & inter vadem nulla est discordia. Christus non venit ut aboleret legem sed ut impleret. Matth. 5. 17. Rom. 3. 30.

IX. Ex his facile est colligere quid respondendum sit ad quæstionem qua quæritur an lex iubeat credere Christo. Hoc enim perinde est ac si quis quæreret an lex Mosis iubeat credi Esayæ Prophetæ. Planum est id lege difertè non iuberi: neque enim ante Esayam natum quisquam ei credere tenebatur. Implicite tamen

& per consequentiam dico id lege precipi, quippe quæ iubet Deo morem geri. Deo autem parendum est, siue immediatè siue per internuntios nobis loquatur. Idem arbitror dici posse de Christo.

X. Eorum enim ad quæ lege Dei astringimur duo sunt genera: Quædam debentur absolutè ab omnibus & omni tempore: immo & ab eis quibus lex moralis per Mosem tradita non innotuit: qualia sunt amare Deum & proximum: Horum enim officiorum cognitione Adam erat imbutus ante lapsum, & hæc præstare actu tenebatur. Sed quædam sunt ad quæ obseruanda tunc demum lege Dei astringimur, quando actu iubentur, & eorum cognoscendorum nobis à Deo facta est copia. Sic Israëlita in Ægypto non tenebantur obsequi mandato de manna non colligenda die sabbati, aut de respiciendo serpente æneo, aut de trajiciendo Iordane, quibus tamen si quis non paruisset quando Deus ea præcepit, sine dubio merito violatæ legis pœnas dedisset.

XI. Perperam vero dicit Arnoldus non hic agi de ista generali potentia credendi omni Dei verbo; De ea enim planè hic agitur, quando quidem potentiâ illa generali potestas quoque credendi in Christum comprehenditur. Non secus ac potestas videndi comprehendit etiam potestatem videndi remedia cæcitatibus, quantumuis remedia illa non præsto sint, nec eis opus sit ante cæcitatem.

XII. Hæc omnia eo pertinent ut appareat corruptione naturali quæ ab Adamo in nos deriuata est amissas esse vires credendi & amplectendi remedia quæ

Deus offert Euangelio : Ac proinde Arminium errare cum dicit Deum teneri dare omnibus hominibus vires ad credendum Christo , aut paratum esse dare fidem omnibus. Deus enim non tenetur restituere homini quod homo sua culpa amisit : nec agit iniuste cum postulat ab homine quod naturaliter debet.

XIII. Ipse Arminius hac in re parum sibi constat & à se posita conuellit. Dicit enim multas gentes per multa sæcula priuatas fuisse luce Euangelij, sine qua tamen non est fides, idq; in pœnam incredulitatis proauorum. Agnoscit ergo Deum non dedisse nec paratum fuisse dare his gentibus vires credendi in Christum. Enimuero Arminius sic loquendo causam assignat cur Deus noluerit, ac proinde non paratus fuerit, dare his populis id sine quo non potest esse fides. An Deus paratus erat dare vires credendi Tyrijs & Sydonijs quibus Christus hoc testimonium perhibet fore vt conuerterentur in sacco & cinere, si verbum & miracula ad eos peruenissent ? An dat vires credendi eis quorum corda obdurat irresistibili voluntate, vt loquitur Arminius ? an poterant credere illi de quibus Ioh. 12. vers. 39. *Idcirco non poterant credere, quia scriptum est, In Per-*  
*excacauit eorum oculos & obdurauit corda ?* An dat vires <sup>kinsum</sup> credendi ijs quos Arminius dicit à Deo vocari modo <sup>p. 294.</sup> *per-*  
<sup>295;</sup> non congruo, & per quem scit hominem nunquam conuerti?

XIV. Hic sanè Arminius Deum non obscure accusat insipientiæ: vult enim Deus sibi ipse aduersetur, & paratus sit facere quod ne fiat vltro viam incongruam sequitur. Quid quod quasi prætorio iure ipsi Deo leges

figit? Nam quid sibi volunt hæc verba, DEVM TENERRI dare vires credendi? Nempe sic visum est ARMINIO Deum hac lege astringere : nec constabit Deo ratio suæ iustitiæ, nisi ARMINIUS media ei suppeditauerit per quæ iniustitiæ crimen effugiat.


XV. Et si autem impotentia illa credendi pœna sit peccati ADAMI, non iniuste tamen punitur qui per hæc impotentiam respuerit Euangelium oblatum, quia hæc eadem impotentia quæ est pœna, est etiam culpa. Quod dico ut appareat quam parum appositè ARNOLDUS hic adhibeat exempla pœnarum quæ non sunt culpæ. *An ( inquit ) fert æquitas ut militi oculis multato ob negligenter actas excubias, imperator delicti cuiusdam* *14. 522. alterius veniam offerat, aut aliud quid promittat sub hac conditione ut diligentius vigilet, & puniat quod sine oculis non vigilauerit?* Hoc sane exemplum non est ad rem: nam cæcum esse non est culpa, nec quisquam renetur obligatione naturali ad videndum. Secus est de impotentia ad credendum. Adde quod multatus oculis moeret, & ægre fert iacturam lucis. At homo ideo non credit quia non vult credere, estque hæc impotentia voluntaria.

*Deum ex*

*Deum ex genere humano corrupto & maledictione obnoxio saluare quos ex mera sua gratia elegit.*

*Quid sit Prædestinatio. Eius partes. Arminium non intellexisse quid sit Decretum Prædestinationis, & funditus sustulisse electionem.*

## CAP. XII.

I.  VM per vnum hominem peccatum sit ingressum in mundum, & per peccatum mors, omnesq; homines sine exceptione nascantur maledictioni obnoxij, certum est neminem posse ab hac maledictione liberari nisi per meram Dei gratiam & misericordiam. Hanc gratiam nobis patefecit in Christo, extra quem non est salus. Is enim naturam nostram induit vt, hoc interuentu & quasi nodo homo cum Deo iungeretur, & mortem passus est vt pro peccatis nostris satisfaceret: & sic facta reconciliatione in titulum & gradum filiorum Dei restitueretur.

II. Hoc beneficium & salutarem gratiam Deus nobis annuntiat per Euangelium; quo proponitur fœdus illud gratuitum, cuius Christus est mediator atq; fundamentum.

III. Hoc Euangelio promittitur vita æterna credentibus in Christum. Nempe vt non est salus extra Chri-

K

itum, ita sine fide Christus non potest apprehendi, nec ad salutem solis fidelibus destinata perueniri. Nam, ut ait Apostolus, *Herb. II. sine fide non potest placere Deo.* Fidem appello non inanem fiduciam per quam indormitur vitijs, & conscientia torpent dum de Dei misericordia benè speratur: Sed fidem viam *quæ per charitatem operatur* Gal. 5. v. 6, & quæ eo ipso auget amorem, quod pellit metum.

IV. Hanc fidem homo non ex se habet, nec res est humani arbitrij, sed est Dei donum; & effectus spiritus sancti, qui trahit homines vocatione efficaci, & Dei promissiones Euangelio propositas in cordibus obsignat, & altè conscientijs imprimat.

V. Hæc fides non est omnium, ut ait Apostolus 2. Thes. 3. alioqui omnes conuerterentur & seruirentur: Sed eorum demum quos Paulus dicit *vocatos ex proposito* Rom. 8. 28. & quos Deus merà suà *discreti* elegit ad salutem.

VI. Datur autem fides ex mero Dei beneplacito; nec datur dignis, sed facit dignos cum datur. Deus enim non inuenit bonos sed facit: nec quicquam præcitat in homine boni nisi quod ipse facturus est: ut postea plenius docebitur.

VII. Hoc consilium Dei æternam, còq; immutabile Prædestinatio appellatur: quæ quidem pars est diuinæ providentiæ: Providentia enim vocatur prædestinatio quando se ad salutem vel damnationem creaturæ rationalis applicat; & quando dispensat & disponit media per quæ ad salutem peruenitur. Hæc enim diuino nutu regi & Deum pro suo arbitrio alijs largiri



quod alijs negat dubitari non potest. Nam etsi scriptura hîc taceret, ratio tamen clamat non esse consentaneum Deum qui ad omnia suam curam extendit, in hoc vno quod est longè præcipuum esse negligentem.

VIII. Porro cum prædestinatio sit etiam inter Angelos, teste Paulo qui 1. ad Timoth. 5. 21. Angelos vocat *electos*: hîc tamen de sola prædestinatione hominum acturi sumus, vt potè quæ sola ad nos pertinet.

IX. Est ergo Prædestinatio Decretum per quod in salutis negotio Deus ab æterno constituit quid de vnoquoque homine facturum sit. Aut sic: Prædestinatio est decretum Dei quo ex massa generis humani corruptâ decreuit certos homines per Christum seruare, cæteros ob peccata iustè punire.

X. Huius Prædestinationis duæ sunt partes, altera est *Electio*, altera est *Reprobatio*, quarum prior necessario ponit alteram. Nam quotiescunque aliqui eliguntur de multis, cæteri necessario reprobantur: & alijs insuper habitis quidam præferuntur.

XI. Electionis & electorum frequens est in scripturis mentio. *Multi sunt vocati, pauci vero electi.* Matt. 20. 16. *Deus nos elegit in Christo ante iacta Dei fundamenta.* Ephes. 1. v. 4. *Manet propositum Dei quod est secundum electionem, non ex operibus sed ex vocante.* Rom. 9. 11. *Reservatio facta est secundum electionem gratuitam.* Rom. 11. v. 5. *Surgent Pseudochristi & Pseudopropheta & edent signa ac miracula ad seducendum, si fieri possit, etiam electos.* Marci 13. 22.

XII. Vicissim quosdam esse reprobatos testatur scriptura 1. Petri cap. 2. v. 8. *Qui quidem impingunt*

*in verbum, immorigeri, ad quod etiam positi sunt.. Et Iudæ vers. 4. Subreperunt quidam homines* *απορριμμένοι* *εἰς τὴν τὴν κρίσιν* *ad hanc damnationem iam prius descripti.* Huc pertinet quod Apocalypseos 20. v. 15. dicitur conijci in stagnum ignis quicumque non est inuentus scriptus in libro vitæ: qui liber nihil est aliud quam catalogus electorum, Dei decreto definitus.

XIII. Huius discriminis insignè exemplum habemus Iacobum & Esau, de quibus adhuc in vtero clausis, priusquam quidquam fecissent boni aut mali, Deus pronuntiat, *Iacobum amavi, Esau odio habui.* Rom. 9. Nec non duos latrones cum Christo crucifixos. *Duo erunt in lecto, alter accipietur, alter relinquetur.* Luc 17. 34. Non absimili euentu illi quo vsi sunt pincerna & præfectus pistorum Pharaonis, qui cum eodem carcere clauderentur, alter ad honorem, alter ad supplicium productus est.

XIV. Eiusdem discriminis specimen Deus edidit, non modo in Abraham, sed etiam in eius stirpe, quam nullo suo merito cæteris gentibus prætulit. *Quum diuideret Altissimus gentes, & separaret filios Adam, pars Domini fuit populus eius, & Iacob funiculus hereditatis eius* Deuter. 32. Ac ne quis id factum arbitraretur ob præuissam populi istius virtutem, ipse sic populum suum affatur, *Scito quod non propter iustitias tuas Deus tuus tibi dedit terram hanc in possessionem, cum sis populus durissimæ cervicis.* Deuter. 9. 6.

XV. Et si autem prædestinatio reprobationem complectitur, cum certum sit impios ad finem certum pœnaq: commeritas esse destinatos, Apostolus tamen

prædestinandi voce, solam electionem intelligit, vt Rom. 8. quos *prædestinauit vocauit*, &c. & Ephel. 1. v. 5. *Prædestinauit nos quos adoptaret in filios*. Hunc loquendi morem imitatus Thomas, sic definit prædestinationem 1. parte Summæ Quæst 23. Art. 2. *Prædestinatio est preparatio gratiæ in presenti & gloriæ in futuro*.

XVI. Cum vero circa hanc doctrinam diuersi diuersa sentiant, vnus tamen Arminius minus quam quilibet prædestinationis naturam affecutus est, & in ipso limine duriter impedit. Is in disputationibus Theologicis Disp. 15. Thes. 3. Prædestinationis genus dicit esse decretum, idq; inquit, non *decretum legale*, secundum quod dicitur, *qui fecerit ea homo uiuet in illis*, sed *Euangelicum cuius hic est sermo*, *Hæc est voluntas Dei vt omnis qui uidet filium & credit in illum habeat vitam æternam*. Eumq; secuti Arminiani omnes, totam doctrinam prædestinationis quatuor decretis comprehendunt. Primum volunt esse illud quo Deus decreuit mittere filium ad redimendum genus humanum. Secundum quo decreuit credentibus dare vitam æternam. Tertium quo decreuit omnibus dare gratiam & vires sufficientes ad credendum. Quartum quo Deus decreuit dare salutem his & illis singularibus quos præsciuit credituros, & in fide perseveraturos. Hæc quasi catenæ anulos sic nectunt vt posteriora decreta à prioribus dependeant, & per priora ad posteriora veniatur.

XVII. Per hæc planum est Arminium non intellexisse quid sit decretum prædestinationis. Decretum enim prædestinationis est quo Deus statuit quid ipse

facturus sit de nobis, non vero quid nos velit facere. Perperam ergo Arminius hanc Dei voluntatem qua statuit eos esse saluandos qui credent ponit inter decreta prædestinationis, cum hac voluntate mandatum Dei includatur. Ipse Arminius ibidem prædestinationem comprehendit sub prouidentia, facitq; prædestinationem speciem vel partem prouidentia: Si ergo illud, *qui credit saluabitur*, non est decretum prouidentia, certè neq; erit decretum prædestinationis, cum prædestinatio nihil aliud sit quam prouidentia ad salutem hominum vel reprobationem restricta. Hoc idem liquidò inde apparet quod Arminius hoc Decretum quod vocat Euangelicum opponit decreto legali quo dicitur *qui hac faciet uiuet in illis*, quod manifestè non est decretum prouidentia, sed regula iustitia. Quod si non hoc, profectò neq; illud: cum Euangelij regulæ nihilo plus pertineant ad prouidentiam Dei, ac proinde nec ad prædestinationem, quam regulæ legis.

XVIII. De quatuor ergo istis decretis secundum expungendum est, eiq; locus assignandus est in doctrina Euangelij, non vero in decreto aeterno & arcano prædestinationis. Et sic de quatuor istis annulis secundo detractò, soluitur tota concatenatio, & quasi deducto paxillo tota compages istius machinae luxatur.

XIX. Quid quod Arminius electionem stunditus euertit, & facit esse rem solius nominis? Negat enim numerum electorum Dei decreto esse definitum: unde fit ut nullus omnino sit electus: Nam si singulorum salus certo Dei decreto esset definita, etiam definitum esset ut hic & ille esset de numero, & sic ex singulis tota

Arnold.

p. 172.

Dicitis

Deo soli

notu esse

qui nam

summa certò & definitè conficeretur. Quod si nume-  
 rus electorum non est certo Dei decreto præfinitus, li-  
 ber vitæ continens numerum saluandorum Apoc. 20.  
 & numerus fratrum nondum impletus, Apoc. 6. v. 11.  
 & quicquid scriptura dicit de ouibus Christo datis,  
 etiam ante conuersionem, Ioh. 10. v. 16. euanescat ne-  
 cesse est.

*Et quot  
 sint ele-  
 cti: sed  
 numeru  
 rament  
 statuitis  
 certum  
 esse & ex  
 præfinita  
 Dei ordi-*

XX. Et cum Arminius vult omnes homines esse ele-  
 ctos ad salutem electione cōditionali, id est dummodo  
 velint credere, & per liberum arbitrium rectè vti gra-  
 tia quæ eis offeretur; ponit electionem quæ non est  
 electio, quippe quæ ad omnes pariter extenditur: Non  
 eligit nisi qui aliquos cæteris præfert. Quid quod per  
 hanc generalem electionem Simon Magus & Simon  
 Petrus sunt pariter electi? & ad Iudam & Pharaonem  
 electio extenditur?

*natione  
 determi-  
 nati qui  
 nec au-  
 geri pos-  
 sit nec  
 minui,  
 idq; ex  
 eadē or-  
 dinatio-  
 ne. Lögē  
 verè als-  
 ter Enā-*

XXI. Illud vero grauissimum quod electionem  
 singularium Arminius facit fide posteriorem, & sic ele-  
 ctionem diuinam ab humano suspendit arbitrio: vnde  
 fit vt salus hominis res sit merè contingens & non ne-  
 cessaria, quippe quæ à re contingente & mutabili de-  
 pendeat, nempe ab humana voluntate. Nam etsi  
 Deus certissimè præscit futura contingentia, non ta-  
 men ideo vel electio vel salus hominis est necessaria,  
 quia res non ideo certa est quia certò præscitur. Et quia  
 electio non est actus præscientiæ Dei, sed voluntatis:  
 cuius executio (si fides Arminio) pendet ab impletio-  
 ne conditionis quæ potest ab homine impediri. Nam  
 Arminij schola censet omnem hominem vires habere  
 credendi, & Deum TENERI dare omnibus vires im-

*gelium.  
 Idem ait  
 Greuini-  
 chonius  
 in præfa-  
 tione.*

Armin.  
p. 262.  
in Tilen.

plendi conditiones secundi fœderis , & gratiam Dei esse causam partialem fidei; neque à sola Dei gratia in homine creari.

XXII. Sic cum Arminiani volunt singulares homines eligi à Deo ex fide præuisa , id est certò destinari ad salutem quos Deus præuidit venturos cum vocabuntur & perseueraturos, planè negant eos eligi. Nam recipere omnes venientes non est eligere. Enimverò quantamcunque gratiam tum præcedentem tum eomitantem Arminiani velint à Deo dari , volunt tamen esse penes humanum arbitrium respuere gratiam aut non respuere. Nempe Arminius vult Deum prædestinare ad salutem eos quos ab æterno præuidit per suum liberum arbitrium benè vsuros gratia. Ego verò pernego hoc posse vocari electionem , cum potius sit decretum admittendi eos qui ad Christum venient cum possent non venire: qui quidem ( si Arminij doctrina obtinet ) priùs eligunt Deum , & ei se applicant antequam à Deo ad salutem destinentur.

XXIII. Mitto quod Arminius homines singulos sic vult elegi ex fide præuisa , ut ij demum ad electionem Dei pertineant, non quos decreuit, sed quos præuidit perseueraturos in fide ad mortem vsque. Vnde fit ut neminem Deus eligat nisi consideratum ut mortuum , aut in ipso puncto quod est vitæ mortisq; confinium. Quod si verum est, perperam Arminius dicit elegi credentes. Debuerat enim dicere eos demum elegi qui credere desierint.

XXIV. His addenouum & prodigiosum dogma Arminianorum

Arminianorum quo censent reprobos posse seruari & electos damnari, nō quidē quā sunt reprobi aut electi, sed quā præditi viribus ad credēdum, & ad perueniendū ad salutem. Quod si is qui Dei decreto est reprobus potest seruari, aut electus damnari, planū est prædestinationē nō esse Dei decretū, sed rem titulo tenus, & voluntatem fluctuantem, aut meram præscientiam: cuius certitudo nitatur præuisione rei incertæ, nempe voluntatis humanæ. Quis obsecro ferat hominem sic loquentem? *Sum quidē reprobus, sed possum efficere vt saluer.* Aut *sum electus, sed penes me est efficere vt reprober.*

XXV. Itaque cum certitudo electionis à voluntate humana suspendatur, poterat fieri vt nemo in Christum crederet, & sic Christus frustra fuisset mortuus.

XXVI. Illa verò serie quatuor decretorū qua Christus morti destinatur antequā Deus statuisset quinam essent saluandi, Christus constituitur caput Ecclesiæ sine certis mēbris: Quod sanè merū est deliriū. Christus enim fingitur dat<sup>9</sup> esse caput Ecclesiæ sine certa Dei voluntate quodnā futurū esset eius corpus. Immodò ex Arminianorū doctrina, poterat fieri vt Christus esset caput sine corpore, & nulla prorsus esset Ecclesia, si quidē censent nullum esse electum qui non possit damnari.

XXVII. Illud quoque non omittendum, Arminianos vt suam illam concatenationē quatuor decretorū tueātur, asserere Christum non mortuū esse pro fidelibus, sed pro omnibus hominib<sup>9</sup> indistinctè: nec magis pro Petro quam pro Iuda: nec Christo in morte cōstitutū fuisse quos morte sua saluaret. Immodò cum Christus moreretur electionem nondum habuisse locum, quia electio est aliquid posterius morte Christi.

XXVIII. Exemplum Caiphæ & Iudæ hîc præcipui est pöderis. Nam ex Arminij doctrina, Deus elegit omnes homines sub hac cōditione vt credant in mortem Christi. Quæro ergo an Deus elegerit Caiphæ & Iudam ad salutem sub hac conditione vt credant in mortem Christi? Hoc sanè dici non potest: Quippe cū Deus decreuerit vti Caiphæ & Iudæ scelere ad Christum morti tradendum. Quo tādē modo potuerunt eligi ad salutem sub conditione credendi in mortem Christi, qui ad id ipsum erant destinati vt per eorum incredulitatem & scelus Christus morti traderetur? Sed hæc cursim tantū & obiter perstringimus, enucleanda accuratius suo loco.

---

*De obiecto Prædestinationis, id est an Deus prædestinans, consideret hominem vt lapsū, an vt non lapsū.*

---

## CAP. XIII.

**I**fî non alia de causa Deus hos potius quam illos elegit ad salutem, quā quia sic ei visum est, nec hui⁹ discriminis causa in homine querenda est, quodnam tamen sit prædestinationis obiectum, id est an Deus eligens aut reprobās homines, eos considerauerit vt lapsos & peccatores, an vt nendum lapsos, sed tantū vt homines, & in massa non corrupta dubitari potest.

Pastores Ecclesiārum Vvalacrianarum, strenui assertores veritatis, in accuratissima sua epistola, cuius antigraphum ad nos miserunt, profitentur se sentire Deū considerasse homines quos eligebat, quosq; præteribat, vt lapsos in Adamo & in peccatis mortuos: Idem sentiunt



quotquot sunt veteres: quorum nemini, quod sciam, vnquā in mētem venit dicere Deum reprobauisse homines sine intuitu peccati. In eadē sententia video esse Calvinum, Zanchium, Melanchthonē, Bucerum, Musculum, Paræum, clara Ecclesiæ nostro æuo lumina. Ex quorū scriptis quasdā sententias excerptas adiiciam ad calcem huius operis, ne morentur lectorē properantem, & filum institutæ aduersus Arminianos disputationis abruptant. Intra hos limites se continet Confessio Ecclesiarū Galliæ, articulo XII. vbi ex capite 9. ad Romanos aliisq; scripturæ locis probatur electio & reprobatio ex massa corrupta.

Hanc sententiam comprobauit veneranda Synodus Dordracena, qua nulla alia à multis retro sæculis celebrior nec sanctior. Tantæ authoritati non video quid possit opponi. Sacer cōuentus ex diuersis Christiani orbis partibus congregatus, prudenter vidit non modo esse modestiorē & tutiorem hanc sententiā, sed etiam esse accommodatissimā ad declinandas obiectiones nouatorum, qui in hoc campo petulanter exultant. Sic dissuicorum technas, & eis neruos incidi. Sublata enim reprobatione sine intuitu peccati, quam totis viribus impetunt, aërem cædunt, nec habent quod feriant. Causas quibus Confessio nostra, nec non veneranda Synodus adducta est, vt sibi putaret in prædestinatione qua homo consideratur vt lapsus esse consistendum has esse arbitror.

I. Primò occurrit phrasis scripturæ, quæ electos vocat *vasa misericordie*. Rom. 9. v. 23. non est autem locus misericordiæ nisi erga miseros. Nec potest eligi ad salutem per Christum adipiscendam nisi qui consideratur

ut opus habens redemptore. Cumque destinatio ad finem includat media per quæ ad finem itur, medium autem ad salutem sit remissio peccatorum, nec sit remissio peccatorum sine peccato, planum est destinari ad salutem eos qui ut peccatores considerantur.

II. Nec sanè potuisset Deus integrâ suâ iustitiâ pœnis afficere homines quos considerasset sine peccato. Deus enim nō punit infontes: Estque damnatio actus diuinæ iustitiæ, quæ sibi constare non posset si homo innocēs & nullâ ob culpâ destinaretur ad desertionem ex qua æterna perditio necessario consequeretur: aut si Deus prius constituisset homines perdere quâ creare.

III. Tum quemadmodum Deus non damnat nisi ob peccatum, ita certum est Deum non velle damnare nisi ob peccatum: At reprobare & velle damnare idem sunt: quemadmodum eligere idem est ac velle salvare. Non reprobatur ergo nisi ob peccatum.

IV. Porro negari nō potest quin reprobatio, seu reiectio creaturæ à Deo, maxima sit pœna quæ possit infligi creature rationali, quippe quam æterni cruciatus necessario consequuntur. Quod si obtinemus, inde sequetur non esse infinitæ bonitatis, supremæque iustitiæ deferere suam creaturam, non quidem quod peccauerit, sed quia Deo ita visum est, & ut ex desertione animulæ à se creatæ quærat materiam gloriæ. An pater qui sciret filij sui felicitatem à se pēdere, posset sine *disparitas* & crudelitatis crimine deferere filium innocentem & nullius sceleris compertum? maximè si per hanc desertionem filius in æternas ærumnas incideret? neque solum inde fieret miserrimus, sed & pessimus?

V. Sed nec iustè ageret Deus si infinitis partibus plus

daret mali suæ creaturæ quam dedit boni. Cui cum dederit esse, mox eidem sine vlla eius culpa daret *male esse* in æternum & miserè. Sanè si Deus tantum adimeret quod dedit, & creaturâ ad nihilû reduceret, nulla esset causa conquerendi. At dare infinitum malum creaturæ cui dederat finitum bonum, & creare hominem ad id tantum vt perdat, vt ex hac perditione sibi gloriam acquirat, abhorret à bonitate Dei atque iustitia.

V I. Illud verò longè grauissimum, quod hac seu reprobatione, seu desertione hominis considerati sine peccato, creatura innocēs non modo fit miserrima sed etiam pessima. Nam quē Deus odit, necesse est Deum oderit, aut odio habiturus sit. Negationem enim spiritus Dei sequitur necessariò auersio voluntatis creaturæ. Cumque iuxta hoc dogma Deus prius oderit hominem à se factum, quàm homo Deum oderit, fieri non potest quin Dei odium quo hominem odit, per idem dogma fiat causa odij quo homo Deum odit, & sic Deus fiat peccati author.

V I I. Quod si Deus odio habuit Esau consideratû vt non peccatorē & in massa integra: oportet Deus oderit creaturam innocentem. Odium autem in Deo etsi non est affectus humanus, nec perturbatio, est tamen voluntas certa puniendi. Pœna autem non potest esse iusta sine culpa. Nec potest iuste puniri, nisi qui vt peccator consideratur.

V I I I. Si quis dicat Deum nullis legibus esse obnoxium, ideoque perperâ eius actiones ad regulas iustitiæ exigî, cum nullis regulis astringatur: Respondebo, Dei naturam esse potentio rem omni lege. Eadem naturalis perfectio per quam impossibile est vt Deus mentiatur, aut

peccet, etiam causa est cur non possit odisse suam creaturam in fontem, aut destinare æternis cruciatibus hominẽ, nullã ob eius culpã. Immo verò si hæc essent vera, prudentis tamẽ esse hæc premere, nec hanc anagyrim mouere, & sibi potius imperare silentiũ aut ignorantiam, quã irrumpere in hæc arcana, quę enuntiata iniiciũt scrupulos, & ansam præbèt aduersariis infamandi verã religionem: & per quã nemo fit aptior ad officia vel Christiani, vel ciuis, vel ad partem vllam pietatis.

IX. Non effugeret qui diceret reprobatione nõ destinari homines ad damnationẽ, sed tantũ præteriri, aut non eligi. Nempe sic quæruntur verba molliora quibus eadem res dicatur. Perinde enim est siue Deus destinet hominem ad damnationem, siue id faciat ex quo damnatio necessariò sequatur. Quemcunque Deus non eligit, siue omissus dicatur, siue reprobatus, semper est exclusus a gratia Dei. Hanc exclusionem certa damnatio sequitur, quia sine gratia Dei non est salus. Enimvero cum apud omnes constet, homines electione destinari ad salutem, velim mihi dici ad quid hi non electi & præteriti destinentur. Sanè si electio destinat aliquos ad salutem, planum est hac reprobatione, quæ omissio appellatur, cæteros à salute excludi & ad perditionem destinari.

X. Quod si Deus in fontem creaturam destinauit ad perditionẽ, necesse est eandem destinauerit ad peccatum, sine quo non potest esse iusta perditio: & sic Deus causa erit impulsu peccati. Nec homo poterit iuste puniri ob peccatũ ad quod est aut præcisẽ destinatus, aut Dei voluntate compulsus.

XI. Sententiæ vero huic quæ statuit Deum in ele-

atione & reprobatione prius considerasse hominem ut lapsum quàm ut damnandum, non officit quod decreta Dei sunt æterna, & quod omnia ab æterno præsciuit. Nam quantumcunque Dei decreta sint æterna, inter ea tamen aliquis est ordo: Veluti decretum æternum de mundo euertendo per ignem ordine posterius est decreto de mundo creando. Sic quoque etsi Deus ab æterno impios pœnæ destinauit, nihil tamen obstat quo minus ordine prior sit consideratio qua considerauit homines ut peccatores, quam qua considerauit ut reprobos, aut pœnæ addictos.

XII. Nec verò ex sententia venerandæ Synodi, & Confessionis Ecclesiarum nostrarum, qua homo lapsus sit obiectum prædestinationis, sequitur Deum incerto fine hominem creauisse, aut fine quem sibi proposuerat excidisse. Finis vltimus Deo propositus, fuit illustratio suæ gloriæ, per manifestationem suæ bonitatis & iustitiæ. Ad hunc finem ut perueniret, decreuit creare hominem iustum, sed mutabilem & liberum. Hoc decretum sequitur, nō quidem tempore sed ordine, præscientia lapsus hominis. Hanc præscientiam ordine sequitur electio & reprobatio.

XIII. Maximè absunt à vero qui volunt Deum in eligendo & reprobando considerasse hominem ut nondum creatum: Perinde enim agunt ac si dicerent Deum considerasse hominem ut nihil, ac proinde ut non hominem. Sanè eo ipso quod hominem dicunt, dicunt aliquid: at aliquid considerare ut nihil, res est fomito propior. Qui vult hominē seruare aut punire: necessario prius voluit esse. Nam si Deus prius destinasset hominem ad pœnam, quàm constituisset eum


creare, perinde ageret ac si quis statueret liberos virginis cedere antequam de ijs generandis statuisset.

XIV. Denique cum primus actus omnipotentiæ fuerit circa nihilum occupatus, necesse est præcesserit actum misericordiæ & iustitiæ, qui non potest nisi circa ens aliquod occupari.

XV. Aliis verbis idē dicunt qui volunt Deū in prædestinādo considerasse hominē vt creabilē & labilē. Nam qui creabilē dicit, dicit non creatū & qui labilem dicit, dicit nondum lapsum. Nisi quod ad alia inconuenientia hoc addunt auctarium, quod ponunt potentiam in re quæ nihil est. In Deo quidem fuit potentia actiua creandi mundum, antequam mundum crearet: at in mundo non fuit potentia passiuā ad creationem, antequam crearetur. Sic nec homini nondum creato inesse potuit potentia ad creationem & lapsum. Ac planē, abhorret à ratione, vt qui non est, labilis appelletur. Tum si Deus elegit hominem creabilem, quid obstat quominus dici possit eum aliquot elegisse quos nunquam creaturus est? Nam hi quoque sunt creabiles. At si Deus elegit eos quos præsupposuit se creaturum, oportet voluntas creandi electionem præcesserit.

*Paulum Apostolum capite I X. ad Romanos nomine  
Massæ, corruptam massam intellexisse.*

### CAP. XIX.

- I.  Ntra hos limites se continuit Paulus cap. 9. ad Romanos: vbi agit de electione & reprobatione plenius & accuratius quàm  
vſpīam

vsquam alibi. Non si Solis radio scripsisset, clarius appareret eum loqui de massa corrupta; & de Dei voluntate qua hominum peccatorum alius eligitur alius reprobat.

II. Scopus Apostoli est retundere inanem fiduciam Iudæorum qui lege & iustitia operum gloriabantur, quibus quidem res videbatur absurda & impossibilis, Israelitas aut eorum maiorem partem excidisse Dei fœdere, aut inter Dei filios non censi. Hunc scrupulum ut de animis euellat, & fastum illum diluat, rem ab ipso fonte repetit, & causam cur quis censendus sit filius Abraham negat esse propagationem carnalem, vel iustitiam operum, sed Dei beneplacitum & electionem gratuitam, per quam de sobole Abrahami Deus quos voluit elegit, quos voluit reiecit: quorum vult miseretur, & quos vult obdurat: Eademq; ex massa quædam vasa præparauit ad honorem, alia vero præparata ad perditionem patienter pertulit. Quam ad rem affert; duo paria exemplorum, Isaacum & Ismaëlem: tum Iacobum & Esau: ponitq; Isaacum & Iacobum ut filios promissionis, & exempla electionis gratuitæ; Ismaëlem vero & Esau ut exempla reiectionis. Et exemplum quidem Esau & Iacobi videtur de industria adiectum ad *οὐκ ἔστιν* seu occupationem. Iudæi enim poterant excipere ideo discrimen fuisse inter Ismaëlem & Isaacum quia ille fuit ex ancilla, hic ex libera: Tum quia cum natus est Isaac, iam Ismaël signa dederat prauo ingenij & ea præstiterat ob quæ à fœdere debuit excludi. Huic obiectioni commodè occurrit Apostolus exemplo Iacobi & Esau, quorum vterq; filius fuit li-

beræ, & quorum cum neuter quicquam egisset boni nec mali, Deus tamen alterum amabat, alterum ode-  
rat.

III. Hæc omnia afferuntur ab Apostolo, vt doceat quæ ratione Iudæorum alios Deus elegerit, alios quantumvis legalis iustitiæ opinione inflatos reprobauerit. Hæc gens cum esset impura & corrupta, non potuit massæ puræ comparari. Ac planè præter rem ageret Apostolus si ad docendum quomodo ex gente corrupta Deus alios elegerit, alios reprobauerit, exemplo massæ non contaminatæ vteretur.

IV. Id ipsum euincunt exempla Iacobi & Esau, de quibus cum essent in vtero, nec dum quicquam fecissent boni & mali, Deus pronuntiat se Iacobum amauisse, Esau odio habuisse. Non potuit autem Deus considerare hos geminos in vtero, nisi quales erant: Erant autem corrupti & peccato originali inquinati. Nimirum non potest dici hic prælatus illi quod in vtero melior esset, cum neuter quicquam adhuc fecisset boni aut mali. Hoc nempe est super quo Paulus sciscitatorum ora comprimit, & non vult Deo litem intendi, aut ei responsari. Cum nulla sit causa nisi merum Dei beneplacitum cur de duobus æqualiter malis hunc illi prætulerit.

V. Nec parum virium est in vocibus, *odio habui*: non potuisset enim Deus odio habere creaturam, quam vt puram considerasset & expertem peccati.

VI. Non leue est quod electos sic describit, nempe eos esse quorum *Deus misereatur*, v. 18. Vnde & commate 23. vocantur *vasa misericordiæ*. Nam misericordia



præsupponit miseriam. Vim faciunt verbis Apostoli, qui per *misereri*, intelligunt simpliciter *benefacere*: Mihi sanè religio esset affirmare Deum miserum esse Christi hominis, cui tamen multò plus quàm cuiquam creature bonorum largitus est.

VII. Maximum quoq; pondus est in voce *obdurandi*: *Obdurat* (inquit Apostolus) *quos vult*. Quemadmodum per eos quorum Deus miseretur intelliguntur electi, ita per eos qui obdurantur, intelliguntur reprobi; Putare autem Deum statuisse obdurare hominem quem ut purum & in massa integra considerat, nefas est, & in Dei iustitiam contumeliosum. Hoc pacto Deus non modo innocentem puniret, sed & infontem deprauaret & corrumpere. Est enim obduratio species quædam pœnæ, ac proinde posterior peccato. Deus neminem obdurat nisi qui iam durus est. Sic Pharaonem obduravit iam suo pte ingenio contumacem & proum ad rebellandum.

VIII. Nec vero opus est multo acumine ad percipiendum, Pharaonem non esse exemplum idoneum reprobationis ex massa integra, aut hominis sine peccato considerati.

IX. Id quoq; apprimè obseruandum est, Apostolum agentem de reprobis, dicere eos esse vasa *κατασκευάσμενα εἰς ἀπώλειαν* *aptata seu preparata ad perditionem*. Non dicit Deum eos parauisse aut aptauisse ad interitum, ne videretur dicere Deum eis indidisse peccatum quo ad exitium præpararentur: At cum agit de electis, flexo sermone, dicit Deum eos præparauisse ad gloriam: quod quidem Deus facit dando eis spiritum & fidem. Non

temerè est quod Apostolus noluit utrobique eodem modo loqui: nempe quia Deus alios inuenit vasa aptata ad interitum, alios facit vasa destinata ad gloriam; idq; miserendo.

X. Hanc in rem disertus est Augustinus. Sexcentis enim locis hunc Pauli locum aut explicans aut attingēs, massæ nomine, corruptam & peccato inquinatam massam intelligit. Sic Epistola 105. *Quia vniuersa ista massa meritò damnata est, contumeliam debitam reddit iustitia; honorem donat indebitum gratia.* Et eadem epistola, *Merito peccati vniuersa massa damnata est: & paulo post. Si vasa sunt iræ quæ perfectæ sunt ad perditionem quæ illis debita redditur, sibi hoc imputent: quia ex ea massa facta sunt quam propter vnius peccatum meritò Deus iusteq; damnauit.* Idem inculcat Epistola 106. & Enchiridio cap. 98. 99. & 107. vbi massam perditionis vocat. Vide lib. 2. contra duas Epistolas Pelagianorum cap. 7. & lib. 5. in Iulianum cap. 3. Nec sane inter veteres quisquam vnquam censuit Paulum agere de integra massa, & non corrupta.

*Arminium verbis Pauli Apostoli claris & disertis  
ultra tenebras offundere.*

## CAP. XV.



SCRIPSIT Arminius tractatum super nono capite ad Romanos, anxia subtilitate, sed infelici successu. Cruciat enim Apostolum, & quasi fidiculis ab inuito exprimit quæ putat facere ad patrociniū erroris sui de electione ex fide præuisa.

I. Fingit mentem Apostoli esse docere, illos solos ex Iudæis filios Abrahami esse censendos, qui missa iustificatione per legem, iustitiam & fidem sectantur. Propositum autem secundum electionem negat esse decretum de electione singulorum, sed decretum generale & conditionatum de omnibus seruandis qui essent credituri. Quo decreto Arminius vult omnes homines eligi conditionaliter, quod sanè non est electio; cum electio non sit nisi singulorum qui eliguntur ex turba, alijs reiectis.

II. Fateor quidem doctrinam de electione gratuita viam sternere ad doctrinam de iustitia per fidem: Veruntamen tota hæc dissertatio Pauli de electione, quæ à versu 6. ad trigésimum extenditur, non agit de iustificatione per fidem, neque vult hoc loco obtinere Apostolus, hominem per fidem iustificari, aut Deum eos eligere qui fide Christum apprehendunt. Sed per

M iij

doctrinam de electione, ad tractatum de iustificatione per fidem, quem postea subiicit, aditum sibi praestruit. Hoc vnum vult hic obtinere, non ex operibus legis hominem vere esse filium promissionis, sed ex electione gratuita & ex Dei misericordia: Manifestum enim est hic non opponi opera fidei, sed electioni & Deo vocanti. Sic versu 12. non dicit, *Non per opera sed per fidem: sed non per opera sed per vocantem*. Sic cum versu 16. dixisset, *Non est volentis neq; currentis*, non addit, *sed credentis*, quid ergo? *sed misereantis est Dei*.

III. Enimvero cum agitur de causa cur de duobus in peccato pariter conceptis (quales erant Esau & Iacob) hunc illi Deus praeulerit, sola Dei misericordia & electio gratuita consideranda est, non vero fides, quae non est causa electionis sed effectum, nec electionem praecedit sed sequitur. Sic Paulus 1. Cor. 7. vers. 25. dicit *se misericordiam consecutum à Deo ut esset fidelis*, non vero quia futurus erat. Quocirca Paulus toto hoc sermone quo agit de causa discriminis quod Deus constituit inter duos naturae pares, nullam facit mentionem fidei. Sed hoc tractatu demum absoluto, descendit vers. 30. ad iustitiam fidei, ut ad fructum qui electionem sequitur.

I V. Sed Arminius ad subsidium suae causae, immutat verba Pauli, & de suo aliquid non bona fide intrudit. In locum enim eius quod Paulus ait, *non ex operibus sed ex* <sup>p. 271.</sup> *vocante*, substituit hæc sua & à se conficta, *non ex operibus sed ex fide qua vocanti Deo pareatur*, cum tamen tota illa dissertatione quæ agitur de electione, nulla fiat mentio fidei, nec eius vel minimum vestigium appareat.

V. Exemplis vero Isaaci & Ismaëlis, nec non Isaaci & Esau mirum quantum Arminius abutitur. Pertendit eos hic proponi, non ut exempla, sed ut typoseorum qui ex operibus iustitiam sectantur; non ex fide. Certè inter typum & rem typo designatam debet esse aliqua conuenientia. Quis autem fando vnquam audiuit Ismaëlem voluisse ex operibus legis iustificari, non ex fide? cum tunc temporis non esset lata lex, nec hæc discrimina iustificationis per legem aut per fidem essent nota; nec credibile sit vnquam Ismaëlem hæc cogitasse, aut curauisse? Perinde ergo agit Arminius ac si Nimrod statueretur typus iustitiæ Pharisaicæ. An potest nox typus esse lucis? an Esau quem Apostolus Hebr. 12. v. 16. vocat profanum, ac proinde & legis contemptorem, potest esse typus eorum qui zelo legis accensi volunt iustificari per opera? At operæpretium est audire cur velit Esau typum esse filiorum carnis, eorumque qui per opera iustitiam affectant. Nempe, inquit, quia prior natus est. Acutè: debuerat dicere quia rufus fuit, aut venator. Pudet hæc refellere. Et tamen in his figmentis vir bonus ponit præcipuum præsidium suæ doctrinæ de electione ex fide præuisa.

VI. Tum vide quam licenter Apostolo illudat; dum enim Ismaëlem & Esau ponit non ut exempla reiectionis ex arcano Dei consilio, sed ut typum nihil habentem conuenientiæ cum re significata, perinde usurpat hæc nomina, ut Logici Socratem, aut Legisperiti Titium & Mæuium pro quolibet homine usurpant.

VII. Quod si ponderamus accuratè quid sit odisse hominem adhuc in vtero existentem, prius quàm quicquam fecerit boni & mali, facilè perspicimus Esau non tantùm hîc poni vt typum, sed & vt exemplum, cui reapse id conuenerit, etiam si pro typo non adhiberetur. Nam nec Malachias vnde hæc verba desumpta sunt Esau ponit vt typum, sed vt exemplum.

Quomodo autem illud quod dicitur Deum odisse Esau adhuc in vtero existentem, priusquam quicquam mali commisisset, possit trahi ad Arminij institutum, & pertinere ad typum eorum qui volunt ex fide iustificari, ipse viderit: ego certè non video.

VIII. Paulus addit, *Quid ergo dicemus? num iniustitia apud Deum?* Sensus est planus, isque pendens ex præcedentibus. Posuerat duos gemellos paris conditionis & naturæ, neutrum altero meliorem, quorum tamen Deus alterum amat alterum odit, causamq; discriminis attulerat meram Dei voluntatem, qui misereretur quorum vult, non vero præuisionem alicuius virtutis in altero. Hinc nascitur obiectio: An Deus iniustus qui paribus dat imparia? & cur non vtriusq; miseretur? Quid hîc Arminius? nempe hæc sic accipit quasi Paulus quæreret an est iniustitia apud Deum, qui cedere excludite eos qui volunt iustificari per legem quam ipse tulit, & qui vult eos qui credût in Christum iustificari? Hæc quidem audax est coniectura; & cuius in præcedentibus ne minimum quidem vestigium. Quod si cuiuis licet tam multa ex suo ingenio comminisci & Scripturæ addere, nihil est tam absurdum aut impium quod non possit probari ex Scriptura. Quid quod nullum hic

lum hic nec color nec ratio ? Nam quæ hic species iniustitiæ in Deo ? aut quis vsq; adeo vecors, vt velit cum Deo expostulare, quod reos violatæ legis velit iustificare per fidem in Christum, & absolueret ? Profectò quicumq; miratur aut quærit, cur Deo visum sit peccatores saluare per fidem in Christum, non desiderat in Deo iustitiam, sed rimatur arcana diuinæ sapientiæ. Quod si hæc fuisset mens Apostoli quam Arminius ei affingit, promptum fuisset respondere, non ideo Deum esse iniustum qui seruat credentes, & qui ijs qui iustificari nequeunt per legem, cuius violatæ sunt rei, meliorem iustitiam suppeditat : aut qui fœderi legis, quod peccato irritum factum est, aliud substituit per quod homo saluetur. Nihil tale Paulus respondet, sed Deum ipsum introducit sic respondentem, *Miserebor cuius misertus fuero, & commiserabor quem commiseratus fuero.* quæ verba non agunt de iustificatione per fidem, sed de electione Dei gratuita, qua de duobus hominibus pariter in peccato conceptis pariterq; reis, alter alteri præfertur. Non dicit Paulus, idcirco quia lex violata est, ideo misericordia opus fuisse, sed assertit causam huius discriminis inter æquales naturâ, *Miserebor cuius misertus fuero.* Iuxta Arminium debuerat dicere, *miserebor quæ ratione voluero, & tale fœdus instituam quale mihi collibuerit.* Vult enim Deum non agere de electione singulorum, sed de modo quem Deo placuit eligere ad vtendum misericordia. Quasi dixisset, *Miserebor vt volam, non verò Miserebor* C V I V S *voluero* ; Sanè vox C V I V S quæstionem hanc profligat, & debile Arminij acumen retundit : hæc enim vox designat singulos,

N

non verò modum quo Deus erga eos vtitur misericordia. Nam & is qui rogauerat, *Quid igitur dicemus, an iniustitia apud Deum?* mouerat scrupulum super obduratione aut reiectione singulorum, non super modo per quem Deo visum est homines seruare, aut eorum misereri.

IX. His verò verbis, *Miserebor cuius misertus fuero; & non volentis est, neque currentis, sed miserebor Dei*, quibus disertè salus & electio ascribitur Dei beneplacito, non humano arbitrio Arminius tenebras offundit. Sic enim interpretatur, *Non est volentis, supple iustitia.* At versibus præcedentibus non actum est de iustitia, sed de electione. Tum verba illa *Miserebor cuius misertus fuero*, sumpta sunt ex Exodo cap. 33. v. 19. vbi agitur de salute, non de iustitia. Factamen hic agi de iustitia. Nonne hinc fit, fidem non esse volentis, ac proinde nec salutem? Si quidem salus est per iustitiam, & iustitia per fidem?

X. Vnâ in remirè se prodit sectariorum peruicacia & affectatus stupor. Paulus inducit percontatorem sic loquentem, *Cur adhuc conqueritur? nam voluntati eius quis resistit?* Quibus verbis liquidò liquet capite hoc agi de voluntate Dei cui resisti non potest, & Arminium vltro cæcutire, dum asserit hic agi de voluntate antecedente, cui vult posse resisti.

XI. Quid quod Arminius tacitè Paulum accusat stuporis aut præposteræ modestiæ? Nam quid opus erat in negotio electionis & reprobationis singulorum comprimere ora percontatorum, dicendo. *O homo, quis tu es qui responsas Deo?* cum ex doctrina Arminij



præsto esset responsio facilis & expedita, Deum hunc elegisse, quia prævidit eum crediturum; illum verò reprobasse, quia prævidit non crediturum? An hæc Apostolus non vidit? an vidit quidem, sed nobis invidit hanc præclaram nodi istius solutionem, quæ his tenebris lucem inferret? At mihi ignoratio Pauli, cuiusquam perspicaciâ semper erit potior.

XII. Arnoldi Coruini in enucleando hoc capite mirificum est acumen, & iocularis audacia. Is in opere suo aduersus Tilenum cap. 9. typum Iacobi & Esau sic exponit. *Scilicet (inquit) ut ibi maiori prælatus fuit minori, sic etiam figuratum fuisse, non ex lege, licet prius data, sed ex fide salutem esse.* Nempe si huic creditur, maior frater est lex, minor fides: Ergone Deus odit legem antequam fecisset quicquam boni & mali? Pudet hæc refellere. Immo verò, cum Deus euāgelisauerit ipsi Adamo, per fratrem minorem natu lex potius esset intelligenda. Voluit fortasse per maiores natu intelligi eos qui per legem volunt iustificari: at & hic non minus difficile est capere, quomodo Deus eos oderit antequam quicquam fecissent boni aut mali: & quomodo maiores natu, cum nunquam fuerint filij.

XII. Deniq; veritas hic tam est euidens, ut Vorstius Collatio-  
nis ad-  
uers. Pif-  
catorem  
Jes. 1412. relicto Arminio in nostras partes concedat. Censet enim scopum Apostoli hoc capite esse docere iustitiam & salutem æternam, non ex operum dignitate, aut vlla carnali prærogatiua, qualibus Iudæi gloriabantur, sed ex mera Dei misericordis *discreta* pendere.

N. ij:

*Sententia partium super doctrina  
Prædestinationis.*

CAP. XVI.

I. **P**RÆDESTINATIONEM diximus esse decretum Dei, per quod in salutis negotio Deus ab æterno constituit quid de vnoquoque homine facturum sit: duasque eius esse seu partes seu species, Electionem & Reprobationem.

II. Arminius Disputationum Theologicarum Thes. 15. Prædestinationis nomine solam, Electionem intelligens, eam sic definit. *Prædestinatio est decretum Beneplaciti Dei in Christo, quo apud se ab æterno statuit fideles quos fide donare decreuit, iustificare, adoptare, & vitam æternam donare ad laudem gloriose gratiæ suæ.* Ceteri omnes eius sectarij vno ore dicunt Electionem esse decretum Dei de saluandis in Christo credentibus, & in fide perseveraturis.

III. Hic verò Arminiani mira calliditate mentem suam abscondunt: Nam definitio ista posita ab Arminio videtur docere Deum certos quosdam homines elegisse ad salutem. Sed secus est, neque hæc mens est huius definitionis: his enim vocibus, *FIDELES QUOS fide donare decreuit*, non intelligunt certos quosdam homines, quos Deus præcisè elegerit: sed tantum innuunt, quales Deus eligat, nempe credituros. Voluntate ve-

rò illa qua Deus decreuit homines fide donare, docent  
 Deum sepe frustrari, & posse damnari quem Deus sic  
 elegerit. Hoc enim decretum negat esse præcisum, sed *Armin-  
ch. p. 101  
dicit hoc  
decretū  
esse condi-  
tionale  
de quali-  
bet, si cre-  
dat, ser-  
uando.*  
 conditionale & quod pendeat ex fide præuisa. Cuius  
 quidem fidei gratia Dei sit causa partialis tantum, nam  
 etiam suas hic esse partes libero arbitrio, penes quem  
 sit benè aut malè uti gratia Dei præueniente & comi-  
 tante, eamq; aut percipere aut respuere. Ergo sta-  
 tuunt Deum quidem hoc decreto seriò intendere sa-  
 lutem omnium hominum, eisque statuisse dare sufficien-  
 tem gratiam, viresq; ad credendum: sed Deum in mul-  
 tis hoc illo suo decreto & intentione frustrari, obstan-  
 te voluntate humana, per quam fit ut Deus fraudetur  
 desiderio suo naturali, & prima intentione, quæ sanè *Coll.  
Flag.  
p. 96.*  
 non potuit esse non optima. Ne quis ergo putet hoc  
 Electionis decreto quod definit Arminius, certos quos-  
 dam electos destinari ad vitam, tenendum est hoc de-  
 cretum ex mente Arminij ad omnes omnino homines  
 conditionaliter pertinere, & voluntate antecedente  
 Pharaonem, Iudam, &c. esse conditionaliter electos. *Arminol.*  
 Quapropter negant Arminiani numerum electorum *p. 192*  
 esse certum ex præcisa Dei ordinatione, quin nec augeri  
 possit nec minui.

I V. Obserua etiam definitionem illam ab Arminio  
 positam non pertinere ad infantes immatura morte su-  
 blatos. Volunt enim Arminiani solos credentes eligi.

V. Præter hanc electionem generalem & conditio-  
 nalem, per quam omnes homines sine exceptione sunt  
 electi, aliam faciunt electionem singulorum, quæ nita-  
 tur fide præuisa. Hanc definiunt esse Decretum Dei

absolutum de saluandis certis quibusdam hominibus, quos ab æterno præuidit credituros in Christum, & in fide perseveraturos; Quam fidem & perseverantiam dicunt in decreto electionis considerari ut iam impletam. Iidem censent hanc electionem dum sumus viatores in terris, esse incompletam & reuocabilem. Sic enim Greuinchovius p. 136. & 137. *Vt salutis nostræ bona sunt incompleta quæ continuantur fide continuatâ, & abnegatâ fide reuocantur: sic electio est incompleta in hac vita, non peremptoria, non irrevocabilis.* Sed peracto cursu electionis hoc decretum volunt demum esse completum & irrevocabile.

VI. Voluntatem Dei de saluandis certis quibusdam hominibus, volunt esse posteriorem voluntate humana, & inniti præuisioni fidei.

VII. Priorem illam electionem volunt pertinere ad voluntatem antecedentem, posteriorem verò ad consequentem.

VIII. Quod Deus suppetit hominibus media ad credendum, putant actum esse providentiæ, non verò huius electionis, qua certos quosdam homines destinavit ad gloriam: & pernegant veram fidem & perseverantiam in fide effectum esse huius electionis posterioris & absolutæ: cum potius præcisa electio ab istius fidei præuisione dependeat, & fides prior sit electione. Negant enim Deum quenquam ad fidem præcisè prædestinasse: sed volunt habentes fidem prædestinari ad salutem.

IX. Totam verò doctrinam Electionis quatuor decretis comprehendunt, quæ sic inter se necantur per-

petua concatenatione, vt posteriora à prioribus dependeant.

X. Primum decretum est de dando Filio ad abolitionem peccati, & redemptionem generis humani, qua redemptione volunt totum genus humanum esse reconciliatum, & omnibus impetratam remissionem peccatorum. Secundum decretum est, quo Deus decreuit saluare credentes, & in fide perseueraturos. Hæc est illa generalis & cōditionalis electio. Tertium decretum est, quo Deus decreuit omnibus hominibus dare sufficientem gratiam ad fidem & resipiscētiā: quas vires dicunt dari irresistibiliter: immo & Deum teneri dare omnibus hanc gratiam; actum verò ipsum credendi, non dari nisi resistibiliter, ne vis fiat humanæ voluntati. Negant ergo Deum decreuisse cuiquam dare absolute & præcisè fidem ætūmq; credendi. Quartum denique & postremum decretum volunt esse illud, quo Deus absolute & præcisè decreuit seruare certos quosdam homines ex fide eorum præuisa.

XI. Hæc sunt scita Arminianorum, & summa totius eorum doctrinæ, in qua peruidenda & introspicienda labor est non mediocris: ita sensus suos inuoluunt, ita mentem abscondunt, vt semper rima aliqua pateat ad effugium: quorum mentem qui non pernouerit, facile credet eis fieri iniuriam, ita speciosis coloribus incrustant errorem, quasi qui nobiscum sentiant, cum tamen absint longissimè. Tum si quis in exponenda eorum sententiā non expressit omnes eorum distinctiunculas, aut non obseruauit omnia di-

uerticula, dici nō potest quantas excitent tragœdias, quam miserabiliter lamententur, quasi de vi & atroci calumnia: Parati etiam eiurare Arminium, & sua ipsi conuellere, & Pontificiorum causam tueri, denique nihil non agere dum nostrorum manus effugiant.

XII. Nos verò apertius rem gerimus, nec Dei electionem tam operosè in articulos concidimus: nec Deo præscribimus ordinem per quem debuerit aut debeat digerere suas cogitationes & disponere decreta. Electionem generalem nullam agnoscimus, cū non sit electio vbi nihil relinquitur: nullaque electionem agnoscimus nisi singulorum: eamque præcisam & Dei consilio definitam. Nec putamus quemquam electum, nisi qui ad salutem certò & infallibiliter peruenturus est. Nec credimus nos electos ex fide, nec ob fidem, sed ad fidem. Deus enim non eligit bonos bonitate quæ electionem præcesserit, sed eligendo vult efficere bonos: Nec quicquam in nobis præcitat boni, nisi quod ipse facturus est: quod sanè non est præiudicare, sed præordinare: Nec electionem singulorum à voluntate humana suspendimus. Immo verò obfirmationem humanæ voluntatis in fide, & perseverantiam, credimus ab electione Dei gratuita proficisci, per quam decreuit dare media ad finem ijs quos destinavit ad finem.

XIII. Inter nos quidem & Arminianos convenit, Deum in eligendo considerare hominem non modò vt lapsum, sed & vt suo beneficio crediturum: quos enim ad salutem destinavit, destinavit quoque ad fidem & resipiscentiam. At non putamus in electione  
fidem -

fidem considerari ut impletam, sed ut implendam per Dei gratiam, quæ sit effectus electionis: idque fieri non quidem cogendo voluntatem, sed flectendo, & dando ut sponte sequatur vocantem. Nec vi quæ ideo irresistibilis dicatur, quia ei non possis resistere etiam si velis, cum hoc ipsum pars sit gratiæ nolle resistere. Deum vero TENERI dare gratiam suam hominibus, ut dogma contumeliosum in diuinam Maiestatem abominamur. Tum Arminianorum sententiam qua statuunt Deum omnibus ex æquo cupere salutem, ut sententiam aduersam scripturæ & experientiæ aspernamur.


XIV. Electionem dicimus esse Decretum Dei æternum, eoque immutabile, quo ex genere humano lapsus & corruptus, Deus decreuit certos quosdam homines ex mera sua gratia per Christum seruare, & media eis dare quibus ad salutem perueniant.

XV. Decretum de danda fide & resipiscentia facimus partem istius decreti. Decretum enim de fine includit media. Sic decretum de bello gerendo includit equos, arma, commearum. Et voluntas qua quis decreuit ædificare, includit necessario voluntatem congerendi lapides & ligna. Nec putamus tutum τελευταια diuina consilia, & quasi in frustra scrupulosè concidere.

O

*Arminianos facere præuisam fidem , causam  
Electionis singularium.*

C A P. XVII.

I. OLLATORES Hagienſes Arminiani, & quotquot ſunt ſectarij, pluſculis in locis profitentur ſe non facere fidem cauſam electionis, ſed tantum conditionem præcedaneam, & aliquid prærequiſitum ante electionem. Hæc illi verbo tenus: nam ijdem ſummo ſtudio congerunt argumenta quibus conficiatur fidem eſſe cauſam electionis ſingularium. Quin & inuitis aut imprudentibus sæpe excidit quod premere conantur; & quaſi ſorices ſuo indicio capiuntur.

II. Nicolaus Greuinchouius pag. 103, fatetur Arminium ſentire electionem INNITI præuiſæ fidei. Eodemq; loquendi modo vtuntur Remonſtrantes collatione Hagienſi. p. 117. Et Arminius Declarationis p. 47. *Decretum quo Deus decreuit certas quaſdam perſonas ſaluare innititur præſcientiæ Dei qua ab æterno ſciuit qui nam credituri, &c.* Arminiani Reſponſionis ad VValachrianos pag. 38. hæc habent. *Statuimus fidei & infidelitatis præuiſionem, decretum prædeſtinationis ordine antegreſſam eſſe, & priori iſti præſcientiæ hoc decretum INNITI.* Profecto cæcus eſt qui non videt aliud eſſe ſequi aliquem, aliud ei inniti. Non ſi ſtella



oriens ordine antecedit sequentem, idcirco posterior innititur priori. Non ergo Arminius ponit fidem tantum ut rem antecedentem, sed ut aliquid quod sustentet electionem, & in quo fundetur, cuique innitatur electio. Non minus autem electionem à fide suspendit qui dicit fidem esse fundamentum, quam qui dicit esse causam electionis. Per hanc enim datur electioni ut sit, per illud ut stet & firma sit: Utrobique Deo par sit iniuria, siue dicas beneplaciti diuini causam esse virtutem aliquam quæ sit in homine, siue dicas beneplacitum Dei habere ab humana virtute suam firmitatem.

III. Sed & iisdem verbis non obscure agnoscunt fidem præuisam esse causam electionis: volunt enim præuisionem fidei perinde antecedere electionem, ut præuisio incredulitatis ordine antegreditur reprobationem. At reprobos destinari damnationi ob incredulitatem, & quia sunt increduli, ipsi passim agnoscunt. Et Arminius in Perkinsum p. 86. rotundè affirmat peccatum esse causam meritoriam reprobationis. Sic Arnoldus pag. 151. *Electio & reprobatio personarum singularium ex præuisione fidei & infidelitatis factæ sunt.* Tuam fidem, Arnolde, ecquis potest suspicari, te voculam EX æquiucè accipere, & in reprobatione quidem causam denotare, in electione verò conditionem? Oportet igitur agnoscant electos destinari ad salutem ob fidem præuisam, & quia sunt credentes fidemque præuisam esse causam electionis singulorum.

IV. Nihil autem interest dicas electionem inniti fi-

O ij

dei præuisæ, an verò præuisioni fidei. Vtrobique enim fides sit causa electionis, hic quidem proxima, illic remota. Fides enim præuisa causa sit præuisionis: præuisio causa electionis. Nam cur Deus præscit eos credituros nisi quia credent? cur autem eligit nisi quia præscit eos credituros? Verba hæc sunt Arminij in Perkinsum pag. 142. *Quod Deus præscit, ideo præscit quia futurum est.*

In VII. lachr. p. 39. V. lidem in Valachros paulò post, quanquam timidè, vtuntur VOCE DEPENDENDI, vt faciant electionem à fide dependentem. *Et quanquam* (inquiunt) *ἡ δὲ διάβλητος* sit illa vox dependendi, qua nunquam in hoc argumento vti solemus, tamen si maleuolus absit animus, ne ad minimam alicuius absurdi suspicionem trahi potest. Immo verò ad maximam; Nam ipse Greuinchouius agnoscit dependentiam strictè sumendo causalitatem arguere, & dependentiam superioris ab inferiore. Ac profecto hi homines non obscurè indicant quàm cupidè hac voce vrerentur, nisi metuerent infectionem nostrorum.

p. 198. VI. Extat Greuinchouij tractatus hoc titulo, *De Electione ex fide præuisa*: At illud EX non tantum indicat prioritatem, sed & causalitatem: Nam quis ferret hominem qui diceret Tiberium esse ex Octauiio Augusto, aut hunc annum esse ex præcedente, quia vnus alterum antecessit? Homo latinitalis non imperitus, satis sciuit, præpositionem EX non esse aptam ad solam prioritatem fidei denotandam, nisi præter prioritatem aliqua insuper efficientia aut dependentia accederet. Quocirca idem p. 24. hæc habet. *Naturæ legum ac conditionum præscriptarum omnino conueniens est vt voluntas*

*iudicis à conditione postulata ac præstita moueatur ad præmium.* Hanc conditionem præstitam Arminiani dicunt esse fidem, quæ in electione ( si eis creditur ) consideratur vt præstita. Volunt ergo Deum ab hac conditione impleta moueri vt det præmium, quod si verum est, planè fides causa est decernendi & dandi præmij, quippe quæ iudicem mouerit.

VII. Sic Collatione Hagienfi Arminiani pertendunt Deum non eligere sine qualitarum respectu. Quod quidem verum est non modo de fide, sed & de resipiscencia, dummodo hoc sic accipiatur, Deum in eligendo considerare homines vt beneficio suo credituros, & renouandos resipiscentiâ. Si respectum illum aliter accipis, oportet hic respectus causa sit: Aliquis enim dicitur aliquid eligere respectu alicuius qualitatis aut virtutis, qui ista qualitate aut virtute mouetur ad eligendum: alioquin non electurus.

VIII. Quid quod Collatores Hagienfes Arminiani p. 86. vtuntur voce causæ. *Mittit Deus verbum suum quò ipsi visum fuerit, non secundum aliquod decretum absolutum, sed propter alias causas in homine latentes.* Nempe homo causa est cur vocetur: vnde fit vt causa etiam sit cur eligatur: Nam quod causa est cur Deus vocet hominem ad salutem, planè causa est cur Deus velit eum seruare: hæc enim sunt connexa. Idem p. 109. *Absurdum est ponere absolutam Dei voluntatem in decreto electionis pro causa prima, quæ reliquas causas, Christum puta, fidem, aliasq; causas omnes antecedit.* Audis fidem poni inter causas electionis? Quocirca Arnoldus p. 53. relinquit in medio, an fides debeat vocari causa, an ve-

rò conditio. *Sine* (inquit) *fides vocetur conditio, sue causa, posito semper pro confesso Dei donum esse, hoc solum queritur quomodo fides se habeat ad electionem.* Et paulò ante dixerat. *Si quis diceret fidem in decreto electionis habere rationem causæ, non tamen proinde negaret eam donum Dei esse.* Non obscurè innuens, quàm pronus sit in eam partem: ac censens non temerè culpandum qui fidem causam electionis vocauerit.

**I X.** His adde quod Arnoldus p. 186. & cum eo cæteri pertendunt fidem non esse electorum, sed electionem esse fidelium. Nos quidem ex Paulo ad Titum cap. i. v. i. dicimus fidem esse electorum, quod quidem sic accipimus quia electio causa est fidei: cui nostræ assertioni cum suam opponant vt contrariam, qua dicunt electionem esse fidelium, quid aliud volunt quàm fidem esse causam electionis?

**X** Ponderentur quoq; momenta rationum. Collatione Hagiensi profitentur se non detrectare scribere vncialibus literis & subsignare, electionem factam à Christo citra considerationem vllam bonorum operum. Idem tamen ad nauseam inculcant electionem esse decretum de saluandis credentibus, & neminem à Deo eligi nisi respectu ad fidem. Ego verò scire velim cur tam sedulò excludant considerationem operum ab electione, cum studium bonorum operum non minus sit conditio prærequisita ad salutem quàm fides? Quis per hæc non videt fidem non poni ab eis merè vt conditionem prærequisitam? Nam si fides ita ab eis consideraretur, planè studium bonorum operum fuisset adiungendum, & eodem gradu cum fide collocandum.

XI. Quod si Deus eligit ad salutem non quos absolute decreuit, sed quos praevidit credituros, planum est Deum in electione respicere ad dignitatem aliquam quae sit in his, non verò in illis. At non est consentaneum quenquam sapientem eligere optimos, alia de causa quàm quia sunt optimi. Nam si bonitas fidelium praecedat electionem, improbè ageret qui eos alia de causa eligeret quàm quia sunt boni.

XII. Ac profecto quodcumque aliquid homini promittitur sub conditione quae sit humani arbitrij, planum est impletionem conditionis ab humano arbitrio, causam esse cur promissio impleatur: Arminiani autem pertendunt Deum dare, immò & teneri dare omnibus hominibus gratiam viresq; sufficientes ad credendum: uti autem ista gratia aut non uti, esse penes arbitrium hominis.

XIII. Nec verò difficile est ab eis extorquere quod volo. Dicat enim nobis Arminij schola quid Deum mouerit ad eligendū volūtate cōsequente Simonem Petrum, potius quàm Simonem Magum? cur Gregoriū potius quam Iulianū? Non habet quod respondeant, nisi id factū quia in illis Deus praevidit fidem, in his incredulitatem. Itaque etsi obtinerent, fidem praeuisam ex ipsorum doctrina non fieri causam cur Deus hunc destinauerit ad salutem; tamen necesse est fateantur iuxta Arminium, fidem praeuisam esse causam discriminis inter electos & reprobos, ideoque causam esse cur hic illi praefatur: Quod sanè nihil est aliud quàm esse causam electionis. Omnis enim electio est comparatiua, & infert alicuius aut aliquorum reiectionem.

XIV. Sic cum voluntate Dei eligentis negant certum esse & definitum numerum electorum, necesse est velint humanam voluntatem causam esse cur talis sit numerus : & sic unusquisque causa erit cur sit de numero electorum, ac proinde & causa electionis suæ.

XV. Quantumcunque igitur hanc suspicionem à se amotam velint, nunquam tamen abstergent hanc maculam; per quam sunt in Deum contumeliosi, & labefactant fidei firmitatem. Vtpote qui electionem Dei æternam & beneplacitum, ab humano suspendunt arbitrio : & volunt salutem esse volentis & currentis : ponuntque in homine dignitatem aliquam & virtutem, quæ causa sit cur salus huic potius quàm illi sit in æterno Dei consilio destinata : unde fit ut nunc fides & salus sit incerta : quippe quam etsi Deus certò præscit, non tamen certò & infallibiliter vult, electio enim non est actus præscientiæ, sed voluntatis, hæc autem voluntas quomodo potest esse certa si pendet à re incerta, nempe ab humana voluntate ? Sed hæc obiter : excutientur enim accuratius suo loco.

*Excutitur*

*Excuitur Decretum electionis generalis, qua Arminius vult omnes homines esse electos ad salutem sub conditione fidei.*

## CAP. XVIII.

I. **D**OCVIMVS cap. 5. voluntatem Antecedentem, prout eam Arminius post Damascenum accipit, merum esse figmentum, & rem in Deum contumeliosam. Hoc fundamento subducto, corrui electio illa vniuer-

falis, & omnibus hominibus communis, sub conditione fidei præstandæ. Hanc enim electionem generalem Arminius vult pertinere ad voluntatem Dei antecedentem.

II. Quibus adde quæ diximus cap. 12. vbi dissoluimus catenam quatuor Decretorum, quibus Arminiani totam Electionis doctrinam comprehendunt: Ibi demonstrauius secundum Decretum, per quod salus non decernitur singulis, sed tantum statuitur eos esse seruandos qui credent, non esse Decretum prouidentia, nec prædestinationis, sed esse regulam Euangelij, quæ præscribit viam salutis.

III. Solo nomine electionis profligatur hæc quæstio, non enim potest electio esse omnium: Non eligit qui omnia capit: Nec fuisse diluuij tempore Noah ad id electus vt esset superstes diluuij, si nemo hominum di-

luvio periisset : Is demum eligitur qui alijs præfertur, cæteris præfretis, aut post habitis.

IV. Et cum in omnibus fidei capitibus, debeamus sapere ex scriptura, multo magis in tam sublimi argumento, quod captum nostrum exuperat. Adant ergo Arminiani quonam loco scripturæ omnes homines dicantur electi, electione ista quæ reprobationi opponitur : ( de ea enim hîc agitur ) non de electione singulorum volûtate consequente : Quis fando vnquam audiuit, Pharaonem, aut Iudam ad electionem Dei vllatenus pertinere ? Petrus quidem 2. Epist. cap. 1. vocationem electioni adiungit, iubens nos firmare vocationem nostram & electionem, id est studio bonorû operum efficere vt sensus vocationis efficacis & persuasio electionis in dies in nobis augeatur. Sed non ideo vocationem & electionem vult esse eadem, nec omnes quoquo modo vocatos esse electos. Immo *Multi vocati, pauci electi*. Mat. 20. 16.

V. Id quoq; obseruandum, per hanc generalem electionem non decerni quinam sint seruandi, sed quales : atq; ad id trahi ab Arminianis caput nonum ad Romanos, vbi tamen apertè agitur de Dei beneplacito & miseratione erga singulos aliquos, & peculiare personas, quas Deo visum est eligere : Nam illud *Miserebor quorum misertus fuero*, agit de certis quibusdam hominibus; non verò de qualibus; alioqui dixisset *miserebor quallium libuerit*, non verò C V I V S, vel, Q V O R V M. Nec exempla Isaaci & Iacobi, qui fuerunt singulares quædam personæ, fuissent accommodata ad explicandam electionem, non singulorum, sed vel *omnium* vel *qualium*.



VI. Velim vero discere ex Arminianis an Iudas, an Pilatus, an Sacerdotes & Scribæ, quorum impulsu & accusationibus Servator in crucem actus est, fuerint electi conditionaliter, & electione illa generali comprehensi: Si non fuerunt comprehensi, concidit illa electio generalis & conditionalis, quam volunt ad omnes homines extēdi. Vicissim si Iudas & Sacerdotes isti fuerunt electi conditionaliter, decretum Dei de crucifixione Christinon potuit esse absolutum, quippe quæ facta est conspiratione hominum, qui electi erant conditionaliter, sub cōditione quam poterāt implere: Poterat ergo fieri ut ante hoc facinus conuerterentur & fideles euaderent, & ita Christum non crucifixissent.

*crenir.  
p. 101.*

VII. Quin & Decreto illo generali quo omnes homines dicuntur electi sub conditione fidei præstandæ, apertè Deo illuditur: Ineptum est enim decretum quod sit sub conditione quam is qui decernit, eo ipso momēto quo decernit, certò scit non esse implendam. Maximè vero si hæc conditio non potest impleri nisi ope & virtute eius ipsius qui decernit: Tali enim decreto Deus sibi ipsi figeret legem non homini. Attamen experimento constat Deum non administrare omnibus media necessaria ad hanc conditionem implendam. Non enim omnibus vult annuntiari Euangelium, nec omnibus dat Spiritum regenerationis.

*Decretū  
conditio-  
nale de  
quolibet  
fieri dicit  
servando  
Et p. 2.*

*Decretis  
salutem  
conferre  
sub cōdi-  
tione fidei  
præstan-  
dæ ab  
iis quibus  
salutem  
applicat.*

VIII. Deniq; quid iudicandum sit de generali hac electione apparet ex confectarijs quæ inde deducuntur: Quorum illud est præcipuum & longè determinum, quo negant electorum numerum esse certum & Dei eligentis voluntate præfinitum: unde fit electio-

*Arnold.  
p. 192.  
Numerū  
statuitis  
certū esse*

*Ex  
precisa  
Dei ordi-  
natione  
determi-  
nati, qui  
nec au-  
geri nec  
minui  
possit, id  
que ex  
eadē or-  
dina-  
tione. Lōgē  
vero ali-  
ter Euan-  
gelū &  
vera præ-  
destina-  
tionis do-  
ctrina,  
quæ in  
genere  
tantum  
docet  
quales  
sint ele-  
cti.*

nem singularium certam non esse, ex Dei voluntate. Nam si certum esset Dei decreto ut hic aut ille esset de numero electorum, ex singulis iunctis summa integra & certus numerus necessario conficeretur. Illud vero quod Arnoldus ait. p. 192. numerum electorum posse augeri vel minui, tale est ut ad eius auditum nemo bonus non cohorrescat. Nam quid est in Deo minuere numerum electorum nisi mutare sententiam, & eximere numero electorum quos re non satis probè perpensa, & malè subductis rationibus, in album electorum re-  
tulerat, referendos potius in reproborum nigrum?

*I X.* Eiusdem & *περί τῆς ἐκλογῆς* est illud Greuinchouii in Amesium p. 136. facientis electionem quādam dimidiatam & incompletam, eoque reuocabilem. *In Scripturis* ( inquit ) *dicuntur electi ; 1. incompletè secundum statum præsentem, quā tales, puta fideles hoc tempore, excepto ultimo vitæ termino in quo 2. electio completur.* En pendulam electionem, per quam pessimus quisque incompletè electus est, & decretum Dei incompletum donec ab homine compleatur. Quæ fane non sunt dogmata sed portenta, quæ ex quo Christi nomen in mundo auditur nunquam cuiquam in mentem venerant.

*X.* At Scriptura docet certum esse numerum electorum. Apoc. 6. animæ quæ sunt sub altari iubentur tantisper expectare donec numerus fratrum impleatur. Tum quod Christus dicit de ouibus sibi datis etiam ante conuersionem, Ioh. 10. v. 6. Nec non quod dicit venturos ad se omnes quotquot sunt ipsi à patre dati. Ioh. 6. v. 37. Et nullam suarum ouium posse eripi de eius

manu, Ioh. 10. v. 28. apertè indicant numerum earum Dei consilio esse definitum. Succinit Lucas, apud quem cap. 10. vers. 20. Christus sic affatur Apostolos. *Negaudete quod spiritus vobis subiiciantur, gaudete vero potius quod nomina vestra scripta sint in cælis.* Nec minus diserte Apostolus ad Hebræos cap. 12. v. 22. & 23. vbi Ecclesiam vocat *Ierusalem cælestem* & *coetum primogenitorum qui scripti sunt in cælis.* Huc pertinet liber ille vitæ de quo sæpe alibi, tum Apocalypseos cap. 20. agitur, vbi dicuntur coniecti in stagnum ignis, qui non inuenti sunt descripti in libro vitæ.

XI. Arminiani Collationis Hagienfis p. 96. verba Christi *Gaudete quod nomina vestra scripta sunt in cælis* futili interpretatione diluunt. Nolunt enim hæc verba accipi de electione ad salutem: sed volunt esse hunc sensum, Gaudete quod iuxta presentem fidei, iustitiæ & obedientiæ statum pro pijs & probis immo & profilijs Dei habemini. Bone Deus vbi frons? Hic sanè, nec ratio nec color: Nam cenferi fideles ab hominibus non est habere nomina sua scripta in cælo. Nec erat cur Apostoli tantopere gauderent quod homines de ijs beneficerent, cum id pessimo cuiq; sæpe contingat: Et hoc sane longè minus fuisset quam quod ad eorum vocem diaboli contremiscebant & fugiebant: quod tamen Christus censet leue esse præscriptione nominum in cælo. Sanè illud *scriptum esse in cælo*, refertur non ad opinionem hominum sed ad consilium Dei. Estq; phrasis hæc sumpta à Prophetis, apud quos aliquid scriptum esse coram Deo dicitur quod decreto eius fixum est & constitutum. Sic Esaia quarto v. 3.

dicuntur *scripti ad vitam*, qui Dei consilio seruandi sunt. Et cap. 65. v. 6. *Ecce hoc scriptum est coram me, non tacebo, sed retribuam*: quasi diceret, certum est mihi & statutum hæc scelera vlcisci.

XII. Pudet effugij quo quidam aiunt ideo nomina Apostolorum dici scripta in cœlo quia electi erant ad Apostolatum. Sic enim Iudæ ipsius nomen fuisse scriptum in cœlis. Quo nomine tantum abest vt debuerit gaudere, vt etiam ipse eius Apostolatus ei cesserit exitio. Tum habemus verba Apostoli ad Hebræos planè his consona, quibus fideles vocat *primogenitos qui scripti sunt in cœlo*: quod non potest trahi ad electionem ad munus, cùm ad omnes fideles & electos pertineat.

XIII. De libro vitæ maior est quæstio, & longior, neq; huius loci. Non me latet esse quendam librum vitæ, qui non est liber electionis, sed catalogus eorum qui se membra Ecclesiæ profitentur, & qui visibiliter sunt insiti fœderi, cuius libri sit mentio, Ezechielis 13. v. 9. & Psalmo 69. vers. 29. à quo libro deleri quosdam non est dubium. At cùm præcipitantur in tartara quotquot descripti non sunt in libro vitæ, planum est hoc libro designari certum & definitum numerum hominum, qui dum alij destinantur igni, soli reseruantur ad vitam: Quorum numerus nihilo plus nunc quam in ultimo iudicio, augeri potest nec minui.

XIV. Hæc de prima illa Electione generali, & conditionali. Veniamus ad electionem absolutam singulorum, quam Arminiani volunt inniti præscientiæ fidei, & fieri ex fide præuisa. Et prior quidem in serie quatuor Decretorum ab Arminio positorum secun-

dum locum obtinet, posterior vero quartum. Illa pertinet ad voluntatem Dei antecedentem, hæc ad consequentem. Illa antecedit, hæc verò sequitur voluntatem humanam. Illà Arminius dicit Deum frustrari, hac verò non posse frustrari.

*Connellitur electio singulorum ex fide prauisa auctoritate scriptura. Probatum homines non eligi ex fide, sed ad fidem.*

## CAP. XIX.



X ampla locorum segete quæ scriptura sacra nobis suppeditat edecumabimus quædam quæ plus habent lucis & ponderis.

I. Paulus ad Ephesios cap. i. v. 3. & 4. hæc habet. *Deus benedixit nobis omni benedictione spirituali in cælis in Christo, prout nos elegit in ipso ante iacta mundi fundamenta.* Satis apertè docet Apostolus benedictiones spirituales, ac proinde fidem, nobis datas secundum electionem æternam, & prout eramus electi. Vnde conficitur necessario electionem esse priorem his benedictionibus & ordine & tempore. Sic qui dicit milites donatiuum accepisse prout visum est Imperatori, omnino dicit prius id visum esse Imperatori, quàm fieret, & voluntatem certam & absolutam Imperatoris, largitionem hanc antecessisse.

Neque leuiores sunt quæ sequuntur. *Elegit nos in*

*Christo ante iacta mundi fundamenta ut essemus sancti & inculpati coram eo per charitatem.* Vides nos electos esse ad sanctitatem, non vero ex sanctitate aut ob sanctitatem? Quod si electi sumus ad sanctitatem, ergo & ad fidem qua præcipuè constat nostra sanctitas. Fidem esse partem nostræ sanctitatis negari non potest, nisi ab eo qui negat incredulitatem in profanis partem esse profanitatis & vitij. Neque enim fide tantum sanctificamur efficienter, sed etiam formaliter: non secus ac paries ab ipsa albedine formaliter dealbatur. Quod si Arminiani obtinerent sanctitatem de qua hic agitur sola charitate constare, nihil tamen efficerent, nec minus ex hoc loco probaretur nos ad fidem eligi. Nam quicūque electus est ad charitatem necessario electus est ad fidem quæ charitatem gignit. Gal. 5. 6. Nec est credibile quendam esse electum ad vnā partem sanctitatis, non vero ad aliam.

Inde ergo depulsi alia quærent effugia. Arnoldus p. 66. per *electos* vult intelligi *vocatos*, quasi idem essent *electio* & *vocatio*. At multi vocati, pauci electi, Matt. 20. Ergo inter hos electos, si Arnolde creditur, multi erūt reprobi; nec hæc electio opponetur reprobationi. Idem pag. 142. pertendit hos *electos* esse *fideles*, quod sanè falsum est eo sensu quo accipit, nempe eos considerari ut iam fideles cum eliguntur: Nam quomodo possent qui considerantur ut fideles eligi ad sanctitatem, cum eo ipso quod sunt fideles iam sint sancti? Alloquitur quidem Paulus Ephesos quos fideles vocat & benedictos: sed non si nunc sunt fideles & benedicti, ideo fideles erant antequam eligerentur.

Ergo

Ergo aliam bonus vir commentus est stropham, & vult Paulum hîc non agere de electione singulorum, sed de electione qua aliquis populus eligitur ad vocationem per Euangelium. Hoc si verum est, oportet ut inter electos ante mundi fundamenta multi sint reprobi. Sed verba sequentia non admittunt hanc interpretationem, dicit enim Apostolus nos electos, *ut essemus inculpati in charitate*: Nempe vult nos esse electos ut studeamus sanctitati & bonis operibus, at bona opera sunt singulorum, non gentis. Neq; per electos possunt hîc intelligi Gentes in fœdus ascitæ, cum Paulus ipse se includat hoc numero, *Elegit nos in Christo*, &c. Ipse Arnoldus satis indicat quàm parum fidat huic solutioni dum subiungit alteram quæ hanc euertit; dicit hîc agi de electione ad gloriâ, ac proinde per sanctitatem intelligi salutem. At huic effugio Apostolus opportunè occurrit; addit enim, *ut simus sancti & inculpati*: Esse autem inculpatum virtus est non salus ipsa. Tum exponit Paulus quomodo sancti simus, nempe *in charitate*, non verò in fruitione gloriæ. Charitatis officia intelligit, quæ exercentur in hac vita, & ad quæ hortari post hanc vitam superuacaneum est. Denique tam varijs solutionibus quæ se inuicem euertunt, satis fatentur se non habere in quo consistent; Et conantur nos obruerè numero solutionum, quia non possunt pondere.

Leue est quod ex hac voce ἀμώμωι i. *inculpati* colligunt agi de perfectione post hanc vitam. Nam etiam in hac vita Apostolus vult nos esse inculpatos, ut Philip. 2. vers. 15. ubi iubet nos esse, ἀμώμους & ἀνεπιλόγους

Q

in medijs generationis obtortæ & peruerſæ. Sanè cùm Apoftolus dicit *ut eſſemus inculpati in charitate*, apparet cum non agere de ſanctis fruētibus gloriâ, vbi nec reprehēſioni locus eſt, nec exhortationi ad charitatis officia. Non parum eſt virium in ſequenti verſu. *Prædeſtinavit nos quos adoptaret in filios per Ieſum Chriſtum*. Ex hoc loco ſic argumentor. Quos Deus prædeſtinavit ad adoptionem, prædeſtinavit etiam ad ſpiritum adoptionis eis dandum. Hoc autem nihil eſt aliud quàm prædeſtinare ad fidem. Nam ſpiritus adoptionis eſt ille qui perhibet teſtimonium in cordibus noſtris nos eſſe filios Dei. Rom. 8. hoc autem teſtimonium eſt fides ipſa. Verum quidem eſt Deum neminem ad adoptionem deſtinare, niſi quem Deus conſiderat ut fidelem futurum ſuo beneficio; ſed idem etiam dici poteſt de deſtinatis ad fidem, quæ nulli deſtinatur niſi quem Deus conſiderat ut fidelem futurum. Et ſanè craſſè allucinantur qui cenſent fideles deſtinari ad adoptionem in filios, cùm hoc ipſo quod ſunt fideles iam ſint filij. Hoc docet Ioannes cap. 1. *Eis qui crediderunt dignitatem dedit qua ſint filij Dei*.

II. Huic loco affinia ſunt alia quamplurima. I. Cor. 7. verſ. 25. *Miſericordiam conſecutus ſum à Domino ut ſim fidelis*, non verò quia me conſideravit ut iam fidelem. Ioá. 15. v. 16. *Elegi vos ut afferatis fructum*: Ergo non elegit nos ut conſideratos iam fideles, ac proinde iam ferentes fructum. Fingamus Chriſtum hîc agere tantum de electione Apoſtolorum ad Apoſtolatum; Puto tamen neminem eſſe oris tam duri qui neget idem dici poſſe de quolibet electorum, quorum nullus eſt quem



Deus non elegerit ut sit pius & probus: quemadmodum etiam omnia sequentia documenta nemo nisi perfrictæ frontis negabit ad omnes fideles pertinere: *Hæc mando vobis, ut diligatis vos invicem: Si mundus vos odit, scitis quod me prius odio habuit, &c.*

III. Non absimile est quod dicit Apostolus 2. Thes. 2. vers. 13. *Deus vos elegit ad salutem per sanctificationem spiritus & fidem habitam veritati.* Nempe dicit nos esse electos ad salutem adipiscendam per fidem, non ex fide, & sic fides est electione posterior, & medium quid inter electionem & salutem.

IV. Consonant verba Ananiæ ad Paulum Acto- rum 22. vers. 14. *Deus te elegit ut cognosceres eius voluntatem,* qua cognitione fides & assensus Euangelio intelligitur, neque enim Paulus magis fuit electus ad cognoscendum Euangelium quam ad credendum Euangelio. Fuit ergo Paulus electus ad credendum, & sic electio eius prior fuit eius fide.

V. Idem Apostolus 1. Thessal. cap. 1. vers. 3. laudans fidem & charitatem Thessalonicensium, harum virtutum causam ab ipsa electione arcessit. *Indefinenter (inquit) memoria repetentes efficacem vestram fidem, & laboriosam charitatem, ut qui sciamus vos à Deo esse electos.*

Hic Arminiani ultro cæspitant in plana via: nam per electionem volunt intelligi vocationem: Quod si verum est, ipsi reprobi erunt electi; utpote qui etiam vocati sunt. Tum illuditur Paulo, quasi non esset mentis compos. Nam cur diceret Thessalonicensibus se scire eos esse vocatos per Euangelium, cum ipse Paulus eis prædicauerit Euangelium? Ridiculus esset Gram-

maticus qui discipulis à se eruditis diceret, *ego scio vos didicisse Grammaticam.* Arnoldus pag. 66. suspicatur vocem *ἐκδοτες* *scientes*, ad Theſſalonicenſes ipſos referri, quaſi Paulus eis diceret, ſcitis vos eſſe vocatos. At vir bonus nimis oſcitanter hîc egit; non enim vidit orationem Græcam hoc pacto fieri incongruam, nam legendum eſſet *ἐκδοτῶν* vt quadraret cum *ὁμῶν*, quod eſt præcedente verſu. Sed diffidens huic ſolutioni, ſubolſecit voce *electionis*, debere intelligi *excellentiā* quæ quidem deſultoria eſt licentia: cùm *electio* diſſerat ab *excellencia* toto prædicamento: Illa enim eſt actio, hæc eſt qualitas aut relatio. Sanè ſi eiufmodi portenta interpretationum licet afferre, quid deinceps erit in ſacra ſcriptura quod non poſſit eludi aut deprauari? Proferat Arnoldus alium locum vbi voce electionis præſtantia intelligatur.

Neque verò mirum videri debet quod Paulus dicit ſe ſcire electionem Theſſalonicenſium. Deus enim potuit ei idem reuelare de Theſſalonicenſibus, quod ei reuelauit de Corinthijs Act. 18. verſ. 10. *populus eſt mihi multus in hac urbe.* Aut ſi id non placet, dicendum eſt, Paulum cùm videret Euangelium à Theſſalonicenſibus ſumma lætitia receptum, & multo cum fructu, facilè ſibi perſuaſiſſe, de iſto populo multos ad electionem Dei pertinere.

VI. Idem Apoſtolus initio Epiſtolæ ad Titum, ſe vocat *Apoſtolum ſecundùm fidem electorum Dei.* Placitum eſt fidem electorum dici, quia electis eſt peculiaris, alioqui perperam ornaretur hoc elogio, idque fatente ipſo Vorſtio, *Fides* (inquit) *dicitur fi-*

collat.  
cum Piſ-  
cat.  
ſect. 118

*des electorum Dei, Titī 1. Nempè quia fides est propria electorum nota, &c.* At cur fides est electis peculiaris? An quia quotquot habent veram fidem à Deo eliguntur? At hoc negant Arminiani, quippe qui scribunt de Apostasia sanctorum, & censent sanctissimos quosq; posse deficere. Restat ergo ut fides dicatur electorum quam dat Deus electis, & quæ fructus est electionis.

Hoc telum Arminiani quidam declinant, dicendo, fidei nomine intelligi doctrinam. Malè: nam doctrina Evangelij non est peculiaris electis, nec potest vocari doctrina electorum, cum etiam reprobis & profanis annuncietur. Hic ergo videre est Apostolum & Arminium inter se commissos: Paulus ait Fidem esse electorum. Arminius contra, Electionem esse fidelium, & qui ut iam credentes considerantur.

*Arnal.  
pa. 186.  
Fides nō  
est præ-  
cise ele-  
ctorum,  
sed ele-  
ctio fi-  
delium.*

Pari licentia ludunt in voce electorum, per quos volunt intelligi vocatos & sanctos. Quo tandem modo? cum iuxta Arminium inter vocatos & sanctos multi sint reprobi? Ergo electi erunt reprobi. Siccine illudi scripturæ? Sed alia videamus.

VII. Insignia sunt Christi verba Luc. 10. v. 20. *Gaudete quod nomina vestra scripta sunt in cælo*: Christus alloquitur homines viuos & superstites, & qui nondum perseverauerant in fide ad finem usque: Nihilominus tamen, iam eorum nomina erant scripta in cælo, iam eorum salus certo Dei consilio definita. Fuit ergo eorum electio prior perseverantiâ eorundem in fide, cōtra quam sentit Arminius qui perseverantiam in fide vult antecedere ordine electionem, & nos eligi ex fide præuisa.

Q iij

Quod si, vt volunt Arminiani, electio non est peremptoria & immutabilis, nisi post finalem perseuerantiam; dicendum erit nomina Apostolorum qui tunc primum professionis Christianæ stadium ingrediebantur, sic fuisse scripta in cœlo, vt tamen fuerit penes Apostolos deficere à fide & sic reprobari: Ac proinde eos potuisse efficere vt Christus mentiretur. En quò recidat nouatorum audacia. Porro in scriptura aliquid dici scriptū esse in cœlo & coram deo quod æterno eius consilio statutum est & definitum, probauimus præcedenti capite: vbi & reiecimus putidam illam & temerariam interpretationem Arminianorum, qui habere nomina scripta in cœlis, volunt nihil esse aliud quàm haberi filios Dei ex præsentis iustitiæ statu: idque nullo aliò argumento quàm quia sic volunt.

VIII. Paulus Ephes. 2. v. 8. *Gratia seruati estis per fidem.* Non dicit eos seruari ex fide præuisa, sed per fidem vt per medium ad salutem. Quod si Deus non seruat nos ex fide præuisa, neque etiam vult nos seruare ex fide præuisa, neque etiam eligit ex fide præuisa: Eligere enim est velle seruare.

IX. Eadem verba, *Gratia seruati estis per fidem*, aperte dicunt fidem esse medium ad salutem: Quod si salus est finis, fides autem medium, oportet Deum prius cogitauerit de salute dāda Petro & Paulo, quā de fide eis dāda qua ad salutem peruenirent. Finis enim prior est intentione medijs: Sic habitatio prius intenditur quàm ædificatio: vita quàm victus, sanitas quàm medicina. Qua fronte ergo Arminiani audent dicere.

Deum prius decreuisse dare Petro & Paulo fidem, quàm eis decreuisse salutem?

X. Hic verò Arminius frontem perfricat, & pernegat salutem esse finem Dei, sed salutem & fidem ait esse dona Dei hoc ordine inter se ex voluntate Dei colligata, ut fides salutem præcedat respectu datoris Dei & re ipsa. Hæc sunt verba Arminij quæ citantur & probantur ab Arminianis, in responsione ad Epistolam Vvalachrianorum pag. 93. At præterquàm quod malo credere Paulo docenti nos servari à Deo per fidem, mihi videtur Arminius id ipsum concedere dum negat. Non est enim consentaneum Deum velle ut fides præcedat adeptionem salutis, nisi quia vult fidem conferre ad salutem. Quod confert autem ad adipiscendam salutem, est medium per quod ad salutem ut ad finem pervenitur: Eum secutus Greuinchovius pag. 12. negat Deum salutem quorundam in particulari tanquam finem intendisse. Et pag. 124. *Fidem dupliciter considerari diximus, vel ut præscriptam & præstandam, vel ut præstitam. Ut præstanda, medium non est, sed conditio, & postulatum: ut præstita, autem medium est homini per quod salutem sub conditione fidei promissam consequatur.* Observabile & tor præclarum acumen. Hic homo vult fidem tum demum esse medium ad salutem cum est præstita: id est cum fides defuit; Nam fidem Arminiani censent tunc esse præstitam, cum quis ad finem usque perseveravit in fide. Quo tempore fidei definenti succedit visio. Tūc ergo fides (si Arminio creditur) incipiet medium esse ad salutem quando non est fides.

Tum illud, fidem præstitam esse medium homini non Deo, valde dilutum est. Non enim alia de causa fides est medium homini ad salutem quàm quia Deus vult & facit vt homo perueniat ad salutem per fidem. Sic qui cibum dicit medium esse homini ad vitam; dicit etiam medium esse quo Deus vititur ad vitæ humanæ sustentationem.

*Ephes.*  
2. 8.

XI. Non leue est quod fidem Apostolus eodem loco, vocat donum Dei. *Gratia seruati estis per fidem idq; non ex vobis donum Dei est.* Neque enim solam salutem Apostolus vult esse donum Dei, sed & fidem. Idem enim qui dat finem, dat etiam media. Vt qui dat nobis vitam dat etiam vitæ subsidia. Sic cap. 1. ad Philip. vers. 29. *Datum est vobis super Christo*, idest in Christi negotio, *non solū in eum credere sed etiam pro eo affligi.* Ergo credere in Christum, donum Dei est. Quocirca malè dicimur electi à Deo ex fide præuisa, quando quidem Deus ipse fidem dat. Neque enim, nisi valde impropiè, dicitur Deus præuidere quæ statuit ipse facere: Non censeretur sani cerebri qui diceret Deum præuidisse Solem futurum rotundum aut splendidum, ipse enim Deus eum in rotunditatem tornauit, eiq; lucem affudit. Quantopere hic errent Arminiani, & ex eorum doctrina sequi fidem non esse donum Dei, vt cunq; aliter aliquando loquantur, videbitur suo loco.

XII. Eodem pertinent verba quæ habentur cap. 1. vers. 11. *Prædestinati secundum propositum eius qui omnia effecit ex consilio voluntatis suæ.* Nempe si quem Deus prædestinauit ad salutem, etiam omnia facit quæ sunt necessaria ad executionem istius decreti: Si autem

autem omnia, ergo & fidem. Fides ergo est aliquid posterius prædestinatione, si quidem pars est executionis istius decreti.

XIII. Insignis est locus Actorum 13. v. 48. Ἐπίστευσαν οὖτοι ἡσθρ πελαγμένοι εἰς ζωὴν αἰώνιον: crediderunt quotquot ad salutem fuerant ordinati. Paulo prædicante Antiochenis quidam credunt, quidam respuunt Euangelium: causam cur illi crediderint Lucas hanc affert, nempe Dei ordinationem & decretum. Prior ergo electio est fide, quandoquidem electio Dei causa est cur credatur. Debuerat Lucas, iuxta Arminium, sic loqui, & quot quot crediderunt, fuerunt a Deo electi, in fidei suæ præmium. At contra, dicit eos credidisse qui fuerant electi.

Socinus & post eum Arminius summo scelere hunc locum deprauant. Nā per πελαγμένους ordinatos intelligunt dispositos, præparatos & proclives seu benè affectos: quasi Lucas scripsisset παραχρημένους. Audax sanè κρησποζην, & interpretatio sine colore & exemplo. Nunquam enim scriptura, nec quisquam quod sciam vocem πελαγμένοι hoc sensu accepit. Quam ad rem cum possint plurima exempla congeri, aptissima tamen sunt quæ sumuntur ex ipso libro Actorum, ut appareat quoq; sensu Lucas hanc vocem semper accipiat. Cap. 15. vers. 2. Ἐταξαν ἀναβαίνειν Παῦλον, decreuerunt seu constituerunt, ut Paulus ascenderet. Et Actorum 28. v. 23. ταξαμένοι αὐτῷ ἡμέρας cum constituisent ei diē. Sic Paulus ad Romanos c. 13. v. 1. αἱ δὲ ὅσαι ἐξουσίαι ὑπὸ τοῦ θεοῦ πελαγμένας εἰσιν, potestates quæ sunt, à Deo sunt ordinatæ seu constitutæ. Sic interpretatur hunc locū Actorum Chry-

Iostomus Homil. 30. in Acta Apostolorū, *τεταγμένοι εἰς ζωὴν αἰώνιον, τὰς τῆς ἀποριστημένης ἐκ τοῦ Θεοῦ, vbi τεταγμένοις vertit segregatos Deo, & prædeterminatos. Et author hypognoticil. 6. Præordinati hoc est prædestinati. Tū etsi vox esset ambigua, ratio tamē ipsa hoc euinceret. Nemo enim irre genitorū potest esse bene dispositus & bene affectus ad vitam æternā: omnes autem hi Antiocheni antequam credidissent Euangelio erant irrogeniti, ergo malè affecti ad adeptionem salutis. Dicat Arminij schola, quænam inesset latroni qui cum Christo crucifixus est dispositio ad credendum antequam crederet? aut Apostolo Paulo cum instar lupi in gregem Christi grassaretur, & turgens Pharisaico fastu, iustitiæ per legem esset assertor acerrimus? Sed & illud ipsum loquendi genus quod comminiscuntur abhorret à sensu communi. Non enim solemus dicere aliquem benè dispositum esse aut pronum aut bene affectum ad beatitudinem, sed ad virtutem. Oportet hæc propensio sit ad agendum, non ad fruendum aut adipiscendum; Sic potest aliquis dici propensus ad exercitationem corporis non ad sanitatem; ad certamen non ad præmium vel victoriam. Aut si cui lubet *dispositum* accipere, pro *cupido*, nemo est qui non sit dispositus ad salutem.*

Non est de nihilo, quod Greca non habent *πρὸς* simpliciter, sed *ὅσοι τεταγμένοι ἦσαν*, quotquot *ordinati fuerant*, quo plusquam perfecto aperte significatur non præsens dispositio sed ordinatio dudum antegressa.

Frustra sunt qui per *ordinatos* intelligi *dispositos* inde



colligunt, quia ibidem opponuntur indignis. Nam Lucas nullam facit hîc oppositionem, nec si faceret quicquam nobis officeret, qui scimus electione ipsa ad fidem & salutem homines fieri dignos, ac proinde & oppositos indignis. Interea iudicet lector, qualis sit & quam nefaria hæc doctrina quæ statuit homines esse dignos antequam credât, & inter infideles inueniri qui digni sint fide & salute.

XIV. Marci 13. versu. 22. *Surgent pseudochristi & pseudoprophetae, & edent signa & miracula ad seducendum, si fieri posset, etiam electos.* Αἱ τολογῆα est in voce electos; Assignatur enim causa, cur aliqui seduci finaliter non possint, nempe quia sunt electi. Est igitur electio prior perseverantia in fide ad finem usque; utpote causa perseverantiæ. Quod autem causa est perseverantiæ in fide, causa est fidei. Quod causa est cur quis semper credat, causa est cur credat. Concidit ergo Arminij dogma quo statuit non modo fidem sed & perseverantiam in fide esse priorem electione, & Deum in eligendo eam considerare ut conditionem iam præstitam & impletam.

XV. Non debent omitti verba Apostoli 2. Timot. cap. 2. vers. 9. *Servavit nos & vocavit vocatione sancta, non ex operibus nostris, sed ex suo proposito & gratia, quæ data quidem est nobis in Christo Jesu ante tempora sæcularia.* Hæc mihi videntur cum Arminianismo pugnare ex diametro. Apostolus enim non modo negat nos servatos ex præuisione operum, sed & æternum Dei beneplacitum affert ad excludendum respectum operum. At si Deus nos non elegit ex præuisione ope-

rum, sanè nec ex præuisione fidei quæ gignit opera, & efficit: Quod si Deus non eligit quenquam ex præuisione operum, sanè nec ex recto vsu gratiæ, nec ex obsequio fidei, quandoquidem hic vsus & obsequium manifestè opus est. Nec dubium quin amplecti Euangelium fide, sit quoddam opus & actus voluntatis.

X V I. Quid quod Arminius non modo fidem agnoscit esse actionem, ac proinde & opus, sed & pertendit fidem imputari in iustitiam, non qua instrumentum, id est, non qua Christum apprehendit sed quatenus est opus & actio? Verba Arminij, afferuntur à fratribus V Valachrianis, in sua Epistola; sunt autem hæc.

*Fides non qua instrumentum sed qua actio imputatur in iustitiam, quanquam propter illum quem apprehendit.* Neque Arminiani in sua responsione eunt inficias, sed vltro agnoscunt hæc esse verba Arminij, eumque tuentur pag. 87. Idem præcedenti pagina fatentur Petrum

Bertium, virum inter Arminianos præcipui nominis, sentire, *ipsum actum fidei in iustitiam nobis sensu proprio imputari, ac proinde fide nos ceu qualitate inherente iustificari.* Quod vlcus hic non attingo: sed id tantum arripio quod facit ad rem præsentem; nempe cum ipsa fides non solum sit actio & opus, sed insuper ex mente Arminianorum, iustificemur fide quatenus est actio & opus & virtus inherens; planum est eo ipso quod Apostolus vitur beneplacito æterno ad excludendam præuisionem operum, etiam excludi præuisionem fidei, quandoquidem ipsa quoque opus est, & actio, immo & iustificat quatenus actio est, si Arminio creditur.

Arnel. Contra Gomarum p. 41. Arminius dicit ipsum credere in Christum nobis in iustitiam imputari non ut instrumentum, & pag. 35. dicit fidem estimari pro obedientia & opere. Vorst. Errorum Sibr. p. 41. Fides nobis ad iustitiam imputatur formaliter. Bertium Epist. ad Sibr. p. 69. 79. Non est ineptum dicere, cum Deus ipse id dicat, nos habitu seu qualitate inherente iustificari. Idem dicit Vorstius Catal. Errorum Sibrandus p. 61. & p. 54. Impius per penitentiam iustificatur.

XVII. Eodem pertinet illud Rom. 9. 11. *Propositum Dei quod est secundum electionem non ex operibus sed ex vocante*: si quidē fides ipsa opus est, & iustificat quatenus opus est, ut volunt Arminiani: & rectē uti gratia est operari.

XVIII. Scriptura agit de Decreto electionis, ut de decreto certo & immutabili. 2. Timoth. 2. vers. 19. *Solidum fundamentum Dei stat, habens hoc sigillum, novit dominus qui sui sint.* Et Rom. 9. *Ut propositum Dei quod est secundum electionem maneret.* Et Ioh. 10. v. 28. *Do quibus meis vitam æternam, non peribunt in æternum, neque rapiet eas quisquam è manu mea.* Et cap. 6. vers. 37. *Quicquid Pater dat mihi veniet.* Quibus adde quod est Marci 13. *electos non posse seduci.* An Pilatus putavit esse nefas, crucis elogium à se scriptum immutare: & res erit digna Dei sapientia & maiestate inducere à se scripta, & à se relatos in album electorum, mutatā sententia expungere? Malè igitur sentit de Deo, & subvertit doctrinam Evangelij quisquis decretum electionis hominum, vult esse mutabile & reuocabile, & pendere ab humana voluntate. Audiuimus Greuinchouium negantem Decretum electionis, dum hīc viuimus, esse peremptorium & irrevocabile. Et tota Arminij schola vno ore clamat numerum electorum Dei electione & voluntate nō esse certum atque definitum. Quod si numerus electorum ex Dei voluntate non est certus, ergo nec ipsa electio. Et sanè meritō faciunt electionem mutabilem qui eam à voluntate humana suspendunt. Electionem enim volunt niti præuisione fidei, fidem autem ipsam pendere ab humano arbitrio. Gratiam quidem præuenien-

tem & concomitantem dicunt esse necessariam ad credendum : Sed huius gratiæ vsum volunt esse penes humanam voluntatem, cuius semper sit ea libertas vt possit ista gratia vti aut non vti. Et videmus suo loco, Arminianos docere gratiam Dei non esse causam totalem fidei, sed tantum partialem.

XIX. Denique passim inuenias electionem fieri ex Dei proposito & bene placito, & ex mera eius gratia, vt 2. Tim. 1. 19. Ephes. 1. vers. 5. & 6. & 11. Rom. 9. 15. & 11. vers. 5. At quenquam eligi ex præuisa fide nūspiam inuenio : nec Arminiani id aliter probant quàm consequentijs longè petitis ; quas tamen excutimus suo loco & ordine.

*Electio ex fide præuisa refutatur locis petitis  
ex Euangelio Ioannis.*

C A P. XX.



V O D si ipsius Christi testimonio statueretur, cessabit hæc contentio. Is in Euangelio secundum Ioannem, multa dicit quæ hunc nodum secant, & nullum locum relinquunt dubitationi.

I. Ioannis sexto vers. 37. sic affatur Iudæos. *Quicquid dat mihi pater ad me veniet.* Venire ad Christum est credere ; sic enim ipse Christus explicat v. 35. *Qui venit ad me non esuriet, & qui credit in me non sitiet unquam.* Poterat vtrobique dicere, qui venit non esuriet nec sitiet : sed posteriori loco posuit credere pro venire, vt sciamus cre-

dendo ad Christum veniri. Mens ergo Christi est eos qui ipsi sunt dati à Patre in ipsam credituros. Dantur autem Filio, qui ad id ei dantur ut eos seruet & sint eius peculium. Sensus ergo horum verborum, *quicquid mihi dat Pater ad me veniet*, hic est. *Quosunque pater mihi dat saluandos, in me credent.* Ergo prius dati sunt Christo quam veniant & credant: si quidem ideo veniunt ad Christum & credunt quia ei dati sunt. At Arminius vult eos prius credere quam dari, vult enim eligi ac proinde & dari Christo ex fide prævisa: Christus dicit ideo eos venire quia ei dati sunt à Patre: sectarij contra volunt ideo eos esse datos quia veniunt.

Non alio in loco magis se detegit horum hominum cerebrosa peruiacia. Per eos *qui dati sunt Christo* volunt intelligi credentes, quasi Christus diceret, *omnis credens in me, ad me veniet.* At iam probauimus, venire idem esse quod credere. Sensus igitur horum Christi verborum, iuxta Arminium, erit, *Quicumque credit in me credit.* His adde quod cum in electione Arminiana fides & perseuerantia in fide consideretur ut iam præstita, ac proinde qui eliguntur considerentur ut defuncti, aut in ipso vitæ mortisq; confinio, dici non possunt venire qui iam vitæ cursum emensi sunt. Nec verò per eos qui dati sunt Christo possunt intelligi qui se prius Christo dediderunt, hoc enim non esset dare eos Filio, sed velle ut filius venientes ad se recipiat. Ille quidem venientes recipit, sed qui ideo veniunt quia Christus eos traxit, ut ipse dicit vers. 44. *Nemo potest venire ad me nisi Pater qui misit me traxerit eum.*

Collatores Hagienfes Arminiani p.87. suspicantur,

per *datos filio* intelligi non quidem *fideles*, sed *datos ad credendum*. At cū Arminiani censeant etiam reprobos *datos* esse ad credendum, & Deum seriò eorum salutem & fidem intendere, falsò dicerentur à Christo venturi esse, id est, credituri quotquot ei ad credendum dati sunt. Ipsa Christi verba clamant & sensus communis hoc euincit per *datos* Christo intelligi Christi peculium, ac proinde electos: quando quidem hîc dati Christo à non datis discernuntur.

II. Iohan 8. vers. 47. *Propterea non auditis quia ex Deo non estis*. Ergo qui audiunt & credunt ideo audiunt & credunt quia ex Deo sunt. Ex Deo autem esse quid aliud est quàm ad Deum pertinere? quemadmodum ex aduerso vers. 44. dicuntur esse ex diabolo, qui pertinent ad diabolum. Cum ergo Christus ipse testetur ideo aliquos credere quia ad Deum pertinent, quis non videt necesse esse vt prius ad Deum pertineant quam credant, quando quidem pertinere ad Deum causa est cur credant?

III. Nec minus roboris in verbis Christi Ioh. 10. v. 26. *Vos non creditis, quia non estis ex ouibus meis*. Ergo ij qui credunt, ideo credunt quia sunt ex ouibus Christi. Non vt Arminius qui ideo vult esse ex ouibus Christi quia credunt. Arminianis placet per oues Christi intelligi credentes. Ergo vero non inficior oues Christi esse eos qui credunt. Sed pernego vocem ouium hoc loco posse sic accipi. Sic enim affingeretur Christo putida *ταυτολογία*, *Vos non creditis quia non creditis*. Indicium est quod paulò ante oues suas vocauit etiam eos qui nondum conuersi sunt. *Alias (inquit) oues habeo quæ non*

*non sunt ex hac caula, illas quoque me oportet adducere ut vocem meam audiant.*

I V. Sic Iohan. 17. v. 6. *Patefeci nomen tuum illis quos dedisti mihi.* Ergo prius erant dati quam Christus eis nomen Dei patefecisset, qua patefactione fidem acceperunt. Collatores Hagienſes Arminiani pag. 87. cenſent hîc agi de Apoſtoliſ qui iam credebant. Sed nihil efficiunt : hoc enim conſeſſo ſtat tamen quod volo, prius datos Apoſtoloſ Chriſto quam ſe eis patefeciffet. Veruntamen non agi hic de ſoliſ Apoſtoliſ ipſe Chriſtuſ diſertè teſtatur. v. 20. *Non tantum pro iſſ rogo, ſed & pro iſſ qui per ſermonem eorum credituri ſunt in me.*

Et cum v. 9. opponuntur mundo; *Pro eiſ non pro mundo rogo*, apparet ad omneſ fideleſ hâc extêdi. Niſi fortè Arminij ſchola exiſtimat ſoloſ Apoſtoloſ non eſſe de mundo, & mundi malediſtione eximi. Porrò cum nulla ſit paſ ſcripturæ, quæ pluſ aſſerat ſolatij, & fidem cum tentationib; luſtantem magiſ ſulciat, quam hâc Chriſti planè diuina & prolux præcatio, quia Chriſti intercedentis pro nobiſ petitioneſ, ſunt totidem promiſſioneſ tacitæ, & declarationeſ voluntatiſ Patriſ quæ cum filij petitione ſemper conſpirat, viderint Arminiani quo agantur ſpiritu, & cur tanto ſtudio conentur noſ fraudare hac conſolatione : quæ ſanè nobiſ eripitur, ſi hâc Chriſti præcatio pro ſoliſ Apoſtoliſ intercedit : & ſi per eoſ qui dati ſunt Chriſto ſoli Apoſtoliſ deſignantur.

*Idem probatur ex octauo & nono & undecimo capite ad Romanos.*

## C A P. XXI.

**P**AVLVS octauo ad Romanos, de prædestinatione agens, omnes erroris nebulas facile discutit. Verba eius hæc sunt, vers. 28. & 29. & 30. *Novimus ijs qui Deum diligunt, omnia simul conferre ad bonum, ijs videlicet qui ex proposito ipsius vocati sunt. Nam quos præsciuit eosdem & prædestinavit, ut conformes fiant imagini filij sui, ut is sit primogenitus inter multos fratres. Quos vero prædestinavit eos etiam vocavit: & quos vocavit eos etiam iustificavit, quos autem iustificavit eos etiam glorificavit.*

I. Principio occurrit illud, nos prædestinatos esse ut conformes fiamus imagini Christi. Cum autem hæc conformitas in hac vita sit per fidem & charitatem, planum est ex apostolo, nos ad fidem prædestinari, non vero ex fide. Scio quidem Christum ipsum non habere fidem, prout fides in Euangelio accipitur: Sed cum conformitas fidelium cum Christo posita sit in charitate, iustitia, & sanctitate, & hæc sint effecta fidei quæ per charitatem operatur, quicumque dicit nos ad charitatem & iustitiam esse prædestinatos, dicit quoq; nos ad fidem destinatos esse quæ ista omnia efficit: non secus ac qui destinatus est ad incessum aut respirationem, destinatus est ad vitam.



II. Quid hîc Arminiani? nempe per cōformitatem cū Christo intelligunt crucem & ærumnas pro Christo. At reclamant sequentia: additur enim, *ut sit primogenitus inter multos fratres*. Est enim Christus primogenitus filiorum Dei, cum alijs de causis, tum quia donis Spiritus liberalius instructus, exemplar est iustitiæ & sanctitatis; *unctus oleo exhilarante supra consortes*. Psal. 45. non secus ac primogeniti plus capiunt de paternis bonis. Vt verò primogenitus dicatur ob crucem & ærumnas, nouum est & insolens, & abhorrens à ratione. Tum quod dicit Paulus certum est ad omnes fideles pertinere. Addit enim *quos prædestinavit vocauit, quos vocauit iustificauit, quos iustificauit glorificauit*. Quatuor sunt istius catenæ annuli, glorificatio, iustificatio, vocatio, prædestinatio ad cōformitatem imagini Christi, ijq; ita conferti & implexi ut nulla ratione possint diuelli. Omnes enim glorificati iustificati sunt, omnes iustificati sunt vocati vocatione illa efficaci quæ electis peculiaris est, omnes sic vocati destinati sunt ut sint conformes imagini Christi. Dicant sectarij annon glorificatio, iustificatio, & vocatio ad omnes electos pertineant? non negabūt: cur non igitur cōformitas imagini Christi ad omnes electos pertinebit? Nam Arminius dum hanc cōformitatem ad ærumnas restringit, multos electos facit non conformes Christo, quippe cum plurimis Dei seruis, etiam optimis, contigerit pax non interrupta, & otium cum honore: An Arminiani ipsi se ex numero electorum expungunt, qui in alta pace obliti crucis Christi, hanc Camarinam mouerunt exitialem sibi

& Ecclesię? Non me latet hæc dici ab Apostolo ad consolationem afflictorum, quibus ait omnia cedere in bonum. Sed quid obstat quo minùs soletur eos documentis quæ ad omnes fideles pertineant? Sic Apostolus Petrus cap. 2. prioris Epistolæ, cum iussisset seruos subiectos esse heris, non modo bonis, sed etiam prauis & asperis, mox eosdem ad tolerantiam hortatur, documentis quæ sunt omnibus Christianis communia, monens placere Deo si quis molestias perferat ob conscientiam; Christum innocentem ideo passum, vt nobis relinqueret exemplar, quò insisteremus eius vestigijs. Nec dubium est quin hi prædestinati ad conformitatem imagini Christi, iisdem sint cum eis quos ibidem dicit vocatos ex Dei proposito. At non ij soli qui sunt afflicti pro Christo ita sunt vocati, sed & omnes electi, inter quos multi sunt expertes persecutionum.

III. Imprimis obserua Paulum hîc agere de electione singulorum; *quos Prædestinauit &c. & quos glorificauit*, quidam enim ijque pauci glorificantur. Hanc electionem singulorum nouatores volunt esse posteriorem vocatione, eos enim demum volût eligi quos Deus præuidit secuturos vocantem, & statuunt electionem niti hæc præuisione. At Paulus hîc electionem facit priorem vocatione, dum ait, *quos prædestinauit vocauit, quos vocauit iustificauit, quos iustificauit glorificauit*. Nempe vt ordine & tẽpore iustificatio prior est glorificatione, & vocatio iustificatione, ita & prædestinatio singulorum prior est vocatione.

IV. Sed operẽ pretium est istius Apostolicæ arenæ

annulos recognoscere. *Quos prædestinavit vocavit, quos vocavit iustificavit, quos iustificavit glorificavit.* Vides ne nos prædestinatos ad vocationem, & per hanc ad iustificationem? cum autem fide iustificemur, sequitur nos ad fidem prædestinari. Nam quomodo potest prædestinari ad iustificationem per fidem, qui non prædestinatur ad fidem? Hæc quidem iugulum petunt.

V. Mitto quod Arminiani evertunt illud Pauli, *quos iustificavit & glorificavit*, dum asserunt multos iustificatos esse qui sunt reprobi. Hoc clarè ædunt Epistola aduersus V Valachrianos pag. 40. *Iustificati dici possunt pro tempore credentes quos euentus reprobos demonstrat.*

VI. Eodem capite v. 16. dicit *Spiritus Dei testari unà cum spiritu nostro nos esse filios Dei.* Quæro an hoc testimonium sit certum, an dubium? Si est dubium arguitur Spiritus Dei mendacij. Si certum, quæro quo firmamento nitatur hæc certitudo. An nititur viribus arbitrij? at hæc certitudo est incerta & fallax. An verò hoc testimonium certum est quia non datur nisi iis quos Deus certò destinavit ad salutem? At hoc ipsum est quod asserimus, & quod Arminiani negant.

VII. Non minus est virium in Capite 9. ad Romanos, vbi Apostolus de electione & reprobatione pertractatè agit & prolixè. Scopus Apostoli est docere non ex operibus legis, sed ex Deo vocante & miserrante esse electionem & salutem: non verò (vt fingit Arminius) agere de iustificatione per fidem. Non repetam ea quæ dicta sunt capite 13. vbi repressimus Arminium cruciantem Apostolum, vt eum inuitum ad suæ causæ patrocinium pertrahat.

VIII. Tantum observabit sedulus lector, Paulum postquam egit de proposito secundum electionem, mox subijcere exemplum istius electionis Iacobum, quem Deus amauerit antequam quicquam egisset boni vel mali, ergo & antequam credidisset, hoc enim est aliquid agere, & sic electio præcessit fidem. Immo quamvis credere Evangelio, eiq; obsequi non esset actio, si tamen electio præcessit considerationem operum, oportet quoq; præcesserit considerationem fidei, à qua fluunt opera. Nam si fides præcederet electionem, Deus in eligendo non posset considerare fidem nisi ut gignentem opera: alioqui consideraret fidem, non qualis est, sed qualis non est.

IX. Tum illud v. 16. *Non est volentis neq; currentis, sed miserentis Dei*, falsum esset, si ex fide præiusta Deus hominum misereretur. Arminiani enim hoc mordicus tenent summoq; studio defendunt, Deum dare omnibus vires credendi in Christum, immo & teneri dare. Ad credendum vero actu quantamcunq; gratiam Deus det, esse tamen penes liberum arbitrium hac gratia uti vel non uti, credere vel non credere. Eum autem à Deo eligi quem crediturum præiudicet, & quem iam ut credentem consideravit. Iuxta hanc doctrinam meritò potest dici, salutem esse volentis, & currentis, & non tantum miserentis Dei. Quod si ideo Paulus dicit non esse volentis, quia non est solius volentis, cur non fas erit quoq; dicere, non esse miserentis Dei, quia non est solius miserentis, sed humani quoque arbitrij?

X. Quod si ad quæstionem qua quæritur cur Deus

ex vna eademq; massa hunc quidem amauerit illum. oderit, huius misertus sit, illum obdurauerit, potest responderi id factum esse quia Deus præuidit hunc crediturum, illum non crediturum, non debuit Paulus sciscitatore in increpatione compescere, ei; imperare silentium, cum causa discriminis esset in promptu, nempe hæc fides, illic incredulitas prævisa. An Paulus Arminio visus est aut parum acutus, aut sine causa religiosus? Veruntamen ne hoc dicere cogeretur, commentus est nescio quas strophas & portenta interpretationum quæ iugulauimus cap. 15. Qualia hæc sunt, *ex vocante*, id est, *ex fide*. Et *miserentis Dei*, id est, *iustificantis non ex operibus sed ex fide*, quæ tamen misratio communis sit etiam multis reprobis. Tum illud *Miserebor cuius miserebor*, ubi per *cuius* vult intelligi *qualium*. Et *non volentis*, supple *iustitia*. Nam de salute hæc negat intelligenda, quasi salus esset volentis. Quernadmodum & *misereri*, si fides Arminio, non est *saluare*, sed dare media ad iustitiam. Et plura eiusmodi inficeta aut oborta, quæ cap. 15. excussimus.

XI. His adde illud vndecimi ad Romanos. *Hoc tempore residuum secundum electionem gratuitam factum est.* Hoc residuo seu portione reseruata, intelliguntur Iudæi qui Christo adhæserunt, & qui cum cæteris non exciderunt fœdere: Habemus ergo causam cur hi perseuerauerint in fide nec exciderint gratia, nempe quia reseruatio facta est secundum electionem gratuitam. Ergo perseuerantia in fide est secundum electionem gratuitam, non vero (vt vult Arminius) electio secundum perseuerantiam in fide.

*Arm.*  
*in Per-*  
*kinsum,*  
*p. 222.* Arminius vt hunc locum eludat, dicit hic agi de electione ad iustitiã non de electione ad fidem: Quod etsi falsum est, non tamen infringit huius loci vim & euidentiã: Nam quisquis electus est ad iustitiã electus est ad fidem. Et sanẽ non possum satis mirari quod dicit Arminius pag. 222. *Quid est illud quod est per gratiam? Electio ad fidem? nihil minus: sed electio ad iustitiã,* quasi vlla esset iustitiã sine fide: aut quasi qui respuit fidem non respuat etiam iustitiã. Hęc sanẽ Socinianismum crepant, & indicant aliquid subesse occulti vlcusis. Tum quid attinet pertendere hic agi de electione ad iustitiã, cum ne hęc quidem certa sit ex Dei voluntate, iuxta Arminium, sed pendeat ex humano arbitrio?


XII. Arnoldus pag. 346. cautius agit. Censet hic agi de reiectione Iudæorum & assumptione gentium: Sed vox residui seu reservationis hoc refellit, nam hinc, vt etiam ex versibus præcedentibus, apparet Paulum inquirere causam cur de Iudæis pauci tantum residui ad fœdus pertineant. Postea explicaturus quomodo in locum cæterorum qui reiecti sunt & amputati Gentes fuerint insitæ.

Deniq; aduersus hęc scripturæ loca. Arminiani quantumlibet acuti ita *φυρομαχῶσι*, ita cessim pugnant, ita ipsi se implicant, vt vel nolle intelligi, vel causæ suæ diffidere videantur. Cæterum si vera dicunt, certum est neminem hæcenus quid sit religio Christiana intellexisse.

*Eadem*

*Eadem electio ex prævisa fide refel-  
litur ratione.*

## CAP. XXII.

**I.**  **SCRIPTURÆ** sacræ ratio ipsa suffragatur. Nam si perseverantia in fide consideratur in electione Dei ut res iam præstita, nemo eligitur nisi consideratus ut mortuus, & iam consum-

mato cursu, nemo enim potest dici perseveravisse usque ad finem, nisi qui ad finem pervenerit.

**II.** Hinc etiam patet ipsum Arminium secum pugnare : Dicit enim electionem esse credentium : at mortui desierunt credere : Debuit ergo Arminius, ut sibi ipse constaret, dicere electionem esse eorum qui desierunt credere : non vero credentium.

**III.** Tum si electio ad gloriam sit ex aliqua virtute prævisa, Christus ipse qua homo non fuit prædestinatus ad gloriam. Neque enim ad tantum culmen gloriæ euectus est ex prævisione vel fidei, vel operum, vel vilius virtutis. Quicquid enim inest Christo homini virtutis & sanctitatis, fuit ex vniione personali cum diuinitate, & ex puritate conceptionis, per quam fuit immunis ab originali labe. Hæc ergo eius sanctitas non potest dici prævisa sed decreta. Nec prædestinatus est ex sanctitate sed ad sanctitatem. Ut autem electio capitis contraria sit electioni membrorum, & caput ad

T

virtutem , membra ex virtute sint electa , nulla ratio admittit.

IV. His adde quod dum electio dicitur esse ex fide præiussa , statuitur electio quæ ad infantes immatura morte sublato pertineret non potest , quippe qui carerent fide.

V. Immo nec electio ex fide præiussa potest dici electio , sed est admissio & receptio eorum qui fide ad Christum veniunt , & qui per liberum arbitrium bene vtentes gratia , prius Deum eligunt in quo ponant fiduciam , quam à Deo eligantur. Christus contra Ioh. 15. v. 16. *Non vos me elegistis , sed ego elegi vos.* Arminiani dum pertendunt hic agi tantum de electione ad Apostolatam , non obscure fatentur hunc locum ipsis officere , si ibi agatur de electione ad salutem. Volunt ergo in salutis negotio Deum eligi ab homine , antequam homo eligatur à Deo. Age verò , demus hinc tantum agi de electione ad Apostolatam : id enim causam nostram non parum iuuat. Nam si apostoli electi sunt ad Apostolatam non ex præiussa aliqua virtute , sed electi sunt ad recipiendas virtutes & dona per quæ Apostolatu fungerentur , multò magis consentaneum est hominem non eligi ad salutem ex virtute vlla præiussa , cum salus æterna sit longè maius bonum Apostolatu , & longius summotum à viribus humanis , nostrumque captum magis excedens , ac proinde sit res ad quam multo magis opus est ope Dei , & quæ minus est humani arbitrij quam Apostolatus adeptio.

VI. Per eadem doctrinam , fides in Christum fit res humani arbitrij , penes quod sit uti gratia vel non uti ,



credere vel non credere: & viribus ad credendum i-  
 nsistibiliter daris vti vel non vti. Profecto nunquam  
 Arminius dixisset electionem esse ex fide prævisa, si pu-  
 tauisset Deum certis quibusdam hominibus quos ele-  
 git ad salutem, fidem quoq; dare decreuisse. Nullum  
 enim agnoscit Dei decretum præcisum & necessarium  
 de dando cuiquam ipso actu credendi. Esset enim ine-  
 pra hæc oratio, *Deum elegisse Paulum, quia prauiderit se ei*  
*daturum fidem.* Omnino si in electione fidēs conside-  
 randa est vt iam præstita, & cui innitatur electio, opor-  
 tet Deus eam non effecerit. Alioqui Deus diceretur  
 velle saluare aliquem quia cōstituit ei dare fidem: cum  
 contra ideo det fidem alicui, quia eum saluare certa &  
 immutabili voluntate decreuit.

VII. Quid sentiendum sit de hac doctrina collige-  
 re est ex consequentibus, quæ ipsi huic fundamento  
 superstruunt: qualia hæc sunt. Dei electio in hac vita non  
 est certa nec irrevocabilis. Numerus electorū Dei vo-  
 luntate & electione non est certus & definitus. Gratia  
 Dei non est causa totalis fidei: Quæ quidem est capita-  
 lis oratio, & fidei fundamenta subruens: vt iam pro-  
 bapimus, & deinceps eadem de re plura dicentur.

Quid quod per hoc dogma nemo potest credere se  
 esse electum? nam si quis crederet se esse electum, cre-  
 deret quoq; suam fidem esse electione posteriore: Sic qui credit se esse hominem, erat homo antequam  
 id crederet. Quod si fides & perseverantia in fide præ-  
 cedit electionem, is qui credit in Christum potest qui-  
 den præsumere eam sperare se electum iri, postquam  
 perseverauerit: at se iam electum esse credere non po-  
 t.

T ij

*Armin.  
in Per-  
kinsum  
p. 223.  
& 224.  
Causa  
totalis  
curisse  
credat  
iste non,  
est volū-  
tas Dei  
& libe-  
rum ar-  
bitrium  
hominis.*

test, cū iuxta Arminium nemo eligatur nisi postquam crediderit, & cum credere desierit. Ideo ne exitialis hæc doctrina Belgicarum Ecclesiarum laniauit viscera, vt ex animis euelleret fiduciam electionis? & vt nemo nisi impudenter & falsò crederet se à Deo electum esse ad salutem?

*⁊ Sententia Augustini de electione,  
ex fide præuisa.*

C A P. XXIII.



DEBEMVS Pelagio eiusque sectarijs eruditos tractatus Augustini, & plenos bonæ frugis, quibus capita fidei Christianæ de gratia, de libero arbitrio, & de prædestinatione plenius & planius quam quisquam explanauit: Nam antè Pelagium hæc *παχύτως* & non satis accuratè tractabantur. Ipse Augustinus libro de Prædestinatione sanctorum cap. 3. & Retractationum lib. 1. cap. 24. & sæpe alibi fatetur se inter initia his de rebus parum consideratè scripsisse: virum sanctum non puduit mutare sententiam postquam ad hanc contentionum cotem ingenium subegit, & ex collisione exilierunt scintillæ veritatis.

Profligata Pelagij hæresi, manebant tamen in Gallia reliquiæ Pelagianorum, qui ad declining inuidiam, ne Pelagio fauere viderentur, naturam distinguabant à gratia: Sed gratiam sufficientem affirma-

bant omnibus hominibus offerri, & tam latè patere quàm naturam. Electionem quidem agnoscebant, sed conditionalem & non absolutam. Eligi enim à Deo quos credituros præuidisset & benè vsuros gratia: Suntq; hæc eorum dogmata. *Electionem esse ex fide præuisa. Et numerum electorum non esse certo Dei decreto definitum.* Doctrinæ vero Augustini de electione secundum propositum fructum dicebant esse vel desperationem, vel torporem, si nec reprobatus potest villo labore & contentione seruari, nec electus potest vllâ negligentia regno priuari. Eorum verba lubet hic ascribere, excerpta ex epistola Prosperi ad Augustinum quæ inserta est Tomo 7. operum Augustini. *Definiunt uniuerfis hominibus propitiationem quæ est in sacramento sanguinis Christi sine exceptione esse propositam: ut quicunque ad fidem & ad Baptismum accedere voluerint, salui esse possint. Qui autem credituri sunt, quine ex fide quæ deinceps per Dei gratiam sit iuuanda mansuri sunt, Deum præscisse ante mundi constitutionem: Et eos prædestinasse in regnum suum quos gratis vocatos dignos futuros electione & de hac vita bono sine excessuros esse præuiderit, &c.* Augustini vero sententiam dicunt lapsis curam resurgendi adimire, & sanctis occasionem torporis afferre, &c. *Non acquiescunt prædestinatum electorum numerum nec augeri posse nec minui.* Hic quidem merus est Arminianismus: eadem sententia: iisdemq; calumnijs incessimur quibus Augustinus.

Aduersus hos Semipelagianos vir sanctus scripsit librum de prædestinatione sanctorum: ex quo non abs re erit loca quædam exscribere.

Cap. 3. *Legimus, dicente Apostolo, Misericordiam consecutus sum ut fidelis essem. Non ait, quia fidelis eram. Fidelis ergo datur, sed data est etiam ut esset fidelis.*

Cap. 17. *Intelligamus vocationem qua sunt electi, non qui eliguntur quia crediderunt, sed qui eliguntur ut credant. Hanc enim & Dominus ipse satis aperit ubi dicit: Non vos me eligistis, sed ego elegi vos. Nam si propterea electi erant quoniam crediderunt ipsi eum prius utique elegerant credendo in eum, ut eligi mererentur. Et paulo post. Non elegerunt eum ut eligeret eos, sed ut eligerent eum elegit eos: quia misericordia eius praeuenit eos secundum gratiam non secundum debitum. Et eodem capite, Elegit ergo Deus fideles, sed ut sint, non quia iam erant. Eligendo ergo facit diuites in fide sicut haeredes regni: rectè quippe hoc in eis eligere dicitur quod ut in eis faciat eos elegit. Rogo quis audiat Dominum dicentem; non vos me eligistis sed ego vos elegi, & audeat dicere credere homines ut eligantur, cum potius eligantur ut credant?*

Cap. 18. *Elegit nos in ipso ante mundi constitutionem ut essemus sancti & immaculati. Non ergo quia futuri eramus sed ut essemus. Nempe certum est, nempe manifestum est: Ideo quippe tales eramus futuri quia elegit ipse, praedestinans ut tales per gratiam eius essemus.*

Cap. 19. *eadem repetit, & hac insuper addit. Cum ergo nos praedestinauit opus suum praesciuit qui nos sanctos & immaculatos fecit.*

*Ibidem Pelagiani reiicientes electionem ex praui-  
sis operibus haerent in sola praui-  
sione fidei. Nos autem  
dicimus (inquiunt) nostrum Deum non praescisse nisi fidem  
qua credere incipimus & ideo nos elegisse, &c. Aduersus*

hæc Augustinus multa differit, & tandem sic sermonem claudit. *Nec fides ipsa præcedit: non enim quia credimus sed ut credamus elegit nos, ne priores eum elegisse dicamur: falsumque sit (quod absit) non vos me elegistis sed ego vos elegi. Nec quia credimus, sed ut credamus vocamur, atque illa vocatione quæ sine pœnitentia est id prorsus agitur & peragitur ut credamus.*

Denique dicit ipsum Pelagium ut ambigua confessione Synodum Palestinam ludificaretur damnauisse eos qui dicunt gratiam dari secundum merita. Quæ sententia probata est à Synodo: ijque damnati qui electionem dicerent esse ex fide præuisa. Hæc enim eodem recidere Augustinus affirmat.

Libro 5. in Iulianum cap. 3. *Deus nullum elegit dignum; sed eligendo efficit dignum.*

Electionem vero absolutam seu (ut loquitur Arminius) præcisam & non dependentem ex præuisione ullius virtutis aut dignitatis, sexcentis locis inculcat. Ut epistolâ 105. *Cur ille credat ille non credat cum ambo idem audiunt: & si miraculum in eorum conspectu fiat, idem ambo vident altitudo est diuinarum sapientiæ & scientiæ Dei cuius inscrutabilia sunt iudicia, & apud quem non est iniquitas, dum cuius vult miseretur & quem vult obdurat: neque enim ista iniusta sunt quia occulta. At Arminio hæc non sunt occulta, quippe qui causam huius discriminis ait esse præuisionem fidei in altero eorum.*


Liber de fide ad Petrum, siue est Fulgentij siue Augustini cap. 3. *Illi cum Christo regnabunt quos Deus gratuita sua bonitate prædestinauit ad regnum. Quia enim tales prædestinando præparauit ut regno digni essent, præparauit*

utique secundum propositum vocandos ut obediant, præparauit iustificandos ut accepta gratia recte credant & bene uiuant. Ad quod regnum illi perueniunt quos Deus gratis nullo bonæ voluntatis vel boni operis merito præcedente saluauit.

---

*Excutiuntur Argumenta Arminianorum, quibus conantur stabilire electionem ex fide præuisa.*

#### C A P. XXIV.

I.  RMINIANI quise Remonstrantes nouo nomine indigent, in collatione Hagienſi effundunt densam locorum scripturæ grandinem, quibus persuadere conantur electionem esse credentium, & nihil aliud esse Decretū prædestinationis quàm velle seruare credentes. Hoc quidem est aliud agere, & quæſtionem non attingere, neq; enim de his inter nos est controuersia. Status quæſtionis hic est, *An electio sit ex fide præuisa.* Tum an Deus eligens singulares & certas personas, consideret in eis perseuerantiam in fide ut rem iam impletā, & ut conditionem cuius præstatione nitatur electio. At hi relinquentes quæſtionem intactam, in eo toti sunt ut probent electionem esse credentium. Quapropter etsi nouem Syllogismorum acies quam explicant, multis alijs nāuis laborat, quia tamen omnes peccant fallacia quæ Ignoratio Elenchi appellatur, quod id quod concluditur putatur officere aduersario, cum tamen.

tamen non officiat, præstat concedere quod volunt, nempe Deum non eligere nisi credentes, & electionem esse credentium, dummodo hæc accipiatur commodè & bono sensu; Nempe Deum eligere & velle saluare credentes, quia neminem seruat nisi cui fidem daturus est, & quia sine fide ad salutem non potest perueniri. Et Deum in eligendo considerare homines vt fideles, id est, vt habituros fidem suo beneficio. Et decretum electionis esse cum respectu fidei, quia decretum de salute includit decretum de medijs ad finem, ac proinde & de fide in Christum. Et sanè falsò Arminius & post eum Arnoldus pag. 29. hanc nobis affingunt sententiam, Deum constituisse seruare electos citra fidei in illis considerationem.

Ergo fulmen quod tanto strepitu vibrant, solo flatu, aut pilei ventulo auertitur, neq; nos aut rem attingit.

II. Nihilo magis ad rem alij sectarij frequenter ingerunt verba Pauli Eph. 1. v. 4. *Elegit nos in Christo*, quod sic accipiunt quasi Paulus diceret, *elegit nos propter Christum & consideratos vt iam credentes in Christum cum eligeret*. Nihil tale Apostolus: cuius mens plana & simplex. *Elegit nos in Christo*, id est, *destinavit nos ad salutem per Christum siue in Christo nobis conferendam*.

III. Nihilo plus efficiunt his locis, *Nemo nos separabit à charitate Dei quæ est in Christo Iesu*. Rom. 8. v. 39. Et *Deus erat in Christo sibi reconcilians mundum* 2. Cor. 5. Hic sanè de fide præuisa videtur. Non si vngues perroderet ad sanguinem, sexcentis talibus locis quicquam efficerent. *Deus erat in Christo in terris agente, in eo & per eum*

peragens nostram reconciliationem : At quid hoc ad fidem præuisam?

IV. Debile est telum quod vibrant. *Qui credit in me habet vitam aternam.* Ioh. 6. *& sine fide non potest placere Deo.* Hebr. 11. His locis probatur quidem necessitas fidei, at non eius præuisio ante electionem. Nemo seruatur nisi credens, quia Deus hanc voluit esse viam salutis, & quia nemini dat salutem cui non det fidem.

V. Conradi Vorstij hæc sunt, in Collatione cum Pifcatore. Sect. 18. *Si per fidē adoptamur, per fidem quoq; simus electi.* Ego verò nego id sequi, est enim adoptio electione posterior, vt docet Apostolus Ephes. 1. v. 5. *Prædestinauit nos ad adoptionem.* Qui dicit nos adoptatos per fidem, non ideo dicit nos electos per fidem, vel ex fide: sed dicit nos per fidem affici sensu amoris paterni Dei erga nos, & credētes spiritum adoptionis accipere.

VI. Tuetur se verbis Apostoli 2. Thess. 2. *Elegit vos Deus ab initio per fidem.* Hic verò Vorstius improbè detruncat verba Apostoli, & mutilata nobis exhibet. Verba Pauli hæc sunt. *Elegit vos Deus ab initio ad salutem per sanctificationem spiritūs, & fidem habitam veritati.* Nempe docet Apostolus Deum nos prædestinasse ad adipiscendam salutem per sanctificationem & per fidem: at non dicit nos electos esse ex fide præuisa: sed nos electos esse ad salutem consequendā per fidem. Quod si ex hoc loco colligi potest nos esse electos ex fide præuisa, ex eodem loco probabitur nos electos esse ex sanctificatione seu regeneratione præuisa: quod non placet Arminio.

Vrget illud Iacobi 2. *Nonne Deus elegit pauperes di-*



*uites in fide?* Frustra. Ideo enim sunt diuites in fide, quia Deus eis fidem dedit. Ideo autem illis dedit quia sunt electi. An si dico Deum elegisse sanctos qui fruuntur gloria, idcirco censeo Deum eos elegisse ex præuisione futuræ gloriæ? Quod scilicet Arminianis verba illa Christi, *do animam meam pro vobis meis*, accipere vt dicta per anticipationem de ijs qui nondum sunt oues, sed qui sunt futuri: cur nobis quoque non erit fas, hæc verba, *Deus elegit credentes*, accipere vt dicta per anticipationem, de ijs qui non credunt actu, sed considerantur vt credituri?

VII. Addit Vorstius Matthæi vicesimo secundo, paucos dici electos quia pauci habent vestem nuptialem. At ego pernego hoc ibi inueniri. Christus parabolam vocatorum ad nuptias, quorum pauci tantum paruerunt vocanti, claudit hæc sententia, *nam multi vocati, pauci electi*. Quibus verbis non redditur ratio cur non vestitus veste nuptiali foras sit eiectus, sed cur de multis vocatis pauci venerint. Quod ne lector animaduerneret, duplici fraude vsus est Vorstius: Nam illud *multi vocari* omisit, tum pro NAM sustituit QVIA, vt persuaderet hic causam reddi cur indecenter vestitus, foras eiectus sit. Sciebat enim particulam NAM sæpe designare notam seu indicium, non vero causam: vt Matt. 26. v. 73. & sæpe alibi. Sed hoc loco, non dubium est quin hic causa significetur. Assignatur enim causa cur de tam multis vocatis pauci secuti sint vocantem, nempe quia etsi multi sunt vocati, pauci tamen sunt electi. Vnde liquet, hunc locum si quisquam alius, officere Arminio.

VIII. Cætera quæ congerit vt probet electos esse credentes, non sunt ad rem. Nam & electi sunt credentes, & credentes electi, At non sunt electi quia credentes, sed vt credant.

IX. Nihilo plus virum est in obiectione quam affert ex 2. Petr. cap. 1. *Firmam facite vocationem & electionem vestram*: ex quibus verbis infert vocationem priorem esse electione. At Petrus non hic præponit vocationem electioni, sed certitudinem vocationis certitudini electionis: Illam ordine priorem esse agnoscō lubens. Ipsam vero electionem priorem esse vocatione docet Paulus Rom. 8. *Quos prædestinavit vocauit, quos vocauit iustificauit, quos iustificauit glorificauit*. Nempe vt iustificatio prior est glorificatione, & vocatio iustificatione, sic prædestinatio vocatione.

X. Greuinchouius in Amesium pag. 171. sic disputat *Dico tua prædestinatione Euangelium inuerti. Nam Euangelij sententia hæc est, si credideris viues: At vero hæc tua prædestinatio dicit, si prædestinatus es ad vitam credes*. Respondeo aliud esse inuertere seu conuertere enuntiationem, aliud euertere. Est enim hæc enuntiatio conuertibilis. Quicumque electus est credet, & quicumque credit electus est: de fide enim agimus! quam Paulus ad Titum 1. v. 1. vocat *fidem electorum*. An potius Arminiani inuertunt Euangelium quod dicit fidem esse electorum, illi vero dicunt, fidem non esse electorum, sed electionem esse fidelium? Quod Greuinchouius ibidem de reprobatione infercit excutietur suo loco.

XI. Idem pag. 130. sic argumentatur. *Salus est mer-*

*Vritur  
eodem  
argumē-  
to Ar-  
minianum  
p. 282.*

*Eodem  
argumē-  
to pug-  
nat Ar-  
nold.*

*p. 240.  
& 241.*

*ces fidei* 1. Petri 1. 9. *corona iustitiæ, præmium laboris, brabium certaminis & cursus consummati, hæreditas filiorum Dei, id est fidelium* Joh. 1. 12. Gal. 4. 30. Quia autem difficile est videre quomodo hæc possint trahi ad electionem ex fide prævisa, cum ibi de electione non agatur, nec de fide prævisa, subiicit: *Ergo electio ad salutem non est decretum de fine hominum ut hominum simpliciter, sed de salute hominum quæ talium, scilicet fidelium, & in fide perseverantium.* Hoc etiam fatemur eo sensu quod diximus: quanquam præstabat dicere *perseverantium*: quia Deus eligens non considerat fidem & perseverantiam ut rem præstitam, sed ut præstandam, idq; suo beneficio & dono.

VII. Addit. *Voluntas conferendi præmium, mercedem &c. necessario præsupponit prævisionem fidei & perseverantiæ in fide, ex pacto Evangelio, si credideris & perseveraveris saluus eris.* Hic verò desleſtis à quæſtione. Agebatur enim de electione ex prævisa fide: tu vero agis de salute quæ confertur post fidem. Deus eligens ad salutem prævidet quidem fidem antecessuram adeptionem salutis, sed ita prævidet quemadmodum Deus prævidet quod ipse factururus est, quod quidem propriè loquendo non est prævidere sed velle. Porro vita æterna vocatur merces fidei, quia non est nisi post certamen fidei, nec eo peruenitur nisi per laborem: sed non datur ob laborem, neque ad salutem eligimur ex prævisione laboris aut fidei. Sed Deus qui nos prædestinat ad præmiũ prædestinat etiam ad certamen: teste Paulo Philip. 1. 29. *Datum est vobis in Christi negotio non solum in eum credere, sed etiam pro eo pati.* Est etiam merces quæ-

dam gratuita : vt docet Ambrosius 1. Epistola 1. libri. *Alia merces liberalitatis & gratia ; alia virtutis stipendium, laboris remuneratio.* Interea lector obiter notabit Arminianos pugnare pro electione ex praeuisione operum : vita enim æterna in sacra scriptura vocatur merces & præmium, non tantum fidei, sed etiam operum, eleemosynarum, patientiæ, iuxta illud Matt. 19. *Voca operarios, & da eis mercedem.* Si ergo inde probari potest electionem esse ex præuisa fide quia vita æterna vocatur merces fidei : cur non eadem electio erit ex operibus præuisis, cum vita æterna merces operum frequenter appelletur ? Maximè cum ipsum credere sit opus, idq; longè præcipuum ? & Arminiani censeant nos iustificari fide quatenus est opus, vt suo loco videbitur.

XIII. Idem pag. 170. & 188. sibi plaudit in hoc argumento. *Si talis est qualem vos fingitis prædestinatio, Ergo duplex est & sibi contradictoria voluntas Dei de salute hominis saluandi, una qua salutem vult & ordinat non credenti, id est, non ex fide præuisa, Altera qua in tempore non vult eundem saluare nisi vt fidelem.* Ego vero pernego hæc pugnare ; Eligere ad salutem non credentem vt credat, & velle saluare credentem. Sic si pater filiolum bimulum destinauerit ad munus Senatoris, aut Pastoris Ecclesiæ, eundem vero filium grandiusculum postea curet literis imbui, vt ad hoc munus preueniat, an volet contraria, quia primò quidem rudem, postea verò literatum ad hoc munus destinauit ?

XIV. Idem pag. 194. sic differit. *Quosunque & quales & quo ordine Deus in tempore saluat, eosdem & ta-*

les & eodem ordine saluare decreuit. At in tempore primò dat Christum, deinde secundum sapientiam suam iustè administrat media ad respicientiam & fidem necessaria, sufficientia, & efficacia: actu autem respicientes & credentes recipit in gratiam: Denique perseverantes in fide saluat. Ergo eodem modo & ordine illos ipsos & tales seu taliter consideratos saluare decreuit.

R. Maior proposito admiscet falsa veris, vt falsa lateant in turba, nec vsquequaque vera est. Non dubium est quin quoscunque & quales Deus in tempore saluat, eisdem & tales ab æterno seruare decreuerit. At Deum seruare eodem ordine quo decreuit, vno modo verum est, altero falsum. Verum est Deum seruare eodem ordine quo decreuit seruare. At non verum est Deum in exequendo seu seruando eundem sequi ordinem quem in decernendo. Nam in decernendo prius cogitat de fine quam de medijs. Contra in exequendo incipit à medijs & adminiculis, & in fine desinit. Sic medicus prius intendit sanitatem quam medicinam: at in exequendo prius medetur quam sanat. Errat igitur Greuinchouius, qui ex ordine quem Deus sequitur in exequendo colligit quis debeat esse ordo in decernendo. Interea obiter obserua in Greuinchouio Arminii genium. Non ausus est dicere Deum dare fidem, sed tantum media ad fidem, quia vult esse liberi arbitrii vti his medijs, neque fidem nisi ex parte esse donum Dei.

XV. Eodem vitio laborat argumentum Arnoldi, p. 181. *Inter ista (inquit) hic est nexus, vt prius Deus velit aliquem credere antequam illum velit seruari: Cum prædestinatio tua contra doceat prius Deum velle aliquem seruare deni-*

lianda doctrina Euangelij, cum Satanæ blasphemia.

XVII. Solent sectarij hoc modo nos inculcare euer-  
sionis Euangelij. *Non potest* ( inquit ) *Euangelium*  
*quod ex conditione vitam promittit credenti , seruire exe-*  
*quendo decreto, quo vita certis & determinatis personis pra-*  
*cisè ordinata est.* At ego pertendo seruire : quia Deus  
promittit vitam sub conditione quam decreuit ipse in  
electis efficere. Nam quid obstat quo minus Deus pro-  
mittat credenti vitam , & tamen fidem decreuerit dare  
certis & determinatis personis quas elegit?

XVIII. Arnoldus p. 52. hæc habet. *Si fides est effe-*  
*ctum electionis non potest decreto electionis comprehendere.* At  
nemo nostrum dicit fidem , sed consilium seu volun-  
tatem de danda fide electionis , decreto comprehendere.  
Hæc autem voluntas se habet ad Decretum electionis  
vt pars ad totum. Nam decretum de medijs ad finem  
includitur decreto quo finis decernitur. Vt voluntate  
ædificandi domum continetur voluntas lapides & li-  
gna congerendi.

XIX. Leue est quod nullibi non inculcant. *Iuxta*  
*Euangelium* ( inquit ) *fides est conditio in saluando &* *Arnol.*  
*eligendo requisita, iuxta vos minimè.* Calumnia. Agnos- *p. 283.*  
cimus fidem esse conditionem in saluando requisitam  
at non in eligendo prærequisitam , vt vult Arminius.  
Fides est res sine qua Deus non eligit , at non ex cuius  
præuisione eligit. Fidem esse in electione requisitam:  
etsi Scriptura totidem verbis non dicit , commodè ta-  
men potest accipi & ex mète scripturæ , si fides ponatur  
vt conditio consequens electionem , & sine qua Deus  
non vult esse salutem. Non secus ac respiratio est con-

ditio ad vitam , quamvis prius sit destinare ad vitam quam ad respirationem.

XX. Arminiani in Epistola aduersus Fratres VValachrianos pag. 43. sententiam suam sic explicant. *Inconuenientissimum nobis videtur affirmare Deum electione decreuisse quid ipse esset in homine per spiritum suum operaturus. Electionis si quidem absolutæ ad salutem decreto, salutis tantum non fidei decernitur collatio.* Hanc suam sententiam hoc argumento fulciunt. *Cum salus & fides predicata sint diuersissima, nec per se nec per accidens vnum constituent, non potest non aliud esse decretum de salutis, aliud de fidei collatione.* Respondeo , quantuncunq; salus & fides sint res diuersæ, est tamen fides medium necessarium ad salutem : decretum autem de fine includit media. Vita & respiratio sunt res non minus diuersæ quam fides & salus : & tamen eodem decreto quo quis destinatur ad vitam, etiam destinatur ad respirationem, quia respiratio est medium ad vitam.

XXI. Frequens est & vsu detrita hæc Arminianorum obiectio. *Si Deus prædestinat homines ad fidem ut ad medium per quod ad salutem perueniant, necesse erit ut Deus quoque prædestinet reprobos ad incredulitatem & impenitentiam ut ad medium per quod ad damnationem perueniant.* Ego verò nego hoc sequi : hic enim agimus de medijs quæ Deus ipse suppeditat , incredulitas autem & impenitentia sunt media quæ homo ipse suggerit de suo. Distinguenda sunt media quæ Deus iuuenit ab eis quæ facit. Deus in prædestinando considerat hominem ut corruptum & in peccato iacentem, unde fit ut media ad damnationem iam sint in homine:

nec opus sit aliunde suppeditari, multo minus à Deo, qui nunquam est author peccati. At cum medijs ad salutem homo sit naturaliter destitutus, non possunt illa contingere homini nisi dante Deo. Nec vero incredulitas est conditio eodem modo requisita in reprobis, vt fides in electis. Nam illa est conditio prærequisita ante reprobationem: hæc est conditio consequens electionem. Inde est quod incredulitas & impenitentia sunt meritoria reprobationis, at fides non est meritoria electionis nec salutis.

XXII. Cum isto argumēto concidit alterum quod sectarij ingerunt ad nauseam. *Si Deus* (inquiunt) *non eligit ex prævisa fide, neque etiam reprobatur ex præviso peccato.* Ego verò pernego hæc esse paria, aut vnum ex altero sequi. Peccatum enim Deus præuidit, quia ipse non est author peccati: fidem vero non præuidit, sed facere decreuit: hoc autem quod Deus decernit non præuidet sed vult: si modo volumus vti signatis vocibus & aptis, non vero impropria oratione tenebras vltro rebus offundere. Ac profecto mihi videntur Arminiani suis se aculeis compūgere. Nam si hæc eorum ratio valet, cur non licebit quoque sic argumentari? Si Deus sine respectu bonorum operum eligit, vt vult Arminius, ergo etiam sine respectu malorum reprobatur. Eadem est consecutio, quam tamen Arminiani non admittunt.

Multa congerit Arnoldus post Arminium, quibus causæ nostræ conflet inuidiam, eamque prægrauet odio, quæ operæpretium est cognoscere, sunt enim multa arte & quæsitis coloribus vestita: locat autem



in fronte argumenta quibus euincat sententiam nostram pugnare cum Dei sapientia.

XXIII. Is ergo pag. 217. sic differit. *Pugnat cum sapientia, aliquid quod amissum est, quodque ideo non est, prius alicui absolute ordinare, inde vero ut idem impeiretur decernere.* Eadem homonymia est in voce absolute quam supra notauimus in Greuinchouio, obiectione 16. inde ergo petatur solutio. Sed neque verum est hoc pugnare cum sapientia Dei: nihilo plus quam absolute decernere ut quis viuatur, & tamen decernere ut medicinam sumat, aut structas insidias euitet.

XXIV. Idem argumētū alijs verbis repetit eadē pagina & sequenti. Nisi quod addit, *pugnare cum sapientia Dei prius ordinare quinam premium sint accepturi quā quā id accepturi sint conditione.* At hoc non docemus. Omnia enim decreta Dei statuimus esse æterna: quoad ordinem attinet, non hæc diuellimus in duo decreta, quorum alterum sit de personis saluandis, alterum de conditione qua saluandi sint. Vno eodemq; decreto Deus certos homines statuit seruare per fidem. Sed neq; si ita loqueremur ut fingit Arnoldus, quiquam inde derogaretur Dei sapientiæ. Sæpe pater decernit aliquid dare filijs, antequam constituerit qua conditione & per quem laborem.

Hoc loco Arnoldus multa infercit de irresistibilitate reprobatione, quæ reijcimus in alium locum. Ergo à sapientia Dei transit ad iustitiam Dei, quam à nobis violari pertendit.

XXV. Incipit igitur pag. 224. à calumnia, *Statuitis (inquit) Deum absq; fidei intuitu quosdam homines decre-*

*nisse præcisè seruare.* Dico nobis impingi calumniā: Nam etsi Deus non eligit ob fidem, eligit tamen ad fidem, & fides est de definitione electionis. Sed neq; si de duobus pariter peccatoribus alterum eligit ad salutē non considerās obedientiā vt rem præstitā, sed eligens eum ad obedientiam præstandam, Deus idcirco erit iniustus; de suo enim facit quod vult, iuxta illud. *Miserebor cuius misertus fuero, &c.* Satis est quod etsi huic gratiam dat indebitam, alteri tamen nullam irrogat pœnam nisi debitam. Interea est quod gaudeant Pontificij qui in Arminio inuenerunt patronum meritorum. Meritum enim dicitur cui merces datur ex iustitia: Vita æterna est merces: vt vero detur ex iustitia Arminius vult dari intuitu obedientiæ præstitæ. Datur ergo merenti.

XXVI. Futile est quod addit p. 225. *Decreto quo Deus nemini nisi credenti salutem dare decreuit, se magis obedientiam quam creaturam amare ostendit. Contra verò decreto vestro Deus magis homines, licet peccatores, quàm iustitiam amare statuitur, quod cum iustitia pugnat.* Hæc sane prauo artificio texta sunt. Nam primò fingit nos docere Deum alios velle seruare quam credentes. Secundo astutē amorem quo Deus amat obedientiam, comparat cum amore quo Deus amat creaturam: cum amor obedientiæ, (qui quidem est ipsissima Dei iustitia) potius comparandus sit cum amore quo Deus amat suam bonitatem & misericordiam. Nam etsi Deus plus amat suam iustitiam quam creaturam, non tamen plus amat suam iustitiam quam bonitatem quæ benefacit creaturæ. Deus enim non minus clara & cer-

ta dat documenta & effecta bonitatis quam iustitiæ: quæ bonitas etiam iustitia quædam est, si iustitia accipitur non strictè pro ea virtute qua dantur præmia iustis, & pœnæ iniustis, sed pro virtute illa generali qua Deus omnia conuenienter agit & ut par est: Et quanquam omnia in Deo sint paria, immo omnia attributa Dei sint vna virtus, & ipsissima Dei essentia, scriptura tamen bonitatem Dei longe maioribus effert præconis quam iustitiam; Sic in lege Deus visitat iniquitatem patrum in filios ad tertiam & quartam generationem, miserationem vero extendit ad mille generationes. Sic Psalmo 36. iudicia Dei comparantur montibus, at bonitas abyssò. Et Psal. 30. eius bonitas ad vitam seu sæculum extenditur, ira ad momentum restringitur. Succinit Iacobus 2. v. 13. dicens misericordiam se efferre ac gloriari supra iudiciũ, quia Deus bonitatis quam iustitiæ euidentiora nobis patefacit *τελευτησια*. Meritò ergo Deus dicitur *Optimus Maximus*, sed prius Optimus quam Maximus. Quod si rem à primordio repetas, inuenies primo loco ponendum esse decretum creandi, in quo sanè est bonitas, non verò iustitia.

XXVII. Eadem prolixius ingerit Arnoldus cap. 9. vbi à nobis ait violari iustitiam Dei, dum volumus Deum ad salutem homines ordinauisse sine ullius obedientiæ intuitu. Quod alienum esse à nostra sententia iam diximus. Fateor quidem Deum plus amare suam iustitiam quam hominem: sed nego eum plus amare manifestationem aut executionem suæ iustitiæ, quàm manifestationem suæ bonitatis & misericordiæ erga

hominem. Deus plus amat quod sibi à creatura debetur, quam ipsam creaturam : At non plus amat quod sibi à creatura debetur , quàm quod ipse sibi debet, nempe manifestationem suæ gloriæ benefaciendo creaturæ. Nempe periculum erat ne Deo sua iustitia non constaret, nisi emerisissent hi nouatores , qui patrocinaurentur eius iustitiæ, insuper habità eius bonitate & sapientia. Atq; hic locus est vbi Arnoldus vult Deum esse debitorem. *Distat (inquit) iustitia vt Deus creaturæ obedientiam præstanti, quod suum est etiam tribuat.* Nihil sanè durius vnquam dictum est ab accerrimis assertoribus meritorum humanorum. Nempe paratus est Arnoldus dicere Deo , redde mihi quod meum est, hoc enim postulat tua iustitia. Strenuè. Sed ad alia pergamus.

XXVIII. In eandem Dei bonitatem à nobis impingi in doctrina de reprobatione paulò post probare conatur : Sed his excutiendis peculiare caput destinamus: vt & ijs quæ de irresistibilitate, & de libero arbitrio, & de Christo electionis fundamento, passim sine ordine infercit, excutiendis suus erit locus.

XXIX. Non est omittendū familiare esse Arminianis in doctrinam electionis quæ creditur in nostris Ecclesijs tragicè inuehi, idque sub obtentu pietatis, & hortationis ad bona opera. Dicunt enim electionem præcisam extinguere omne studium bonorum operum, preces, verbi auditum, denique omnem pium conatum auertere. Nam si quis credet se prædestinatum ad fidem & ad bona opera , relinquet curam Deo mouendi hominem infallibiliter: & omnem salubrem

timorem excutiet, quippe persuasus nullis flagitijs salutem posse amitti nec fidem excuti. Hæc & alia à Pelagianis emendicata & à Pontificiorum incude adhuc calentia quasi Circensem pompam circunducunt magno cum strepitu. Quin & homines astuti sic loquuntur quasi facti doctiores experimenro: Dicunt enim se quando idem sentiebant nobiscum, sensisse in se ipsis gliscentia per hanc doctrinam vitia, sibiq; obrepisse langorem, & immunitatem amoris Dei, interdum etiam sensisse quædam tentamenta desperationis. His se morbis sanatos, suamq; pietatem incaluisse, ex quo excusserunt opinionem illam de præcisa electione. Nimirum conclamatum erat de pietate & sanctitate morum nisi emerisset hæc secta, quæ de vitijs quarta opima retulit, & pietatem intermortuam excitauit. Non inquiri in eorum mores, tantum dico eorum scripta spirare iracundiam, & plena esse acerbis.

XXX. Sed ad rem. Nego ex nostra doctrina posse capi iustam occasionem peccandi, & laxæ dihasinas intemperantiæ. Sed nihil tam sanctè vnquā nec tam verè dictum est quod nō possit trahi in deteriore partem, & sinistra interpretatione corrumpi. Eandem calumniam passus est Paulus, qui cap. 6. ad Romanos opportunè prolepsi hanc à se opinionem amolitur; sicloquens, *An manebimus in peccato ut abundet gratia?*

XXX. Negamus igitur hæc quæ fingunt, ex nostra doctrina sequi. Non si quem Deus prædestinavit ad fidem & resipiscentiam, idcirco debet minus esse sollicitus quomodo Deo placeat, eiq; morem gerat. Enimvero

Enimvero resipiscentia est illa ipsa sollicitudo. Perinde ergo loquuntur quasi dicerent, electos debere carere sollicitudine quia Deus eos prædestinavit ad sollicitudinem.

XXXI. Nec vero Dei beneficentia impedit hominis vigilantiam. Sic Deus dat nobis panem quotidianum, nec tamen per hoc impedit laborem. Frustra expectat à Deo vitæ subsidia qui sedet otiosus, brachijs decussatis. Idem Deus qui dat nobis victum, nos hortatur ad laborem. Eius enim benedictio non superuenit socordiae sed industriae.

XXXII. Porro nihil obstat quominus gnauiter incumbatur labori, cuius euentus certo Dei decreto est definitus, siue hoc decretum nobis notum sit, siue non sit. Christus non ignorabat vitæ suæ in terris terminum: & tamen vitabat pericula, & Iudæorum manus non semel euasit. Ezechias recreatus ex morbo sciebat sibi adhuc superesse annos quindecim vitæ, quo tempore non dubium est quin cibum sumpserit & curauerit suam valetudinem. Deus reuelauerat Paulo neminem de vectoribus qui erant in eadem naui submersum iri: nihilominus tamen nautas hortabatur ad laborem, & volentes demissa in mare scapha fugere, iussit in naui retineri. Non negabunt Arminiani euentum bellorum esse Dei consilio definitum, nec tamen inde velint inferre frustra strenuè pugnari. Scriptura multis in locis testatur Deum unicuique fixisse limites vitæ, & dierum nostrorum numerum esse Dei consilio definitum, non tamen ideo vituperandus est qui accersit medicum in morbo, aut qui ante prælium lorica in-

duit. Oportet enim hominis industria Dei decreto subferuiat. Nec fas est vt Dei liberalitas nobis causa sit negligentiae. Sic embryo se mouet in vtero, & natiuitatem suam ipse adiuuat, quamuis id ipsum quod vires habet se mouendi sit à Deo. Sanè cum fides & respiciencia sint media ad salutem, nihil tam abhorret à ratione, quam vt sine ad abolenda media. Quocirca Paulus secundo ad Philipenses Deo quidem refert acceptum velle & perficere; ibidem tamen nos hortatur ad incumbendum saluti cum timore & tremore. Cuius malum credere quam Arnoldo cuius hæc sunt verba pag. 273. *Mihi conscientia peccati omnino extingui videtur in eo qui nouit se ex peccato absoluta Dei & immutabili ordinatione esse ereptum. Quid? an postquam Deus Dauidi significauit per Prophetam Nathan se eius peccatum abstulisse, Dauidis conscientia ad peccatum occalluit, aut amisit sensum peccati? Immo vero peccatum suum mœret, & grauiter lamentatur. Nam etiam post impetratam veniam hæret infixus animo dolor, & pœnitentia. Sic Paulus 1. ad Timoth. cap. i. dicit Deum ipsius esse misertum, & tamen ibidem peccatum suum detestatur.*

XXXIII. Idem sentiendum de precibus quod de labore & studio bonorum operum. Nam rectè & piè petimus à Deo quæ sunt certo eius consilio definita: Nempe Deus cui constitutum est nobis bene facere, vult id dare nostris precibus, non vero torpori & securitati. Non frustra orabat Iosaphat ante pugnam 2. Chron. 20. quamuis non ignoraret Deum iam decreuisse quis futurus esset euentus belli. Satis nouerant

Apostoli sibi esse remissa peccata à Deo, & tamen quotidie vsurpabant illud, *Dimitte nobis debita nostra*. Non dubitabat Christus de sua resurrectione, & de adeptione gloriæ post certamen, idem tamen orabat pernox, & secedebat in montem ad orandum.

XXXIV. Mitto quod optimus quisque est temptationibus obnoxius, quibus assilientibus, confugiendum ad Dei auxilium, ne fides labascet, aut torpor & negligentia obrepat.

XXXV. Quid quod teste Paulo Rom. 8. Spiritus sanctus orat in nobis, & gemitus precationesq; suggerit, unde à Zacharia cap. 12. v. 10. *spiritus supplicationum* appellatur: qui quum sit effectus beneplaciti Dei, & fructus electionis, mirum sanè esset si ipsa electio nos à precibus reuocaret.

XXXVI. Quod si quis electus, de sua, ut fit, salute adhuc dubitat, habet quod petat à Deo, nempe *πληροφάν*, & sustentationem fidei vacillantis, & incrementum charitatis & zeli, & adeptionem gloriæ. Si vero certus est de salute, petat incrementum huius fidei; petat perseverantiam in fide & bonis operibus; petat cohiberi à peccatis ad quæ se pronum sentit; petat complementum promissionum Dei: deprecetur temptationes Satanæ, qui etsi electos nō potest pessundare, eorum tamen calcaneum pungit, eosque stimulis fodiat.

XXXVII. Eiusdem est farinæ quod Arnoldus ex Arminio p. 304. nobis exprobat. *Vestra* (inquit) *doctrina Dei servos & Ministros in suo Ministerio segnes reddit, ut pote ex qua sequitur ipsorum diligentiam non posse*



*prodesse, nisi iis quos Deus absolutè vult seruare, & qui perire non possunt: & negligentiam, rursus ipsorum non posse nocere nisi iis quos Deus absolutè vult perdere, quique seruari non possunt. Eadem obijciebant Pelagiani Augustino lib.*

*Aug. de bono*  
*Perfen.*  
*cap. 14.*  
*Amnt*  
*præde-*  
*stinatio-*  
*nis defi-*  
*nitione*  
*utilitati*  
*predica-*  
*tionis,*  
*aduer-*  
*sam.*  
de bono perseuerantiæ cap. 14. ad quæ iam prolixè respondimus: Eadem enim rationes quæ acuum sollicitudinem auditorum ad penitentiam & bona opera, perinde valent ad incitandos pastores ad munus suum gnauiter obcundū & subdendos auditoribus aculeos ad resipiscentiam. Nam etsi electi non possunt perire, scimus tamen Deum electos deducere ad salutem per verbum & sacramenta & ministerium Euangelij: cuius decreto oportet nostrum obsequium subseruiat.

Quod si Minister verbi perfunctoriè agens non potest efficere vt electus pereat, ipse tamen sibi nocet, & negligentie istius pœnas luet in Dei iudicio: Itaq; etiam si alijs non noceret, sibi tamen ipse obesset plurimum. Paulus acerrimus electionis assertor profitetur tamen *se omnia sustinere propter electos vt salutem consequantur,* 2. Timoth. 2. 10.

XXXVIII. Quod ad reprobos attinet, si hæc Arminij ratio valet, pari ratione neque edendum erit neque bibendum, neque parentes debebunt esse solliciti de valetudine liberorum: quia nulli potest nocere hæc negligentia, nisi eis quos Deus vult perire, qui suo decreto vitæ singulorum certam fixit metam, quæ reuelli non potest, nec transiliri. Quod si constaret Pastoribus quinam de suo grege essent reprobi, aliquis esset color dubitationis an de reprobis salute deberent esse solliciti. Sed cum hoc eis ignotum sit, debent

semen verbi vbique spargere , euentum Deo relinquere.

XXXIX. Arnoldus pag. 307. rem dicit , meo iudicio , pessimam. *Si quis ( inquit ) doceret Deum ipsum præcisè statuisse aliquem in hac vita aliquandiu nutrire , & ita de pane quo nutriatur ipsi prospicere , vt non possit non habere abundanter : concedo talem non posse moneri vt sollicitus sit quomodo panem sibi paret ,* Ego vero pertendo talem posse & debere moneri vt sibi panem paret , quia idem Deus qui promittit panem , & decreuit dare , idem quoq; declarat verbo , se velle dare hunc panem nostro labori , & mediante nostra sollicitudine. Ideoq; idem qui panem dare vult dat quoq; vires , volūtatem , & industriam qua panis paretur. Itaq; Arnoldus sibi ipse concedit , quod nemo benè sentiens ei concessurus est.

XL. Porrò cum certitudo electionis possit bifariam accipi , vel pro immutabilitate decreti diuini , vel pro certa persuasione qua aliquis certò credit se esse electum , de priore tantum certitudine hic agitur ; posterior tractatum peculiarem exposcit. Obiter tamen dicimus nihil à nobis credi eorum quæ nobis Arnoldus affingit , quale est illud , omnes homines teneri credere se ad vitam æternam esse electos. Immo vero docemus , eum qui non vult in Christum credere , nec respicere , teneri credere salutem Christi morte partam ad se non pertinere : Eiusdem notæ est illa calumnia qua dicit nos iubere omnes sceleratos esse securos , vt qui nullis flagitijs possint excidere à salute. Apage tam abominandam doctrinam. Dicere , *sum electus ergo*

*mibi licet esse improbo*, sermo est reprobi, qui ideo vult malus esse quia Deus bonus est. Hoc pacto amor quo Deus nos in Christo complexus est, qui est acerrimus stimulus ad amandum Deum, vertitur in puluillum cui profana securitas indormiat. Quemcunq; Deus elegit, dedit ei aut dabit Spiritum sanctum, per quem à tam profana cogitatione absteineat. Sic quem destinavit ad vitam destinavit etiam ad cibum & respirationem. Ridiculus esset qui diceret, si Deus decrevit ut vivam ad annum octuagesimum, quid mihi opus est edere, cum fieri non possit quin eo usque perveniam? Eiusmodi hominis proculdubio instat exitium: nempe ad eum puniendum Deus statuit uti hac ipsa eius recordi peruvicacia.

**XLI.** Interea monemus, esse sedulò distinguendam certitudinem electionis singulorum à certitudine qua singuli se credunt esse electos: illa est certitudo Decreti, hæc est certitudo fidei. Nam si Arminius efficeret, persuasione electionis extingui pietatem & studium bonorum operum, non tamen inde fieret, decretum Dei de electione singulorum non esse certum atq; præcisum: Sed tantum sequeretur hoc Decretum non debere à nobis certo credi. Vnde apparet quam malè argumententur Arminius & Arnoldus, qui ex eo quod fiducia electionis aliquos reddit negligetiores ad opera pietatis, inferunt Dei decretum de electione singulorum non esse absolutum neq; præcisum.

**XLII.** His adde quæ docuimus cap. secundo, ubi exposuimus quot modis doctrina de electione conferrat ad bonos mores pietatisq; disciplinam. Quod ta-

men sic volumus accipi; non quòd singulis expectanda sit reuelatio de sua electione. Sed audiendum est Euangelium, ac penitus animo infigenda & toto pectore amplectenda hæc promissio, qua Deus promittit vitam credentibus. Qua persuasione quincunq; se sentiet amore Dei ad viuum affici, & ad resipiscentiam impelli, facile colliget se esse electum, & rem Euangelio promissam ad se pertinere. Nam etsi electio naturà prior est fide & resipiscentia, quippe causa vnde hæ virtutes fluunt, est tamen fides & resipiscentia nobis notior: Semper autem procedendum à notioribus. Vnde fit vt ab effectis sæpenumero progrediamur ad causam, qui ordo in scholis Resolutius appellatur.


XLIII. Quod si vellemus imitari Arminium, faciliè nobis esset hæc ei reponere, & docere quot modis eius doctrina impingat in Dei sapientiam, & bonitatem, ac proinde & in eius iustitiam: quot modis inde possit capi occasio aut diffidentia aut proteruitas: qua ratione inflet hominem vt disrumpatur, & tollat in altum vt eum præcipitet. Enimvero aliquis Arminio plenus, sic poterit loqui. Deus quidem me vult seruare, sed potest frustrari sua voluntate; potest fraudari desiderijs suis naturalibus, quanquam sint longè optima. Quos vult seruare voluntate antecedente eosdem vult perdere voluntate consequente. Tum eius electio nititur præuisione volitionis humanæ: miserum me si mea salus penderet à re tam instabili. Idem quoq; sic argumentabitur: Deus dat omnibus gratiam sufficientem; at non omnibus patefacit Christum: ergo est aliqua gratia sufficiens sine cognitione Christi. Sed & idem

facile credet Deum illudere hominibus, quippe qui in Arminij schola didicerit Deum seriò cupere & intendere salutem omnium & singulorum hominum, nihilominus tamen plurimos vocare modo non congruo, id est modo, tempore, & mensurà non apta nec idoneà, quo modo quicumque vocatur nunquam sequitur vocantem. At quid scio an vocer modo congruo nec ne? His adde præclara hæc dogmata: etiam irregénitos facere bona opera, esse mites, sitientes, facientes voluntatem Patris. Eidem partim esse à gratia partim à libero arbitrio. Quid quod aliquis ex Arminij ludo parumularius, audebit Deo ipsi leges figere, & dicere Deum **TENERI** dare omnibus vires credendi? Et Dei iustitiam poscere ut reddat homini quod suum est? Et hominem se ipsum discernere, & sibi ipsi cor aperire ut verbum Dei recipiat? Vestram fidem: hæccine sunt illa vestra præclara incitamenta ad vitæ sanctitatem? His ne documentis Arminius homines ad pietatem imbuit? Profecto si quis per hæc instigatur ad bona opera, eo ipso magis corrumpitur. Deus enim mauult peccata cum pœnitentia, quàm iustitiam cum superbia. Deus non vult accendere homines ad resipiscentiam dispendio aut nostræ fidei, aut suæ gloriæ. Nec tantum danda est opera ut homines instigentur ad pœnitentiam, sed insuper videndum est ut id fiat rationibus idoneis, & quæ non sint in Deum contumeliosæ.

*An Christus*

*An Christus sit causa electionis, &  
fundamentum.*

## CAP. XXV.

I.  ICI MUS neminem seruari nisi per  
& propter Christum. Et Christum  
esse *λυτρωτήν* & pretium nostræ re-  
demptionis, fundamentum salutis,  
causamq; meritoriam. At non dici-  
mus causam esse electionis, aut cau-  
sam cur de duobus in massa corrupta consideratis hic  
illi præferatur. Non desunt exempla hominum pessi-  
morum, quorum alteri Euangelium annuntiatum est  
sic dispensante Deo, vnde factum vt conuerteretur &  
crederet, alteri vero non est annuntiatum. Causam hu-  
ius discriminis esse mortem Christi scriptura non dicit,  
neque patitur ratio: sed causam reperit à Dei *ἰδιωκίᾳ* &  
beneplacito, qui miseretur quorum vult: Semper  
enim amor Patris præcedit intercessionem Filij: quan-  
doquidem amor Patris erga mundum causa ei fuit mit-  
tendi Filium.

Enimvero cum Christus ipse, qua homo, sit electus,  
& caput electorum, non potest esse fundamentū ele-  
ctionis & causa. Nam vt caput est hominum qua ho-  
mo, ita caput est prædestinatorum qua homo præde-  
stinatus ad tantum honorem qui ei ex mera Dei gratia  
contigit.

Z

II. Quocirca Apostolus vocat quidem Christum λυττόν, & ἱλασθῆμον Col. 1. Rom. 3. causam vero cur hi potius quam illi eligantur nunquam esse dicit.

III. Ipsa ratio concinit: Nam vt ægrifanatio semper præcedit intentione adhibitionem medici, ita necesse est in mente Dei prior fuerit (non quidem tempore, sed ordine) cogitatio de saluandis hominibus quam de mittendo saluatore.

IV. His adde quod mediatio Christi & redemptio, est actio qua satisfit iustitiæ Dei: quod sanè electionis voce non significatur. Nempe quia aliud est esse Mediatorem, aliud esse causam electionis, seu prælationis vnius alteri in arcano Dei consilio. Vnde fit vt Christus sit quidem causa meritoria salutis, at non electionis: Quod perinde est ac si dicerem, Christum esse fundamentum & causam executionis decreti electionis, at non causam ipsius electionis.

V. Non leue est quod Christus Ioh. 15. vers. 13. dicit se mortem pati pro amicis: & cap. 10. v. 11. ipse se vocat bonum pastorem qui animam ponit pro suis ouibus. Quod si Christus est mortuus pro amicis & pro ouibus suis, necesse est vt cum moreretur pro eis iam eos consideraret vt amicos & oues, quantumuis multi eorum nondum essent vocati: teste ipso Christo qui versu 16. eiusdem capituli vocat oues suas etiam eos qui nondum erant conuersi. Quod si Christus moriens pro nobis, nos considerabat vt amicos & oues, planum est ante mortem Christi iam factam esse distinctionem inter amicos & inimicos, inter oues & hircos, ac proinde decretum electionis prius esse ordine morte Christi: &

explodendum esse Arminij dogma vt subuertēs Euangelium, quo cenſet tunc cum Chriſtus mortuus eſt electioni nondum locum fuiſſe. Omnino qui mortuus eſt pro ouibus, mortuus eſt pro electis, non vero pro eligendis poſtquam fuerit mortuus.

Ex his patet per amicos & oues pro quibus Chriſtus mortuus eſt, non intelligi eos ſolum qui Deum amant & Chriſtum ſequuntur, ſed omnes eos quos Deus amat, & quorum ſalutem decreuit: pro quibus cum nondum amarent Deum, eiꝑ; eſſent inimici, Chriſtus eſt mortuus: Ergo inimici dicuntur Rom. 5. v. 10. quia Deum non amabant, ſed tamen iam tunc ſummè amabantur à Deo, & ad ſalutem in Chriſto erant deſtinati: Nempe diuerſo reſpectu erant amici & inimici, oues & hœdi. Amici quia Deus eos amabat, inimici quia Deum nondum amabant.

VI. Nec vero fit iniuria Chriſto, ſi amor Patris & *dilectio* dicatur præcedere ordine decretum de Filio mittendo, cum ipſe Chriſtus id teſtetur. Ioh. 3. 16. *Ita Deus dilexit mundum vt Filium ſuum vnigenitum dederit,* &c. vbi dilectio Patris miſſioni Filij manifeſtè præponitur. Quod quidem ſic accipiendum eſt, non quod ab ipſo electionis actu Filius excludatur: cum & ipſe ſit vnus Deus cum Patre: ſed hoc ab eo factum eſt non qua Mediador, ſed qua Deus.

VII. Sed nec fit iniuria Chriſto ſi Patris voluntas de hominibus ſeruandis dicatur præcedere Chriſti redemptionem: cum hæc redemptio ſit etiam poſterior peccato: eſt enim morbus prior medicinà.

VIII. Nec quidquam detrahitur de magnitudine



pretij, etiam si voluntas eius qui pretium obtulit dicatur anteceſſiſſe.

IX. Iſa definitio Decreti Electionis hoc idem euincit, ſi quidem electio eſt decretum de certis hominibus per Chriſtum ſaluandis, qua definitione Chriſtus ponitur non vt cauſa electionis, ſed vt medium executionis, & cauſa meritoria ſalutis.

X. Hic vero Arminiani mirum quantum inſultāt, nam quia amorem Patris facimus, non quidem tempore ſed ordine priorem interceſſione filij, ſic agunt nobiſcum quaſi doceremus Deum nos amauiffe extra Chriſtum, & vt conſideratos ſine fide in Chriſtū; quod quidem tam alienum eſt à noſtra ſententia quā quod maximè. Abſit dicamus Deum vnquam nobis voluiſſe ſalutem conferre, quin ſimul & eodem momento nos in Chriſto conſiderauerit, vt per eum ſeruandos. Neque erat cauſa cur Socinianismi ob id inſimularemur: Nihil nobis commune eſt cum hoc Alaflore qui Chriſti beneficium funditus euerſit. Sed aliud eſt dicere, amorem Patris præcedere ordine interceſſionē filij, aliud dicere Deū nos amare extra filium. Aliud eſt digerere ordine Dei cogitationes; aliud res cogitatas diuellere & ſeparare. Arminius qui initio libri aduerſus Perkinſum, ipſe ſe naſutulum vocat, aſtutè, immo improbè aucupatur puncta prioritatis in ordine, ad diuellenda quæ ſeparari non poſſunt. Perinde ergo agit ac ſi quis diceret in Deo priorem ordine fuiſſe cogitationem de creando homine, quam cogitationem de ornādo eo ſanctitate & iuſtitia, & inde inferret Deum prius voluiſſe crea-

re hominē non iustū, aut prius considerauiſſe eum vt non ſanctum. Si quis dicit in Decreto Dei priorem eſſe cogitationem de euertendo mundo quam de euertendo per ignem, non idcirco dicit Deum prius cogitare de eo euertendo abſque igne. *Æterna ſunt omnia Dei conſilia, etiamſi ordo quidam ſit inter ea & dependentia.*

XI. Vrit Arminium locus ille Iohannis 3. *Sic Deus dilexit mundum & Filium dedit &c.* vbi dilectio Dei ponitur vt cauſa per quam factum eſt vt filium dederit. Conatur ergo locum tam diſertum eludere inſulſo cauillo: *Ille* (inquit) *dilectio non eſt qua vult vitam æternam: Quod etiam ex ipſo dicto Iohannis apparet, ſi leu enim in Chriſtum inter hanc dilectionem & vitam æternam interiungit.* Obſeruabit ergo lector ipſum Arminium agnoſcere quendam amorem Dei erga homines qui decretum de mittendo filio antecedit. Sed dicit Deū iſto amore non velle dare vitam æternam. Quid ergo? hoc enim debuerat ædere. An illo amore Deus vult homines in morte relinquare? An poſſibile eſt vt Deus amet creaturam à ſe creatam ad vitam, quin illo amore velit eam viuere? Pudet ſane tam dilutæ ſubtilitatis. Immò vero, eo ipſo quod per iſtum amorem miſit Filium, ſatis aperit, ſe illo amore voluiſſe vitam homini reſtitui. *At* (inquit) *inter dilectionem illam & vitam æternam fides intercedit.* Quid tum? nonne poſſum velle ſanationem ægri, etiam ſi interueniat medicus inter meam volitionem, & ægri ſanationem? Hic ſanè ex rebus appoſitis facit oppoſitas. Sed non video cur magis faueat Socino qui dicit Chriſtum

non esse causam electionis, quam qui dicit Christum non esse causam amoris per quem Deus voluit Christum mittere in mundum, & nobis prospicere de redemptore. Aut cur plus peccetur faciēdo redemptionē Christi esse medium inter amorem Dei per quem nos elegit & inter nostram salutem, quā si fiat medium inter amorem Dei quo vult dare Christum pro nobis, & inter nostram salutem. Utrobique enim ista redemptio fit medium, non prima causa. Ne igitur inuideamus Patri hanc laudem, ut eius beneplacitum, fons & prima origo nostræ electionis statuatur.

XII. Obserua insuper electionem cuius Arminius vult Christum esse fundamentum, esse electionem illam generalem quā omnes homines sunt conditionaliter electi. Quam quidem cum abundē confutauerimus cap. 18. euanesceat quicquid Arminiani afferunt ad probandum Christum esse electionis fundamentum. Sanē non erat cur tantopere desudarent ad probandum Christum esse fundamentū electionis qua Pharaō & Iudas sunt electi. Cuius quidem imaginariæ electionis verum habebit characterem & delineationem qui Deum sic loquentem induxerit. *Decreui mittere filium ad seruandos omnes homines qui credent, sed quinam & quot illi sint futuri nondum constitui; tantum dabo omnibus vires sufficientes ad credendum, credet vero qui volent.*

XIII. Aduersus veritatem tam euidentem tuctur se Arminius vno apostoli verbulo. Eph. 1. 4. *Elegit nos in Christo.* Verum aliud est electum esse in Christo, aliud propter Christum, ita ut Christus sit causa cur hic potius quam ille electus sit. Mens Apostolica est perspi-

cua. *Eligere* nihil est aliud quàm *destinare ad salutem*. Ergo eligere in Christo, est destinare ad salutem in Christo seu per Christum adipiscendam. Quoscuque enim Deus decreuit seruare, eos Christo dedit, & vt Christo adiunctos considerat. Nodum in scirpo quærit qui longè petitis interpretationibus tenebras offundit rei perspicuæ.

XIV. Huic vero suæ sententiæ Arminius & post eum Arnoldus cap. 7. subternit hoc axioma: *Prædestinationem esse fundamentum Christianismi*. Hoc postulatum vult sibi concedi, neq; enim probat: Non secus ac si quis initio disputationis vellet precariò obtinere & peteret sibi concedi, *circulum habere angulos*. Hoc quidem magnum est *aitræma*, & quod nemo opinor ei concedet, qui scit quid sit prædestinatio, & quod sit fundamentum religionis Christianæ. Fundamentum fidei Christianæ est, agnoscere Christum Filium Dei vnicum à patre missum, vt quicumque credit in eum non pereat sed habeat vitam æternam. Omnino necesse est vt fundamentum Christianismi sit regula fidei, cui innitatur fides Christianorum: At prædestinatio non est regula fidei, sed actio diuina qua constituit certos homines seruare per Christum. Absit dicamus decretum arcanum quo singuli homines, puta Petrus aut Carolus electi sunt, esse fundamentum Christianismi. Quicumque vellent inde auspicari religionem, & ab hoc decreto ordiretur elementa fidei Christianæ, is aut offusa caligine trepidaret in limine, aut vertigine correptus corrueret. Quæcunque ergo Arnoldus superstruit tam falso axiomati ultro concidunt; vt nobis non sit

neceſſe euertere quæ vltro collabûtur. Adde quod impugnat quod à nobis nõ creditur, nempe nos eſſe amatoſ a Deo extra Chriſtum. Tantùm notanda eſt ambiguitas qua fucû facit lectori, cum dicit p. 171. *Chriſtum eſſe fundamentum aſſumptionis in gratiam & amorem Dei.* Si per aſſumptionem in gratiam intelligit reconcilia-tionem per ſatisfactionem pro nobis præſtitam, fateor iſtius aſſumptionis in gratiam & amoris Chriſtum eſſe fundamentum. At ſi per aſſumptionem in gratiam & amorem intelligatur amor ille Patris per quem voluit mittere filium ad nos ſeruandos ( qui ſanè amor eſt ló-ge maximus & fons omnis boni) ne quidem ipſe Arminius vult Chriſtum eſſe amoris iſtius fundamentũ. Attamen eodẽ illo amore Deus ab æterno eligit quos voluit.

XVI. Non excutio quod præſidenter & temerè Arminius dicere auſus eſt, Deum non potuiſſe aliter nos ſeruare quam per Chriſtum : nec ei fuiſſe copiam alterius medij ad ſalutem hominum. *Non poteſt* ( inquit) *Deus alicui velle vitam æternam citra reſpectum Mediatoris.* Et Collatores Hagienſes Arminiani, *impoſſibile eſt apud Deum, ſalutem decernere peccatoribus quin ante decreuerit ſatisfactionem iuſtitie ſue :* loquuntur autem de Chriſti ſatisfactione. Audacter ſanè & temerè ſapientiam diuinam limitibus circumſcribunt : Quod ſi hoc verum eſſet, non tamẽ eſſet hominis talia prolo-qui. Satis eſt quod Deus eſt ſecutus viam conuenientiſſimam & qua nulla eſt melior. Obſeruandum obiter hanc Arminij ſententiam non placuiſſe Vorſtio. Is diſputatione de Deo pag. 331. aſſerit *Deo licitum eſſe de iure ſuo remittere, non minus quam ius ſuum retinere aut perſequi*

p. 320.

*sequi. Et pag. 399. Falsum est quod nullum omnino peccatum per Dei iustitiam possit impunitum dimitti.*


XVII. Collatores Hagienſes sic argumentantur. Si Decretum de Christo Salvatore posterius est decreto electionis quarundam personarum singularium ad salutem : ergo Deus prius ordine decrevit quarundam singularium personarum salutem quàm satisfactionem suæ iustitiæ.

Fraus hîc est multiplex : nam Decretum de saluandis certis hominibus, & Decretum de mittendo Christo ad eos saluandos faciunt duo decreta, cum vnum sit : Electio enim est decretum de certis hominibus in Christo saluandis. Non est aliud decretum quo Deus destinauit hominem ad vitam, aliud quo ad respirationem : Altera fraus est quod comparant salutem singularium cum satisfactione iustitiæ diuinæ, cum instituenda esset collatiô manifestationis bonitatis Dei per quàm saluat singulos, cum satisfactione eius iustitiæ suæ. Non est inconueniens si Deus dicatur prius decreuisse manifestationem suæ bonitatis quàm satisfactionem suæ iustitiæ : His adde quod astutè ad *ἐκ παυλισμῶν* & quasi ad contemptum, vtuntur his vocibus *electionis singularium quarundam personarum*, cum hæ singulares quædam personæ sint Ecclesia electorum, cuius salus tanti est apud Deum vt ob eius salutem voluerit satisfacere suæ iustitiæ, vnde sequitur Deum vt declararet suam bonitatem prius intendisse eorum salutem quàm satisfactionem suæ iustitiæ.

Cætera quæ addunt iam sunt à nobis excussa.

## DE REPROBATIONE.

## CAP. XXVI.

I.  EPROBATIONIS doctrina eatenus utilis est electis, quatenus ex comparatione sortis reprobatorum cum sua, excitantur ad laudem & admirationem diuinæ erga se benignitatis. Tum ubi pignora electionis languent, & spiritus adoptionis à cupiditatibus carnis contristatur, prodest fidelibus aliquo horrore concuti, & instigari ad se ipsos explorandos an proficiant in regeneratione, an vero in peius ruant & prolabantur: ut sic subdantur segnibus aculei.

II. Quosdam esse Reprobos ipsa vox Electionis euincit: non enim essent aliqui electi nisi ceteri præterirentur & reijcerentur. Reprobatorum mentionem facit scriptura 1. Petri cap. 2. v. 8. *Qui quidem impingunt in verbum & sunt immorigeri, ad quod etiam positi sunt.* Et Iudæ. v. 4. *Subreperunt quidam homines ad hanc damnationem iam prius descripti.* Hi in Apocalypsi solent designari per eos qui non sunt descripti in libro vitæ. Quorum numerum esse maximum Christus innuit, sic loquens, *Multi vocati pauci electi.* Idem comprobatur experienciâ: Nam non modo ante aduentum Christi, sed & hoc ipso tempore plurimæ sunt gentes quibus ne nomen quidem Christi notum est, sine cuius tamen cognitione non est salus.

III. Reprobatio est Decretum Dei quo statuit ab æterno certis hominibus non dare gratiam qua ab infinita prauitate & debita maledictione liberentur, eosque ad iustas & commeritas ob peccatum pœnas destinauit.

IV. Non placet definitio Thomæ qui reprobationis Decretum dicit esse *voluntatem permittendi aliquem* <sup>Prima</sup> *cadere in culpam, & inferendi damnationis pœnam pro culpa:* <sup>parte Summæ</sup> *Nam permissio qua Deus permittit peccatum non pertinet ad prædestinationem, sed ad prouidentiam, quantumlibet inferuiat prædestinationi.* <sup>Q. 23. Art. 3.</sup>

V. Reprobos posse seruari dogma est Arminianæ scholæ. *Nam* (inquit Arminius) *decretum illud non est de potentia sed de actu seruandi.* <sup>In Per-  
kinsum</sup> *Malè: nam ubi actus Dei* <sup>pag. 141.</sup> *decreto definitus est, frustra est potentia per quam huic actui possit resisti. Hoc dogma, vt sunt errores inter se colligati ceu oua serpentum, alia nihilo meliora secum trahit. Nam si reprobis potest saluari, poterit qui non est scriptus in libro vitæ efficere vt de integro inscribatur, & sic electorū numerus non erit certus, nec reprobationis decretum erit irreuocabile & peremptorium (vt ipsi loquuntur) nisi post finalem perseuerantiam in incredulitate. Tum inde sequetur reprobis posse, si uelit, fidem adipisci, & se conuertere: vnde fit vt fides non sit ex mera Dei gratia: quam esse sententiam Arminij postea videbimus.*

VI. Deuseodem modo est causa reprobationis quo iudex est causa pœnæ fontium: Peccatum vero est causa meritoria. Cum ergo peccati consideratio moueat iudicem, iudex vero damnet ad pœnam, apparet pec-



catum esse causam remotam damnationis, & non solum conditionem necessario prærequisitam: iudicem verò esse causam proximam.

VII. Porro etsi peccatum sit causa destinationis ad pœnam, non est tamen causa discriminis inter electos & reprobos. Exempli gratia, sint duo fontes rei eiusdem criminis: placeat autem Regi hunc damnare, illum absolvere, peccatum quidem eius qui damnatur causa est pœnæ: at non est causa cur Rex aliter affectus sit erga hunc quam erga illum; cum par utrobique sit culpa. Causa discriminis est quod aliquid intercessit quod ab vno horum pœnam auertit. Quod quidem in prædestinationis negotio, nihil est aliud quam mera Dei *Arbitria*, per quam certos homines ex suo merito beneplacito donauit Christo, cæteris in insita corruptione, & debita maledictione relictis. Super quo discrimine nefas est Deo litem intendere, cum non sit *in æquos*, nec obstrictus vlli creaturæ, & neminem iniuste puniat: ibi quidem dans gratiam indebitam, illic vero irrogans pœnam debitam.

VIII. Hic quæritur quod nam sit illud peccatum ob quod Deus reprobatur: Nimirum an homines reprobentur ob solum peccatum ab Adamo contractum, & ob labem quæ reprobis cum electis communis est; an vero etiam reprobentur ob peccata actualia quæ toto vitæ cursu sunt commissuri. Solutio est in promptu. Nam quauis corruptio naturalis sit causa sufficiens ad reprobationem, non est tamen dubium quin ob quam causam Deus damnat, ob eandem damnare decreuerit. Damnatur autem reprobos ob pec-

cata quæ actu commiserunt: non enim in inferno luunt tantum pœnas peccati originalis, sed etiam peccatorum actualium. Ergo & Deus destinavit eos ad damnationem ob eadem peccata. Reprobare autem & destinare ad damnationem idem sunt. Sic planè Deus aliquid exequitur in tempore prout ab æterno decrevit exequi. Punit autem in tempore ob peccata actualia, Ergo & ob eadem ab æterno punire decrevit. Inde est quod Capernaitarum pœna futura est grauior quam Sodomitarum, & eius qui sciuit voluntatem heri quàm qui nesciuit, quia inter peccata actualia ob quæ puniuntur magnum est discrimen. Nihil obstat quo minus Deus considerans hominem iacentem in corruptione & prauitate naturali, eundem quoque consideret pollutum ijs peccatis quæ per istam prauitatem naturalem est commissurus.

IX. Arminius non putat quenquam reprobari ob peccatum originale: quippe cuius remissionem toti generi humano à Christo impetratam esse contendit: Sed vult tantum hominem reprobari ex præuisione peccatorum actualium, id est ob violatam legem & contemptam gratiam. Qua in rem ipse sibi constare non videtur. Cum enim peccata omnia actualia fluant, à peccato originali, fieri non potest vt causa peccatorum actualium & fons à Deo remittatur, peccata vero quæ inde fluunt non remittantur. Veluti si Deus condonaret alicui intemperantiam, sed puniret eum ob adulterium: actiones enim fluunt ab habitibus & propensionibus naturalibus vt secundum ad primis.

X. Inter peccata ob quæ aliquis destinatur ad pœnam sine dubio est incredulitas & reiectio Euangelij: Nam hac ipsa reiectione peccatur in legem per quam Deus nos iudicaturus est: Lex enim iubet Deum amari toto corde, ejque, in omnibus & sine exceptione morem geri, ac proinde & credi loquenti, & iubenti credere obtemperari, quodcunque tandem illud fuerit quod vel iubebit vel dicet.

XI. Vt reprobetur ob reiectum Euangelium & spretam Christi gratiam is cui Euangelium nunquam annuntiatum est, nulla ratio patitur. Sed quem Euangelium non seruat, relinquit sub lege vt per eam iudicetur. Quæ tunc demum astringit hominem ad credendum in Christum cum Christus ei annuntiat. Nec est pædagogus ad Christum, nisi quibus Christi cognoscendi facta est copia. Eodem planè modo quo lex non astringebat credere Ieremiæ prophætantem eos quibus Ieremiæ nomen nunquam innotuit, nec potuit innotescere.

XII. Et si autem reprobatio non potest dici esse causa peccati, quippe quod antecedit reprobationem: non potest tamen negari quin reprobatio causa sit negationis gratiæ & prædicationis Euangelij, & spiritus adoptionis qui electis est peculiaris: Cum enim hæc negatio pœna sit, necesse est infligatur iusti iudicis voluntate. Arminij verba hæc sunt pag. 88. in Perkinsum. *Reprobationis decreto negatur gratia efficax, & paulo post, Deus certo reprobationis decreto statuit nonnullis fidem & pœnitentiam non dare, scilicet adhibendo illis gratiam efficacem qua certò credant & conuertantur.* Non est ergo cur

hoc nomine traducamur ab Arminianis, cum id ipsum dicat coryphæus sectæ.

Cur autem Deus non teneatur dare omnibus fidem & pœnitentiam causa est in promptu. Deus enim qui non effecit morbum, non tenetur dare omnibus remedia morbi, nec suppeditare vires ea præstandi quæ ab homine Deo debentur. Impotentia enim hæc præstandi, ab ipso homine profecta est, non à Deo. Impletio autem legis est debitum naturale. Quæ cum violeretur reiectione Euangelij, planum est hoc etiam esse de debito naturali credere Euangelio, non quidem antequam annuntietur, sed tunc demum cum annuntia-

XIII. Arminiani censent neminem reprobari, nisi qui contempsit gratiam quæ ad Christum ducit, præcipuamq; causam reprobationis faciunt incredulitatem, non modo in ijs quibus prædicatum est Euangelium, sed etiam in ijs qui ne fando quidem Christi nomen audiuerunt: hos Arminius reos facit contemptæ gratiæ. Dicit enim omnibus hominibus irresistibiliter dari facultatem credendi, & vires adipiscendi fidem si velint. Immo & Ethnicis qui ante aduentum Christi viuebant in intima Hispania aut Scythia, volût administrata esse media sufficientia ad credendum. Ponuntq; gratiam quandam vniuersalem sufficientem, omnibus hominibus communem. Sed cum ventum est ad explicandam istam gratiam, modo eam constituunt in notionibus communibus & luce naturali, modo in contemplatione creaturarum, modo in qualicunq; cognitione legis. De qua nefaria doctrina, &

*Arnol. p. 336*  
*Dicit Armi-*  
*nus gratiam*  
*qua facultas*  
*credendi da-*  
*tur quamplu-*  
*rimis, dicit*  
*omnibus com-*  
*munem esse,*  
*an proinde ne-*  
*gat gratiam*  
*esse? Et pag.*  
*262. Respon-*  
*det Deum in*  
*notum sedus*  
*gratia propo-*  
*nit & culpa*  
*admissa re-*  
*missionem*  
*promittit sub*  
*nona obedi-*  
*entia condicione*  
*TENERI ma-*  
*xime vires ad*

re quibus ho-  
mo conditionē  
istam possit  
implere, alio-  
qui non posset  
iudicari istam  
gratiam sin-  
cere offerre.

quomodo per hæc in Pelagij castra non obscurè tran-  
seant, agatur suo loco.

XIV. Hic verò vndique telis incessimur : & Armi-  
niani conuitia in nos quasi ex plaustro iaculantur, &  
sibi fingunt mōstra quæ iugulent. Collatores Hagien-  
ses p. 122. post cructatas aliquot calumnias, sic clau-  
dunt sermonem. *Hæc breuiter dicta sint aduersus absur-  
dam, destabilem, atq; abominandam sententiam istam.*

Collat. Hag.  
p. 277. Non  
potuit se con-  
uertere, impe-  
ditus scilicet  
à diuina volū-  
tate.

Bona verba quæso. Non terrent nos hæc *μωρολογία*.  
Fingunt nos docere infidelitatem fluere ex reprobatione,  
quasi reprobatio causa esset infidelitatis. Hunc  
coccysmum sexcenties nobis occinunt viri boni:  
tribuentes nobis doctrinam quam nec credimus, nec  
docemus. Nam si quis non decreuit dare cæco reme-  
dia quibus recuperet visum, non idcirco causa est cæ-  
citatis, aut cæcum ad cæcitatem destinauit.

XV. Nituntur autem falso fundamento, cui peio-  
ra superstruunt. Sermonem enim suum de Reproba-  
tione sic auspiciunt p. 118. *Notum est fratribus Con-  
traremonstrantibus quod qualis ex una parte est Electio, ta-  
lis debeat esse ex altera parte Reprobatio.* Hic fons erroris;  
falsum hoc principium homines acutos abduxit in de-  
uia. Alia longè est Electionis ratio, alia Reprobatio-  
nis. Peccatum enim & infidelitas non est conditio eo-  
dem modo requisita in reprobis, quo fides est conditio  
requisita in electis. Nam peccatum est conditio præ-  
requisita ante reprobationem, fides vero est conditio  
consequens electionem. Reprobatio fit ex peccato,  
electio vero est ad fidem. Peccatum causa est destina-  
tionis ad pœnam, fides est electionis effectus. Illud Deus  
inuenit,

inuenit hanc facit. Peccatum sequitur reprobationem necessitate consequentiæ tantum, at non necessitate consequentis. At fides utroque modo sequitur electionem. His abundè diluitur calumnia quam Arnoldus p. 228. & sæpe alibi nobis inspergit: nos negare reprobos esse reprobos propter peccatum.

XVI. Calumniandi ansam præbet Arminianis quod dicimus decretum Reprobationis esse præcisum & absolutum, nec assentimur Arminio docenti reprobos quidem non seruari, sed tamen posse seruari: & neganti numerum reproborum decreto Dei esse definitum. Sed nihil hîc est ex quo possit deduci, reprobationem causam esse peccati, aut quenquam reprobari sine intuitu peccati.

XVII. Arnoldus sententiam nostram obiectiunculis quibusdam vellicat. Pag. 219. *Dicitis reprobos ob aliud peccatum à salute in Decreto à Deo esse exclusos, ob aliud verò in tempore exclusos iri.* Calumnia: Hoc nec sentimus nec dicimus. Eandem criminationem ingerit pag. 229. & 238. ubi dicit à nobis credi homines reprobari tantum consideratos in peccato Adami.

XVIII. Pag. eadem sic argutatur. *Non est sapientia velle ut bonum sperent qui absoluto Dei Decreto ab eodem sunt exclusi.* At nego incredulos aut profanos absoluto Dei decreto à bono esse exclusos, eo modo quo *absolutum* accipis, id est sine respectu ad eorum peccata. Non est autem insipientis iubere ut qui absoluto, id est certo & ineuitabili decreto à vita æterna sunt exclusi, contendant & aspirent ad vitam æternam, quando ob id ipsum à vita sunt exclusi quia ad eam non aspirauerunt.

Bb

XIX. Idem pag. 226. *Statuitis (inquit) Deum citra considerationem impenitentiae quosdam peccatores in lapsu adiacentes praevisè à salute reprobasse: Calumnia: hoc non credunt Ecclesiae nostrae. Non hoc dicit Confessio Ecclesiarum Galliae: Non Angliae: Non Belgij. Decreto quidem reprobationis includitur voluntas non dandi fidem & finalem poenitentiam reprobis: Sed non inde fit reprobationem esse citra considerationem impenitentiae.*

XX. Subijcit Arnoldus. *Vestra doctrina statuit Deum à reprobis fidem exigere, eosq; si non credant decreuisse damnare, cum tamen simpliciter illis sit impossibile ut in Christum cum certa animi persuasione credant, non solum quia Deus illis non dat vires ad credendum, sed etiam quia si vel viribus ad credendum essent instructi, immo crederent in Christum, falsum crederent, utpote quia Christus pro ipsis non est mortuus. Pugnat vero cum divina iustitia talem obedientiam exigere, & ob obedientiam talem quae creatura absolute est impossibilis non praestitam creaturam punire. Eadem saepe alibi & ex opus inculcat: praecipue vero p. 261. & 262.*

Multa hic falsa. Primò falsum est fidem ab omnibus reprobis exigì, nam ab ijs solum exigitur quibus Evangelium annūtiatur. Sed neq; verum est fidem absolute & sine cōditione exigì ab omnibus quibus Euāgelium annuntiatur: exigitur enim sub conditione, nempe si conuertantur & resipiscant: Si vero non resipiscant, docemus & clamamus Christi beneficium ad eos non pertinere: & frustra ac falsò ab eis sperari & credi in Christum, quandiu Deo inuitanti ad penitentiam ad-

uerfantur: Sed & falsum est Deum fore iniustum si iubeat eos credere & obsequi, qui insita prauitate non possunt credere & obsequi, & quibus Deus non dat vires credendi: homo enim ipse sibi hanc impotentiam accersuit, & hæc prauitas in homine est voluntaria: & Deus exigens ab homine vt sibi per Christum loquenti credat, nihil exigit quod homo non debeat: Obsequi enim legi est debitum naturale: Non potest autem Deus per Christum loquens respui & contemni, quin lex violetur, vt plenius iam aliquot locis docuimus, præcipuè vero cap. II. vbi docuimus vires credendi nobis in Adamo esse datas; & Adamū eas habuisse ante lapsum; sed occasionem defuisse: Ac proinde & has vires in Adamo esse amissas. Nec Deum TENERI eas restituere, vt vult Arnoldus, Deo ipsi leges figens. Per hæc etiam itur obuiam criminationi qua nos infectatur Arnoldus p. 230. *Statuitis* (inquit) *reprobis fidem exigi, media tamen ad obsequium fidei præstandum præcisè negari.* Nam nec ab omnibus exigitur, sed ab ijs quibus Christus innotuit, neq; ab his absolute, sed cum conditione resipiscentiæ: neq; ab ijs quamuis reprobis quicquam exigitur quod non debeant.

XXI. Sed Arnoldus affuit fœdam calumniam qua causam nostram odiosè prægrauat. *Vultis* (inquit) *reprobis fidem exigi, vt inexcusabiles reddantur, & damnatio ipsorum aggrauetur.* Dicimus quidem damnationem grauiorem inde effici, sed non dicimus hunc finem Deo esse propositum. Sic cum dicimus aliquem proficisci ad bellum vt occidatur, significamus quid euenturum sit, non quis finis intendatur. In finem vero



quem sibi Deus preponit scrupulosè inquirere non est nostrum. Hi duo tamen fines certi sunt : Nempe petere ab homine quod debet : tum electos hoc pacto ad salutem perducere.

XXII. Intentat aliud telum pag. 286: *Vestra* (inquit) *doctrina pugnat cum minis Euangelicis, quatenus cum intentio Dei in illarum propositione sit, ut homines ab impænitentia deterreantur & ita seruentur: vos contra docetis Deum media ad pœnitentiam necessaria aliquibus negare, quia illos statuit non seruare.* Principiò dubitari potest an sint aliqua minæ Euangelicæ, nam minæ quæ in libris Euangelij continentur non sunt pars Euangelij. Cum enim ipsa vox Euangelij bonum nuntium denotet, non video quomodo minæ ad bonum nuntium possint pertinere. Non per Euangelium, sed per legem punientur qui non crediderint Euangelium. Sed ut ut sit, nihil hîc video quod pugnet cum his minis per quas Deus intendit ab homine exigere quod debet, & quod ipsa lex postulat, nempe ut Deo mos geratur. Cum tali minarum denuntiatione optimè conuenit negatio gratiæ & restitutionis virium quas homo sua culpa amisit. Non pugnant ista, vitam sub conditione obsequij homini proponere, & vires obsequendi culpa hominis amissas homini non restituere.

XXIII. Sed neque hæc pugnant, vitam sub conditione alicui proponere, & eundem ad mortem ob præuiam inobedientiam ordinare.

XXIV. Idem pag. 296. (nam quod de infantibus subiungit postea tractabitur) post Arminium, sic inuehitur in nostram sententiam. *Vestra* (inquit) *senten-*

*tia facit quo minus publicæ preces sicut decet Deo offerri possint, scilicet cum fide & fiducia quod omnibus verbum audientibus sint profuturæ: quia iuxta vestram illam sententiam inter eos multi sunt quos Deus non modo non vult saluari, sed quos absoluta, æterna, & immutabili voluntate, omnes omnino res & causas antegrediente damnari vult. Apostolo interim ubi preces pro omnibus fieri iubet hanc rationem adiungente, quod hoc bonum & acceptum sit coram Deo qui vult omnes homines saluos fieri & ad agnitionem veritatis venire.*

XXV. Respondeo falsò supponi ab Arminio preces publicas debere fundi cum hac fiducia, quod omnibus verbum audientibus sint profuturæ. Temeraria esset hæc fides, nec nixa Dei verbo. Maximè cum Ministrî verbi ut plurimum multos nouerint apertè contumaces & profanos, nec dubitent quin præter hos multi sint intercutibus vitijs ægri, qui tamen præ se ferunt pietatem. Profectò simile de semine sparso in diuersum solum & discrepantis ingenij, dissimilique successu, plus hac in parte nobis affert timoris quam fiduciæ. Veruntamen quia nobis ignota sunt arcana reprobationis, merito pro omnibus concipiuntur preces, quia de singulis bene speratur. Non video autem quo pertineat hæc obiectio nisi ad distinendum lectorem ludicra declamatione; quippe cum hæc eadem obiectio non minus vrgeat Arminium, qui etsi decretum Dei non vult esse præcisum, fatetur tamen Deum certò præscire qui sint damnandi. Hoc autem fateri quid aliud est quam docere Deum velle ut pro ijs oremus, quibus certò scit orationes nostras non profuturas?

B b iij

Quod vero nobis impingit, nos facere decretum reprobationis antegrediens omnes omnino res & causas, ac proinde & ipsum peccatum, alienum est planè à nostra sententia: Quod si cuitalia verba exciderunt per incogitantiam, non hæc idcirco est sententia Ecclesiarum nostrorum. Defendimus nostra, at non præstamus aliena.


XXVI. De loco Apostoli ubi dicit Deū velle omnes homines saluari, agatur suo ordine & loco: Velle hic nihil est aliud quam inuitare & vocare. Tum per omnes homines, intelligit homines cuiuscunque conditionis & fortis: Eodem planè modo quo ad Titum cap. 2. v. 11. gratia Christi dicitur esse salutifera omnibus hominibus, cum tamen tam multi pereant. Indicio est quod ibi quidem de regibus, hic vero de seruis agitur: Illorum dominationem tunc temporis Christo aduersam, horum vero sortem abiectam, Apostolus vult non esse impedimento quo minus pro illis preces concipiantur, hi vero gratiæ salutaris non posse esse participes existimentur.

XXVII. Arminiani sibi acutè agere videntur cum sic differunt. *Sit (inquiunt) aliquis cui ob malè actas excubias oculi sint eruti, an iustum est ei iubere ut vigilet deinceps & excubet? Quod si non fecerit eundem gravissimis pœnis multare quod non vigilauerit?* Respondeo hoc exemplum planè esse alienum: vtuntur enim exemplo cæci qui non tenetur videre: at homo quantumvis corruptus & prauus tenetur Deo obsequi. Ni fecerit merito plectitur. Tum afferant exemplum eius cui reluctanti & inuito oculi sunt effossi: at homo ultro sibi

prauitatem asciuit, & voluntariè malus est: meritò ergo punitur.

*Quatenus & quo sensu Christus sit pro omnibus mortuus. Sententia partium.*

## C A P. XXVII.

I.  RMINIANI censent, Christum morte sua omnibus & singulis hominibus impetrauisse & acquisiuisse remissionem peccatorum, & reconciliationem & salutem. Nec dubitant dicere morte Christi reconciliationem & salutem esse acquisitam Pharaoni, Sauli, Iudæ, Pilato, non quidem quæ reprobis, sed quæ peccatoribus. Deum enim salutem omnium hominum ex æquo intendere & desiderare. Sed quod remissio & reconciliatio omnibus non applicetur, causam esse hominis incredulitatem.

*Coll. p. 130. Christus omnibus per mortem impetrat remissionem & reconciliationem & remissionem peccatorum.*

II. Vnustamen Vorstius Arminianorū Coryphæus hæsitat in hæc quæstione, & pronior videtur in contrariam sententiam. Is pag. 65. collationis cum Piscatore, dicit Christum nō pro solis electis, sed pro omnibus omnino hominibus, saltem pro vocatis, in mortem à Deo traditum esse.

*Collat. Hag. pag. 183. Non omnibus merito sua partem salutem conferet etiam si omnibus sit acquisita.*

III. Finem verò quem sibi Deus proposuit in tradendo filium morti censent non fuisse, applicare hoc beneficium certis quibusdam hominibus, nec Christum fuisse destinatum ad mortem ex præcisa Dei vo-

luntate hominem saluandi; Christum enim à Patre morti esse destinatum, antequam Deus de saluandis hominibus cogitaret: ideoque Christum morti destinatum sine illo respectu, vt credentes in eum seruarentur. Greuinchouius p. 21. disertè dicit etià impetratione iam còpleta nullam tamen esse necessitatem applicationis: id est post impetratam salutem & reconciliationem omnibus hominibus, non esse necesse vt quisquam saluetur, & possibile fuisse vt nemo actu reconciliaretur. Nempe quia vult decretum de mittendo Christo ordine antegredi decretum de saluandis credentibus, ac proinde Deum statuisse mittere filium, cum nondum statuisset seruare credentes. Sed Arminiani finem Deo propositum in mittendo filio hunc fuisse volunt, reddere salutem hominis possibilem, & sibi viam patefacere qua posset saluare peccatores, illà suà iustitia. Hinc Deo partam esse potestatem hominem saluandi, quia sine morte Christi per quam satisfactum est Dei iustitiæ, Deus ne quidem potuisset velle hominem seruare.

*Greuinch. p.  
15. 16. & 17.*

I V. Quod si nemo in Christum credidisset, Christus tamen (si his creditur) finem quem sibi moriendo proposuerat assecutus fuisset; Negant enim eum esse mortuum vt quenquam præcisè saluaret, sed vt salus hominis possibilis redderetur, eique ianua ad salutem pateret, quam homini gratià adiuto liberum esset ingredi, aut non ingredi.

*Vide Cellar.  
Hag. p. 172.  
Greuinch. p.  
8. & 9. Deus  
applicationē  
reconciliationis  
omnibus nec  
voluit nec no-  
luit, &c.*

V. Distinguunt ergo inter impetrationem & applicationem. Omnibus quidem impetratam reconciliationem & remissionem peccatorum pertendunt, quæ  
tamen

tamen solis credentibus applicetur. Omnes homines datos esse Christo iure saluationis: at non communicatione salutis. Deum applicationem reconciliationis, id est fidem & salutem omnibus nec voluisse nec noluisse, sed ita demum voluisse si crederent & si vellent recipere gratiam.

VI. Sed & iidem negant Christum in cruce electorum personam sustinuisse: aut mortuum esse pro electis: quia electio tunc locum nondum habebat, quippe quæ sit aliquid posterius morte Christi.

*Arm. in  
Fek. p. 77.  
& 78.*

VII. Christum quidem dicunt se obtulisse in sacrificiū pro omnibus, at quod ad intercessionem eius non sibi constant, \* interdū enim volunt eum intercedere pro solis fidelibus, quasi aliquid impetrari posset sine intercessionem. Interdum verò faciunt duo genera intercessionis, \* quandam generalem, & omnibus communem, quandam particularem, quæ credentibus peculiaris est.

*Greuing. p.  
46. Christus  
quoad actū  
oblationis  
omniū om-  
nino homi-  
num sacer-  
dos fuit, etiā  
Pharaonis  
&c. Ibi per  
oblationem  
vult fieri im-  
petrationem,  
per interces-  
sionem vero  
applicationē.*

VIII. Ab hac sententia absumus longissimè. Christum quidem pro omnibus esse mortuum agnoscimus, sed pernegamus hac morte omnibus hominibus impetratam esse salutem aut remissionem peccatorum; Aut Caino, Pharaoni, Sauli, Iudæ &c. esse partam reconciliationem. Nec putamus alicui impetratam esse remissionem peccatorum, cui non sint remissa peccata, aut acquisitam salutem ei quem Deus ab æterno damnare decreuit: inanis enim esset hæc acquisitio. Electionem vero posteriorem esse morte Christi, cum multis aliis de causis negamus, tum quia Christus in ipso mortis agone dedit insigne specimen electionis


*Coll. Hag.  
pag. 187. Re-  
spondemus  
duplicem esse  
intercessionē  
unam gene-  
ralem quæ to-  
tum mūdum  
spectat alte-  
ram particu-  
larem quæ ad  
solos credentes  
pertinet.*

in latrone, cuius ineffabili modo cor affecit & mentem illustravit, altero latrone insuper habito: Cum verò Christus passim dicit se mori pro suis ouibus, & pro iis quos pater ei dedit, satis indicat se pro electis esse mortuum.

IX. Cum autem dicimus Christum pro omnibus esse mortuum, id sic accipimus: Nempe Christi mortem sufficientem esse ad seruandos quoslibet credentes: Immo & abundè suffecturam ad seruandos omnes homines, si quotquot sunt toto orbe homines in eum crederent. Et quod omnes non seruantur causam esse non in insufficientia mortis Christi, sed in hominis prauitate & incredulitate. Denique eodem modo potest dici Christum morte sua Deo reconciliare omnes homines quo dicimus Solem illustrare oculos omnium hominum: quamuis multi sint cæci, multi dormientes, multi in tenebris abditi. Nempe quia si omnes & singuli homines essent oculati, & vigilantes, & positi in media luce, lux solaris sufficeret ad eos illustrandos. Nec dubium est quin possit dici non modo Christum mortuum esse pro omnibus hominibus, sed etiam omnes homines per Christum seruari, quia inter homines nemo seruatur nisi per Christum: eodem planè modo quo Apostolus 1. ad Corinth. cap. 15. v. 22. dicit *in Christo omnes viuificari*, quia nemo nisi per eum viuificatur.

*Christi morte non esse omnibus & singulis acquisitam nec  
impetratam reconciliationem nec remissionem  
peccatorum, nec salutem.*

## C A P. XXVIII.

I.  RINCIPIO quicumque dicit morte Christi impetratam esse reconciliationem omnibus & singulis, quamvis consideret Pharaonem & Iudam non ut reprobos, sed simpliciter ut peccatores, dicit tamen reconciliationem esse impetratam ijs qui nunquam crediderunt, nec fuerant credituri. Cum autem non sit æquum, nec iustum ut talibus reconciliatio impetretur, perperam adhibetur mors Christi ad impetrandum aliquid iniusti, & ad faciendum aliquid quod Dei iustitiæ aduersatur.

II. Quis autem nisi qui sibi ultro oculos configit, vnquam credet morte Christi impetratam esse reconciliationem Iudæ, cum ipsa mors Christi sit ipsissimū Iudæ crimen, & inde ad laqueum adactus sit.

III. Cumque eo ipso tempore quo Christus mortem oppetebat multi iam cruciarentur in inferno, oportet sit vacui capitis, qui censet morte Christi eis salutem aut reconciliationem impetratam esse.

IV. Tum per hanc doctrinam Deo apertè illuditur, Fingitur enim Christus à Patre impetrare quod

Cc ij



scit nunquam profuturum: quasi Deus concederet filio salutem hominis quem ab æterno damnare decreuit. Enimvero si Pharaoni & Iudæ, siue consideratis vt reprobis, siue consideratis vt peccatoribus, Christus impetrauit reconciliationem & remissionem peccatorum, satis sciebat istam impetrationem ipsorum bono & vtilitati non cessuram. Inducitur ergo Christus sic rogans patrem, *Obsecro te recipe in gratiam eos quos scio te nunquam recepturum in gratiam, & quos certo scio esse damnandos.* Christus enim in morte & ante mortem, arcana electionis pernouerat. Nempe hi homines id videntur dare operam vt religio Christiana ridenda propinetur.

V. Sed & ludibrio Deum exponunt, dum volunt Deum simul eundem hominem amare & odisse: & amare quidem quia dat pro eo filium, & vult ei impetrari reconciliationem; odisse verò quia ab æterno eum damnare decreuit.

VI. Quod si Christus impetrauit Iudæ remissionem peccatorum, oportet Deus id Christo roganti concesserit, & Iudæ remisit peccata. Quod quidem si verum est; oportet Deus sua acta resciderit. Et damnans Iudam pœnas sumpserit de peccatis remis-  
sis. Et homines puniantur ob peccata quorum impetrata est remissio. Et testamentum Christi per quod volunt omnibus hominibus acquisitam salutem, factum sit irritum.

VII. Neque solum Deo sic illuditur, sed & Deus fingitur illudens generi humano. Constat enim vsu & omnium sæculorum experientia, Euangelium vix

decimo cuique hominum annuntiari, & nomen Christi maximæ parti orbis esse ignotum. Quod quidem Dei providentiâ sic dispensante fieri nemo negabit, nisi qui res susque deque ferri, & temerè fluere putat. Quod si acquisita est omnibus hominibus reconciliatio & salus per Christum, cur Deus non promulget hoc beneficium per totum orbem? Cur patitur hanc reconciliationem maximæ parti generis humani esse ignotam? Cur premit & abscondit tam multis hominibus gratiam quæ ad eos pertinet, & quæ eis est impetrata? sine cuius tamen cognitione nemo potest servari? Respondent, Deum id facere, quia homines se præstant indignos hac gratia. Quasi vero quisquam esset eâ dignus, aut posset se præstare dignum. Quis nescit indignissimis quibusque annuntiatum esse Euangelium, *Et ubi abundavit peccatum, ibi abundasse gratiam?* Quod si Deus indignitate hominis impeditur ne ei patefaciat reconciliationem impetratam, eadem indignitas potuit & debuit impedire impetrationem reconciliationis. Cum enim impetrata est reconciliatio, iam Deus præsciebat indignitatem futuram, non minori certitudine quam si præsens fuisset.

VIII. Cum vero dicunt Christum pro omnibus esse mortuum quod ad impetrationem reconciliationis, non vero quod ad applicationem, planè fatentur Christum non impetrauisse ut hæc reconciliatio omnibus applicaretur. Vnde fit ut inanis sit hæc impetratio, immo & ridicula. Perinde enim loquuntur ac si dicerent alicui impetratam esse liberationem, sed non

ut liberetur : aut alicui cibum esse impetratum , sed non esse impetratum ut hoc cibo vescatur.

IX. Cum autem per fidem fiat applicatio mortis Christi, si Christus morte sua nō impetrauit nobis applicationem reconciliationis ; omnino sequetur eum nobis non impetrauisse fidem : Nempe oportet negent fidem nobis impetratam, qui fidem nolunt esse à sola gratia, sed partim esse ex libero arbitrio ; penes quod volunt esse gratiam respicere vel admittere, actu credere vel non credere.

X. Et sanè qui attentius perpenderit quid sibi velint hæ voces, *Impetratio applicationis* , aut *applicatio impetrationis*, comperiet meram esse *μετεωρολογία*, &tricas importunas quibus ingenia implicant : cum Christus nihil impetret quod non applicet, nec quicquam applicet quod non impetrauerit : alioqui inanis esset impetratio beneficij quod & qui impetrat, & is à quo impetratur scit nūquam applicatum iri, & nunquam profuturum esse ei cui impetratur. Nec credibile est impetratam esse remissionem peccati quod nunquam remitteretur.

XI. Immo vero sic agunt nouatores, ut qui velint morte Christi non nobis, sed Deo aliquid esse partum : morte enim Christi volunt Deum acquisiuisse potestatem nos saluandi, Petro vero & Paulo salutis collationem seu applicationem negant morte Christi esse impetratam : sed ianuam tantum & viam eis apertam, ut possint salutem acquirere. Quocirca Christus morte sua non dator, sed præparator salutis dicendus erit. Ac profecto sententia Arminij eo ten-

dit, vt dicatur Christus non impetrauiffe cuiquam conciliationem, sed Deo patefeciffe viam qua posset salutem conferre.

XII. Non minus ineptiunt cum fatentur fructum resurrectionis ad solos credentes pertinere, at fructum mortis, id est reconciliationem & remissionem peccatorum ad omnes & singulos extendunt. Ergo, si his creditur, erunt quidam homines ad quos fructus mortis pertineat, resurrectionis vero non pertineat. Perinde ac si dicerent Christum mortuum esse pro aliquibus pro quibus non superauit mortem: Et ad omnes quidem pertinere fructum pugnae, at non victoriae. Et erunt aliqui pro quibus cum se obtulerit in terra, se tamen non offert in cœlo. At scriptura hæc nescit vt indiuisa & inseparabilia, mortuum esse pro nobis & surrexisse pro nobis. Rom. 8. 34. *Christus is est, qui mortuus est, immo vero qui etiam surrexit, qui etiam est ad dexteram patris postulans pro nobis.* Et 2. Cor. 5. vers. 15. *Vt qui viuunt post hac non sibi uiuant, sed ei qui pro ipsis mortuus est & surrexit.* Nimirum quia fructus mortis Christi nemo fit particeps nisi per resurrectionem.

XIII. Non leue est quod si toti generi humano reconciliatio impetrata est, necesse est omnes infantes nascentes extra fœdus esse reconciliatos, & peccatum eis esse remissum. Vnde fit vt non alio maiori beneficio possint affici quam si quis eos clementi crudelitate in cunis iugulauerit. Nam si in hoc statu reconciliationis moriuntur, certa est eorum salus. At iidem viui & superstites educabuntur in Paganismo, quæ est certissima via ad perditionem æternam.

*Adu. V. Valer. p. 51. Nō ad eos omnes fructus resurrectionis extenditur, pro quibus mortem operijit Christus.*

XIV. Cum autem nemo possit seruari, nisi cui impetrata reconciliatio, fuerit quoque applicata: non video quid in infantibus immatura morte sublati impetratio differat ab applicatione: nam (ex doctrina Arminij) per solam reconciliationem seruantur: Hic ergo euanesceat illa distinctio impetrationis & applicationis. Quæ quidem quantumcumque inter homines locum habeat; apud Deum tamen locum habere non potest, qui nihil concedit quod non det; à quo nihil impetratur quod non largiatur & actu conferat: ei enim omnia sunt præuisa, nec quicquam potest accidere per quod compellatur negare quod concessit, aut mutare consilium, aut sua acta rescindere.

XV. Quod si hæc duo inter se conferantur, impetrare inimicis reconciliationem ut seruentur, & salutem eis iam reconciliatis cōferre, non dubium est quin longè maioris sit amoris, mori ad reconciliandos inimicos, quam dare salutem reconciliatis. Id disertè docet Apostolus ad Rom. 5. v. 10. *Si quum inimici essemus reconciliati sumus Deo per mortem filij eius, multo magis reconciliati seruabimur per eius vitam.* Nempe, si Paulo creditur, seruare reconciliatum res est facilior & probabilior quam reconciliare inimicum, moriendo pro eo. Cum ergo quod est longè maximum & summi amoris τὸ μέγιστον, Christum (si fides Arminio) pro omnibus præstitit: dicendū meritis, Christum mortem oppetendo pro nobis, non minus Pilatum & Iudam & Saulem ac Pharaonem, quam Petrum & Iohannem amauisse. Ut autem Christus summo amore amauerit quos pater ab æterno odit, & quos filius ipse sciuit ab æterno destinatos ad

tos ad pœnam, nemo à se impetrabit vt credat nisi qui vult decipi.

XVI. Enimuero cum Christus, quâ Deus vnus cum Patre, reprobos ab æterno prædestinauerit ad damnationem, non est cōsentaneum, immò nec possibile vt idem Christus & impetrauerit reconciliationem Iudæ, quâ homo & Mediator, & eundem ab æterno reprobauerit quâ Deus. Nam etsi sectarij decretum reprobationis velint esse ordine posterius impetratione, tempore tamen neutrum est altero prius, & oportet vt simul in vna eademq; mente fuerint studium reconciliandi & decretum reprobandi.

XVII. Insignis est Christi sententia Ioh. 15. v. 13. *Maiorem dilectionem nemo habet quam si quis ponat animam pro amicis.* Mens Christi est, non posse amicos plus amari quam mortem pro ijs oppetendo. Nam quantumcunque sit maioris dilectionis mori pro inimicis quam pro amicis, certum est tamen non posse quicquam prestari in amicorum gratiâ, quo amorem tuum erga eos magis testeris, quam si mortem pro eis oppetas. Cum ergo hic sit summus amor mori pro aliquo, siue amicus sit siue inimicus, oportet Christus omnes homines summo & pari amore dilexerit. Oportet ergo asserant, si sibi constare volunt, Christum, mortem oppetendo, summo amore amauisse Iudam, Pilatû, immo & Cainum & Pharaonem qui iam erant apud inferos.

XVIII. Collatores Hagienſes, conantur se expedire p. 183. *Si (inquiunt) summè diligere est non tantum salutem mereri sed & conferre, negamus Christum genera-*

Dd

*liter omnes eos summè amare pro quibus ipse mortuus est:* Damnent ergo Christum, & mendacij arguant qui hunc vult esse summum gradum amoris, mori pro aliquo. Impossibile est autem vt Christus summo gradu amoris amet aliquem, quin salutem ei conferat. Quod si hæc possent separari, maneret tamen illud statum & firmum, Christum summo amore dilexisse eum pro quo mortuus est, etiam si salutem ei postea non contulerit: quia magnitudo amoris Christi, non ex utilitate quæ ad eum pro quo moritur peruenit, sed ex magnitudine dolorum quos pro eo pertulit æstimanda est. Immo quisquis hæc accuratà iudicij trutina ponderabit, comperiet, maioris esse amoris pati mortem pro aliquo ad ei adipiscendum exiguum aliquod bonum, quam magnum. Sic flagrantioris est amoris exponere se morti, ne amicus vel tantillum lædatur, quam si id faceret ne amicus viuicomburio pereat.

XIX. Nec verò effigiunt distinctione amoris in antecedentem & consequentem, quandoquidem antecedens amor quo Iudam & Pharaonem volunt à Christo esse amatum, non potest non esse maximus, & quo, Christo ipso teste, nullus est intensior. Non sunt duo amores, velle misereri ante fidem, & velle saluare post fidem, sed vniuseiusdemq; amoris duo effecta.

XX. Quod si Christus morte sua fuit vas & *ὄργανον* Iudæ, Pharaonis, Saulis, & c. Deo inuretur nota iniustitiæ, qui duas pœnas pro iisdem peccatis sumpserit, cum prior satisfactio sufficeret, & bis in idem indicauerit. Semel enim mortui fuerint in Christo, cum Christus eorum personam in cruce su-

stinuit, & tamen iidem ipsi in sua personà moriuntur morte æterna. Inde etiam sequetur Christum frustra luisse pœnas Iudæ & Phraoni debitas, seq; pro ijs frustra vadem constituisse. Enimvero si Christus in cruce, vas erat omnium & singulorum, & pro eis comparebat vt fideiussor, necesse est eorum locum in cruce impleuerit, & eorum personam sustinuerit. Et sic de omnibus hominibus sine exceptione poterit dici, quod dicit Apostolus 2. Corint. 5. v. 14. *Si unus pro omnibus fuit mortuus, nempe omnes sunt mortui.* At reprobos cum Christo aut in Christo esse mortuos nemo hætenus, quod sciam, ausus est dicere. Ac profecto sequentia verba Apostoli arguunt eum non loqui de omnibus hominibus toto orbe: sed de omnibus ad quos pertinet fructus resurrectionis Christi & qui sunt noua creatura.

XXI. Reconciliationem vero solis fidelibus esse acquisitam docet Apostolus ad Romanos 5. v. 11. *Gloriamur in Deo per Dominum nostrum Iesum Christum, per quem nunc reconciliationem assequuti sumus.* An Paulus tantopere gloriaretur beneficio quod ipsi cum Herode & Pilato commune esset? Et cap. 3. v. 24. *Christum Deus proposuit placamentum per fidem in sanguine ipsius.* Non est ergo placamentum sine fide, proinde nec reconciliationis impetratio. Hoc enim ipso, censetur Deus placatus peccatori, quia Christus ei reconciliationem impetrauit.

XXII. Eiusdem Epistolæ cap. 8. v. 34. non modo dicitur Christus mortuus esse pro electis, sed etiam ex eo quod Christus pro eis est mortuus Apostolus in-

D d ij



fert nullam accusationem eis intendi posse. *Quis intendet accusationem in electos Dei? Deus est qui iustificat. Quis condemnabit? Christus est mortuus &c.* Ex quo loco sic argumentamur, li pro quibus Christus est mortuus condemnari non possunt nec eis vlla accusatio intendi. At reprobi damnantur, & in eos accusatio intenditur. Ergo Christus pro eis non est mortuus. Nempe eo sensu quem in initio dixi, videlicet Christum morte sua non eis impetrauisse reconciliationem & salutem.

XXIII. Quibus Christus impetrauit reconciliationem & remissionem peccatorum, pro ijs orauit & intercessit. At non intercedit neque orat pro mundo, sed pro solis fidelibus, vt ipse Christus dicit Ioh. 17. 9. *Ego pro eis rogo, non rogo pro mundo, sed pro eis quos dedisti mei.* Per mundum intelligi non credentes, & qui gratiam Christi non receperunt, inter quos etiam sunt refractarij, non dubium est: Pro his Christus negat se orare. Sunt autem tales omnes homines sua natura, & destituti non modo fide, sed & viribus credendi. Sed inter eos Deus quosdam dat Christo, quibus etiam dat fidem in Christum. Pro his solis Christus proficitur se apud Patrem intercedere.

XXIV. Hic more suo, distinctionculam adhibent sectarij: Faciunt enim duplicem intercessionem, vnam generalem qua Christus pro omnibus, alteram particularem qua pro solis fidelibus intercedit. Illà impetrari reconciliationem peccatorum, hac vero applicationem reconciliationis & salutis. Sed hæc intercessio generalis planè est superuacanea, frustra enim petitur reconciliatio sine applicatione salutis. Vtique ista ge-

nerali intercessione Christus vel petijt salutem Iudæ & Pilato, vel non petijt, si non petijt inanis fuit eius intercessio. Si petijt, repulsam passus est, & frustra intercessit. Cum tamen ipse dicat Ioh. 11. v. 42. se semper à patre exaudiri. At fortasse volunt Christum petiisse applicationem salutis omnibus hominibus, sed sub conditione, nempe si sint credituri, & ea lege vt credant. Profectò si ita est, tum Christus non intercessit pro omnibus. Quod enim petitur sub conditione, sublata conditione non petitur. Qui dicit Deo, *Oro te pro omnibus dummodo credant*, satis apertè declarat se non orare pro non credituris: Quocirca Christus ipse missionem suam in mundum, ac proinde & intercessionem, ad solos credentes restringit Ioh. 3. v. 13. *Deus usque adeo dilexit mundum ut dederit filium unigenitum, ut quicumque credit in eum non pereat, sed habeat vitam æternam*: Ibi vides non solum fructum seu applicationem dationis filij, vt ita loquar, sed & ipsam dationem filij ad solos credentes pertinere.

XXV. Sed operæpretium est cognoscere, quænam sit illa particularis intercessio, qua (vt fatentur sectarij) Christus Iohannis 17. pro solis fidelibus intercedit, & quid per eam petat. *Pater* (inquit) *conserua eos*: & paulo post, *Rogo te ut serues eos à maligno*. Si hæc intercessio peculiaris est fidelibus, non video quid supersit intercessioni generali: nam sine his omnis intercessio inanis est. Cum autem in oratione Dominica hæc duo simul & iunctim petantur, remissio peccatorum & liberatio à maligno, quis ferat tam audax figmentum quo Arminiani hæc diuellunt, & volunt Christum impetrare

omnibus remissionem peccatorum : at non liberationem à maligno ?

**XXVI.** Quod si Christus orat pro omnibus ; orat etiam pro ijs quos scit peccare peccato ad mortem, pro quibus Iohannes ne quidem nos patitur orare. Ioh. 5. v. 16.

**XXVII.** Immo nec Arminiani sibi hic satis constant, cum dicunt Christum pro fidelibus & pro ijs quos Pater dedit filio intercedere particulari intercessione. Cum enim doceant fideles & pios posse prorsus deficere à fide, & damnari, apparet eos velle Christum intercedere pro multis reprobis intercessione particulari: si quidem multi fideles sunt reprobi.

**XXVIII.** Arminius pag. 70. in Perkinsum, multa hanc in rem affert quæ haud scio an ab eius sectatoribus probentur. Primò censet Christum se sacrificare pro multis pro quibus non intercedit: quia sacrificatio prior sit intercessione. Vult enim sacrficationem pertinere ad meritum, intercessionem vero ad meriti applicationem. Hæc quidem mihi videntur pugnare non modo cum veritate ; sed & cum sensu communi : Nam quicumque se parat ut sit piacularis victima pro alio necessariò orat ut sacrificium quod oblaturus est sit gratum & acceptabile pro eo pro quo se offert in sacrificium. Et quicumque offert pretium redemptionis prius rogat ut pretium hoc recipiatur, ut Chryses ille, Iliad. a sic loquens

Παῖδα δὲ μοι λύσατε φίλιν', & δ' ἄποινα δέχισθε.

En preces prioriloco, deinde verò oblationem pretij. Est ergo aliqua intercessio prior sacrificio. Addit Armi-

nus, *Verum quidem est Christum in diebus carnis suæ preces cum lachrymis Deo patri obtulisse: at istæ preces non sunt factæ pro impetranda applicatione bonorū promeritorum, (id est pro impetranda salute) sed pro assistentia spiritus, ut consistere posset in certamine.* Impium sane & sceleratum dogma, quippe quo negatur Christum pro nostra salute orauisse antequam mortem oppeteret: Cum tamen Iohannis 17. sic oret ante mortem, *Serua eos in nomine tuo.* Et *Pater cupio ut quos dedisti mihi sint mecum, ut conspiciant gloriam quam dedisti mihi.* Ipsum Arminium pudit tam falsæ doctrinæ: nam dubiâ quadam ἐπαροψία videtur damnare quod dixit, addit enim: *Si verò præces tum obtulit pro impetranda applicatione, illæ nitebantur sacrificio peragendo, tanquam peracto.* Illud, **S I V E R O,** dubitantis est, cum tamen sit res certissima. Sed quid hoc aduersus Perkinsum qui dixit Christum non sacrificare pro ijs pro quibus non orat? Hæc sanè quæ Arminius congerit planè aliena sunt, nec rem attingunt. Nam etsi preces quas Christus ante mortem concepit pro nostra salute, sint fundatæ in merito mortis futuræ, manet tamen quod Perkinsus dicit, Christum non se sacrificare pro ijs pro quibus nō orat: Nam ne quidem mors Christi fuisset sacrificium, nisi orasset ut Patri esset accepta pro eorū vita pro quibus mortem oppetebat. Dolor enim & cruciatus sua natura non est sacrificium, nisi talis petitio accesserit.

**XXIX.** Non inficior, Christum in morte orasse pro crucifigentibus eum. At nego eum orasse pro omnibus sine exceptione, sed pro iis tantum qui id faciebant per ignorantiam, dicit enim, *Pater remitte eis, nes-*

*ciunt enim quid faciant.* Lucæ 23. v. 34. Quos paulo post ad Christi fidem esse conuersos idem Lucas testatur, Actorum 2. & cap. 3. v. 17. An & hoc Christus dicit humano affectu, non vero qua Redemptor? poruit enim quâ homo bene cupere illis quos, quâ Deus, nouerat esse reprobos. Sic illachrymatus est Ierosolymis, cuius vrbis casum & reiectionem ipse, quatenus Deus, decreuerat.

XXX. Cum vero negant sectarij Christum in cruce, electorum personam sustinuisse, apertè impingunt in illud Christi Ioh. 10. v. 11. *Ego sum bonus ille pastor: bonus pastor dat animam suam pro suis ouibus.* Et Ioh. 15. v. 13. *Maiorem hac charitatem nemo habet quam ut quis animam suam ponat pro amicis suis.* Et Ephes. 5. 25. *Christus dilexit Ecclesiam suam, & semet ipsum exposuit pro ea.* Est ergo Christi mortuus, pro ouib<sup>9</sup>, pro amicis, pro Ecclesia sua: At hi quid aliud sunt quâ fideles & electi? an Pharaos, Iudas & c. vlla ratione possunt dici oues Christi? Respondent Arminiani, oues vocari non respectu præsentis conditionis, sed futuræ. Frustra: nam conditio futura iam erat præsens in decreto Dei, cuius decreti respectu oues dicuntur ante conuersionem. Ioh. 10. 16. Dicuntur enim oues non tantum quia se aggregaturi sunt ad ouile Christi, sed quia Deus in consilio suo æterno eis fidem dare decreuit qua se ad Christi ouile aggregent: enimvero cum hæ oues datæ sint Christo, non est dubium quin datæ sint antequam essent oues: ac proinde & ad electionem Dei pertineret, antequam sese aggregarent ad ouile Christi. Nam si non datæ essent Christo nisi postquam se per fidem Christo adiunxissent, ipsæ se dedis-

sent

sent Christo priusquam Deus eas Christo dedisset.

XXXI. Interim obseruandum est qua fide hic agant sectarii. Volunt enim Deum elegisse credentes. Neque nos negamus: dummodo per *credentes* intelligantur illi qui Dei beneficio sunt credituri, & quibus Deus fidem dare decreuit: nempe dicimus fidem considerari ut rem præstandam, non verò ut præstitam aut præsentem: & credentes vocari, cum de electione agitur, non ratione præsentis conditionis, sed futuræ: Hoc cum rationi & verbo Dei sit consentaneum, reiicitur tamen à sectariis ut absurdum: At iidem mox illud ipsum usurpant, & in nostras partes concedunt. Illud enim, *Do animam meam pro ouibus*, volunt accipi respectu non præsentis conditionis sed futuræ: & vocari oues, quia se aggregabunt ad caulam Christi. Non est ergo cur tantopere commoueantur quando dicimus, *electos esse credentes* non respectu præsentis conditionis aut præteritæ, sed futuræ; & intuitu fidei per quam, Dei dono, ad destinatam salutem sunt peruenturi. Nec quod ipsis placet cum ab eis dicitur, debet eis displicere cum à nobis usurpatur. Maximè cum scriptura nunquam disertè dicat *electos esse credentes*: sed clarè pronuntiet Christum mortuum esse pro suis ouibus, & pro Ecclesia.

XXXII. His de causis scriptura sacra, quæ interdum Christum ait mortuum esse pro omnibus, eo sensu quem dixi, frequenter generalem illam locutionem coarctat & restringit, dicens, *Sanguinem Christi effusum esse pro multis*, Matth. 26. 28. Et *filium hominis venisse ut daret animam suam in redemptionem pro multis*. Matth. 26.

Ec.

28. *Et oblatum esse semel ad tollenda peccata multorum* Heb. 9. v. 28.

XXXIII. Quod si rem à capite arceffas, & ab ipfo fœdere quod cum Adamo Deus pepigit, inuenies hoc fœdus ad eos solos pertinere quorum calcaneum ferpens pungit, & quos leui vulnere fauciat, ac proinde ad solos fideles & electos. Nam cæteros inficit veneno, & interfecit morfu, ac lethali vulnere perimit.

XXXIV. Quod si Christus morte impetrauit reconciliationem Caino, Pharaoni, Iudæ, &c. oportet eos redemerit: At non eos redemit, quia semper manent & manebunt captiui. Nec credibile est Christum voluisse soluere pretium redemptionis pro ijs quos sciebat nunquam liberandos esse. Aut Satanam potuisse eripere Christo animas empras tanto pretio.

XXXV. Paulus 2. Cor. 5. v. 20. *Deus* (inquit) *erat in Christo sibi reconcilians mundum.* Si per mundum intelliguntur omnes & singuli sine exceptione; planè credendum erit non solum impetratam esse reconciliationem omnibus & singulis, sed eos etiam actu reconciliatos fuisse. Et Iudam ac Pharaonem aliquando fuisse inter amicos Dei, quod ne quidem Arminius ipse dicere audeat.

XXXVI. Denique si Christus impetrauit reconciliationem omnibus hominibus, etiã ijs qui sunt extra fœdus, nemo nascetur extra fœdus Christi, & falsum erit quod ait Paulus Ephes. 2. v. 3. vbi loquens de conditione sub qua nascimur, dicit nos natura esse filios iræ, id est nasci obnoxios maledictioni. Nam quomodo potest quisquam nasci maledictioni obnoxius, si

omnibus hominibus sine exceptione reconciliatio cum Deo est impetrata?

*Diluuntur obiectiones Arminianorum quibus impetrationem salutis pro omnibus hominibus astruere conantur.*

## C A P. XXIX.



DVERSVS hæc Arminiani multa mouent, sed nihil promouent. Primò proludunt locis Scripturæ, deinde rem gerunt rationibus.

I. Afferunt locum illum Iohan. 3. 16. vbi Deus dicitur vsq; adeo dilexisse mundum, vt dederit filium: Quem locum iam docuimus officire Arminio, & missionem Filij verbis sequentibus restringi ad solos credentes. Vnde liquet Christum non esse missum nisi ad eos saluandos qui essent credituri. Possem dicere *mundum* hic accipi pro solis fidelibus, vt Ioh. 6. 33. & 1. Timoth. 3. 16. & Hebr. 2. 5. Sed vt concedamus per mundum, totum genus humanum in solidum intelligi, non tamen inde sequetur Christum omnibus & singulis salutem acquisiuisse. Nam impetratio reconciliationis quorundam hominum, abundè testatur genus humanum à Deo diligi.

II. Operapretium autem est cognoscere quam mentem Christo Arminiani affingant, & quis iuxta Arminium, sensus sit horum verborum Christi. Sic  
Ec ij



*Deus dilexit mundum ut Filium suum unigenitum dederit, ut quisquis credit in eum non pereat sed habeat vitam eternam.* Iuxta doctrinam Arminij oportet hic sit sensus horum verborum. Sic *Deus dilexit totum genus humanum amore quo non voluit eius salutem, ut decreuerit Filium mittere antequam cogitasset de homine saluando, ad sibi acquirendam potestatem hominis saluandi, postea autem decreuit dare omni homini vires credendi si velit, ut sic habeat vitam eternam.* Monstrum fanè doctrinæ, & novum Evangelium.

III. Pugnant quoque verbis Iohannis 1. Epist. cap. 2. v. 2. vbi Christus dicitur esse propitiatio pro peccatis totius mundi. Et ex Iohan. cap. 1. vbi vocatur agnus auferens peccatum mundi. Sed nihil agunt: hoc enim dicitur quia in toto mundo nemini remittuntur peccata nisi per Christum. Eodem planè sensu quo 1. Cor. cap. 15. v. 22. Paulus dicit *in Christo omnes vivificari*, quia nemo nisi per eum vivificatur. Sic qui diceret Hippocratem omnem Græciam & Italiam imbuisse arte medendi, non diceret omnes & singulos Græcos & Italos ab eo didicisse medicinam, sed neminem didicisse medicinam nisi ab eo. Christum enim non abstulisse peccata omnium & singulorum hinc liquet, quod plurimi manent in peccato, & ob peccata damnantur.

IV. Speciosè ostentant locum primæ ad Timoth. cap. 2. v. 4. *Deus vult omnes homines servari, & venire ad agnitionem veritatis.* Et v. 6. *Christus semet ipsum dedit pretium redemptionis pro omnibus.* Tum illud ad Titum cap. 2. *Illuxit gratia Dei salutaris omnibus hominibus.*

Sed hic per OMNES intelligi *Quosvis* & cuiuslibet conditionis homines loci textura euincit. Priori loco Apostolus vult orari pro Regibus, posteriori iubet seruos esse fidos & nihil *νοσφίζειν*. Huius exhortationis *αἰτῶ-λογία* hæc est, quia ad Reges quantumuis tunc temporis alienos à Christo, & ad seruos quantumuis fortis abiectæ, pertinet promissio salutis, nec vlla conditio hominum à salute excluditur. Hunc locum primæ ad Timotheum sic accipit Augustinus Enchiridion ad Laurentium cap. 103. Et Thomas commentario in hæc epistolam. Idque illis ipsis Apostoli verbis confirmatur: dicit enim, *Deus vult omnes homines seruari & venire ad agnitionem veritatis*. Constat autem experientiâ Deum non dare, immo nec offerre omnibus & singulis cognitionem veritatis.

V. Frequens est in sacra scriptura acceptio vocis OMNES pro quolibet, vt Lucæ 11. v. 42. *decimatis mentham & rutam & omne olus*. Et Matth. 9. v. 35. *Christus sanabat omnem morbum*, pro quolibet. Simile exemplum habes Col. 1. v. 28. Hoc sensu Hebr. 2. Christus dicitur pro omnibus mortuus.

VI. Porrò non est dubium quin Apostolus iubeat orari non tantum pro regibus in genere, sed & pro singulis. Nos enim quibus ignota sunt arcana electionis, debemus de singulis bene sperare. Sed qui iubet orari pro Nerone, non idcirco statuit Deum velle seruare Neronem, sed tantum vetat de eo desperari.

VII. Sensus ergo horum verborum, *Deus vult omnes homines seruari* hic est. *Deus quoslibet homines ad salutem inuitat, & nullam conditionem hominum à salute exclu-*

E c iij

*dit.* Nam si Deus aut absolutè vellet, aut seriò cuperet omnes homines & singulos seruari, non deessent ei media quibus integrà sua iustitia, & illibatà hominis libertate, efficeret quod vult, & compos voti fieret.

VIII. Nihilò plus ad rem facit locus quem afferunt ex 14. cap. ad Rom. v. 15. *Ne esca tua illum perdisit pro quo Christus est mortuus.* Ibi enim perdere non est damnare, sed scandalo percellere, & conscientiam alicuius offendere, quo factò, quantum in nobis est, trahatur in ruinam. Nam absolutè quenquam perdere non est in nostra potestate. Sic Apostolo 2. Cor. 10. v. 8. *destruere* idem est quod scandalo offendere, & operibus pietatis incumbentem retardare.

IX. Secundà Petri cap. 2. v. 1. dicitur Christus redemisse Pseudopphetas qui cum abnegant. Sed ibi non agitur de redemptione à morte æterna, sed de liberatione ab ignorantia, & errore ac tenebris seculi per lucem Euangelij, quod isti pseudopphetæ falsæ doctrinæ admistione corrumpebant. Nam redemptionem sumere pro quacunque liberatione in scriptura tralatitium est. Vsq̃ue adeo vt resurrectio, redemptio corporum appelletur: Rom. 8. 22. Ephes. 4. 30.

X. Eadem epistola cap. 3. v. 9. Petrus dicit *Deum nolle quenquam perire*: nempe quia non est causa perditionis cuiusquam: & quia omnes qui conuertuntur admittit, nec quenquam reiicit. Sed non tenetur omnibus restituere vires culpà hominis amissas, nec omnibus dare fidem, cum homo suapte culpa impotentiam credendi sibi accersuerit, vt prolixè probauimus cap. 11.

XI. Ezechielis cap. 18. v. 23. Deus hæc dicit. *Non de-*

*lector morte peccatoris, sed ut conuertatur & uiuat.* Hæc verba nihil aliud dicunt quam Deum nolle mortem peccatoris qui cōuertitur. At si non conuertitur, ne Arminius quidem negabit quin Deus mortem eius velit, vt iudex vult fontis supplicium. Deus non delectatur morte peccatoris qua homo est: sed nemo potest negare quin Deus amet executionem suæ iustitiæ.

XII. Primà quidem ad Timotheum cap. 4. v. 10. Deus vocatur *σωτήρ* *conseruator omnium hominum.* Sed ibi Apostolus loquitur de conseruatione in vita præfenti, & de Dei prouidentia quæ ad omnium hominum conseruationem extenditur. Quam curam Dauid Psal. 36. vsque ad bestias extendit, ibi enim Deus vocatur conseruator hominum & bestiarum. Id indicant verba præcedentia Apostoli, *Speramus in Deo uiuo*, loquitur enim de Deo quatenus cuncta à se creata viuificat. Locum similem habes Act. 17. 25.

XIII. Arminius pag. 220. in Perkinsum, adhibet promissionem factam Adamo de semine mulieris, quam ait ad omnes & singulos homines pertinere. Respondeo, hac promissione tantum promitti Satanam à semine mulieris superatum iri: ad omnes verò & singulos pertinere nullibi dici. Doctrina Euangelij annuntiata Adamo non perinde pertinet ad omnes eius posteros, vt præcepta legis naturalis: quia obsequiū legis est debitum naturale: at doctrina Euangelij est remedium supernaturale: Inde est quod peccatum Adami in legem Dei omnibus eius posteris imputatur, at fides eius qua credidit Euangelio, eius posteris non imputatur. Nec si Adam respuisset per incredulitatem

promissionem de semine mulieris, idcirco eius posteritatem à spe salutis excidissent. Quid quod manifestè hæc promissio de semine obtrituro caput serpentis, ad solos credentes restringitur? Solorum enim Dei filiorum calcem Satan pungit, cum cæteros lethali vulnere perimat.

XIV. Excussi sacra scriptura confugiunt ad rationes. Quemadmodum utuntur scriptura sine ratione, ita & pugnant rationibus sine scriptura. Intentant quasi telum trabale hunc syllogismum, qui tamen similior est festucæ,

*Quodcumque tenentur omnes credere id verum est.*

*Christum pro se esse mortuum omnes tenentur credere.*

*Ergo id verum est.*

Huius syllogismi minor falsa est, & patitur multas exceptiones. Nam ij quibus Christus non est annuntiat, & qui de morte Christi nihil inaudiuerunt, non tenentur credere Christum pro se esse mortuum; qui tamen sunt pars orbis longè maxima. Sed neque ij quibus Christus prædicatur tenentur credere absolute & sine conditione Christum pro ipsis esse mortuum; sed sub hac demum conditione si conuertantur. Nam si in impenitentia perseverauerint, tenentur credere mortem Christi nihil ad se pertinere.

XV. Arminius p. 77. in Perkinsum, eiusque sectarij hæc inculcant, & ingerunt ad nauseam. *Si Deus noluit per Christi mortem sibi satisfieri pro peccatis aliquorum hominum, iam nullo iure potest fides ab illis postulari, neque Christus iudex eis statui. Nec reprobis potest culpari propter gratiam redemptionis repudiatam, quippe quæ ad eum non per-*

*non pertinebat.* Respondeo hæc omnia niti hac falsa suppositione, fidem ab omnibus exigi: iam enim docuimus non exigi ab eis quibus Christi cognoscendi nulla vnquam facta est copia. Tum eos quibus annuntiatur non teneri absolutè & sine conditione credere se redemptos morte Christi, sed ita demum, si conuertantur. Ii autem quibus Euangelium non est annuntiatum, non damnabuntur ob reiectum Euangelium, sed ob violatam legem: cuius iudicij arbiter Christus datus est à Patre, qui quos per Euangelium non saluat sub lege relinquit. At qui oblatam Euangelio gratiam respuerunt per incredulitatem, merito damnantur ob reiectam gratiam: non quod reiecerint rem ad incredulos & impenitentes pertinentem, sed quod rem ipsis sub conditione credendi oblatam spreta conditione neglexerint. Quam conditionem etsi viribus naturalibus implere non possunt, eam tamen debent, nam impotentiam credendi homo ipse sibi sua culpa accersiuit, cui impotentia Deus non tenetur in omnibus mederi. Quæ de re prolixè actum est cap. II. At (inquiunt) non possunt reprobi culpari ob spretam gratiam ad ipsos non pertinentem. Sed errant tota viâ. Nam reprobi non possent ob contemptam gratiam accusari, si eam contemnerent quia sciunt eam ad ipsos non pertinere: Sed ideo eam reiiciunt quia Christum non amant, & ad eius contemptum sua voluntate aguntur. Non idcirco reprobi non credunt quia salus ad eos non pertineat, sed potius ideo salus ad eos non pertinet quia non credunt, & exitium sua sibi incredulitate & impenitentia attraxerunt. Verum quidem est reproba-

tionem esse causam cur Deus huic aut illi nolit dare fidem & pœnitentiam: at non est causa quæ indat & ingeneret homini incredulitatem & impœnitentiam. Quapropter illud Christi Ioh. 10. v. 16. *Non creditis quia non estis de ouibus meis*, sic accipiendum est quasi diceret, *Idcirco Deus non dat vobis fidem electus peculiarem quia non estis electi*.

**XVI.** Greuinchouij obiectio hæc est p. 19. *Si electio prior est impetratione salutis, prius igitur Deus de communicanda quam de impetranda salute decreuit. Ego vero tantum absurdum ab eo ut putem hoc esse absurdum, ut planè credam esse necessarium: Semper enim prius cogitatur de fine quam de medijs ad finem. Salus hominum finis est quem sibi Deus proposuit: hunc esse finem inde constat, quia hoc est vltimum executione. Ergo Deus prius cogitauit de danda salute, quàm de impetratione salutis per Christum, quia hoc medium est per quod ad salutem nos perducit.*

**XVII.** Idem p. 87. sic disputat. *Quibus pretium hoc amplectendum offertur saluandis ipsis idoneum si modo amplecti velint, pro ijs etiam solutum est ex Deo proposito. Offertur autem & reprobis hac conditione si velint id amplecti Ergo &c.* Respondeo minorem non esse vniuersaliter veram: non enim hoc pretium offertur omnibus reprobis. Maior vero peccat in regulas præcongnitionum, quæ volunt omnis enuntiationis subiectum esse seu *existere*. Exempli gratia hæc enuntiatio, *Quicumque implet legem seruatur*, non est falsa: sed falsitas est in præsuppositione quæ fit ante hanc enuntiationem, qua præsupponitur, *quosdam implere legem*.

Hoc vitio laborat Maior huius Syllogismi: Eius enim subiectum est imaginarium & non existens. Subiectum enim hoc est *si quibus pretium hoc amplectendum offertur si amplecti velint*. Nego tales homines inueniri. Nam nec reprobis offertur hoc pretium si velint amplecti, cum certissimè non velint, & non possint velle, cuius impotentia homo ipse causa est: Nec electis hoc pretium offertur si velint, sed Deus illud pretium offerendo efficit ut velint.

XVIII. Cum autem agitur de sufficientia mortis Christi, illi ut eius efficaciam extollant, dicunt non modo pro hominibus, sed & pro Diabolis esse sufficientem. Quod si verum est, oportet Deus recidat & amputet aliquid de pretio mortis filij; & coarctet eius efficaciam. Ego vero etsi scio pretium & dignitatem mortis Christi non pendere ex humana eius natura, sed ex infinita excellentia naturae diuinae, nego tamen eius mortem aptam esse redemptioni Diabolorum, quia iustitia Dei exposcit ut homo qui peccauit poenas luat: & opus fuit ut mediator inter Deum & hominem utrumque attingeret communionem naturae. Idcirco ad seruandum hominem, *non assumpsit Angelos sed semen Abrahae*. Heb. 2. Quod si hominis mors apta est ad satisfaciendum pro peccatis diabolorum, cruciatus Angeli, si Christus assumpsisset Angelicam naturam, fuisset aptus ad satisfaciendum pro peccatis hominum. Denique ubi agitur de aptitudine non disputandum est de sufficientia; Alioqui posset etiam disputari an Christi mors sufficiens sit ad saluandos equos aut scarabeos, eosque donandos immortalitate; quod sane non caret impie-

Ff ij



XIX. Hæc ferè sunt argumenta quibus nouatores se tuentur. Nostram vero sententiam suo, id est malo more exagitat, eam enim immutant antequam impugnent: Hoc pacto non refellunt nostram sententiam, sed sua figmenta. Exempli gratia Christus Ioh. 3. v. 17. sic loquitur. *Non misit Deus Filium suum in mundum ut condemnet mundum, sed ut seruetur mundus per eum.* Greuinchouius p. 21. fingit nos hunc locum sic interpretari, *Deum misisse Filium suum in electos*, cum tamen manifestè ibi per mundum terrestris hæc regio & habitatio inter homines intelligatur. Plura eiusmodi nobis affingit, lasciuiens desultorià licentia. Vnum hoc exemplum quod addam erit vice multorum. Pag. 76. inducit nos sic loquentes: *Quid cessatis reprobi? nacti λυτὸν tam idoneum, ut si modò mendacio credatis, aut rupem comedatis, mox hinc recta migraturi sitis in regnum cælorum?* & paulo post, *& vos quoque [reprobos] æternis iam licet supplicijs nullo merito vestro addictos vocatione sua dignatus est ad hoc ut magis excæcati & obstupescati vobis grauius iudicium accersatis.* En delicias hominis, & Theologicum iecur. Non equidem dubito quin hæc scribenti salirent præcordia præ exultatione, quasi re præclarè gesta. At vir bonus nugatur, & cum sua umbra configit. Hæc enim toto cælo distant à nostrà sententia. Nam nec iubemus reprobos, hoc est perseuerantes in impenitentia & incredulitate, credere mendacio, aut dum perseuerant in impenitentia, sub obtentu fidei in Christum inani spe sibi blandiri. Neque dicimus eos addictos æternis pœnis nullo suo merito, cum ipsi sibi suis peccatis accersant exitium. Neque

docemus quenquam ad id tantum à Deo vocari, vt grauius iudicium sibi accersat, etsi saepe per vocationem homines fiant inexcusabiles, quia per cognitionem officij crescit culpa neglecti officij, & grauius est non facere quod scias, quam nescire quid facias. Scopus Dei vocantis, erga reprobos est petere ab eis quod debent, erga electos verò dare efficaciam vocationi vt seruentur: Erga vtrosq; patefacere quid sibi acceptum sit, & quæ obedientia ei sit grata.

XX. At non inultum feret Greuinchouius, lubet enim hæc ei reponere, & Arminianæ scholæ prodigiosam doctrinam quasi detracto velo exhibere spectandam, idq; sine calumnia. Induens enim Arminiani personam possum sic reprobos affari. Estote bono, animo reprobi, nam etsi estis reprobi potestis tamen, saluari: Verum quidem est neminem reprobum saluari, sed tamen nemo est illorum qui non possit saluari. Nam Christus vobis salutem impetrauit, sed non applicationem salutis: Vobis impetrauit bona, sed non vobis impetrauit vt ea bona actu vnquam possideatis: Vobis enim impetrauit reconciliationem, quam eo ipso momento quo impetrauit, certo sciebat vobis non profuturam. Vobis impetrauit remissionem peccatorum quæ certo sciebat non esse remittenda. Non enim applicatur hæc reconciliatio, nisi sub conditione quam sciebat non implendam esse. Vt autem sciatis quam Christus vobis bene cupiat, moneo vos, Christum intercedere pro vobis intercessione generali, at non particulari, sine qua nemo seruetur. Nam morte Christi vobis impetrata est reconciliatio, sed non communicatio,

Ff iij

„ reconciliationis: nec vobis est impetrata applicatio re-  
 „ conciliationis impetratæ, sed Deo parta est licentia &  
 „ facultas vos saluandi. Quia morte Christus factus est  
 „ redemptor, nullo certo Dei consilio qui nam essent re-  
 „ dimendi, & factus est caput Ecclesiæ sine certis mem-  
 „ bris. Deus quidem mittens Filium in mundum motus  
 „ est aliqua propensione & affectu erga homines, sed si-  
 „ ne certa voluntate homines saluandi. Decretum enim  
 „ mittendi Filium' ordine antecedit decretum saluandi.  
 „ Per quod decretū omnes homines sunt electi, etiā si  
 „ multi ab æterno sint reprobī. Omnes quidē Deus cupie-  
 „ bat seruare, idq; seriō, sed per vos sine suo frustratus est  
 „ nec quod cupiebat est assecutus: quod quidem eum  
 „ dolore affecit maximo. Id quoque scitote, ô reprobi,  
 „ Christum quidem vobis omnibus impetrauisse salu-  
 „ tem & acquisiuisse, sed non velle id notum esse nisi  
 „ paucis quibusdam, cum tamen sine hac cognitione ne-  
 „ mo possit seruari. Tum etsi vobis impetrauit recon-  
 „ ciliationem, vobis tamen non impetrauit fidem sine  
 „ qua tamen non est salus. Quapropter Deus quidem  
 „ vos vocat ad salutem, sed modo non congruo, quo  
 „ qui vocantur nunquam sequuntur. Ne tamen ani-  
 „ mum despondeatis, Deus dat vobis omnibus vires cre-  
 „ dendi, vt actu credatis si vultis: positum enim est in  
 „ vestro libero arbitrio vti gratia vel non vtī, vt possitis  
 „ seruari, etiā si certō sitis damnandi. Benignè: immò  
 „ vero improbè, & ad Dei hominumq; ludibrium.  
 Nam quis ad effigiem tam prodigiosæ doctrinæ non  
 exhorrescat? quis non doleat vicem Ecclesiæ Christia-  
 næ ad quam deformandam & vertendam in monstrū

non segnia ingenia totum suum acumen conuerterūt?  
Cum ergo Greuinchouius p. 70. tactus erga nos misericordia, proſitetur se paratum succurrere noſtrorum infirmitati & ignorantia, dubium digniorne ſit riſu an commiſeratione.

---

*Olim diſputatum eſſe, an Chriſtus ſit mortuus pro omnibus, ſed ſenſu longè diuerſo.*

CAP. XXIX.




**AUGUSTINO** è viuis ſublato, eius ſcripta de prædeſtinatione & gratia, & libero arbitrio variè à varijs accepta ſunt. Hic morbus præcipuè Aquitaniam exercuit. Inter has contentiones emerſit hæreſis prædeſtinatorum, cuius meminit Sigebertus Chronico ad annum 415. Hi docebant, nihil prodeſſe ſtudio bonorum operum homini reprobo; nec viciffim poſſe obefſe ſcelera homini electo, quantumcūque libidini, gulæ, rapinæ indulgeat. Hoc errore imbutus fuit Lucidus quidam Presbyter Aquitanix ad quem extat Fauſti Rhegiensis Epifcopi Aquitani Epiftoſa, cui ſubſcripta ſunt nomina vndecim Epifcoporum Concilij Arclatenſis. In hac Epiftoſa anathema dicitur illis qui dicunt Chriſtū pro omnibus non eſſe mortuum. Tum ijs qui dicunt Deum nolle omnes homines ſeruari. Quod ſanè à Fauſto vere eſſe pronuntiatum, & iuxta Catholicam fidem Synodus Arclatenſis meritò iudi-

cavit. Credidit enim hoc dictum fuisse à Fausto aduersus Pelagium, qui cum negaret peccatum originale, & censeret hominem suo libero arbitrio posse perfectè implere legem, non mirum est si dixit Christum non esse mortuum pro omnibus. Nam cur Christus mortuus esset pro non peccatoribus? aut quid opus medicina vbi non est morbus? aut Euangelio ei qui legem impleuit? Sed Faustus homo vafer & versipellis Synodo Arelatensi imposuit verbis ambiguïs & subdolis, quibus texta est hæc Epistola Synodo oblata. Nam mentem suam postea aperuit, libro quem inscripsit *De Gratia qua saluamur*, vbi in Pelagium est pronior. Cuius libri ita meminerunt Gennadius lib. de Scriptoribus Ecclesiasticis cap. 85. & Sidonius Apollinaris lib. 9. Ep. 9. vt videantur de eo honorificè sentire. At eodem tempore aduersus hunc librum scripserunt Cæsarius Arelatensis Episcopus, nec non Auitus Viennensis, vt testatur Ado in Chronico. Quibus se adiunxit Fulgentius Ruspensis Episcopus in Africa: ex quibus videre est non tanti esse Fausti authoritatem vt debeat hic esse alicuius ponderis. Neque hæc quæstionem vnquam agitatam eo sensu quo nunc agitur. Nunquam enim (quod sciam) ante hæc sæcula quæsitum est, an Christus morte sua salutem omnibus & singulis acquisiuerit, aut an sua morte perinde impetrauerit reconciliationem Pharaoni ac Petro.

*An Deus*

*An Deus amet omnes homines aqualiter, & omnium salutem ex aequo cupiat.*

## CAP. XXXI.

I.  VESTIO qua quæritur an Deus ex æquo omnes homines amet, & eorum salutem perinde desideret, est corollarium præcedentis quæstionis & ab ea pendet. Nam si morte Christi non est omnibus impetrata remissio peccatorum nec salus acquisita, planum est omnes non æqualiter amari à Deo. Quapropter iisdem locis scripturæ nouatores se tuentur in vtraque quæstione: Arnoldi hæc sunt verba p. 379. *voluntate & affectu generali, Deus ex æquo omnium salutem desiderauit.* Concinit Greuinchouius p. 335. *Voluntas Dei & affectus saluandi erga omnes aqualis est.* Nempe in serie illa quatuor decretorū qua totam doctrinam de prædestinatione comprehendūt, istud est tertium, Deum decreuisse media omnibus hominibus sufficientia ad fidem & resipiscentiam administrare.

Ego vero arbitror hoc ab eis asseri, non quod ita credant & seriò sentiant, sed vt cætera sua dogmata tueantur, quæ cadēte hoc dogmate stare non possunt. Pugnant enim apertè cum scriptura, & cum experientia, immo & ipsi secum.

II. Quod prius quam demonstramus, monendus est lector amorem in Deo non esse affectum, nec passio-

Gg.

nem, nec animi propensionem, nec cupiditatem, his enim passionibus Deus non tangitur, quippe impassibilis & affectibus non obnoxius: Sed quemamodum tunc Deus dicitur irasci aut odisse, cum vult punire aut perdere, sic amor in Deo est certa voluntas benefaciendi creaturæ. Vnde fit ut is meritò dicatur magis amari à Deo, cui plura & meliora bona largitus est, aut largiri decreuit.

III. Hoc discrimen liquidò conspicitur non modo inter bonos & malos, sed etiam inter ipsos bonos, quorum alteri plus dat lucis, & spiritum suum ampliori & cumulata mensura admetitur, alteri vero parcius, & quasi raso modio. Huic dat duo talenta, illi quinque pro suo arbitrio. Non modo dans plura melioribus, sed etiam efficiens meliores dum plura dat.

IV. Hic vero non possum mirari qua fronte Greuinchovius pag. 335. ausus sit dicere, *Deum spe maioris lucris repetendi ab hoc quam ab illo, huic quinque talenta committere*; quasi spes aut metus aut lucrū possent cadere in Deum: aut quasi ille qui quinque talentis fœnori collocatis strenuè rem auxit, voluntatem & vires tam feliciter fœnerandi non habuerit à Deo. Ineptè sanè Deus dicitur sperare quod ipse factururus est. Solent quidem homines astuti cur vrgentur, dicere hæc *αὐτοπροαγῶς* dici; sed intèrea illis ipsis improprijs vocibus abutuntur ad deducenda sua *πελοματα*, & sua dogmata astruenda. In declamando aut orando ad populum hæc *ἀνυπολογία* fertur, at non in disputando, & cum ponderanda sunt momenta veritatis.

V. Ergo super hac inæqualitate donorum Dei, velim

à sectarijs doceri, cur Deus plura largitus sit dona Paulo quam Marco aut Cleopæ, alioqui sanctis & bonis, An quia Paulus ante conuersionem erat procliuior ad Christi fidem & melius affectus quam isti? an quia Paulus melius Marco utebatur gratia communi & generali quæ etiam reprobis contingit? Nugæ; nullus enim tunc erat Paulo capitalior hostis nominis Christiani. Quid ergo? nempe sic Deo visum fuit qui de suo facit quod vult, & qui in distribuendis donis Spiritus sancti nec sequitur Arithmeticam proportionem, nec Geometricam, quippe qui æqualiter malis dat bona inæqualia, pro suo arbitrio, vtpote nulli homini debitor, nec ulli legi obnoxius.

VI. Sed discrimen & inæqualitas amoris Dei luculentius apparebit, si illi quos Deus verbo suo vocat, & quibus dat spiritum adoptionis & fidem, & per hæc salutem, cum cæteris hominibus comparentur. *Multii* (inquit Christus Matt. 22. v. 4.) *sunt vocati, pauci electi.* En tria hominum genera, non vocati, vocati sed non electi, vocati & electi,, quos omnes promiscuè & æqualiter amari, & Deum eorum salutem perinde velle, nec dici nec cogitari potest.

VII. Christus Ioh. 6. v. 44. *Nemo (inquit) potest venire ad me nisi Pater qui misit me trahat eum*: vbi agi de attractione ad fidem & per fidem ad salutem nemo dubitat. Cum ergo ex his verbis constet non omnes sic trahi, certum est eos plus amari qui sic trahuntur. Fides Dei donum est, at non omnium est fides, & paucis datur; Ergo hi plus amantur. Sic Spiritus adoptionis, prerogatiua est filiorum Dei, ergo & hi plus amantur.

Gg ij



VII. Quid quod populos quosdam Deus ex alto visitat, & dignatur verbisui præconio, cæteris in super habitis, vt docet Paulus Act. 14. v. 16. dicens *Deum præteritis temporibus fuisse gentes ipsarum Vis incedere?* Nunc etiam quam multæ sunt gentes profundis tenebris immerse, ad quas ne fama quidem aut nomen Christi peruenit?

IX. An Corinthii & Philippenses qui aliquot sæculis antecesserunt sæculum Apostolorum tantundem amati sunt à Deo, ac eorum posteri qui Pauli prædicatione ad fidem conuersi sunt? an potest dici Deum illorum æquè ac horum salutem optauisse?

X. Quid Tyrios & Sidonios dicam? quorum si salutem æquè Christus optauit ac Iudæorum, mirum cur noluerit Euangelium ipsis innotescere, maximè cum ipse eis perhibeat hoc testimonium, eos proniores esse Capernaïtis ad pœnitentiam?

XI. Actorum 16. v. 6. & 7. Paulum conantem annuntiare Euangelium in Asia & Bythinia Spiritus Dei prohibet, iubetque traicere in Macedoniam: Profecto apparet Deum non æqualiter voluisse salutem Bythinorum & Macedonum, cum voluerit Euangelium his potius prædicari quam illis: & media ad salutem necessaria his representauerit, illis negauerit. Fateor aliquot post annis Euangelium in Bythiniam peruenisse, sed inter has moras plurimi in Bythinia vita excesserunt quibus Christi cognoscendi non facta est copia: quorum salutem æquè Deum desiderasse quam Macedonum ad quos Paulum properare iussit, nemo credet nisi qui ultro animum obfirmat ad resistendū veri-

tati. Non secus ac si dicerem medicum, duorum pari morbo ægrotantium æquè cupere sanationem, quorum uni medicinam parat, alteri non vult parare.

XII. An cum Christus Iohannis 10. v. 16. diceret, se alias habere oves quas nondum collegisset, istas oves nondum coactas, sed suo tempore cogendas nihilo plus amabat alijs hominibus quos non modo non traxit verbo, sed nequidem vocare dignatus est? Sanè si Deus æqualiter vellet salutem omnium & singulorum hominum, æqualiter omnibus suppeditaret media ad salutem. Nec multis populis sublustrem tantum lucem & media largiretur per quæ sola ne ipsi quidem Arminiani ausi sunt hæcenus asserere quenquam ad salutem peruenisse.

XIII. Insigne est illud Christi Matthæi 11. v. 25. agentis gratias Patri quod abcondisset doctrinam salutis sapientibus, & reuclasset paruulis. Quid enim? an tantundem amauit eos, quibus doctrinam salutis abscondidit? Arnoldus pa. 413. & 414. verba Christi deprauat: Vult enim Christum agere gratias quod abscondita sapientibus reuclauerit paruulis. At Christus non tantum dicit hæc fuisse abscondita sapientibus, sed disertè dicit Deum hæc eis abscondidisse.

XIV. Vrit sectarios locus Pauli ad Rom. 9. vbi dicitur Deus amasse Iacobum & odisse Esau priusquam quicquam fecissent boni aut mali. Habemus ergo Deum ipsum profitentē, se homines naturæ æquales, & quorum neuter altero melior, non æqualiter amare: Idq; nō quia hic boni aliquid fecerit aut facturus sit, sed ex mera sua beneuolentia, qua miseretur quorum vult: Nam

et si huius amoris & odij effectum Malachias dicat esse Iacobi in fratrem imperium ; Apostolus tamen conscius mentis Dei , hoc siue exemplum siue typum vult esse electionis secundum propositum, & Dei verba ad salutis negotium extendit. Deniq; in re tam clara superflua est diligentia.

X V. Arminiani aduersus hanc argumentorum grandinem tegunt se sua illa distinctione voluntatis Dei antecedentis & consequentis. Dicunt Deum plus amare hos quam illos voluntate consequente, id est voluntate qua sit posterior fide & poenitentia hominis. Deum enim plus amare eos quos prauidit credituros, & per liberum arbitrium bene vsuros gratia. At voluntate Dei primaria & antecedente Deum perinde amare omnes homines, & æqualiter desiderare salutem omnium, ideoq; omnibus dare gratiam sufficientem ad fidem, ac proinde & ad salutem. Causam vero cur omnibus non prædicatur Euangelium, dicunt non esse Dei voluntatem, sed vel negligentiam Christianorum, vel indignitatem horum populorum, vel peccata proauorum qui reiecerunt gratiam oblatam.

XVI. Hæc quidem capitalis est oratio; & pugnans ex diametro non solum cum sacra Scriptura, sed & ipsa secum. Dum enim rationes afferunt cur Deus non offerat omnibus Euangelium, incauti in nostras partes concedunt; Causas enim afferunt cur Deus non æqualiter omnes amet: At non quærebatur cur Deus hos illis maiori amore prosequeretur: sed an æqualiter omnes amaret. Ergo se ipsi implicant.

Quam autem sit absurda illa distinctio voluntatis

Dei in antecedentem & consequentem , & in Deum contumeliosa, eo sensu quo capitur à sectarijs prolixè docuimus. 5.

XVII. His adde quod cum doceant Deum sæpe frustrari voluntate sua antecedente , & Dei amorem demum esse immutabilem si nos amat voluntate consequente, id est voluntate quæ sit amore & fide & voluntate nostra posterior, impium est velle vt immutabilitas amoris Dei erga nos sit posterior nostro amore, & pendeat ex nostra voluntate. Non enim amor Dei erga nos potest esse certus si nitatur amore quo cum prius amauimus: vt ergo amor Dei erga nos sit certus & immutabilis oportet amorem nostrum antecedit: vt docet Iohannes 1. Epistola cap. 4. v. 19. *Nos diligimus eum quia ipse prior dilexit nos.*

XVIII. Quod si Deus voluntate consequente hunc plus illo amat quia præuidit hunc crediturum, & bene vsurum gratia: tunc non Deus hominem, sed homo se ipse discernet: contra illud Pauli 1. Cor. 4. 7. *quis te discernit?* Et hic plus amabitur à Deo quàm ille, quia Deum plus amauit.

XIX. Tum concidet illud Apostoli Rom. 9. *Non est volentis neq; currentis sed miserentis Dei*, si voluntas hominis antecedit voluntatem Dei qua nostri certò & immutabiliter miseretur. Docent enim Arminiani voluntati Dei antecedenti resisti posse, consequenti vero resisti non posse. Oportet ergo dicant Apostolum ibi agere de voluntate consequente & de amore quo nos amat voluntate consequente, cum Apostolus ibidem addat, *voluntati eius quis resistit?* Ac profecto viri boni hic tenentur impliciti nodo quo se nun-

quam expedient. Nam si statuunt Apostolum hoc loco agere de voluntate antecedente cui resisti potest, impingunt in illud quod ibidem additur *Voluntati eius quis resistit* ? Si vero volunt cum agere de voluntate consequente quæ innitatur voluntati humanæ, & recto usus gratiæ, sitq; voluntate nostra posterior, refelluntur altero Apostoli dicto, *Non volentis est neque currentis sed miserentis Dei*. Sed Paulus disertè hic docet per hanc ipsam voluntatem cui resisti non potest excludi voluntatem humanam, præuisionemq; recti usus gratiæ, vel fidei quam voluntas miserendi consequatur.

XX. *Ædant vero Arminiani cur Iacobum Deus amauerit, Esau oderit, priusquam quicquam fecissent boni & mali? Sanè non hic illi est prælatus voluntate consequente, & quæ sit fide vel operibus Jacobi posterior: cum Paulus disertè ab electione secundum propositum remoueat cōsiderationem omnis boni, quod vel fecissent, vel essent facturi; Nam parum appositè loqueretur Apostolus si solam considerationem boni gestiante natiuitatem excluderet, non vero considerationem boni quod postea Iacob gesturus esset: cum nemo nesciat Iacobum non potuisse quicquam boni agere ante natiuitatem: Immo si potuisset, præuisio tamen boni gerendi post natiuitatem non minus derogaret electioni gratiæ quam præuisio boni quod præcederet natiuitatem. Quod si Deus eligens, boni quod Iacob gesturus esset rationem habuisset, Paulus responsantem aut scrupulosius inquirentem non compescuisset: Cum ratio esset in promptu, hunc illi esse prælatum*

prælatum quia Deus huius fidem vel opera præiudicasset. Denique illud *Non volentis est neque currentis*, omnem conatum hominis à causis electionis & voluntatis Dei per quam hominis immutabiliter miseretur excludit.

XXI. Illa vero exempla & argumenta quæ attulimus ex Scriptura non minus stabiliunt inæqualitatem amoris Dei ex voluntate antecedente quam ex consequente. Enimvero cum Christus dicit Ioh. 6. *Nemo potest venire ad me nisi Pater eum traxerit*, loquitur de vocatione quæ fidem antecedit & quæ quibusdam peculiaris est. Idem statuendum est de cæteris exemplis. Quid enim? an Deus Euangelisans Iudæis, non verò Tyrijs, minus amabat Tyrios quam Iudæos voluntate consequente, id est quia videbat Tyrios peiori modo esse affectos, & minus dispositos ad credendum quàm Iudæos? Nequaquam: contra enim Christus testatur Tyrios fuisse proniores Iudæis ad pœnitentiam.

XXII. An Corinthij vel Romani coæui Apostolorum plus habebant propensionis ad fidem quam eorum maiores centum annis retro? An Deus Corinthios vel Ephesios qui vivebant paulò ante natum Christum nõ dignatus est doctrinà salutis, quia eorum proavi eam respuerant? At si hæc fuit causa, cur horum filios ipsæ maioribus ortos illustravit salutari doctrina? Nempe Deo sic visum est, qui pro sua bonitate plus beneficiorum largitus est eis quos plus amavit, quamvis nihilo melius essent dispositi ad fidem & pœnitentiam.

XXIII. At cur Deus Paulum vocavit tam efficaci

Hh

vocatione, in ipsa odij in Ecclesiam ἀχμῇ, eumq; ex lupo fecit ouem, ex oue pastorem? an id factum, quòd Deus in eo aliquam propensionem cerneret ad fidem in Christum? vel quia bene vtebatur gratia vniuersali? Nequaquam: nam tunc temporis tigris instar in ouile Christi grassabatur. Sed nec Deus plus eum amauit voluntate consequente, id est ex præuisione fidei, cum ipsa illa fides Pauli fuerit effectum amoris Dei: nec sit amatus quia futurus esset fidelis, sed vt esset: Teste ipso Paulo 1. Cor. 7. vbi ait *se misericordiam consecutum vt esset fidelis.*

XXI V. Cum autem, vt fit, Deus homini deteriori & peioribus maioribus orto plus impertitur gratiæ & donorum, eumq; efficaciter conuertit, vt vbi abundat peccatum ibi abundet gratia, Rom. 5. 20. velim scire an voluntate antecedente Deus erga deteriorem voluerit esse liberalior, an consequente? Si antecedente, vicimus: Si consequente, dicant Arminiani quæ voluntas hominis deterioris vocationem eius efficacem antecefferit, quæ in altero minus malo non inueniatur? An dicent illum qui peior erat ante conuersionem, fuisse sitientem, paruulum, facientem voluntatem Patris, vt ipsi loquuntur? Oleum ex pumice facilius expriment, quàm in Paulo ante conuersionem, in latrone ante crucifixionem, aut in ijs quibus ex corde lapideo Deus dat cor carneum, ante regenerationem tales dispositiones inueniant.

XX V. His adde quod Scriptura dicit Act. 14. v. 16. *Deum præteritis ætatibus fuisse omnes gentes suis ipsarum vijs incedere.* Hic quæro an Deus tantundem amauerit

has gentes, earumq; salutem perinde optauerit, ac amavit earum posteros, quos postea vocavit vocatione efficaci per Euangelium? Nemo opinor erit oris tam duri ut id asserere audeat. Neque verò negant Arminiani vocationem salutarem per Euangelium maximum esse *τελειωσις* amoris Dei erga gentem aliquam. Sed aliorum flexa disputatione rimantur causas cur Deus hos illis impenius amet: quod sanè id ipsum est quod volumus.

XXVI. Denique si omnibus hominibus Deus æquè vult finem, id est salutem, ergo & eis æquè vult suggerere media ad finem: puta verbum, fidem, Spiritum. At hæc non suggerit omnibus æqualiter. Nec quicquam absurdius fingi potest, quam Deum æqualiter quidem velle omnes homines & singulos credere & saluari, sed quibusdam suggerere media congrua & apta ac certò profutura, alijs vero media non congrua, non apta, & certò non profutura. Quæ tamen est Arminij doctrina.

XXVII. In assignandis vero causis impenius amoris Dei erga aliquam gentem, & minoris erga aliam dici non potest quam frigide agant: Interdum causantur meliorem horum dispositionem quam illorum. Quod sanè pernegamus. Neque enim Roma aut Corinthus aut Ephesus proniores erant ad pietatem paulo ante illatam Euangelij lucem, quam aliquot sæculis antè. Immo verò tunc libido prodigiosa & luxur ac superbia & rapina in immensum excreuerant, ne habebant quò progredierentur ulterius. Eodemq; tempore multæ erant gentes barbara stoliditate stupentes,



& quæ digniores videbantur commiseratione, si cœlestis vocatio ex humana ratione, non ex arcano Dei consilio gubernaretur. Nimirum ante aduentum Pauli Deus habebat Corinthi populum multum, vt Deus ipse dicit Act. 18. 10. idq; inter fœdissimas vulgaresq; libidines impurissimæ vrbis. In quorum electorum gratiam constituto tempore Deus misit Corinthum tam præstantem Apostolum, claram Euangelij tubam, cuius prædicatione & miraculis vsus est ad eorum conuersionem qui ad suam electionem pertinebant.

XXVIII. Denique cum nemo non per se & sua natura sit indispositus ad conuersionem & fidem, nemo non in peccatis mortuus, nemo non impotens sequi Deum vocantem, ridiculus est qui in negotio regenerationis & resurrectionis spiritualis quærit inter mortuos dispositiones & discrimina propensionis ad vitam: & qui Deo affingit voluntatem nos saluandi, quæ humanum arbitrium consequatur, & ab eo dependeat.

XXIX. Proauorum vero culpam causari, & putare ideo noluisse Deum huic genti Euangelium prædicari quia maiores eius ante annos mille aut his mille gratiam Dei respuerunt, planè est ἀπολογισμός. Romani enim & Corinthij tempore Apostoli Pauli, iisdem erant maioribus orti quibus Romani & Cōrinthij qui triginta aut quadraginta annis Pauli prædicationem præcesserant. Nec æquum est pronepotes luere peccata auorum. *Filius non geret iniquitatem patris*, Ezechiel. 18. Nec lex visitationem iniquitatis patrum in filios vltra tertiam generationem extendit, quan-

quam & ibi loquitur de nepotibus qui insunt maiorum vestigijs, & paternum scelus imitantur. Accedit quod per bella, per colonias, per exilia, per matrimonia, mira fit generis humani permixtio, & in vna eademq; gente alij alijs orti sunt maioribus quorum fuerunt mores diuersi. Immo verò vnus idemq; homo ortus est maioribus quorum alij gratiam Dei respuerūt alij non respuerunt: Quorum omnium si habenda est ratio: & si Deus vult annuntiari alicui genti Euangelium aut non annuntiari prout se eius maiores gesserint, impossibile erit quin varijs & contrarijs cogitationibus distrahatur, & vinculis ridiculis contrarijsq; consilijs eius sapientia illigetur.

XXX. Perstant tamen nouatores, & quamuis omnibus sæculis, immo & hoc nostro sciant & videant plurimis gentibus Christi nomen ignotum esse: obfirmant tamen animum & pertendunt Deum velle Euangelium omnibus prædicari. Arnoldus p. 97. pernegat posse dici Deum nolle Euangelium omnibus prædicari. Et pag. 397. *Verum quidem est (inquit) Euangelium non omnibus vbique prædicari, hinc tamen non sequitur Deum nolle omnes homines ad fidem adducere, sed hoc inde est quod propria & affectatà malitià ac peruersitate se ista gratia indignos reddant. Quæ verba mihi videntur implicare contradictionem, nam si cur Euangelium alicui genti non prædicetur causa est eius malitià, & prauitas, planum est Deum nolle isti genti Euangelium prædicari, quippe qui hac pœna vlciscitur eius contumaciam. Putare verò pœnas aliquas infligi nationibus Deo non volente, præcipue in salutis negotio, pro-*  
Hh iij

sus est infimulare Deum crudelis negligentia, eiusq; providentia velle oculos configere. Tum abunde docuimus omnes homines esse indignos, & indignissimis quibusq; & deterrimis gentibus Euangelium esse annuntiatum, sic dispensante Deo : Iuxta illud Rom. 10. v. 20. *Inuentus sum ab iis qui me non querebant, conspicuus sum factus iis, qui me non interrogabant.*

XXXI. Hinc ergo depulsi, aliud quiddam commenti sunt quo nihil est dilutius. Dicunt dici non posse Deum nolle Euangelium omnibus gentibus prædicari : Sed multas gentes desiderare in tenebris quia defunt qui velint eis prædicare, idq; fieri quia zelus Christianorum deferbuit, & ex socordia pastorum Ecclesiæ, qui nolunt eo proficisci prædicandi ergo. At si omnes Christiani affecti essent ut par est, & tangerentur zelo domus Dei, nullis populis defuturam prædicationem Euangelii.

Respondeo me non eum esse qui velim asserere Christianos hac in re prorsus vacare culpa : sed nihilo minus hæc ex Dei consilio & providentia administrari, dubitari non potest. Nam si Deus Americanis per multa sæcula in densa ignorantia nocte demersis voluisset in ferre lucem Euangelii, non passus fuisset eos per tot sæcula Christiano orbi esse ignotos. Quomodo enim possent incusari non prædicati Euangelij Americanis, qui nequidem sciebant illos esse Americanos, aut illam terræ plagam habitari? Nec credibile est, per negligentiam aliquorum Ministrorum Deum posse frustrari intentione & cupiditate aliquam gentem saluandi. Nec æquum est ut innumerabiles po-

puli in æternum luant pœnas alienæ negligentia. Tum si Deus vóluisset annuntiari Euangelium populis qui solo & cœlo & lingua à nobis diuiduntur, infudisset aliquibus nostrum dona linguarum, vt possent à barbaris intelligi. At hodie imbuuntur Papismo idiomate Hispanico, ad quod discendum per vim compelluntur: ergo religionem cum lingua inuiti acceperunt, Ita vt Christum cognoscere genus sit pœnæ & pars seruitutis, quod sanè à diuina vocatione abhorret. Sed nouatoribus dum in alta pace & otio sibi & alijs creant negotium facile est de his garrere in angulis. Qui si seriò loquerentur, illico frequentes in Americam aut Floridam nauigarent, aut se conferrent ad incolas continentis Australis, vt eos imbuerent fide Christi, nec obliti crucis Christi & ingeniorum prurigine correpti, tot turbas dedissent, nec suæ Ecclesiæ viscera laniassent.

XXXII. An vero Apostoli prædicauerint omnibus solet disputari. Mihi sanè non est verissimile Apostolos intimam Africam trans Æquatorem penetrauisse, aut peruenisse in Americam, & si quæ est alia pars orbis minus nota. Vita Apostolorum brevis ad id non suffecisset, nec patebant adhuc hæc itinera; tum aliqua saltent ibi extarent Christianismi vestigia. Falsò Paulus, cuius itinera & cursus pernouimus, dixisset se plus omnibus Apostolis laborasse 1. Corinth. 15. 10. si cæteri Apostoli ad Antipodas, & ad plagam Arcticam & Antarcticam peruenissent. Omniumque sæculorum memoria testis est plures semper fuisse Ethnicos Christianis, Ecclesiam.

que Christianam etiam cum esset florentissima vix decimam terræ partem occupauisse. Iussi quidem sunt Apostoli prædicare omni creaturæ, sed hoc mandatum non ad Apostolos solos pertinet, sed & ad eorum successores, qui lampadem Euangelii eis à prædecessoribus traditam per totum orbem aut circumtulerunt aut circumferent. Nempe debet prædicari Euangelium omnibus gentibus, at non simul & eodem tempore, sed successiue. Non si prædicatoribus Euangelii accommodatur illud Psalmi 19. *In omnem terram exiuit sonus eorum*, idcirco debet id fieri simul & vno momento, potius quàm per partes & successiue: Deo quasi illustrante & obeunte gentes, donec nulla sit ad quam tandem non peruenerit doctrina salutis: non secus ac Sol die Æquinoctii totum terræ globum non simul sed per partes illustrat, donec conuersionem absoluerit. Tunc enim finis mundi instabit cum Euangelium ad omnes populos peruenerit: teste ipso Christo, Matt. 24. v. 4. *Prædicabitur Euangelium regni in uniuersa terra, ut sit testimonio omnibus gentibus, & tunc veniet finis.* Quæ verba Seruatoris hunc nodum secant: Apparet enim tempore Apostolorum Euangelium non fuisse prædicatum omnibus gentibus, quia tunc temporis finis nondum instabat.

XXXIII. At (inquis) Paulus ad Coloss. 1. vers. 23. dicit *Euangelium prædicatum esse omni creaturæ quæ sub cælo.* Respondeo Apostolum vsum esse formula loquendi vsitata in Scripturis, quæ per omnes qui sunt sub cælo, non omnes & singulos absolutè ac sine exceptione, sed valdè multos intelligunt. Sic Actuum 2. vers. 3.

vers. 5. *Erant Ierosolymis commotantes Iudæi ex omni natione quæ sub celo.* Quid enim? an etiam ex America, aut Molucis, aut continente Australi, quorum nequidem tunc erant nota nomina? nedum ut inde Ierosolyma venissent. Sic Ecclesiastes cap. 4. v. 15. *Vidi omnes viuos qui incedunt sub Sole*, cum tamen Solomo exiguum tantum terræ particulam vidisset. Vide Ezechielis cap. 31. v. 6. & 13. & caput 32. v. 4. & cognosces, vocem OMNES frequenter non ita accipi ut nullus excipiat, sed pro MULTIS persæpe vsurpanti.

XXXIV. Ne multa; in hac quæstione an Deus omnium hominum salutem æqualiter cupiat, & an omnes æquali amore prosequatur tanta est veritatis euidencia, ut ipsos Arminianos sui interdum pudeat, & sæpe in nostras partes incauti transeant. Arminius in Perkinsum p. 214. hæc habet. *Si quis peculiaris ope gratia gratiam oblatam apprehenderit, inde patere Deum maiore ipsum profecutum esse amore quam illum cui gratiam tantum communem fecit, peculiarem vero denegauit.* Arnoldus p. 380. fatetur Arminium agnoscere non offerri omnibus sufficienter media ad fidem. Ergo non perinde omnes amantur. Nec quicquam tam frequens est apud Arminianos, quam Deum vocare quosdam modo, & tempore congruo, quo modo qui vocantur certissime & infallibiliter sequuntur vocantem: quosdam vero vocare modo non congruo, quo qui vocantur nunquam parent Deo vocanti: At non dubium est quin magis amentur quibus datur peculiaris gratia quam quibus negatur. Tum ij quibus datur sufficiens gratia ad fidem quam quibus non datur. Tum ij qui

*De vocatione  
qua fit prout  
Dei non est  
se congruum  
vide Arn. p.  
73. & seq. &  
Armin. in  
Perk. p. 245.*

vocantur modo quem Deus nouit esse congruum & qui certò sit profuturus, quàm qui modo incongruo & quem Deus certò scit non profuturum. Arminius in Perkinsum pag. 16. hæc habet. *Deus certo decreto statuit illis fidem & penitentiam non dare, scilicet adhibendo illis gratiam efficacem qua certo credant & conuertantur.* Et constans est Arminianorum sententia Deum non dare omnibus gratiam efficacem, sine qua tamen nemo credit, nemo seruat: & gratiam qua Deus dat non modo posse sed & velle conuerti & credere, paucis tantum dari. Horum ergo salutem Deus magis cupit quam aliorum quos hoc beneficio non dignatur.


XXXV. Notabilia præ cæteris verba sunt Greuinchouij pag. 342. *Interdum ( inquit ) maiores peccatores, citius adiuvat sua gratia quàm minores. Quis enim Deo modum præscribet, quominus interdum præter legem à se constitutam, pro liberalitate sua peioribus præstantiora dona largiatur?* Satis opinor luculenta est hæc confessio. Nam si hæc vera sunt, non potest negari quin Deus antecedente voluntate istos deteriores plus amet, si quidem ista voluntate antecedente plura bona eis largitur, & impertit eis gratiam quam alijs minus malis negat. Neque enim potest dici hanc gratiam peioribus dari voluntate quæ voluntatem humanam consequatur, cum nulla bona voluntas humana, sed pessima dispositio largitionem gratiæ antecesserit. At fortasse rarò Deus hoc facit, & ut ait Greuinchouius, præter legem præstitutam: Immo vero hoc facit ut plurimum, & iuxta regulam Evangelio declaratam, *Ubi abundauit peccatum ibi abundare gratiam, Rom. 5.*

Sic enim gloria Dei & virtus clarius elucescit, per quam durissima quæq; frangit & perrumpit obstantia : & vbi *δοκασιολογία* aut perditissimi mores videbantur obistere progressibus Euangelij, ibi Euangelium plantat & propagat feliciori successu & maiori efficacia.

## DE LIBERO ARBITRIO

*Partium sententia.*

C A P. XXXII.

I.  VANT OPERE puritas illa & integritas in qua homo primitus fuerat creatus sit deformata per peccatum, & Dei imagini imago Satanæ superinducta docuimus cap. 7. Mansit tamen voluntati libertas à coactione & à Physica necessitate: si enim voluntas cogi posset, non esset voluntas sed noluntas. Aut si à principio externo, naturali & immutabili lege necessario ad vnum determinaretur, non esset voluntas, sed vel impulsio violenta, vel propensio naturalis & *εὐνοία* destituta cognitione & iudicio: qualis est propensio grauium ad centrum. Cum enim tria sint genera libertatis: vnū à coactione & necessitate Physica, alterū à peccato, tertium à miseria, homo dum est in vita presenti nunquam erit planè liber & immunis à peccato & à miseria: sed ad has duas libertates demum perueniet in futura vita. Libertas vero à coactione & à necessitate Physica essentialis est voluntati, & inseparabilis.

II. Huius libertatis sedes est in voluntate: quippe quæ circa actiones voluntarias imperium obtrinet. Nam

li ij



etſi voluntas in ſingularibus aſtionibus ſequitur ſuaſionem intellectus, intellectus tamen non iudicat nec deliberat niſi iuſſus à voluntate; ad cuius imperium homo ſe ad deliberationem & ad veri inquiſitionem applicat. Eodem planè modo quo herus cæcus obtemperat in ſingulis ſeruo manuſcruenti & ſuadenti: qui ſeruus tamen id facit vt hero pareat qui vult ſe duci & moneri.

Cum autem ſcriptura dicat hominem ſeruum eſſe peccati Rom. 6. 17. & venditum ſub peccato, Rom. 7. verſ. 14. Et mortuum in peccato Ephes. 2. v. 1. & 5. & Coloff. 2. 13. quouſque ſe extendat libertas humanæ voluntatis, tam ſub ſtatu peccati & ante regenerationem, quam ſub ſtatu gratiæ & regenerationis operæpretium eſt cognoscere.

III. Voluntas eſt appetitus rationalis, qui ſemper ſua natura fertur in bonum, ſeu id verè fuerit bonum ſeu *φαινόμενον*. Nam vt quis velit malum qua malum & non ſub ratione boni, impoſſibile eſt.

IV. Libertas voluntatis qua poteſt velle aliquid aut non velle, libertas contradictionis vocatur: libertas vero qua aliquid vel eius contrarium perinde poteſt velle, libertas contrarietatis appellatur.

V. Duo autem omnino ſunt quæ poſſumus velle, velenim volumus finem, vel media ad finem; quorum illud Ariſtoreli Ethicorum 3. cap. 4. *βέλους*, hoc *τεταγμένοις* dicitur. Volumus enim abſolutè finem, eligimus media: Quod ſi quis medium aliquod ad finem adipiſcendum abſolutè vult & ſine deliberatione, illud medium vult non ſimpliciter vt medium, ſed vt finem;

& vt illud adipiscatur alia media eligit. In eligendo autem voluntas sequitur iudicium intellectus practici: Nisi cum appetitus vehementes & inordinati præpollentes, rationem offuscant, aut eius iudicio renituntur.

VI. Inuoluntarium dicimus non modo quod coactum est & ad quod per vim compellimur, sed & illud quod fit per ignorantiam.

*Arist. Ethic.  
3. cap. 3.  
ἀκούσιον ἐστὶ τὸ  
βίαιον καὶ τὸ δι'  
ἀγνοίας.*

VII. Voluntarium differt à spontaneo, quod spontaneum latius patet voluntario. Omne enim voluntarium est spontaneum, sed non vicissim: Nam etiam pecudes sponte sua mouentur, & habent ὁρμὰς & propensiones spontaneas: Ea demum voluntariè fiunt quæ cum cognitione & ratione aliqua: siue ratio recta sit, siue habens speciem recti & veri.

VIII. Sed eorum quæ voluntariè fiunt alia alijs sunt magis voluntaria. Sunt enim quædam quæ quis facit ἀκων ἐκων & cunctanter, vt cum æger porrigit brachium amputandum, ne gangræna serpat vltcrius, aut cum mercator manibus suis merces proijcit in mare. Quæ tamen actiones plus habent voluntarij, quippe quæ fiunt ob bonum: Nam minus malum per quod peruenitur ad maius bonum speciem boni induit.

*Arist. Ethic.  
3. cap. 1. το  
ῦτο δὲ πρὸς συμ  
βαίνει ἐπὶ τοῖς  
πρὸς τὴν ψυχῆς  
μικροῖς ἀπολαύ  
μασι αἰσθητικῇς  
πρὸς τὰς ἀρετὰς  
ἐστὶν, ὡς καὶ δι'  
μᾶλλον ἐκ  
στὶς.*

IX. Finem vltimum nempe felicitatem, volumus omnes necessario; nec appetitio finis vltimi cadit in deliberationem. Nemo enim a se impetrare potest vt velit esse miser. Attamen finem istum volumus liberè, quia sine coactione, & cum cognitione ac iudicio: Vnde fit vt hæc appetitio non modo sit spontanea, sed & voluntaria, ac proinde libera.

X. Porro actionum humanarum multa sunt genera. Quædam enim sunt merè naturales, vt arteriarum systole & diastole, cõcoctio alimèti &c. Quæ quia nõ sunt penes nos, nec humani arbitrij, circa ea nec voluntas occupatur, nec in eas cadit electio aut deliberatio.

XI. Quædam actiones sunt partim naturales, partim voluntariæ: vt edere, ambulare: quæ cum sint naturales, reguntur tamen à voluntate. In his actionibus voluntas est libera, nisi cum cogit externa vis, aut inuitos vrget ineuitabilis necessitas.

XII. Sunt & actiones quædam ciuiles, vt vendere, emere, contrahere, ludere, ædificare, pingere. In his voluntas hominis est libera, & se horsum vel illorsum liberè inclinatur. Nam qui hæc facit ad alterius imperium, vult tamen alteri morem gerere, ac proinde non tantum aliena, sed & sua voluntate impellitur. De hac libertate loquitur Apostolus 1. Cor. 7. v. 37. *Qui stat firmus in corde suo, nec adigitur necessitate, sed in potestate habet propriam voluntatem, & hoc decreuit in corde suo vt seruet suam virginem, bene facit.* Nam hoc loco Apostolus id bene fieri dicit, non quod sit congruenter cum lege diuina, sed quod prudenter, & ad rem ac tempus præsens accommodatè.

XIII. Sed & in actionibus honestis honestate ciuili, voluntas humana suo pte mouetur arbitrio, vt cum Ethnicus lapsum erigit; aut erranti cõmonstrat viam.

XIV. Par libertas in obseruatione politicæ Ecclesiasticæ. Et in operibus lege Dei præceptis, quod ad

externum opus attinet. Nam & pessimi quique defunguntur ritibus sacris, erogant eleemosynas, verbum Dei legunt & audiunt.

XV. Præcipue verò in malis actionibus homo liber est. Non enim solum ad peccandum spontè fertur, sed & inter duo aut plura mala liberrimè eligit : & quo fert animus se voluntariè applicat. Quocirca cum homo naturaliter malus regatur à sua praua voluntate, & ideo aliquis liber dicatur quia facit quod lubet, apparet hominem ob id ipsum esse seruum peccati, quia subditus est suæ ipsius voluntati, & quia peccat voluntariè & liberè : ac proinde hominem eo ipso seruum esse quia liber est.

XVI. Per hanc seruitutem & prauitatem naturalem qui dicunt hominem irrogenitum necessariò peccare, non debent reprehendi; Homo enim irrogenitus inuitabiliter peccat. Sic diaboli peccant necessariò attamen liberè. Peccant enim non coacti, nec determinati ad vnum à causa extrinseca eos impellente. Sed aguntur proprio motu, & insita prauitate, & cum cognitione. Eodem modo quo sancti qui peruenerunt ad gloriam necessariò boni sunt, & immutabiles, & tamen voluntariè ac liberè. Neque enim credibile est sanctos glorificatione libertatem amisisse. Est quædam necessitas voluntaria. Nec pugnat libertas cum necessitate sed cum coactione & cum seruitute. Quocirca Augustinus Enchiridio cap. 105. & Ciuitatis 22. lib. cap. vltimo docet per necessitatem non peccandi quæ erit in sanctis liberum eorum arbitrium potius auctum & confirmatum quam diminutum iri.

*Aug. lib. 22.  
de Ciuit. cap.  
30. Nec ideo  
liberum arbitrium non habebunt quia peccata eos delectare non poterunt, &c.  
Enchir. cap. 105. Multo liberius erit arbitriū quod omnino non poterit serui-  
re peccato.*

Quid Deo liberius? idem tamen necessario est bonus, & agit bona. Nam ut ait Thomas Tomo 8. De libero Arbitrio Quæst. 24. Art. 3. *posse eligere malum non est de ratione liberi arbitrij*. Idem sæpe dicit coactionem non vero necessitatem pugnare cum libertate voluntatis, præcipuè vero eodem Tomo Quæst. 10. de processione diuinarum personarum Art. 2.

XVII. Superfunt habitus & actiones; id est virtutes & opera quæ ad salutem conferunt, & quæ propriæ sunt fidelium. Qualia sunt vera Dei cognitio & serius amor, fides & resipiscentia, & actiones sanctæ ab his virtutibus promanantes. Circa hæc voluntas hominis irrogeniti & in puris naturalibus constituti non est libera, nullum hic hominis liberum arbitrium, nulla propensio, nulla dispositio. Perdifficile sanè esset in Paulo grassante in Ecclesiam, & in latrone in crucem acto ob latrocinia, quem Christus in ipso mortis agone conuertit, inuenire dispositiones aliquas aut præparationes ad resipiscentiam.

XVIII. Non inficior quin Ethnicorum multa memoriæ sint prodita honestè facta & vtiliter ad societatem ciuilem, ad concordiam, ad patriæ defensionem. Sed cum *sine fide non possimus placere Deo*, Heb. 11. v. 6. & cum ea demum actio grata sit Deo quæ fit cum fide, quia *omne quod fit sine fide peccatum est*. Rom. 14. v. 23. & quæ refertur ad Dei gloriam, ut iubet Apostolus 1. Corinth. 10. v. 31. planum est in illis Ethnicorum honestè factis culpam non defuisse: & eiusmodi ciuilibus virtutibus non posse ad salutem perueniri, neque quenquam per hac posse disponi ad fidem aut veram resipiscen-

resipiscenciam: Alia sunt *καρπώματα* virtutum civilium, alia officia fidei & pietatis Christianæ. Ac meo quidem iudicio, iudex Ethnicus, qui in iure dicundo & herciscundis possessionibus iudicat ex æquo & bono, nihilo iustior est coram Dei tribunali, quàm latrones qui inter se equaliter & bonâ fide prædam partiuntur. Quisquis enim fide in Christum caret, filius Dei non est, ac proinde non potest esse hæres iustusq; possessor bonorû terrenorû, quantuncumq; virtutibus civilibus emineat. Sed lux quædâ dubia, & semina æquitatis naturalis relicta sunt homini ad societate civilē: & ut illi ipsi quibus lux Euangelij affulget, dum indulgēt vitijs, his exemplis stimulati pudore suffundantur.

**XIX.** At postquam Deus illustravit mentem alicuius sua luce, & cor eius tetigit pœnitentiâ, eique fidem Christi penitus impressit, voluntas hominis incipit vltro se mouere ac liberè ad sanctas actiones; ad quas quidem non impellitur necessitate Physica, sed leni ac efficaci siue suafione, siue influxu, sic flectitur, ut volûtas vltro & liberè Deum vocantem sequatur. Alioqui ne quidem esset bonum opus ad quod quis coactione traheretur, vel naturali necessitate cōpelleretur. Qui bonum inuitus agit improbè agit. Benignè cum eiusmodi homine agitur, si Deus ignoscit eius obedientiæ. Nam quantumuis Deus oderit malum, non idcirco tamen vult cogere ad bonum: quia bonum opus non est bonum nisi cum est voluntarium.

**XX.** Veruntamen quantumcunq; homo liberè moueatur ad opera pietatis, solida tamen laus boni operis Deo debetur, qui efficit in nobis *vellere & perficere*.

*pro gratuita sua beneuolentia.* Philip. 2. Sic quamuis fœtus in materno utero ipse se commoueat, & ipse suam natiuitatem adiuuet, id ipsum tamen quod se mouet habet à Deo. Quemadmodum igitur si quis Deo tribuit integram laudem conformationis embryonis, & generationem ac natiuitatem eius soli Deo adscribit, non per id embryonis natiuitatem moratur, aut eius vigorem minuit: ita qui Deo adscribit totam laudem nostrę regenerationis & sanctarum actionum, non per id moratur studium bonorum operum, nec voluntatem humanam eueruat, aut Physicę necessitatis vinculis constringit.

XXI. Hic ergo adhibenda est distinctio. Nam si agitur de initio conuersionis, & primordijs regenerationis ac fidei, id est de acquisitione seu formatione fidei & resipiscentiæ in animabus nostris, pertendimus nullas hic esse partes liberi arbitrij: & animas nostras inter initia non modo se habere purè passiuè, sed etiam operi Dei, in nobis formantis rudimentū noui hominis, summo plerumque conatu obsistere: ita ut homo hac in parte non sit liber nisi ad resistendum Deo. At post regenerationem inchoatam, & postquam Deus dedit homini cor carneum ex lapideo, tunc homo se mouet liberè ad opera Deo grata. Ac prout sunt tacita, sed tamen certa, incrementa regenerationis, ita hæc libertas sensim accrescit, languescit in dies resistentia cupiditatum. Hoc pacto humana volūtas Deo cooperatur, ita tamen ut quicquid boni sit Deo soli debeatur. Non sicut ac cum scriba manū tremulā pueri apprehensam ducit, & primulū format ad pingenda elementa: co-

natur quidem puer formare elementa, & totis viribus contēdit: recta tamen conformatio characterum non puero sed scribæ debetur. Hoc exemplum idcirco mihi videtur accommodatissimum, quia docet Deum nō tantum operari cum voluntate nostra, vt voluit Synergistæ Semipelagiani huius seculi, sed etiam docet Deum agere per nostras voluntates, & eas flectere motione efficaci: Cui quōmodo & quatenus homo possit postea docebitur.

*resistere*

XXII. Ipsum ergo actum credendi & resipiscendi eatenus dicimus esse hominis, quatenus homo ipse credit & resipiscit, non vero Deus: & quatenus nemo credit & resipiscit nisi volens: Sed dicimus solam Dei gratiam creare in nobis fidem: & id ipsum quod sponte & libere credimus & resipiscimus diuini esse muneris, & à spiritu regenerante. Quæstio enim non est quis credat, homine an Deus: sed quid fidem in homine producat: & an sit penes liberum arbitrium adiutum gratiâ, credere vel non credere, & gratiâ vti vel non vti.

XXIII. Ab hac doctrina cuius firmamenta ex sacra scriptura sequenti capite afferentur, immensum quantum distat Arminius eiusque sectarij. Censent enim homini irrogenito inesse vires credendi & resipiscendi. Collatores Hagienſes Arminiani pag. 272. affirmant conuersionem præcedere fidem, & hominem aliquid ad suam conuersionem conferre antequam fidem habeat. Quin & euoluens scripta sectariorum, inuenio quidē eos statuere, per naturæ corruptionem, hominis intellectui esse offusas tenebras, & affectus eius esse deprauatos: at voluntatem eius pronam esse sua natura

Kk ij



ad peccatum & deprauatam, nullibi in eorum scriptis inuenio: Sed ei tribuunt τὸ ἀμειψέντες in bonum & in malum: & in vtramque partem æqualem propensionem. Quapropter in hominis regeneratione volunt intellectum quidem illuminari irresistibiliter (sic enim loquuntur) & affectus trahi: At voluntati volunt manere suam libertatem credendi vel non credendi, resipiscendi vel non resipiscendi. Viuificationem verò voluntatis in regeneratione nostra non volunt in eo esse sitam, quod ex naturaliter mala, fiat bona per infusionem alicuius virtutis, sed quod per intellectus illuminationem & affectuum emendationem *voluntas potens redditur ad insitam sibi facultatem volendi aut nolendi excrendam*. Id docent Arminiani Collationis Hagienfis pag. 251. Quin & ijdem Collatores paulò post hæc dicunt. *In spiritali morte non separantur proprie dona spiritalia ab hominis voluntate, quia illa nunquam ei fuerant insita*. Nimirum censent voluntatem Adami ante lapsum non fuisse instructam iustitia & sanctitate: Nam has virtutes esse dona spiritalia negari non potest. Quæ sanè prodigiosa est Theologia.

XXIV. Ijdem affirmant gratiam sufficientem dari omnibus hominibus, etiam irrogenitis & Ethnicis, ad quos Christi nomen non peruenit, per quam possunt fidem adipisci, si velint. Nec hominem irrogenitum planè esse mortuum in peccato, sed ei inesse reliquias vitæ spiritualis, & vires implendi legem naturæ: Censent enim Deum nihil exigere ab homine ad quod præstandum non det vires sufficientes; Alioqui (inquiunt) Deus colligeret ubi non sparsit. Dicunt ergo

Arn. p. 403.  
Homo corruptus potest lumine naturalis rectè uti: & habet aliquas reliquias vitæ spiritualis.

Deum TENERI dare omnibus vires implendi quod iuber, & credendi Christo.

XXV. Verba Arminij notabilia sunt pag. 244. in Perkinsum. *Antu (inquit) negas liberum arbitrium esse flexile in utramque partem, addo & sine gratia? flexibile enim est natura sua: & ut malo additum in statu peccati, ita capax boni: quam capacitatem illi gratia non donat, inest enim illi a natura.* Ergo secum ipse dissidet, cum addit liberum arbitrium non flecti ad bonum sine Dei gratia: Nam quomodo sibi hæc constant? liberum arbitriū flexibile esse ad bonum sine gratia: & tamen non flecti ad bonum sine gratia? Frustra est potentia quæ nunquam ad actum reducitur. Nam vnde colligit id posse fieri quod ipse agnoscit nunquam factum esse nec futurum? Huc pertinet illud quod dicit pag. 257. *Posse credere naturæ est, credere gratiæ: ergo posse credere non est gratiæ.* Inest quidē homini naturaliter possibilitas habendi seu recipiendi fidē: At non ei inest naturā posse credere. Hæc enim plurimū distant. Illud denotat susceptibilitatem & possibilitatem recipiendi fidem, hoc vero significat vim actiūā & facultatem credendi: quæ sanē non inest homini à naturā, sed tantum est à gratiā.

XXVI. Arnoldus pag. 271. nobis ut maximum errorem exprobat quod statuimus reogenitum non posse quicquā [boni] agere nisi à gratia sit motus. Magnum verò crimen, & quod nobis cum Apostolo commune est, qui pronuntiat *Nos ne quidem idoneos esse ad aliquid cogitandum velut ex nobis ipsis, sed omnem sufficientiam nostram esse à Deo, 2. Cor. 3. 5.* Idem Arnoldus pag. 447. vsum gratiæ subijcit humanæ voluntati. *Statuitur*

Kk iij

(inquit) *usum gratiæ voluntati subijci ut homo eadem vi possit vel non vi, pro naturali sua libertate, & paulo post fatetur, statui ab Arminio effectum diuinæ misericordiæ in potestate hominis, sed iam corroborati gratia. Quæ gratiâ tēset esse penes liberum arbitrium vi vel non vi, credere vel non credere. Denique Arminiani volunt gratiæ efficaciam, id est efficientiam, pendere ex libero arbitrio. Arnoldus contra Bogermannum, p. 263. & 274. Positis omnibus operationibus gratiæ quibus ad conuersionem in nobis efficiendam Deus viuitur, manet tamen ipsa conuersio ita in nostra potestate libera ut possimus non conuertere, id est nosmet ipsos conuertere vel non cōuertere. Greuinchouius, p. 198. Dico effectum gratiæ ordinariā lege pendere ab actu aliquo liberi arbitrij ut præuia conditione sine qua non. Idem pag. 203. & 204. Dicit totius complexi ( quare hæc gratia in Paulo aut Petro potius sit efficax quàm in alio ) causam communem non posse dari aliam, præter libertatem voluntatis. Perkinsus dixerat, Sicut nihil boni potest esse aut fieri nisi Deo faciente, ita nihil mali potest caueri nisi Deo impediēte. Hanc sententiam veram & sanctam carpit Arminius & vellicat pag. 113. & pro, potest caueri, vult poni cauetur, vult enim omnibus hominibus inesse vires faciendi bonum & cauendi malum, at actum ipsum partim esse à gratia partim à libero arbitrio, quod gratiam vel admittit vel respuit ex libito. Audi verba Arnoldi pag. 381. *Vsus ipse bonus liberi arbitrij est a gratia principaliter, ita tamen ut ipse homo arbitrio suo bene utatur: eidemque gratiâ vel utendi vel non utendi libertas relinquatur.* Censent enim sectarij vires credendi dari irresistibiliter omnibus, at actum credendi sic adiuuari à gratiâ ut relinquatur libero arbitrio actu credere vel*

non credere, gratiaque vel benè vel malè vti.

XXVII. Fidem vero negant esse à sola gratia, sed partim à gratia partim à libero arbitrio. Greuinchouius pag. 208. & 210. *Liquet liberum arbitrium & gratiam simul esse causas partiales.* Sic debuit loqui homo qui electionem dicit esse ex fide præuisa: rerincommodè enim Deus diceretur præuidere quod solus ipse facturus est, hoc enim non est præuidere, sed decernere. Eodem pertinet decretum conditionale de saluandis hominibus, si credent: sic enim prorsus ponitur esse penes hominem credere: Ineptum enim esset huiusmodi decretum, *volo hunc seruari si ei dederò fidem.* Arminius in Perkinsum pag. 223. & 224. *Causa* (inquit) *totalis cur ille credat iste non, est voluntas Dei & liberum arbitrium hominis.* Arnoldus pag. 288. dicit *Arminium præcipuas partes in fide efficienda gratiæ tribuere*: nempe quia in fide efficienda vult aliquas esse partes liberi arbitrij: Quas non esse postremas, immo verò maximas ex sensu sectariorum, quantuncunque id præse non ferant, satis agnoscit Arminius & post eum Arnoldus pag. 125. *Negatur* (inquit) *hoc discriminè gratiæ vocantis non tam in hominis arbitrio quam in Dei voluntate positum esse.* Ac profecto oportet in conuersione hominis præcipuè partes sint liberi arbitrij, si verum est quod pertendunt Arminiani, gratiæ efficientiam pendere à libero arbitrio, & gratiæ rectum vsum humanæ voluntati subijci. Et quod Arnoldus dicit pag. 444. *Deum ita in homine operari, ut modo ille sibi ipsi non desit, se conuertere possit.* Greuinchouius in Amesium pag. 205. *Gratia non determinat nisi arbitrio cooperante:*

*qua ratione & modo quidni dicamus efficaciam quoque gratiæ quod in modo ab arbitrio pendere quoad euentum? Si ergo gratiæ efficacia quod ad euentum, id est effectum, pendet à libero arbitrio, oportet in conuersione & regeneratione partes liberi arbitrij sint longè præcipuæ. Idem pag. 214. Comparando inter se auxilium Dei efficace & influxum arbitrij, nulla est inter utrumque prioritas. Et cum sit penes liberum arbitrium sic uti gratia ut credat actum, & fidem adipiscatur, per fidem autem sumus filij Dei, Gal. 3. 26. apparet ( si Arminio fides ) filios Dei fieri rem esse liberi arbitrij, & quantuncunque id non possit fieri sine auxilio gratiæ, effectum tamen pendere ab humana voluntate. Ut iam ultro Deus homini debeat: nam quod filios habet id debebit humano arbitrio.*

XXVIII. Hic quidem nigræ est succus lolliginis & pestilentissima doctrina: de qua quid iudicandum sit facile est cōijcere ex locutionibus quæ passim in sectoriorū scriptis occurrunt. Lydiam sibi ipsi cor aperuisse: cū tamen teste Luca Actorū 16. 14. Deus Lydiæ cor aperuerit. Et hominem se ipsum discernere, quamuis Paulus dicat, *quis te discernit?* 1. Cor. 4. 7. Et hominē irregeneratū non esse prorsus in peccatis mortuum: & Deum dare homini vires credendi si velit: cum tamen Deus det ipsum velle & perficere, Philip. 2. v. 13. Et sufficientem gratiam quæ omnibus immo & reprobis datur tollere impotentiam, & libertatem arbitrij constituere, ut docet Arminius in Perkinsum pag. 245. & 246. Audiantur verba fastuosa Greuinchouij pag. 253. *Ego me ipsum discernuo: quum enim Deo ac prædeterminationi*  
*diuine*

Armin.  
234. &  
235.

*diuina resistere possem, non restiti tamen, atque in eo quid mihi liceat tanquam de meo gloriari? Quod enim potui Dei miserentis est, quod autem volui cum possem nolle id mea potestatis. Periculum est ne hic vermiculus tantopere infletur ut creper. Nempe hominis est magnanimi nolle Deo nimium debere, nec eius beneficijs obrui. Non minoris supercilij hæc sunt eiusdem authoris, pag. 279. Dices in hoc operandi modo Deum etiam quodam modo à voluntate [hominis] dependere. Concedo quoad actum determinationis libera. Hoc nimirum vnum deerat ad extremam superbiam ut Deus ab homine pendere diceretur.*

XXIX. Occurrunt quidem in nouatorum scriptis loca aliquot quibus dicunt hominem in statu corrupto esse planè mortuum, & à se ipso nihil quod verè bonum sit neque cogitare posse, neque velle, neque facere. Sed hæc dicuntur ad fucum faciendum, & ut lectori incauto palpum obtrudant. Nempe volunt hominem nihil posse boni sine gratia: Sed per hanc gratiam intelligunt gratiam vniuersalem quæ est omnibus hominibus communis, & gratiam sufficientem quæ vel ijs datur quibus Christus nunquam innotuit, & quæ æquè latè patet ac natura. Gratiam quidè dicunt causam esse credendi, sed nunquam addunt SOLAM esse causam.

Collatores Hagienfes Arminiani tertio & quarto articulis sic loquuntur quasi qui nobiscum sentiant. Ibi enim profitentur *hominem saluificam fidem non habere à se: & Dei gratiam esse principium progressum & complementum omnis boni, & omnes bonas actiones gratia Dei in Christo ascribendas esse*: Sed homines versipelles cum

dicunt hominem non habere fidem à se, intelligunt non habere à se solo: Et cum dicunt omne bonum opus ascribendum gratiæ, sedulo cauent ne dicant, SOLI gratiæ. Tum in voce gratiæ decipulam tendunt, & simiæ Pelagianorum fingunt quandam gratiam omnibus communem quæ æquè late pateat ac natura. Tum distinguunt gratiam ab usu gratiæ: nam gratiam quidem volunt esse à Deo, at vltum esse penes liberum arbitrium: Pari astu vires credendi dicunt esse à gratia. Nam mox quod porrexerunt retrahūt, dū dicūt ipsum credere esse liberi arbitrij: & dari gratiam homini per quam credat si velit. Quādocunque autem ad vniuersalem illam gratiam volunt specialem quandam gratiam accedere, huius tamen gratiæ vsum à libero arbitrio suspendunt, & ab eo efficientiam gratiæ pendere rotundè & sine circuitione affirmant.


Quin & videbimus per gratiam illam vniuersalem & sufficientem ac omnibus communem, intelligi dona naturalia & notiones naturaliter impressas, & naturam vestiri specioso nomine gratiæ: quod & faciebat Pelagius. Quod cum faciant summo artificio, nunquam tamen eorum simulatio ita est cauta quin subinde Pelagianæ auriculæ promineant: & quantumcunque veritatis sermonem imitentur, larua tamen incautis frequenter excidit: & eorum vlcera pressa foetidum pus illico eiulantur.

XXX. Hic tamen Vorstius à præceptore suo discessit: cum enim Arminius statuatur neminem actu conuerti & credere per solam gratiam vniuersalem, quæ etiam reprobis communis est, sed insuper requiri gratiam

aliquam specialem, Vorstius contra Collationis cum Piscatore pag. 57. asserit per gratiam vniuersalem, quā vocat minorem misericordiam; quosdam conuerti, id est sine speciali gratiā, quam vocat plus quam sufficientem gratiam & exuberans auxilium. Ergo, si huic creditur, per solam gratiam quæ Ethnicis omnibus communis, aliqui ad salutem perueniunt.

*Hominem irregentum planè destitutum esse viribus, & libertate arbitrij in ijs quæ ad fidem & salutem pertinent, probatur ex Sacra Scriptura.*

## CAP. XXXIII.

I.  I c si statur iudicio sacre scripturæ, nullus erit dubitandi locus. De homine irregento, & in puris naturalibus, scriptura sic loquitur, Genes. 6. v. 5. Omnis cogitatio cordis humani duntaxat mala est, omni tempore. Idem repetitur cap. 8. v. 21. Concinit Ieremias cap. 17. Præuum est cor hominis & inscrutabile. Et Rom. 3. Non est iustus ne vnus quidem, omnes deflexerunt, & inutiles facti sunt, non est qui faciat quod bonum est, ne vnus quidem. Et Rom. 7. v. 18. Scio quod in me, id est in carne mea, non habitat bonum. Et cap. 8. v. 8. φρόνημα σαρκός, id est quicquid sapit & sentit homo carnalis, inimicitia est aduersus Deum; legi enim Dei non subijcitur: nam ne potest quidem: Confer hæc cū Doctrina Arminij, censentis hominem

Ll ij



infidelem & irrogenitum habere vires sufficientes ad credendum, & ad implendam legem: Apostolus enim censet nostram carnem non modo legi non esse morigeram, sed ne quidem posse. Idem Apostolus. 1. Corinth. 2. 14. *Animalis homo non est capax eorum quæ sunt spiritus Dei: sunt enim ei stultitia, nec potest ea cognoscere.* Huc pertinet quod Scriptura Ezech. 36. dicit cor hominis esse lapideum, eoque sua naturâ ineptum & incapax ad recipiendâ impressionem legis diuinę; nisi Deuseam, ut olim, digito suo inscribat isti lapidi. Tum quod Paulus Eph. 2. vers. 1. & 5. non modo Ephesios ante vocationē, sed & nos omnes ait fuisse in peccatis mortuos. Idem habet ad Coloss. cap. 2. v. 13. Et quod Christus dicit Ioh. 14. vers. 17. *Spiritus veritatis quem mundus NON POTEST recipere, quia eum nec videt nec nouit.* Planè his verbis Christus nullum agnoscit liberum hominis arbitrium, nullas vires ad recipiendum spiritum veritatis: sed naturalem auersionem & impotentiam.

II. Quapropter immutationem hominis per Spiritum regenerationis Scriptura aliquando alteram natiuitatem, Ioh. 3. aliquando creationem noui hominis Ephes. 4. vers. 24. quandoque etiam alteram resurrectionem ex mortuis appellat. Apocal. 20. v. 6. Luc. 15. 32. Ioh. 5. 25. Non quidem quod creatio, & resurrectio sit per omnia similis regenerationi & immutationi animarum: sed in hoc duntaxat de quo hic agitur, videlicet quemadmodum cadauer non potest se ipsum disponere nec præparare ad resurrectionem, nec res nondum creata potest quidquam conferre ad

suam ipsius creationem, ita homo in statu peccati & ante regenerationem nihil habet quo se ipse disponat, aut pareat ad regenerationem & innouationem spirituales.

III. Collatores Hagienſes Arminiani pag. 279. rotundè fatentur morte ſpiritali ſeparari ab anima libertatem benè aut malè agendi. Quæro igitur an ir-regenitus inſtruetus gratia illa ſufficiente & vniuerſali, quæ etiam reprobis contingit, habeat liberum arbitrium benè aut malè agēdi in ijs quæ ad ſalutem pertinent? Si non habet, cur contra Arminiani pertendūt? Si habet, planum eſt, iſſis Arminianis fatentibus, cum non eſſe in peccatis mortuum.

Sed præcipua vis in voce naſcendi. Nam ſi in homine irrogenito eſſent aliqua ſemina & reliquæ vitæ ſpiritalis, vt cenſet Arnoldus, non opus eſſet iterum naſci, & nouum hominem formari, ſed orandus eſſet Deus vt ſcintillas illas & reliquias vitæ ſpiritalis ἀναζωοποιῇ<sup>iv</sup>, & quaſi ad motis fomites accendere & augere dignaretur.

IV. His adde loca quæ docent ſine fide non poſſe placenti Deo Heb. 11. fidemque, non eſſe omnium 2. Theſ. 3. quippe quæ eſt donum Dei. Philip. 1. 19. Ephes. 2. 8. Cum ergo quicquid ſit ſine fide ſit peccatum. Rom. 14. 23. planum eſt in rebus quæ ad Dei cultum & ſalutem pertinent, nil niſi peccari ab eo qui caret fide, quales ſunt omnes Ethnici & irrogeniti. Quo loco ad Romanos, notandum eſt Apoſtolum loqui de uſu ciborum, quibus vult nos veſci cum fide, id eſt cum certa cognitione uſum ciborum à Deo probari, & cum

eius verbo conuenire. Cum ergo etiam in rebus sua natura indifferentibus peccetur, quando eis utimur sine tali fide, quanto magis sentiendum est Ethnicos peccare in omni actione quæ ad Dei cultum & salutem pertinet, quia planè sunt destituti hac fide?

V. Eodem pertinent loca quæ docent Deum omnis boni operis quod fit à nobis, & omnis virtutis esse authorem. *Non sumus sufficientes aliquid cogitare ex nobis ipsis, sed omnis nostra sufficientia ex Deo est* 2. Corinth. 3. v. 5. & Christus Ioh. 15. v. 5. *extra me nihil potestis facere*, & ibidem comparamur palmitibus excelsis & igni destinatis, nisi Christo fuerimus insiti, per quem viuimus & fructum ferimus: Apostolus Eph. 2. v. 8. docet salutem & fidem esse non ex nobis sed ex Dei dono. *Seruati estis gratuito per fidem, idque non ex vobis sed donum Dei est: Quam procul ab Arminio qui fidei causam totalem vult esse non solam gratiam, sed gratiam & liberum arbitrium. Ac ne quis ex Arminij schola quærat effugium, & dicat, vires quidem credendi dari omnibus irresistibiliter, actum vero credendi sic adiuuari à gratia ut sit etiam à libero arbitrio, opportunè occurrit Apostolus futili subtilitati, Philip. 1. v. 29. ubi ait, Datur vobis in Christi negotio, non solum in eum credere, sed etiam pro eo affligi. Vides non solum vires credendi nobis dari, sed etiam ipsum actum, id est ipsum credere? Affine est illud Io. 6. Nemo potest venire ad me nisi pater traxerit eum: ubi venire est actu credere: non autem vires & facultatem habere credendi, quæ per liberum arbitrium ad actum reducantur. Nec minus disertum est illud Apostoli ad Philip. cap. 2. v. 13. Deus est qui in vobis operatur*

*efficaciter velle & perficere, pro suo bene placito: Velle autē est actu velle, non vero vires habere volendi. Ipse Deus Ezechielis, cap. 36. v. 27. ponam ( inquit ) spiritum meum in vobis, & efficiam ut in praeceptis meis ambuletis.* Non ergo tantum dat vires ambulandi in suis praeceptis, sed & efficit reapse ut ambulemus, & actum ipsum in nobis operatur.. Quomodo & quo vsque electi possint resistere spiritus efficaciz, postea videbitur. Satis est ad praesentem quaestionem si obtinemus, Deum non tantum dare vires quibus possimus credere, sed & dare ac perficere in nobis ipsum credere, actumque credendi.

Occurrunt quidem interdum loca quibus Arminiani dicunt non tantum vires credendi sed etiam ipsum credere actumq; credendi à Deo dari. Sed hunc actum volunt à Deo dari quatenus dat menti cognitionem & suscitatur affectus languentes qui voluntatem extimulant ad credendum, idque fieri suasionem morali, & eo modo quo mouemur ab obiectis. At hoc non est dare fidem actumque credēdi. Enimuero qui suadet & obiecta proponit & appetitum inuitat ad currendū, non dat ipsum currere, actumque currendi. Quocirca Arminiani negant fidem ipsam à Deo infundi aut cordi imprimi, sed voluntatem morali tantum suasionem & blanda illecestrationē ad credendum inuitari.

Pari fraude, ut aliquid magni Deo tribuere videantur, dicunt Deum dare vires credendi idque irresistibiliter. Sed cum deuentum est ad explicationem modi quo istae vires suppeditantur, apparet eos negare vires credendi homini dari à Deo. Non aliter enim censent has vires dari quam illustrando intellectum cognitione

didit homini prauitatem : sed nouit qui sint illi quorū vult misereri : & constat ei ratio suarum actionum , in quas inquirere non modo temerarium esset , sed & periculosum.

VIII. Paulus ad Galat. 3. vers. 26. dicit *nos esse filios Dei per fidem in Christum*. Si ergo est penes liberum arbitrium adiutum gratiā credere vel non credere , & vti gratia illa vel non vti , oportet quoque sit penes liberum arbitrium adiutum gratiā efficere vt simus filij Dei vel non simus : Quod sanè pugnat non modo cum pietate sed & cum sensu communi : nam quis vnquam effecit vt esset filius patris sui ? aut quis sibi debet aliqua ex parte suam ipsius generationem ?

IX. Idem Apostolus ad Rom. 9. *Non est volentis neque currentis sed miserentis Dei*. Per volentem & currentem , operantem intelligit , nempe ab electione , aut ( vt mauult Arminius ) à iustificatione hominis , consideratio operum excluditur , vt hoc beneficium acceptum feratur soli misericordiæ Dei. In hanc regulam peccat Arminius : Nam ex eius doctrina hominis cōuersio per fidem , ac proinde & iustitia & salus , est volentis & currentis & operantis , id est eius qui ope liberi sui arbitrij gratiā vniuersali bene vtitur , & qui ideo credit quia ad auxilium gratiæ attulit vires liberi arbitrij per quas fidē adeptus est. Nam , vt dixi , causam fidei Arminiani faciunt hæc duo coniuncta , gratiam nempe & liberum arbitrium : quo libero arbitrio vti ad fidem adipiscendam & ad se conuertendum , planè est velle & currere : debuerat ergo Apostolus dicere , *Est volentis & currentis hominis ac miserentis Dei* , vt liberum arbi-

Mm

trium cum misericordia Dei coniungeretur. Quod si, vt aptè dicit Augustinus lib. 1. ad Simplicianum quæst. 2. quia non fit conuersio & salus per solum hominis arbitrium potest dici *non esse volentis neque currentis*, cur non etiam poterit dici non esse miserentis Dei, quia conuersio non fit per solam Dei gratiam, sed quoq; per liberum arbitrium? Nihil refert quod Augustinus vsus est hoc argumento aduersus Pelagium negantem nos à gratia præueniri, habet enim easdem vires aduersus Semipelagianos adiungentes liberum arbitrium gratiæ: cum Paulus non dicat, *non est tantum volentis*, sed planè voluntatem & liberum arbitrium excludat.

X. Denique hoc Argumentum ita torfit Arnoldum p. 445. vt in nostras partes concedere velit videri, dicit enim, *non esse positum in nostra voluntate vt vocationi obtemperemus, sed hoc ipsum etiam à Dei esse misericordia*. Sed nascutus homo & vafer sibi cauit ne aliquid diceret quod suæ causæ officeret. Cum enim dicit non esse positum in nostra voluntate, subintelligit s. & L. A. Idcirco noluit dicere hoc ipsum totum positum esse in sola Dei misericordia, sed molliter & fluctuante sermone, dicit *positum esse in Dei misericordia*. Tantundem sanè poterat & debebat dicere de libero arbitrio, vt sibi ipse constaret: censet enim nec positum esse in sola Dei gratia, nec in solo libero arbitrio.

XI. Hominem verò non posse conuerti nisi Deus eum cōuertat, & conuersionis nostræ solidam laudem Deo deberi docet Ieremias cap. 31. v. 18. *Conuerte me & conuertar*: Quod & repetitur Threnorum ultimo. Pudet dilutæ interpretationis Collatorum Hagiensum

Arminianorum qui pag. 266 per *conuerti* volunt intelligi *castigari*. Nihil est in sacra scriptura tam clarum & disertum quod non possit inepta & temeraria interpretatione corrumpi. Quis Hebraïcis mediocriter tinctus nescit verbum *Shub* esse *reuertere*, non verò punire? ac proinde in Hiphil esse *efficere ut quis reuertatur*, non verò ut puniatur? Aut quis non videt quam sit ridiculum si homines obtriti ærumnis petant insuper castigari? ut si quis grauiter concisus loris petat sibi insuper colaphum infligi? Sed Ieremias ipse se explicat, & docet quid sit conuerti: addit enim *conuersus agam penitentiam, memet agnoscam*: hoc nimirum est conuerti. Cum igitur homines iam conuersi dicant *Conuerte me & conuertar*. Ierem 31. *Trahe me & curram*, Cantic. 1. & conuersionis suæ progressum soli Deo ascribant, quanto magis initium nostræ cōuersionis soli Deo tribuendum est? Nam si iam volentes fatentur se quicquid boni agunt Deo debere, nec nisi per eius gratiam posse pedem vltius promouere, quanto magis statuendum est nos non posse fieri volentes ex nolentibus & viuos ex mortuis, nisi Deo trahente, & viuificante?

XII. Ad præparationes vero euertendas, per quas sectarij censent hominem irrogenitum benè vtentem gratia vniuersali & luce naturali, se disponere & parare ad regenerationem, apprimè facit illud Dei apud Ezechielem cap. 36. *Dabo vobis cor nouum, & spiritum nouum ponam in præcordijs vestris: auferam cor lapideum de carne vestra, & dabo vobis cor carneum. Inseram Spiritum meum in interiora vestra, efficiamq; ut ambuletis in statutis meis*. Cum enim Deo ipso teste, in ijs quæ ad Dei

Mm ij

cultum & salutem pertinent homo naturaliter habeat cor lapideum & quod opus sit tolli, vt aliud à Deo detur in quod Deus imprimat characterem fidei & resipiscentiæ: liquidò apparet hominem irregenitum non posse se parare ad suam regenerationem. Quod enim tolli debet & cum alio commutari vt regenerari possimus, id sanè non adiuuat regenerationem, nec nos preparat ad eam: alioqui ipsis impedimentis adiuuaremur.

XIII. Respondet Arnoldus p. 461. hanc phrasim, cordis lapidei & carnei esse figuratam, Theologiam symbolicam non esse argumentatiuam: Respondeo figuratas locutiones vim habere propriarum quando ab ipsa scriptura exponuntur: & quando euidentis est in quem finem & quo sensu adhibeantur: At eodem loco Ezechielis multæ sunt voces simplices & non figuratæ quæ hanc figuram multa luce perfundunt: Ibidem enim Deus promittit se daturum nouum spiritum, per quem efficiat vt in vijs Dei incedant.

XIV. Quocirca differentias inter cor & inter lapidem Arnoldus abs re congerit, & superflua diligentia. Saxum non habere vitam, cor verò habere. Saxum molliri non posse sine ablatione formæ substantialis, cor posse. Saxum non posse resistere suæ emolitioni, cor posse. Omnia præter rem, vna enim in re de qua hic agitur aptissima est comparatio. nempe nō fecus ac saxum non potest se ipsum mollire, sed sola vi externi agentis id fit, ita nec cor irregenitū posse ipsum se conuertere, aut disponere ad regenerationē: sed id fieri solà Spiritus Dei efficacia: Extra hoc qui quæret comparationes inueniet infinita discrimina, vt lapi-



dem posse scalpi & cædi, ex latomijs erui, ædificio apponi, &c. cor vero non posse.

XV. Vrunt præcipuè Semipelagianos verba Pauli, quibus ait hominem in peccatis esse mortuum : loquitur autem de homine irrogenito : cuius teli cuspidem vt frustrentur & declinent, operosè congerunt discrimina inter corpus mortuum, & inter hominem irrogenitum : Quæ quidem eò pertinent vt euincant hominem irrogenitum non planè esse in peccatis mortuum, & vt ait Arr. oldus, *habere aliquas reliquias vitæ spiritualis* : Quibus reliquijs naturalibus si addatur gratia vniuersalis & sufficiens, quam volunt dari omnibus hominibus etiam irrogenitis & reprobis, per quã nemo non potest implere legem & fidem adipisci, inuenietur sanè in homine irrogenito plurimum vitæ spiritualis, & nulla aut perexigua cum mortuo conuenientia aut similitudo. Bene est ergo quod sectarij in id totis viribus incumbunt vt doceant Paulum non satis appositè locutum esse. Discrimina hæc affert Arnoldus p. 466. & 468. In resurrectione animam infundi, in regeneratione tãtum immutari. Ibi nullas præcedere dispositiones & præparationes, at regenerationem fieri post præuias quasdam dispositiones. Tũ resurrectionem fieri in instanti, regenerationem per gradus. Illam necessariò fieri, hanc manente libero arbitrio. In cadauere nullas esse reliquias vitæ, at in homine irrogenito esse quasdam reliquias vitæ spiritualis. Deum non alloqui cadauer : at Deum alloqui mortuos in peccatis, eisque verbum suum proponere. Mortuum non posse resistere suæ resurrectioni, irrogenitum posse.

Mm iij

Ego vero nōn inficior hoc simile non quadrare per omnia: Nec dubium est quin Arnoldus multa alia potuerit inuenire discrimina: vt quod resurrectio corporum fiet vltimo demum die, quod ad tubam Angeli, &c. Sed sufficit quod hoc simile apprime quadrat in eo quod caput est rei, & de quo inter nos controuertitur. Nempe in eo quod vt cadauer est inhabile ad motum, nec seipsum potest disponere nec præparare ad resurrectionem, ita anima hominis irrogeniti & in peccatis mortui, caret in spiritualibus & quæ ad salutem pertinent omni sensu & motu: nec seipsa potest ad regenerationem parare & disponere, donec spiritus regenerationis cordi illapsus cieat nouos motus, & inchoet nouæ vitæ primordia. Per sensum in spiritualibus intelligo zelum, per motum bona opera. Et sanè mihi videntur hæc pugnare, mortuum esse in peccatis, vt ait Paulus, & habere reliquias vitæ spiritualis, vt vult Arnoldus: Nam mors in spiritualibus vitam spirituales planè excludit. Esse quidem aliquas notiones veritatis & scintillas lucis in homine non regenito, & obscura imaginis Dei vestigia, vltro agnosco. Sed hæc reliquæ non sunt pars vitæ spiritualis & regenerationis: Ipsi Dæmones habent multò plus lucis, qui tamen planè sunt in peccatis mortui.

XV I. Sed neque discrimina illa quæ afferunt vera sunt omnia. Principiò, deum respicere ad dispositiones liberi arbitrij, aut hominem per liberum arbitrium se parare ad regenerationem pernegamus. Deus quidem calamitatibus & liberationibus & exemplis vltionis quam sumit de improbis aliquando viam sibi ad rege-

nerationem alicuius præstruit. Tum potest aliquis servili trepidatione, & metu pœnæ ante regenerationem vtiliter concutiri: sed assero istos motus internos tunc demum incipere esse laudabiles & Deo gratos cum producantur a Spiritu sancto: Quod cum sit, dico eiusmodi motus iam esse partem regenerationis, & primos *σπουδῆς* novi hominis, & debilia quidem, sed certa novæ vitæ initia: non verò præparationes liberi arbitrij, quæ antecedant regenerationem, & quibus Deus ad dandam ampliorem gratiam mouearur. Tantum autem abest ut Deus in inchoanda regeneratione ad prævias dispositiones respiciat, ut contra alienissimi quique à regno cœlorum vocentur, & qui sunt altioribus tenebris demersi. Exemplo sit latro in cruce: Tum Romani, Alexandrini, Antiocheni, Corinthij, Ephesij, quibus populis nullivinquâ fuerunt aut libidinis magis perditæ, aut luxus magis effœminati, aut crassioris ignorantiæ, & magis prodigiosæ idolatriæ: quos tamē tā malè affectos & dispositos Deus vocavit efficaci vocatione, & missis ad eos apostolis Christo lucratus est, ut ubi magis abundabat peccatū, magis abundaret & gratia.

XVII. Regenerationē verò non semper fieri per gradus docet exemplū latronis cōuersi, qui in extrema decursione agonis spiritualis, vno momento immensum spatium emensus est: Vicissim resurrectionem corporis posse fieri per gradus, docet Ezechiel cap. 37.

XVIII. Nihilō verius est quod dicunt, regenerationem fieri manente libero arbitrio. Nam si liberum arbitriū manet in regeneratione, oportet præcesserit regenerationem: at in spiritualibus & quæ ad salutem

pertinent nullum erat ante regenerationem liberum arbitrium.

XIX. Eiusdem farinae est, immo longè pessimum quod addunt; in homine irrogenito inesse reliquias vitæ spiritualis. Sic enim petunt quod quæritur : & quod falsum esse probauimus.

XX. Immo nec verum est quod aiunt Deum non alloqui cadauera. Christus enim affatus est Lazarum mortuum his verbis, *Lazare prodi.* Ioh. 11. Et Ezechielis 37. v. 4. Deus sic alloquitur ossa pridem arefacta, *Vos ossa sicca audite verbum Domini.* Deus vocat quæ non sunt quasi essent, sed eo ipso quod illa vocat, efficit ut sint: verba Christi in hac rem diserta sunt Ioh. 5. v. 25. *mortui audient vocem filij Dei & qui audierint uiuent.* Nam ut Deus lumine suo sic cæcos illustrat ut simul det eis oculos, sic verbo suo sic affatur mortuos, ut per illud ipsum verbum eos viuificet.

XXI. Mirificum est Collatorum Hagienſium Arminianorum acumen, qui inde probant facultatem aliquam in homine spiritualiter mortuo relictam esse : quia nos ipsi agnoscimus hominem posse resistere gratiæ. Præclare : Nempe probant hominem in peccatis non esse mortuum, quia potest resistere spiritui Dei, quasi reliquiæ spiritualis vitæ in facultate resistendi Deo positæ essent : cum contra ideo homo sit in peccatis mortuus, quia nil potest nisi resistere. Sic ergo agunt ac si dicerent hominem non esse in peccatis mortuum, quia in peccatis est mortuus.

XXII. Illud verò quod dicunt, mortuum non posse resistere

se resistere suæ resurrectioni, at irrogenitum posse resistere suæ viuificationi pro nobis facit, & nouatorum causam prægrauat. Nam inde fit mortem in peccato longè esse deteriorem, & mortuum in peccato longè arctioribus vinculis constringi, siquidem ipse suæ resurrectioni reluctatur, non modo in primordijs regenerationis, sed & in progressu. Immo illa ipsa procliuuitas ad resistendum Deo pars est mortis illius & corruptionis naturalis longè præcipua.

XXIII. Interea obseruabit lector quam artificiosa *xp̄i* utatur Arnoldus dum dicit mortuum non posse resistere suæ resurrectioni, at mortuum in peccato posse resistere suæ viuificationi. Sententia Arminianorum est, hominem irrogenitum habere liberum arbitrium, per quod potest gratia sufficiente uti vel non uti, credere vel non credere: debuerat igitur Arnoldus sic instituere suam comparisonem, dicendo, mortuum non posse impedire suam resurrectionem nec adiuuare: at irrogenitum posse suam regenerationem vel impedire vel adiuuare. Sed Arnoldus adiumenti illius mentionem hîc non facit, ad declinandam inuidiam & suspicionem Semipelagianismi: quod solent quos suæ sententiæ pudet.

XXIV. Non est silentio prætereundum id quod dicunt Arminiani Hagienfes Collationis p. 81. Ibi enim faciunt duo genera irrogenitorum: quosdam qui tanquam extra omnem vocationem positi ambulant in vanitate mentis & cogitationum suarum. Hos illi fatentur esse in peccatis mortuos: quosdam verò qui iam sunt vocati & excitati per gratiam Dei, quibus iam

Nn

intellectus illuminatus & affectus accensi voluntatem ad veritatis apprehensionem extimulāt. Hos negant in peccatis esse mortuos, quippe quibus intellectus & appetitus viuificati sunt, etsi voluntas nondum pertracta. Multa hīc absurda: 1. Primo quod quosdam censent esse irrogenitos qui iam viuificati sunt: cum tamen viuificatio & regeneratio idem sint. Nam si cuius mense est viuificata oportet quoq; esse regeneritam. 2. Pari errore ibi ponunt viuificationem vbi non est fides: cum teste Apostolo, iustus fide viuatur, & impium sit in homine infideli & irrogenito vllam viuificationem agnoscere. 3. Infelicititer verò Philosophantur cum censent intellectu illustrato cognitione veritatis & appetitibus accensis eius amore, possibile esse vt voluntas sit auersa ab hac veritate. Et viuificari hominem mente & affectibus, voluntate manente sine vita. Nam quid voluntatem auerteret quando duo ista eam instigant: cum ab his solis voluntas moueatur? nec vnquam voluntas pendeat dubia, nisi cum hinc quidem instigat ratio, illinc verò retrahit appetitus, & voluntas inter contrarias mentis & appetituum suggestiones vtro citroq; impellitur? 4. Nec vero sibi constant cum dicūt aliquos esse extra omnem vocationem positos, cum magna contentione asserant omnes homines vocari ad salutem, vocatione non modo externā, sed etiam interna: Et gratiam sufficientem omnibus administrari. 5. Deniq; quāto vnde habeant duo illa genera mortuorum in peccatis. Si ex Scriptura, ædant locum. Si ex sua coniectura, non credimus.

XXV. Arnoldus in Tilenum pag. 134. statuit fieri

posse, vt ex duobus æquali auxilio gratiæ donatis hic conuertatur ille non. Sed debebat quoque docere an fieri possit vt ex duobus æqualiter malis, & æquali auxilio gratiæ donatis, id est habentibus pariter sufficientem gratiam & vniuersalem, & pariter, vocatis Euangelio, possit fieri vt alter conuertatur alter non. Si potest fieri, quæro, vnde discrimen? an maior gratia huic data? at ipse statuit esse æqualem. An quia alter altero melior? quæstio est, de æqualiter malis; tum sic non esset huius conuersio ex sola gratia, sed ex libero arbitrio. Neque diffitetur Arnoldus: Addit enim, *Scit. Deus, qui fidem in homine operatur principaliter, fidem ab infideli discernat, quia tamen fidem & conuersionem in homine non operatur sine voluntate hominis, etiam non discernit hominem sine homine*: & paulò post addit, *hominem se discernere sua voluntate*. Audis Deum causam esse principalem fidei, & non totalem? & hominem sese sua voluntate discernere, cum tamen Apostolus dicat *Qui se discernit, hanc laudem soli Deo tribuens*? Et de duobus æqualiter vocatis, cur hic sequatur alter renuat, causam esse in vno liberum arbitrium, in altero gratiam quidem, sed cuius vsus pendet à libero arbitrio, penes quod sit gratia vti vel non vti? Ita vti tibi quidem liberum arbitrium causa sit totalis incredulitatis, hic verò causa sit partialis fidei & conuersionis? vt iam homo habeat de quo possit gloriari: & ipse se discernat: & salus sit *volentis & currentis hominis, & misereantis Dei*.

XXVI. Ergo stat immotum illud Pauli ad Titum cap. i. *immundis & infidelibus nihil est mundum, sed pollu-*


Nn ij

*ta est eorum mens & conscientia.* Loquitur autem non tantum de cibis sed & de ciborum usu, qui purus est pro puritate conscientiae: nequis putet de puritate ciborum hic agi, non verò de puritate actionum.

XXVII. Denique omnes Christianae virtutes, fides, charitas, &c. vel insunt nobis naturà, vel sunt usu & studio acquisitae: vel sunt à Deo inditae & creatae in cordibus nostris. Esse naturaliter insitas ne Pelagius quidem dicere audeat. Non esse usu acquisitas & studio, euincit exemplum latronis qui vno momento absque usu & exercitatione fidem adeptus est. Superest ergo ut à Deo sint inditae, fidemque esse ex mero Dei dono & gratia, non vero ex humano arbitrio.

*Excutiuntur rationes Arminianorum quibus asserunt liberum arbitrium in homine irrogenito circa spiritualia & pertinentia ad salutem.*

CAP. XXXIV.

I.  N doctrinam Orthodoxae Ecclesiae, quae hominem irrogenitum omni libero arbitrio in negotio salutis exuit, sultam Dei verbo & sensu ipso ac experientia comprobata Arminiani magni conatu insurgunt, & libero arbitrio in irgenitis patrocinantur.

II. Obijciunt & nullibi non ingerunt illud Pauli ad Romanos 2. 14. *Gentes quae legem non habent, naturà quae legis sunt faciunt.* Respondeo lege præcipi amare Deum ex toto corde & viribus, quod fieri non potest nisi



omnes actiones tuas dirigas ad eius gloriam, & nisi fide sis præditus, quia quod sine fide fit peccatum est: Ad harum regularum amussim quicūque exiger Ethnicorum virtutes, comperiet in honestissimis eorum factis multa desiderari, & plus inesse peccati. Hinc patet, gentes opere quidem externo facere quæ sunt legis: nec verba Pauli ulterius extendi. Forma vero recti operis, quæ posita est in intrinseca conuenientia cordis cum Dei lege, ab infidelibus & Ethnicis semper abfuit. Aliud est facere quæ sunt legis, aliud implere legem: Illud est quod ad materiam operis externam legi obsequi: hoc vero est legi morem gerere eo modo & eo animo, & in eum finem qui verbo Dei iubetur.

III. Spargunt minutula quædam: veluti Esaiæ 55. v. 1. Inuitaria Deo sitientes: id est cupidos reconciliationis cum Deo & salutis. Et Matth. 11. vocari onustos. *Venite ad me qui fatigati estis & onusti.* Per onustos autem pressi conscientia peccatorum, & gementes sub pondere designantur. Ergo, inquiunt, iam erant cupidi salutis, & conscientia peccatorum pressi antequam vocarentur, regeneratio autem est vocatione posterior: Ac proinde in irrogenitis potest esse dolor salutaris, & cupiditas remissionis peccatorum. Ego vero pertendo istos sitientes & onustos, non esse irregenitos. Nam illa ipsa cupiditas salutis & gratiæ Dei, & gemitus cōscientiæ anhelantis sub pondere peccatorum, per quem ad Christum confugere compellimur, pars est quædam regenerationis. Et initialis ille timor, (si quidem Deo gratus est) effectus est Spiritus sancti pungentis præcordia. Quid enim obstat quo minus qui

Nn iij

fitit gratiam Dei iam eam leuiter gustauerit, & quasi primoribus labris libauerit? Quid obstat quo minus qui ad Christum iubetur venire iam se moueat, & quamuis lento passu, incipiat tamen progredi? An quotiescunque Christus iubet in se credi solos non credentes alloquitur? Immo vero hæc exhortatio ad credendum & ad veniendum ad se, ad eos præcipuè pertinet quorum fides nascens & debilis cum carnis dubitationibus luctatur.

I V. Familiare est Arminianis citare verba Christi Ioh. 7. 17. *Si quis voluerit exequi voluntatem eius qui misit me, cognoscet de doctrina, an ego à me ipse loquar.* Hinc volunt effici aliquem posse exequi Dei voluntatem antequam Christum eiusq; doctrinam cognoscat. Hoc quidem est illudere scripturæ & eam torquere ad libitum. Sic enim agunt quasi Christus dixisset, *Qui voluerit exequi Dei mandata, postea cognoscet de doctrina an sit à Deo, &c.* Tū per *exequi voluntatem Dei* intelligūt, agnoscere sua peccata, Deum timere seruili metu, optare serio gratiam Dei & remissionem peccatorum: facere quæ sunt legis &c. Falsa omnia. Nam exequi voluntatem Dei hoc loco nihil est aliud quàm Christo loquenti credere: hoc enim ipsum est quod Christus subinde inculcat, hanc esse voluntatem Patris vt credamus in Filium: cui loquenti si quis credit, eo ipso cognoscit eius doctrinam esse cœlestem & diuinam. Quapropter non existimandum est prius fieri voluntatem Dei quam eius Filio credatur: Sic etsi verum est eum qui mouetur viuere, non tamen inde sequitur motum esse aliquid prius vitæ: sic ex eo quod Christus dicit.

quisquis voluerit exequi voluntatem Patris, cognoscet meam doctrinam esse ex Deo, non sequitur prius fieri voluntatem Patris quam cognoscatur eius doctrinam esse à Deo. Sitamen hic vllus ordo est temporis, oportet prius cognoscatur doctrinam Christi esse à Deo quàm ei credatur, & mos geratur loquenti. Nemo enim credit nisi quod aliquatenus cognouit. Hunc ordinem sequitur Christus Ioh. 17. 8. *Cognouerunt me à se exiisse, & crediderunt me à te missum esse.* Et cap. 14. v. 17. *dicit Spiritum veritatis non recipi à mundo quia mundus eum non cognoscit.* Prius est ergo cognoscere quam recipere.

V. Nihilo meliora sunt quæ subdit Arnoldus p. 409. *Initium sapientiæ timor Domini.* Prou. 1. Et *Secretum Domini timentibus ipsum reuelat.* Ps. 25. Ego vero pernego timorem Dei de quo hic agitur posse irrogenitis & infidelibus conuenire. Solomon dicit timorem Domini esse CAPUT sapientiæ, id est summam, & id in quo præcipue sapientia consistit, hoc enim vox Hebraïca *Reshith* apertè denotat. Timentes vero Deum quibus secretum suum reuelat non sunt irrogeniti, sed verè pii quibus largitur in dies incrementa sapientiæ & veræ cognitionis Dei.

VI. In eundem finem Arnoldus pag. 397. affert Psalmi 51. verba, *Sacrificium gratum Deo est contritus spiritus:* & Ps. 66. *Deus in contrito spiritu vult habitare:* hæc de homine irrogenito, sed qui confitetur peccata, dolet, habet initialem timorem &c. Arnoldus dici existimat: Sed aut fallit aut fallitur. Ibi enim David prolixâ confessione sua peccata lamentatus, hac se se fo-

rationem & ea quæ fiunt post regenerationem quod illa sunt imperfecta, hæc perfecta. Nempe hæ sunt duæ illæ species meritorum quibus Pontificiæ Scholæ perstrepunt, merita de congruo, & merita de condigno, sed interpolata & alijs nominibus vestita. Notabit igitur lector Arminianos ponere in homine regenito perfecta opera & perfectum amorem Dei. Sentiant enim, *regenitos posse per Spiritum Christi ita secundum legem istam vitam suam conformare ut ad eum obedientia gradum perueniant quem Deus ab illis requirit.* Hæc sunt Arnoldi verba pag. 492. Et pag. 399. post Arminium, dicit duplicem esse Spiritum : vnum qui regenerationem præparat & ad illam tendit, qui est Spiritus seruitutis ad metum, alterum qui regenerat & regenerationem PERFICIT. Arminius Resp. ad 31. Articulum pag. 164. & 165. *Non repugno isti sententiæ Augustini qua statuit hominem sine peccato esse posse in hac vita.* Præfidenter id quidem : Meliores ergo Arminiani Apostolo Iacobo sic loquente cap. 3. *in multis labimur omnes* : quo dicto se quoq; ijs accenset qui in multis labuntur. Meliores Iohanne cuius hæc est confessio : Epist. 1. cap. 1. *Si dixerimus nos peccatum non habere nos ipsos fallimus & veritas in nobis non est.* Meliores denique omnibus Apostolis qui quotidie dicebant, *Remitte nobis debita nostra.* Nec sanè mirandum est si Arminiani censent regenitos posse implere legem, cum etiam statuant legem naturæ posse impleri ab Ethnicis & irrogenitis : lex autem naturæ est ea cui Adam ante lapsum erat obnoxius : quæ obligatio ad posteros transijt. Hæc lex vetat mentiri : at scriptura quæ non

O.o

est mendax dicit omnem hominem esse mēdacem. Eadem lex iubet Deum amari toto pectore & viribus: quod quonam modo posset præstari ab irrogenitis, cum ne à regenitis quidem vnquam præstitum fuerit? Quod viuus nunquam præstitit quomodo præstaretur à mortuo? Deniq; actum est de religione Christiana, & aliud cudendum erit Euangelium, si prodigiosa hæc doctrina admittitur.

**IX.** Sed vt ad duplicem illum Dei Spiritum veniamus, Arminius & post eum Arnoldus p. 399. duos Spiritus comminiscuntur, aut potius duos actus eiusdem Spiritus: Horum spirituum alterū volunt esse omnibus hominibus communem, etiam irrogenitis, immo & Ethnicis, ad quos Euangelium non peruenit, per quem spiritum Deū agere in omnibus hominibus, & in nullo otiosum esse existimāt. Hic est ille spiritus quem vocāt spiritum seruitutis de quo Rom. 8. vers. 15. qui opponitur ibidem spiritui adoptionis qui veris fidelibus peculiaris est. Hunc spiritum seruitutis Arminiani volunt in lege esse efficacem, non modo in lege scripta, sed etiam in ea quæ naturaliter cordibus impressa est. Per hunc spiritum censent homines irrogenitos metu salutaricon tremiscere, peccata agnoscere & confiteri, gratiam Dei implorare, obsequio legis naturæ incumbere, has esse præparationes & dispositiones ad regenerationem, si modo liberum arbitrium velit vti grata vniuersali & sufficiente quæ omnibus hominibus communis est. Hæc sunt scita nouæ sectæ, multis ambagibus perplexa, & ad subtilitatis limam tenuata.

**X.** Ego vero in sacra scriptura inuenio Spiritum

adoptionis, primitias spiritus, spiritum sanctificationis; Spiritum vero Dei affixum legi, omnibus hominibus communem, nusquam inuenio. Nec potest Spiritus Dei agens in cordibus, à cognitione Christi sine summo scelere diuelli. Nec video quomodo in ijs quos Paulus Ephes. 2. dicit mortuos in peccato, remotos à vita Dei, & sine Deo in mundo, possit aut aliqua vita spiritualis, aut Spiritus Dei inhabitans corda & salutariter afficiens agnosci. Nunquam profecto Apostolus legem separatam ab Euangelio vocauisset literam occidentem, nec eam opposuisset Spiritui, si Spiritus Dei semper esset legi adiunctus, aut si Spiritus Dei sine Euangelij notitia in cordibus operaretur, & eos ad conuersionem & fidem disponderet. Nec lex est pædagogus ad Christum, nisi postquam gratia Christi nobis oblata est: tunc enim lex ad gratiam annuntiatam amplectendam terrore minisq; compellit.

2. Cor. 3. v. 6.  
Ministri noui  
testamenti non  
litera sed spi-  
ritus: nam li-  
tera occidit,  
at spiritus vi-  
uificat.

XI. Illud verò longè grauissimum quod premunt Arminiani, nec effari audent, nempe spiritum Sanctum inesse naturaliter omni homini. Nam si spiritus Dei in lege semper est efficax, lex autem naturaliter omni homini insculpta est, necesse est spiritus Dei naturaliter insit omni homini: Et sic concident, immo erunt ridicula quæcunque habet scriptura de altera natiuitate per spiritum, de creatione noui hominis, & de resurrectione spirituali. Nam quid opus est infundere nouum spiritum ad regenerationem, si iam idem spiritus Dei habitabat in cordibus irrogenitorum?

XII. Locum vero Pauli Rom. 8. *Non accepistis spiritum seruitutis rursus ad metum*, perperam & inuito

Apostolo huc trahūt. Paulus enim Spiritum Dei nunquam vocauit Spiritum seruitutis, sic enim fuisset contumeliosus in Spiritum Dei; sed tantum dicit Spiritum qui ipsis datus est non esse seruilem, & qui trepidatione seruili corda percellat. Nam *ubi Spiritus Domini ibi libertas* 2. Cor. 3. An si dicerem, nos non accepisse à Deo spiritum mendacij, idcirco dicerem aliquem Dei spiritum ad mendacium impellere? An Spiritus Dei ipse sibi est contrarius? ut alius Dei spiritus, spiritus seruitutis, alius libertatis appelletur? Planus ergo & simplex sensus verborum Apostoli hic est: *Spiritum Dei accepistis, non quidem qui conscientias vestras perterrefaciat timore seruili, qui vos habebat suspensos & anxios antequam Dei gratia & adoptio per Christum vobis reuelata esset &c.*

XIII. Non mediocriter autem allucinantur qui metum & terrorem quem lex destituta Spiritu regenerationis & cognitione Christi cordibus incurrit ponunt inter effecta Spiritus Dei. Lex enim ita recepta potest transis per cohibere furentes affectus metus pœnæ, & formare hominem ad externam quādam obedientiam: at nunquam purgabit internas sordes, aut guttam vllam instillabit veræ pœnitentiæ: quinimo potius irritabit cupiditates ex obfistentia: ut est insitum omni homini niti in vetitum, & vbi-cunque proposita est spes impunitatis, ruptis repagulis tantò impotentius lasciuire quanto arctiori fræno cohibebatur. Hoc nempe est quod vult Apostolus ad Rom. 7. vers. 5. & 8. *Affectiones peccatorum per legem ipsam vigere in membris nostris, & peccatum occasione*


*sumpta, per ipsum mandatum gignere cupiditatem. Idque donec lex Spiritus vitæ qui est in Christo Iesu liberet nos à lege peccati & mortis; ut dicitur cap. 8. vers. 2. id est donec potens efficacia spiritus viuificantis quem habemus à Christo nos eximat à seruitute illa peccati mortiferi.*

XIV. Leuiculum est quod obijciunt, corruptionem hominis irrogeniti comparari somno, & vlceri. Fateor comparari somno, sed lethali, & à quo homo sese nequit expergefaceret: vlcus autem & liuor de quo Esaïa 53. & 1. Petri cap. 2. non ipsa peccata sed pœnas significat. Ergo nihil hoc ad reliquias vitæ spiritualis in irrogenito.

---

*Soluantur obiectiones quas Arminiani à Pelagianis & Pontificiis mutuuntur. An homo irrogenitus necessario peccet: & an necessitas excuset peccantem. Et an Deus iubeat quæ non possunt ab homine præstari.*

CAP. XXXV.

I.  Is spinis auulsis quæ aditum obstruebant, veniendum est ad declamationes potius quam ad argumenta quibus causam nostram odiosè prægrauant. Dicunt per nostram doctrinam hominem irrogenitum nihil nisi peccare, & necessariò peccare. Non esse peccatum quod necessariò fit, & vitari non potest. Arminius in Perkinsum pag. 106. *Peccandi necessitas & immutabilitas excu-*

O o iij



fat à peccato, & a pœna eximit actus illius patratiōem. Et Arnoldus pag. 388. *Neccēssitas excusat a peccato.* Frustra iuberi si impossibile est obsequi. Deus (inquit Arnoldus pag. 443.) *nihil a nobis exigit ad quod vires sufficientes non det.* Immo; inquit, *si Deus peteret ab homine aliquid, nec daret vires sufficientes ad observandum, colligeret ubi non sparsit.* Eadem ingerit Vorstius pag. 28. collationis cum Piscatore.

II. Hanc Pelagianam crambem nobis reponunt sectarij, & millies eadem occinunt, quæ necesse est accurate perpendere, quamvis ad pompam magis & ad perturbanda ingenia debilia hæc iactent quàm quòd ita sentiant.

ἡ τὴν δὲ ἐκ τῆς  
ἀδυναμίας τῆς  
ἀνθρώπου, ὡς  
ἀφ' ἧς μὴ ἐξ ἑαυτοῦ  
τοῦ πνεύματος μὴ  
δὲ καὶ τοῦ ἐκείνου,  
ἀλλ' ἐκ τῆς ἐξουσίας  
τοῦ θεοῦ.

III. Principiò statuimus necessitatem peccandi non excusare à peccato, si est voluntaria: tum si est peccantis culpa contracta. Sic Aristoteles Ethicorum 3. cap. 7. dicit iniustis & intemperantibus initiò licuisse talibus non esse: sed postquam sua voluntate tales sunt facti, non posse amplius tales non esse: nec ideo tamen excusari. Quin & dicit probrosum esse si quis ex ebrietate cæcitatem contraxerit. Quod si ita est in vitijs corporis, in quæ cum quis vitio suo incidit cuperet non incidisse, & magno pretio id vellet redemptum: quanto magis in vitijs animi, quæ cum sunt habitu aut generatione contracta, amantur ab eo qui voluntariè malus est? In hoc enim posita est maxima pars morbi, quod vitiosus amat sua vitia, nec vult emēdari. Neccēssitas enim quædam est voluntaria, ac proinde libera: nec satis est talem necessitatem dicere esse spontaneam, cum etiam pecudes ductæ instinctu sponte sua agantur; & sine

cognitione: at qui necessariò malus est, non modo sponte est malus, sed & volutariè, quia cum iudicio & cognitione. Sic Deus necessariò bonus est, sed tamen liberè: & Satan necessariò malus est, sed liberrima voluntate: Et Sancti in cœlo liberè boni sunt, & tamen necessariò: neque enim credibile est eos glorificatione libertatem amisisse. Neque vero dici potest Sanctos in cœlo ideo non posse peccare quia nulla ibi est peccandi occasio, nulla tentatio: nam neque Angeli ante lapsum plus habuerunt occasionis peccandi. Ex ipsis Dei donis quibus abundè erant instructi ceperunt occasionem sese plus æquo amandi, & per id segniore facti sunt ad contemplationem Dei, hærentes in admiratione sui, vnde superbia, & ex superbia rebellio. Alio fundamento nitatur oportet necessitas perseuerantiæ sanctorum, nempe electione Dei: qui quos prædestinavit ab æterno & dedit Christo, instruit donis & medijs necessarijs ad perseuerandum in eo statu ad quem sunt destinati. Adde quod certa quædam est visio Dei, ad quam cum creatura admittitur, necessario transformatur in Dei similitudinem: non secus ac cum speculũ ad solẽ inardescit: De qua visione Ioh. 1. Epist. cap. 3. *similes erimus quia videbimus eum sicuti est.* Et Psalmo 17. vers. 15. Denique si iniuste punitur qui peccat necessariò, quãuis peccet volutariè, & peccandi necessitatem sua sibi culpa contraxerit, iniuste quoque cumlabitur bonis & gloria qui non potest peccare, & qui necessariò bonus est; quales esse Angelos, & sanctos in cœlis probauimus.

IV. Quocirca Augustinus pusculus in locis non du-

bitavit dicere inesse homini peccandi necessitatem. Sic disputatione 2. contra Fortunat. *Postquam homo libera voluntate peccavit, nos in necessitatem præcipitati sumus qui ab eius stirpe descendimus.* Et libro de perfectione iustitiæ ratioci. 9. *Quia peccavit voluntas, secuta est peccantem peccatum habendi dura necessitas.* Ab eo dissentit Arminius, cuius hæc sunt verba in Perkinsum pag. 106. *impossibile est ut quod quis liberè facit id necessario faciat.* Immo pag. 144. audet pronuntiare Deum omni sua omni potentia non posse facere ut quod necessario fit liberè fiat. Huic enim homini ut familiare est fingere leges diuinæ iustitiæ, sic & fingere limites Dei omnipotentia.

Pag. 106. in  
Perkinsum.

Quod si Deus necessario bonus est, non vero liberè; ut censet Arminius, & longè præstantius est bonum esse liberè quam non liberè, homo proculdubio erit melior Deo, & subscribendum erit Senecæ blasphemix, qui Epistola 53. dicit sapientem antecedere ipsum Deum, quia hic sapiens est naturæ beneficio, at ille suo. Quemadmodum igitur Deus liberè bonus est, & tamen non potest esse non bonus, & Satan necessario malus est, sed liberè & voluntariè, ita & homo in peccatis mortuus necessario peccat, attamen voluntariè, eòque liberè.

Idem habet  
p. 398. —

V. Qua in re tanta est vis veritatis ut incautis frequenter excidat, hanc enim necessitatem peccandi Arnoldus insciens ne an de industria, agnoscit pag. 394. ubi dicit post Arminium, *hominem sub statu peccati nihil quod verè bonum sit posse intelligere, velle, facere: & hinc quidem eum necessario peccare, nisi Deus gratiose istam* NECES-

SITATEM.

SITATEM tollat. Fatetur ergo ab homine peccari necessariò antequam Deus necessitatem istam peccandi tollat: & ab homine peccari necessariò, & iam cum peccat liberè. Nam ne quidem ( fatente Arminio ) peccatum esset nisi liberè peccaretur: At fortassè Arminius & Arnoldus censent Deum ab omnibus hominibus tollere peccandi necessitatem: audiamus ergo quæ Arnoldus ibidem subiicit: *Arminius* ( inquit ) *statuit Deum paratum esse quod ad sese tollere istam peccandi necessitatem:* quibus verbis non obscurè fatetur Deum eam non tollere ab omnibus, sed paratum esse tollere si modo velint, sed ne tollat ab omnibus per nos stare, vt ipse Arnoldus agnoscit pag. 398. Idem p. 395. dicit post Arminium, *Deum paulatim per gratiã Spiritus sui liberare ista peccandi necessitate*: non ergo statim tollitur, immo manet perpetuò in illis in quibus Spiritus sancti gratia aut non operatur aut non præualet. Idem p. 406. agnoscit inesse homini impotentiam resistendi peccato: at hæc impotentia quid aliud est quam peccandi necessitas?

VI. Quid quod Arminiani dicunt Deum quosdam irresistibiliter obdurare, vtor enim eorum verbis: At nihil est euidentiùs quam necessariò peccari ab eo qui irresistibiliter obduratus est: habemus ergo ex confessione sectariorum quosdam qui peccant necessariò, & quos peccandi necessitas à peccato non excusat, quia sua sibi culpà hanc necessitatem contraxerunt.

VII. Mirum est igitur quod Arminiani, alioqui ingeniosi, in hanc festucam impegerint, & maluerint Pelagio patrocinari, & ab eo arma mutuari, quàm cedere scripturæ & veritatis euidentiæ. Eodem enim

modo disputat Cælestius Pelagianus apud Augustinum libro de perfectione iustitiæ Ratio. 2. *Iterum* (inquit) *querendum est: peccatum voluntatis an necessitatis est? Si necessitatis, peccatum non est. Si voluntatis est, vitari potest.* Ergo in Arminio habemus rediuuium Pelagium.

VIII. Statuimus igitur peccandi necessitatem excusare à peccato, si qui peccat hanc peccandi necessitatem suâ culpa non contraxerit. Tum si per necessitatem intelligatur coactio, & vis maior agentis extrinseci, aut necessitas Physica ad vnum determinata à Creatore, destituta cognitione, qualis est inclinatio naturalis grauium ad centrum. At necessitas non excusat peccatum, si peccans sibi ipse contraxit peccandi necessitatem: & si sciens & prudens peccat, & ista ad peccandum propensione delectatur.

IX. Illud vero quod dicunt sectarij, non esse pœnæ locum si homo caret libertate arbitrij, admitti potest, si per libertatem arbitrij τὸ ἐκούσιον siue spontaneum intelligatur, Quo sensu multi veterum, precipuè vero ante Augustinum, defendunt libertatem arbitrij: quicumq; enim peccat, sponte peccat. At si per libertatem arbitrij intelligatur τὸ ἰσόρροπον, & inclinatio pariter libera vel ad bonum vel ad malum in ijs quæ pertinent ad fidem & salutem, pertendo hominem dignum esse pœna, quantumuis careat hac libertate. Satis est ad pœnam quod non modo spontè peccat, sed etiam voluntariè, & quod sibi ipse necessitatis peccandi causa est; & quod ipse sibi plaudit & placet in hac necessitate voluntaria.

X. Instant tamen sectarij, & asserunt frustra iuberi

si non est penes nos obsequi: inanes esse exhortationes, promissiones, minas, consilia, si nihil horum potest nec percipi ab homine nec præstari: perinde enim esse ac si furdo caneretur fabula: aut si quis iuberet cæcum videre, aut compeditum currere: aut si quis nuda ossa mortuorum sic compellaret, conuertimini, <sup>collat.</sup> conuertimini & videte. Vetus hæc est obiectio <sup>Hag. p. 288.</sup> Pelagianorum, vt videre est apud Augustinum lib. de perfectione iustitiæ, rat. 6. & 11. vbi Cœlestius Pelagianus sic disputat. *Iterum quarendum est utrum præceptum homini sit sine peccato esse. Aut enim non potest & præceptum non est, aut quia præceptum est potest. Nam cur præciperetur quod fieri omnino non posset? Et Rat. 11. Tamen illa omnia quæ prohibita sunt vitari possunt quàm quæ præcepta sunt perfici. Nam frustra aut prohiberetur aut iuberetur quod vel caueri vel impleri non posset. Hic quidem purus putus est Arminianismus. Hanc obiectionem Cœlestius sumpsit ex Cicerone, teste Augustino lib. 5. de Ciuitate Dei cap. 9. vbi dicit Ciceronem dum negatione diuinæ præscientiæ vult homines facere liberos, fecisse sacrilegos.*

XI. Ad hæc respondeo frustra fore præcepta, minas, consilia &c. si homo careret facultate intelligendi & aliquid volendi aut nolendi sponte & cum ratione ac iudicio. At homo irrogenitus præditus est intelligentia, & habet voluntatem quæ suapte impulsu & sponte mouetur, & post præuiam cognitionem ac iudicium practicum. Nec semper verum est frustra dari præcepta quæ non possunt impleri. Sic intemperas qui cōsuetudine callum obduxit, nec potest sibi tempera-

Pp ij.

re à libidine aut crapula, cōsuetudine versa in naturam, sobrietatis tamen & temperantiæ legibus constringitur. Nec dubium est quin diabolus necessario malus, & inhabilis ad obsequendum Deo, teneatur Deo obsequi, alioquin equidem peccaret dum Deo aduersatur. Sic à debitore qui grandem pecuniam scēori sumptam aleā decoxit, non frustra nec iniuste exigitur quod debet, nec per debitoris scelus creditor ius suum potest amittere. Cum ergo homo suā sibi culpa contraxerit impotentiam præstandi quod Deus vult, non frustra nec iniuste Deus ab eo postulat obedientiam quam debet. Non enim æquum est vt peccatum hominis ei profit, & ideo sit exlex quia ipse se suo scelere corripit, & sibi attraxit impotentiam soluendi Deo debitum naturale. Quod quidem Deus exigit ab homine considerato non vt peccatore, nec etiā vt iusto, sed simpliciter vt debitore, & quatenus est creatura obnoxia & astricta obedientiæ. Eodem planè modo quo creditor reposcens æs creditum, non considerat debitorem qua pauper est, nec qua diues, sed simpliciter qua debitor. Hoc modo Deus legem ferens considerat hominem: & quando adiicit promissiones & minas legi, dicendo *Fac & viues, & elige bonum vt viuas*, &c. *& facite vobis cornouum, curenim moreremini, domus Israel?* Ezech. 18. Fallitur sanè, fallitur quisquis putat Dei præcepta esse mensuram nostrarum virium, cum sint regula officij. Non enim in lege discimus quid possimus, sed quid debeamus: nec quid nunc possumus sed quid olim potuerimus, & quanto iustitiæ culmine per lapsum Adami simus deuoluti.

XII. Hanc ad rem Scriptura validissimas probationes suppeditat. Paulus ad Philip. cap. 2. v. 12. iubet nos cum timore & tremore salutem nostram conficere: mox tamen ne inde putetur hoc à nobis posse præstari quia iubetur, subiicit, *Deus est qui efficit in vobis ut velitis & ut perficiatis pro gratuita sua benevolentia.* Ezechielis 18. vers. 31. *Facite vobis cor novum, & spiritum novum.* At ne quis putet hoc esse nostri arbitrij, eiusdem Prophetæ cap. 36. Deus sic loquitur, *Auferam cor lapideum de carne vestra, & dabo vobis cor novum.* Et Ioëlis 11. *Conuertimini ad me ex toto corde.* At fidelis conuersionem esse diuini muneris agnoscit, Ier. 31. vers. 18. *Conuertere me Domine & conuertar,* Et Threnorum ultimo *Conuertere nos Iehoua, & conuertemur.* Sic Deut. 10. v. 16. Deus sic affatur populum, *Circuncidite præputium cordis vestri.* At cap. 30. vers. 6. declaratur quis istud perficiat, *Dominus Deus tuus circuncidet vobis corda vestra.* Christus iubet in se credi Ioh. 14. vers. 1. Idem tamen dicit neminem posse ad se venire nisi Pater traxerit eum: Ioh. 6. 44. per *venire* autem intelligi credere ipse docet vers. 35. *qui venit ad me non esuriat, & qui CREDIT in me nunquam sitiet.* Et Philip. 1. & Ephes. 2. docemur à Deo esse fidem actumq; credendi. Deniq; scriptura vult homines sudore & labore manuum panem lucrari: nihilo secius tamen iubemur panem quotidianum à Deo petere, quia victus corporis donum Dei est, sed quod dat operanti; Dei enim benedictio non superuenit otio nostro sed labori. Ne multa, nonne Deus perfectam obedientiam postulat ab irrogenitis, immo & ab Ethnicis quibus Christus nun-



quam innotuit ? Quos tamen si quis diceret posse esse perfectè iustos & prorsus sine peccato, tribueret infidelibus quod ne fideli cuiquam vnquam contigit. Nonne Arminius ipse agnoscit quosdam irresistibiliter indurari, à quibus tamen Deus postulat perfectam obedientiam?


XIII. Nec tamen idcirco Deus incassum iubet, aut inania sunt eius præcepta: Nam Deus iubendo, hortando, minando, afficit hominem sensu peccati. Docet quid homo debeat: quid aliquando potuerit, & unde exciderit. Tum regulam iustitiæ proponit, ne quis peccatis suis obtendat ignorantiam. Denique verbo suo adiungit spiritus efficaciam, eumque quasi præpilat & acutum reddit ac efficax. Non frustra iubetur compeditus curere, si per illud ipsum mandatum cornipedes eius soluuntur. Non frustra præcipitur cæco ut videat, si illis ipsis verbis quibus hoc iubetur, aperiuntur cæco oculi. Verba enim Dei id efficiunt in nobis quod iubent à nobis effici. Sic imperât ut simul operentur, quemadmodum in creatione. Deus iubet quod vult, sed & dat quod iubet: & vtilè est homini premi intolerabili pondere legis quæ eius vires excedat, ut oblata in Christo remedia cupidius amplectatur. Præclare Augustinus in hanc rem libro de correptione & gratia, cap. 3. *O homo in correptione cognosce quid debeas agere: in correptione cognosce tuo te vitio non habere: in oratione cognosce unde accipias quod vis habere.* Et libro de spiritu & litera, *Deus legis suæ præcepta non humanis viribus metitur, sed ubi iussit quod rectum est, gratis implendi facultatem dat suis electis.*

XIV. Similia verò quibus vtuntur sectarij ad conflandam nobis inuidiam, planè sunt aliena, nec ad rem. Dicunt frustra obiurgari cæcum quod non videat, etiamsi oculos ipse sibi cruerit, & eū qui manus ipse sibi amputauit frustra vrgeri ad opus. De cæco respondeo, exemplum hoc parum appositè ab eis adferri, nam nemo cæcus, siue sua culpa sit cæcus siue alienà, tenetur ad videndum: at qui factus est improbus sua culpa, & impotens Deo obsequi, tenetur tamen ei obsequi: functiones naturales vbi cessauerint nemo tenetur eas exercere: at obligatio qua creatura suo Creatori astringitur nulla occasione, multo minus scelere hominis potest expungi. Quid quod si cæcus aliquis mallet cæcus esse quam videns, & respueret oblata remedia, merito obiurgaretur? Talis est hominis conditio in statu peccati, nam non solum necessario malus est, sed ne quidem vult esse bonus, & sua prauitate delectatur.

XV. Iisdem vitijs laborat simile eius qui vltro sibi manus amputauit. Quibus hoc addendum est, quod manus possunt amputari; at voluntas quæ hic per manus designatur amputari nō potest: pessimus enim quisque præditus est voluntate qua semper tenetur Deum colere & amare, quantuncunq; eam corruperit. Deniq; similia rerum naturalium & ciuiliū vt plurimum ad moralia & ad religionem perincommodè & absurdè trahuntur. Parè ratione diluitur simile ridiculum hominis alloquentis ossa nuda: Non enim tenentur hæc ossa se mouere: at homo irrogenitus tenetur credere & obsequi.

XVI. Arnoldus pag. 136. hæc habet, *Videmus* (in-

quit) *Scripturam* saepe dicere eum qui credit & conuertitur se ipsum à malo separare, purgare, viuificare, sanctificare, saluare, circumcidere, cor nouum sibi facere, hominem nouum induere, &c. vnde colligit posse etiam dici hominem se ipsum discernere, vtcunq; Paulus dicat, *Quis te discernit*, supple, *nisi Deus*? Loca vero quibushoc probat notata in margine hæc sunt. Ezech. 18. 31. *Facite vobis cor nouum, & spiritum nouum.* Iacob. 1. vers. 27. *Religio pura est seruire se impollutum ab hoc mundo.* 1. Petri 1. vers. 22. *iubemur purificare animas nostras, & 2. Tim. 2. 21. Si quis se purificat vas erit sanctificatum ad honorem* Luc 17. 33. *Quicumque perdet animam viuificabit eam.* Deuter. 10. 16. *Circumcidite præputium cordis vestri.* Quæ loca omnia sunt extra rem, non enim dicunt id quod Arnoldus eis affingit, nempe hæc à nobis fieri, sed tantum iubent vt fiant: & miror quomodo homini acris ingenij & acuti tanta supinitas obrepserit. Immo si hæc loca diceret hominem sibi ipsi dare cor nouum, se ipsum sanctificare & viuificare ac saluare, non inde fieret hæc fieri nostro libero arbitrio; familiare enim est scripturæ dicere ea à nobis fieri quæ Deus per nos facit: Sic homo aperit Deo pulsanti Apoc. 2. 20. Sic Apostoli suscitabant mortuos: Sic pastores remittunt peccata Matth. 18. Ioh. 21. Sic saluant animas 1. Tim. 4. 16. cum tamen sine scelere non possint arrogare sibi titulum Seruatorum animarum.



*De Vocatione externa & interna, & an vna  
possit esse sine altera.*

## CAP. XXXVI.

I.



VAMVIS Dei opera quæ circum-  
quaque oculis nostris obuersantur  
abundè testentur, & penè inuitis  
ingerant potentiam Dei infini-  
tam, bonitatem & sapientiam: sub-  
lustris tamen est hæc lux & tene-

bris propior, præ luce verbi Dei, quo Deus non mo-  
do nobis fidem facit de sua omnipotentia & maie-  
stàte, ac prouidentia, sed & nobis reuelat suam vo-  
luntatem. Enimvero contemplatio creaturarum  
non tãgit homines sensu peccati, nec indicat homi-  
ni viam salutis & reconciliationis cum Deo. Quini-  
mo nulla potest esse salutaris contemplatio naturæ,  
nisi verbo Dei quasi specillis admotis distincta no-  
bis appareant, quæ in dubia luce & exolescentibus  
characteribus ægre legebantur. Tum demum cœ-  
lum vt vestibulum paternæ domus filialibus oculis  
contemplamur, postquam Deus verbo suo a men-  
tibus nostris caliginem dispulit, & paterni sui amo-  
ris certa monstrauit indicia.

II. Porro etsi cognitio creaturarum non sufficit  
ad salutem, gentes tamen quæ nullo alio quam na-

Qq

turæ magisterio instituuntur in eo sunt inexcusabiles, quod non vtuntur his, quantumlibet paruis adminiculis, quo vsq; possunt: & quod naturales *σωτηρίαι* & scincillas honestatis & æquitatis ipsis naturaliter inditas suffocare aut deprauare conantur. Quapropter ij demum sub creaturis magistris ad pietatem proficiunt, & conscientiæ aculeis ad Deum excitantur, quos Deus verbi sui prærogatiua dignatus est.

III. Non tamen ij omnes quorum aures pulsantur verbi præconio perueniunt ad salutem: sed ij demum in quibus prædicatio Euangelij altè sedens & penitus admissa immutauit eorum corda, & mentem celesti luce perfudit. Et hi quidem salutare effectus non debentur eloquiæ humanæ ad persuadendum cõparatæ, sed occultæ efficaciz Spiritus sancti, qui verus est doctor animarum, & digitus ille Dei insculpens legem Dei tabulis lapideis cordium. Inde est quod Euangelium gladius *δισκος* & malleus frangens lapidem, & brachium Dei, & potentia Dei ad salutem in Scriptura appellatur. Sine qua Spiritus sancti efficacia, prædicatio est litera mortua, & sonus incassum aures feriens, ad id tantum efficax vt grauior sit auditoris contumacis & rebellis condemnatio.

Hinc oritur duplex vocatio, altera externa, quæ fit promulgatione externa Euangelij: alia interna quæ fit attractione potenti & immutatione cordis per Spiritum sanctum, per quem verbum fit efficax. Hæc interior immutatio constat duabus partibus, illu-

stratione mentis, & immutatione voluntatis: quarum hæc quidem est posterior tempore sed potior dignitate: vsque adeo vt illustratio mentis sine renouatione cordis cedat in maiorem condemnationem Hæc interior immutatio, in Scripturis, conuersio, regeneratio, noua natiuitas, creatio, & resurrectio nuncupatur.

IV. Hic vero nobis res est cum Arminianis, & non mediocris controuersia. Statuunt enim, verbum quandocunque & apud quoscunque prædicetur, nunquam destitutum esse sua virtute viuifica, nec quenuquam extrinsecus vocari quin trahatur intrinsecus: Ideoque distinctionem illam vocationis in externam & internam aspernantur. Verba Arminij in Perkinsum p. 57. hæc sunt. *Verbū est inuile extra Spiritum sanctum, quare iunctam sibi semper habet Sp. sancti cooperationem.* Idque dicit, immemor eorū quæ paulo ante dixerat: vbi loquens de verbo & cooperatione Spiritus sancti dicit, *hæc duo penè semper coniungi: non ergo semper.* Nec diffitetur Arnoldus Arminium in eo hæsitasse. Sic enim loquitur p. 432. *dubitari potest an Arminius senserit semper & erga omnes auxilium internum spiritus iunctum esse externo præconio* Sed quod Magister timidè & dubitabundus dixit, id ab eius discipulis apertè & sine circuitione affirmatur. Arnoldus enim cap. 4. Arminium vult trahere in hanc sententiam; *vocationem externam nemini contingere sine interna* & pag. 433. *Sententia Arminij est Spiritus sancti efficaciam adesse omnibus qui primò vocantur.* Arminiani in epistola aduersus Valachrianos pag. 46. in

eo multi sunt ut doceant, *in iis ipsis qui non conuertuntur verbum spiritui viuifico non esse destitutum* Hanc vim viuificam annexam esse non modo prædicationi Euangelij sed etiam legis docet Arnoldus pag. 464. & hanc mutationem fieri à Spiritu per verbum legis preparatorie, per verbū Euangelij consummatorie, idque ita ut homo illum sensum non possit non recipere, eoque non affici, & ad hanc actionem Spiritus planè passivè se habeat Ex quo sensu vult spiritum elicere assensum, salua tamen libertate voluntatis. Hunc Spiritum sanctum operantem in cordibus per cognitionem legis ponit Arnoldus etiam in infidelibus & non regnitis: qui etsi non sit Spiritus regenerationis, tamen ad regenerationem disponit.

V. Hæc doctrina pugnat non modo cum sacra Scriptura, sed etiam cum experientia & sensu communi. Videmus enim multos verbi auditores, nihilo plus affici prædicatione, quàm si surdis occurrerentur documenta; quorum animus aliò peregrinatur, nec unquam redit: tanto stupore hebetes ut nullum gustum habeant Euangelij nullum sensum nec assensum: quamvis ad cætera non tardi. Quin & plurimi sunt qui ut primùm audiuerunt Euangelium, excipiunt illud sannis & multo risu quasi rem absurdā: ut Athenienses Act. 13. 32. Christus enim prædicatus scandalum est Iudeis stultitia Græci: quia illi offenduntur, hi rident. Vidi qui rogati quid ex prædicatione retulissent, mandassentque memoriæ, seriò respondebant se ne quidem potuisse discernere Gallicène an Latinè concionator esset locutus.

VI. In talibus, immò & in infidelibus sola lege imbutis, Arminiani volunt spiritum Dei operari, & eis necessario & ( vt loquuntur ) irresistibiliter, dare sensum veræ doctrinæ, etsi non dat assensum nisi opeliberi arbitrij. Multò magis igitur in Arminiana plebe nemo erit qui non trahatur Spiritu sancto, & qui non sentiat in se spiritum viuificantem. Hæc *μετεωρολογία* à fanatico Anabaptistarum enthusiasmo non multum distat, nisi quod Anabaptistæ volunt sensum illum suis esse peculiarem. At Nouatores volunt communem esse fidelibus & infidelibus: denique omnibus quibus annuntiatur Euangelium vel lex sine Enangelio.

VII. Loca Scriptura ad euertendam hanc hæresim cogerere nihil attinet. Huc enim pertinent loca omnia quæ capite 34. attulimus ad probandum hominem irrogenitum & infidelem inhabilem esse ad omne opus bonum, & vtile ad salutem, quæ omnia falsa essent si in infidelibus & irrogenitis inhabitaret vis viuifica Spiritus sancti, & si omnes homines traherentur intrinsecus, & vocatione interna.

VIII. Huc faciunt loca quæ docent eos dē munt venire ad Christum quos pater trahit: Ioh. 6. v. 44. At iuxta Arminium omnes trahuntur, & intrinsecus afficiuntur à Spiritu sancto. *Vt ventus spirat quocunque vult ita & spiritus* Ioh. 3. v. 8. non ergo spirat vbique. In turba populi, Lydiæ præ cæteris cor Deus aperit. In consternatione Apostolorum latro credit interfurentis populi clamores & tot impedimenta credendi. Vna Christi vocula Matthæum permouit vt

Qq iij



telonio relicto Christum sequeretur: cum Capernaitæ inter tot miracula & documenta, occalluerint ad Euangelij præconium. Vnde apparet quosdam tractos esse spiritus efficacia, quosdam relictos in prauitate naturali. Vnde hoc discriminē? Si ad dignitatem respicitur, æquis inter homines irregenitos nō est indignus gratia Dei, cum omnes sint corde lapideo, & in peccatis mortui? Si verò ad præcedentē dispositionem, cur Capernaitæ potius sunt vocati per Euangelium quam Tyrij, cum Christus testetur Capernaitas prius fuisse affectos & minus propensos ad pœnitentiam?

IX. Arnoldus pag. 445. contendit ideo cor Lydiæ apertum fuisse quia bene erat affecta & disposita, & ideo Deum cor eius aperuisse quia ipsa sibi aperuit. Ibidem enim vocari *οὐκοῦν τὸν θεόν* Dei cultui additam, antequam Paulo credidisset. Possem dicere plurimos Deum colere prauo cultu & illegitimo. Sed pronior sum in hanc sententiam ut credam Lydiam Iudaicam feminam ante prædicationem Pauli præditam fuisse spiritu regenerationis, & veram pietatem imbibisse, & in Messiam promissum credidisse, quamuis Iesum Mariæ filium esse Christum adhuc ignoraret, quia ei nondum annuntiatus fuerat. Talis Eunuchus ille Candaces & Cornelius qui vocatur Act. 10. & cuius orationes ac eleemosynę pietasque laudantur, antequam de Christo quicquam inaudiuisset: hi erant de illis qui ut ait Lucas cap. 2. v. 25. *expectabant consolationem Israël*: quos nefas puto aggregare infidelibus, aut cæteris Iudæis

qui in Christum blasphemabant & loquentem aspernabantur. Cum ergo talis esset Lydia, Deus eius cor aperuit ut attenderet ad verba Pauli, & ab eo disceret, Christum quem expectabat iam aduenisse: & impleta esse quæ de eo à Prophetis sunt prænuntiata.

X. Aduersus hæc Arminiani afferunt argumenta quædam, sed ita leuia ut solo halitu diffidentur. Arminius in Perkinsum p. 57. dicit Stephanum Actorum 7. v. 51. exprobrare Iudæis eos semper Spiritui sancto obniti. Hinc vir acutus colligit hos Iudæos rebelles affectos fuisse intrinsecus Spiritu sancto. Sed sequentia verba demonstrant quid sit resistere Spiritui sancto, addit enim Stephanus, *quem Prophetarum non sunt persequuti patres vestri?* Nimirum persequi prophetas loquentes afflatu Spiritus sancti, & Spiritui loquenti per eorum ora obniti, hoc verè erat resistere Spiritui sancto.

XI. Fateor esse quosdam qui contumelia afficiunt spiritum gratiæ, de quibus loquitur Apostolus ad Hebr. cap 10. v. 29. & qui internæ suggestioni Spiritus sancti reluctantur. Sed ibi Apostolus loquitur de paucis quibusdam qui amplexi Euangelium cum gaudio, & accepto aliquo gustu verbi Dei, mox obstinato animo & data opera Deo terga vertunt, & gratiam cum indignatione expuunt, & *ultra peccant post acceptam cognitionem veritatis, ut dicitur vers. 26.* Quos esse eosdem cum iis qui peccant in Spiritum sanctum hinc apparet, quod Apostolus ibidem eorum salutem dicit esse conclamatam, & negat pro

*eorum peccatis ullam reliquam esse hostiam, aut spem reconciliationis ullam superesse. Sed hoc conuenit paucissimis quibusdam, non verò omnibus quibus vellex sola vel Euangelium cum lege innotuit, quos omnes introrsum aglā Spiritu sancto, & sensum veræ doctrinæ eis imprimi docent sectarij. Neque putato dona Spiritus quæ istiusmodi homines acceperūt, esse dona regenerationis, aut spiritum adoptionis, aut veram ac germanam fidem ac iustificantem, sed tentamenta quædam Spiritus pulsantis præcordia: ad cuius suggestionem voluntas leui quodam æstu calefacta magis quàm accensa tantisper adhæsit Euangelio, donec torpentes appetitus sentientes sibi bellum indici, maiori se conatu erexerunt, & pietatem ἐπιπολεύσαντες, corde excussam verterunt in odium: & per ipsa pietatis incitamenta occultum virus vehementius erupit.*

XII. Arminius ibidem nutantem causam loco Esaia quasi tibicine suffulcit, Esaías cap. 55. v. 11. hæc habet. *Sic erit verbum meum quod egredietur ex ore meo, non reuertetur ad me vacuum, sed faciet quod volo & prosperabitur in his ad quæ misi ipsum.* Hoc nimirum est acutem tangere. Mens Esaia plana est: dicit enim promissiones & minas verbo Dei propositas executioni mandatas iri, neque quicquam incassum esse dictum quod non impleatur. De efficacia viuifica Spiritus afficiente corda nulla hic fit mentio: neque si fieret hinc posset probari Spiritum Dei in omnibus operari, sed in iis demum quos seruare decreuit.

XIII. Arnoldus pag. 443. locorum Scripturæ  
nimbum

nimbum effundit quibus sanè nō probatur id quod intendit. Non Matthæi 23. vers. 37. *quoties volui congregare liberos tuos*, &c. Nam hos liberos fuisse congregatos docuimus cap. 5. Tum si non fuissent congregati, non sequeretur tamen eos aliter vocatos quam vocatione externa.

XIV. Non Esaiæ 65. v. 2. *Expandi manus tota die ad populum desertorem*. Nec Prou. i. v. 24. *Vocaui & renuisti*. Ibi enim agitur de vocatione externa, non verò de Spiritus efficacia agente in cordibus.

XV. Non Psalmo 81. v. 14. *O si populus meus audiuisset, si Israël in viis meis ambulasset quam breui eius inimicos deiecisset*. Hæc enim verba nihil aliud dicunt quam quod apertè sonant, nempe Deum prostraturum fuisse hostes Israël, si Israël Deo morem gessisset. De interna efficacia spiritus *ἐνδεχόμενον*.

XVI. Non Ezechielis 18. 31. *facite vobis cor nouum & spiritum nouum*. Hoc enim loco non efficitur, hominem sibi ipsi facere cor nouum. Cum Deus dicat eiusdem prophetæ cap. 36. *Dabo vobis cor nouum & spiritum nouum*. Multo minus hinc efficitur Spiritum sanctum in omnibus hominibus operari.

XVII. Non Iohan. 5. 34. *Non quero testimonium hominum, sed hæc dico vt seruemini*, & versu 40. *Non vultis venire ad me vt vitam habeatis*. Quibus verbis quomodo conficiatur Spiritus sancti vim viuificam operari in cordibus omnium hominum fateor, qui meus est stupor, me non posse capere.

XVIII. Non illis Pauli verbis 1. Tim. 2. vers. 4. *Deus vult omnes homines seruari*: quorum verborum

R r

hunc esse sensum, Deus quolibet & cuiusque conditionis homines inuitat ad salutem, prolixè probauimus cap. 29.

XIX. Non loco Petri, Ep. 2. cap. 3. v. 9. *Deus non vult vllos perire, sed omnes ad resipisceniam tendere.* Ex hoc enim loco non potest elici Spiritum sanctum intrinsecus operari in omnibus hominibus, etiam in iis quibus Euangelium non est annuntiatum. Sed tantum, Deum non esse causam perditionis cuiusquam, neque gaudere hominis exitio, qua homo est: Alioqui enim qua idem homo est peccator, Deus amat executionem suæ iustitiæ.

XX. Non loco Ezechielis cap. 12. v. 2. *Fili hominis in medio domus rebellis habitas, qui oculos habent ad videndum & non vident, aures habent ad audiendum sed non audiunt:* ibi enim per oculos & aures non est intelligenda gratia sufficiens ad salutem vel mediatè vel immediatè, nec operatio Spiritus sancti agens in reprobis, sed notitia in corde qua agnoscebant vel inuiti, recta esse quæ à prophetis docebantur: quippe tam claris documentis commonefacti, tam seueris minis stimulati, vt non possent ignoracionem prætere. Hanc notitiam illis dabat non gratia supernaturalis intrinsecus agens, non gratia sufficiens omnibus hominibus communis per quam potuerint credere & conuerti si voluissent: sed documéta Prophetarum & Dei lex cognita & mente percepta, aduersus quam vltro animum obfirmabant.

XXI. Scripturæ ita deprauatæ nihilo meliores rationes adiungit. *Illuderes (inquit) Deus hominibus* &

*iis salutem offerret, eorumque salutem se desiderare diceret, quos tamen hoc sine non vocat ut seruentur. Respondeo, finem Deo propositum in vocandis per legem vel per Euangelium iis quos scit non sequuturos, non esse ut ij quos vocat non seruentur: sed finem Dei esse petere ab homine quod debet, nempe obsequi Deo iubēti sibi morē geri & sibi credi promittenti. Nec dubiū est quin seriō vocet homines: nam vocās homines, seriō declarat quid sibi gratum sit, & quid homo debeat, & quid daturus sit credentibus & obsequentibus. At non dicimus cū Arnoldo Deum teneri restituere homini vires amissas, & mederi impotentia hominis quā homo ipse sibi accersuit. Ceterū improba est audacia velle præscribere Deo media quæ nisi sequatur non habiturus sit quo iniustitiæ crimen effugiat: quasi coram humano tribunali causam dicere cogeretur.*


**XXII.** Pergit Arnoldus. *Idem (inquit) docet Deus cum expresse ostendit se hac iniqua suspitione nolle gravari quod aliquid à nobis exigat ad quod præstandum vires sufficientes dare non velit. Mitto inconditum loquendi genus & Deo parum conueniens: cum dicit Deum iniqua suspitione nolle gravari, quasi Deus iniquas suspiciones hominū pertimesceret. Ad rem igitur dico, nefariam esse hanc doctrinam & qua vix vlla deterior: Nam cum Deus etiam ab irrogenitis & infidelibus exigat debitum naturale, id est perfectam impletionem legis, ex hac Arnoldi oratione sequitur, ipsis irrogenitis & infidelibus non deesse vires per quas sine Christi cognitione & sine fide legem per-*

fectè impleant, & sint sine peccato. Ipsi Arminiani dicunt Deum quosdam obdurare irresistibiliter: qui cum non possint non peccare, ab iis tamen obduratis Deus non minus postulat perfectam obedientiam, quam ante obdurationem: Nulla enim ratione, immo ne pœnis quidem æternis, creatura à subiectione creatoris eximitur. Nec dubium est quin ipsi diaboli in æternis cruciatibus Deum amare teneantur. Nam ob id ipsum puniuntur quia cum non amant. Tum si quis punitur ob præteritam inobedientiam, non idcirco eximitur ab obedientia in futurum debita.

Sed peruersa hæc doctrina quæ ex Dei mandatis colligit quæ sint hominis vires: & censet nihil à Deo iuberi ad quod implendum vires homini non suppetant prolixè confutata est cap. 35.

DE DISTINCTIONE GRATIÆ  
*in sufficientem & efficacem.*

CAP. XXXVII.

- I. RATIA est in scholis distinctio gratiæ in sufficientem & in efficacem. Sed efficax gratia potest bifariam accipi. Vel enim significat gratiam quæ apta est ad efficiendum: ut cum medicinam efficacem dicimus, & remedium efficax, quod etsi non sumatur ab ægro, aptum est tamen

ad sanandum. Vel efficax dicimus quod actu efficit: quo sensu efficax pro efficiente, & efficacia pro effectu vel pro efficientia usurpatur. Philosophi dicunt causam efficientē aliam esse potentiā, vt Architectus, & medicus: aliam actu vt ædificans & sanans. Hinc fluxit gemina illa acceptio efficaciz.

II. Pontificij sentiunt omnibus hominibus dari auxilium sufficiens ad conuersionem: cui auxilio possunt ope liberi sui arbitrij sic cooperari vt conuertantur: licet aliud auxilium efficax nullum accedat. Per gratiam autem efficacem intelligunt efficientem & quæ suum effectum producit.

III. Arminiani qui in quæstione gratiæ & liberi arbitrij sic Papismum interpolant, vt Papistæ Pelagianismum, eandem distinctionem gratiæ sufficientis & efficacis frequenter adhibent. Sed ita fluctuante sermone, & affectata ambiguitate vt quid ipsis sit gratia efficax difficile sit cognoscere. Arminius in Perkinsum pag. 245. dicit efficacem gratiam esse quæ efficit re ipsa effectum, & aſſert hæc exempla. Deum sufficere multis mundis creandis sed non id efficaciter facere. Christum sufficere ad omnes homines saluandos non tamen id facere efficaciter. Quæ oratio sane est *ἀναγκαστικὴ* & digna risu. Sic enim loquitur quasi Deus aliquid faceret non efficaciter: aut quasi creauisset multos mundos ineffaciter. Nempe pro *efficaciter facere* debuerat simpliciter dicere, *FACERE* aut *efficere*.

IV. At Arnoldus vt Tydides melior patre ab Arminio desciuit. Is enim p. 397. hæc habet. *Efficax esse*

Rr iiij



*aliquid dicitur non quod aliquid efficit, sed quod admodum ad aliquid faciendum validum est, vii efficax remedium, efficaces rationes.* Sic nempe patroni erroris sunt inter se commissi. Sed mihi hic fas sit Arminio patrocinari aduersus discipulum. Nam accipiendo gratiam efficacem pro ea quæ actu efficit, distinctio gratiæ in sufficientem & efficacem admitti potest, quia multa sunt sufficientis virtutis ad agendum quæ tamen actu nõ efficiunt, vt medicus absens, aut Philosophus dormiens. At dici non potest gratiam aliam esse sufficientem ad efficiendum, aliam aptam ad efficiendum: hæc enim coincidunt: nec quicquam potest dici absurdius quam aliquam gratiam esse sufficientem quæ non sit ad agendum idonea. Non potest esse causa sufficiens quæ non est sufficientis virtutis.

V. Ergo secundum Arminium media ad fidem & salutem sunt sufficienter omnibus administrata sed non efficaciter seu efficienter. At iuxta Arnoldum media hæc Deus administrat omnibus sufficienter & efficaciter. Maluit enim efficaciam sumere pro aptitudine ad efficiendum, quàm pro efficientia: vt posset dicere efficaciam gratiæ non pendere à libero arbitrio. Nam si efficaciam accepisset pro efficientia, tunc dicendum ei fuisset gratiæ efficaciam pendere à libero arbitrio. Schola enim Arminij hoc mordicus tenet & vno ore clamat effectum seu efficientiam gratiæ pendere ex libero arbitrio. Deum quidem dare gratiam viresque sufficientes ad conuersionem, sed vt homo conuertatur actu vel non conuertatur esse penes liberum arbitrium. Hoc pro-

lixè docet Arnoldus pag. 447. *Statuitur* (inquit) *sum gratiæ voluntati subijci, ut homo eadem vi possit vel non vi pro naturali sua libertate.* Et paulo post agens de homine instructo viribus gratiæ, dicit *effectum diuinæ misericordie esse in potestate hominis.* Et p. 448. docet si efficacia sumatur pro efficientia, hominem reddere gratiam inefficacem: puduit enim Arnoldum addere alterum membrum, & dicere hominem reddere gratiam efficacem vel inefficacem: quibus tamen verbis æquipollent alia loca à nobis prolata: nec non quod dicit pag. 449. *Homo si ipse sibi non desit se conuertere potest.* Notabit ergo lector quam sit pestilens hæc doctrina, quam Arminiani vix vnquā sine ambagibus pronuntiant quasi pudore cohibiti, quod *gratia Dei sit efficax* (id est efficiens) *id deberi libero arbitrio, & efficientiam gratia Dei subijci humana voluntati:* Qua oratione hoc volunt, Deum seruare hominem si homo velit, hoc enim pendere ex humana voluntate.

VI. Ab hac doctrina, Ecclesiæ orthodoxæ absunt longissimè. Nam quomodo conuerteremur per gratiam Dei si volumus, cum hoc ipsum quod volumus, sit gratia ipsa Dei, immo ipsa conuersio? Nam quicumque serio vult conuertere ad Deum, iam aliqua ex parte conuersus est. Sed de his iam multa diximus, capitibus de libero arbitrio, & plura dicentur cum agetur de modo quo gratia Dei in nobis conuersionem certò efficit: quem modum Arminiani odiosa & absorta voce irresistibilitatem indigentant.

VII. In voce verò sufficientis gratiæ, non modo inter se dissident, sed etiam unusquisque secum. Volunt enim omnibus & singulis dari gratiam sufficientem ad credendū, viresque credendi. \* Idem tamen dicunt neminem actu credere & bene uti hac gratia vniuersali, sine gratia speciali. Vestrā fidem, an potest gratia sufficiens vocari quæ nunquam producit effectum ob quem data est, nisi accedat altera gratia specialis? An causa sufficiens est quæ sola nunquam efficit? Aut quid minus consentaneum rationi quam cum Arminio facere gratiam vnā sufficientem per quam peccator conuerti possit sed non conuertatur, alteram efficacem per quam conuertatur? nonne eiusdem est virtutis & facultatis posse agere & agere? posse videre & videre? Profectò hos homines vertigo corripuit, dum student subtilitati.

VIII. Hoc, ni fallor, Vorstius vidit: ideoque Sectione 20. & 21. Collationis cum Piscatore duo facit genera gratiæ, vnā sufficientem ac planè necessariam quam Deus vocatis omnibus largitur, alteram verò extraordinariam & affluentem ac singularem per quam homines re ipsa conuertuntur: & reicit eos qui dicunt per priorem illam gratiam nullos omnino conuerti. Neque enim Deum promississe se omnes quotquot conuertuntur plus quam sufficiente auxilio & exuberante gratiæ efficacitate conuerrere velle.

IX. Nos verò vocem gratiæ efficacis accipientes pro apta ad efficiendum id ad quod data & instituta est,

\* Arn. p.  
405. Li-  
ces sit ge-  
neralis  
gratia  
quod ho-  
mines do-  
niti ista  
possint re-  
ctè vti: ta-  
mē quod  
actū recte  
viri vti-  
ā speciali  
gratia est.  
Potentia  
enim in  
actū non  
perduci-  
tur nisi  
per auxi-  
lium alte-  
rū us gra-  
tiæ subse-  
quentis  
quæ spe-  
cialis est  
quia non  
omnibus  
cōiungit.

est, nullam gratiam sufficientem agnoscimus quæ non sit efficax, id est apta ad efficiendum id ad quod data & instituta est, siue sola efficiat, siue cum aliis. Quod ἔξ επιτηδεις adicio, quia sæpe ad vnũ <πρὸς τέλοςμα multæ causæ concurrunt: vt ad eruditionem, natura, ars & exercitatio: ad fertilitatem agri, tractabilitas soli, Sol, pluuia, & cultura conueniens.

X. Cum autem in concursu causarum ad vnum effectum producendum sint quædam causæ quæ non tantum agunt cum aliis, sed quæ insuper agunt per alias, & causis adiunctis dant efficaciam: in conuersione hominis Spiritus sanctus & prædicatio verbi concurrunt: sed Spiritus dat efficaciam verbo. Frustra enim pulsantur aures nisi Deus aperiat corda, & verbo occultam vim inspiret.


XI. Gratiam autem absolutè sufficientem vel ad conuersionem & ad fidem, vel ad salutem, sine Spiritu regenerationis, & cognitione Christi nullam agnoscimus. Arminij scholam damnamus docentem omnes homines, immo & Ethnicos ad quos Christi nomen non peruenit, gratiâ sufficiente & salutari præditos esse ad perueniendum ad fidem, & per hanc ad salutem.

XII. Media tamen externa ad salutem largiter administrata, sine efficacia interna Spiritus sancti, possunt aliquatenus vocari gratia sufficiens, non modo quia sufficiunt ad ἀναπολογησίαις, sed etiam quia hæc media deberent sufficere ad perueniendum ad salutem, si homo talis esset qualem esse oportuit. Nam si quid deest isti gratiæ, defectus nascitur ex

parte eius qui vocatur, non vero ex parte vocantis, qui ex regula iustitiæ non tenetur suppeditare dispositiones internas, quippe quas homo tenetur de suo dare, & ex se afferre: nec Deus eas tenetur homini restituere postquã homo eas culpâ suâ amisit. Meritò ergo Deus Esaia 5. *Quid est quod vltra debuisti facere vineæ meæ, & non feci?* Nam humanitùs loquendo Deus dicitur debere facere quod postulat iustitia, & quod si non faceret videretur causa esse expostulandi. Deum verò ibi agere tantum de externis mediis hinc apparet, quod beneficia in Israël collata comparat plantationi in locovberi, repastinationi, circumpositioni sepi, exossationi, ædificationi torcularis: at de vegetatione arcana, de cœli clementia, de tempestiua pluuiâ, quæ sunt virtutis magis arcane nulla mentio. Adde quod ad quæstionem qua quæritur an Deus det singulis gratiam sufficientem, parum appositè affertur locus hic ex quinto Esaya, ubi non agitur de gratia sufficiente quam Deus offert vel dat singulis, sed quam toti genti. Donum enim spiritus viresque credendi quas Arminius vult singulis administrari, donum est quod singulis datur seorsim, non verò toti genti simul sumptæ. Sed de sufficiente ista gratiâ, instituenda est peculiaris tractatio.

*De vniuersali gratia, quæ & sufficiens, Arminianorum sententia.*

CAP. XXXVIII.

I.  N serie illa quatuor decretorum quibus Arminiani totam doctrinam de prædestinatione comprehendunt tertium decretum hoc fuit, quo dicunt, Deum decreuisse media ad fidem & resipiscen-  
tiam necessaria sufficienter omnibus & singulis administrare. Arnoldus vult hæc media efficaciter omnibus administrari, quia per efficaciam, aptitudinem ad efficiendum intelligit.

II. Non quidem quod sectarij velint media ad fidem & salutem omnibus ex æquo administrari. Volunt enim suppeditari aliis parcius, aliis liberalius: omnibus tamen ea mensura quæ sufficiat ad credendum si velint, & per quam omnes ad viuificationem disponuntur, ita vt per Deum non stet quin omnes homines habeant fidem, & credendo seruentur.

III. Censent autem Deum dare irresistibiliter omnibus hominibus \* vires credendi: at non ipsum actum credendi: ad quem etsi Deus dat omnibus gratiam sufficientem, volunt tamen esse penes liberum arbitrium vti hac gratia vel non vti, credere vel non credere. Deum enim non suppeditare \* hæc

Si ij

Arn. p.  
407.  
\* Arn. p.  
3, 6. Dicit  
at Ar-  
minius  
gratiam  
qua facit  
ias credere  
di datur  
quamplu-  
rimis, di-  
cat omni-  
bus com-  
munem  
esse, an  
proinde  
negat gra-  
tiam esse?  
Arn.  
in Perk.  
256. &  
257.  
Quæ re-  
futatio  
tua? quid  
enim si  
quis dicat  
omnes in-  
vincerent  
homines  
habere po-  
tentiā cre-  
dendi &  
salutē cō-  
sequēti si  
velint? &  
hanc ipsā  
potentiā  
esse N A-  
TURAŁE  
hominū  
diuinitas

collatam:  
quo tuo  
argumento  
consuetu-  
bis illam  
\* Arn. p.  
372.  
Arnol.  
p. 360.  
Deus in-  
discrimi-  
natim sta-  
tuit me-  
dia ad fi-  
dem ad-  
ministra-  
re & p.  
372. Etia  
Ethni-  
cis ante  
aductum  
Christi  
media ad  
fidem in  
Christum  
sufficien-  
ter & ef-  
ficaciter  
admini-  
strata &  
pag. 443.  
Deus ni-  
hil à no-  
bis exigit  
ad quod  
vires suf-  
ficientes  
non det.  
Ibid. Si  
petere ab  
homine  
aliquid  
nec aaret

media sufficientia ex præcisa intentione seruandi aliquas singulares personas. Sed hæc media omnibus & singulis administrare quæ sufficiant ad ostendendum, Deum omnium salutem serio & ex animo desiderare: & per eum non stare quin omnes seruentur.

IV. Addunt, esse quosdam quibus gratia hæc sufficiens parcius administretur, quibus tamen Deus paratus est dare plura media, dummodo his quæ habent bene vtantur: iuxta illud, *Habenti dabitur*. Verba Arminij in Perkinsum hæc sunt pag. 259. & 260.

*Gentes dum cognitione Dei destituuntur, non tamen sine testimonio Deus eas reliquit, sed & illo tempore aliquam veritatem de potentia & bonitate sua illis patefecit, legem quoque mentibus insculptam conseruauit, quibus bonis si rectè vti fuissent, saltem ex conscientia maiorem ipsis gratiam concessurus fuisset, secundum illud, habenti dabitur. Nec dubitant dicere Gentes cognitione Euangelij destitutas, tam posse peruenire ad bona quæ Euangelio offeruntur, quam ij quibus Euangelium prædicatur. Audiantur verba Arnoldi pag. 105. & 106. quæ legens sanè cohorrui. Licet (inquit) multe nationes ordinario Euangelij præconio destituantur, tales tamen à gratia ipsa Euangelij non esse præcisè exclusas, sed semper bona quæ Euangelio offeruntur, illis æque manere exposita, atque cæteris qui prædicationis priuilegio fruuntur, modo scilicet conditiones fæderis præstent. \* Proh Dei atque hominum fidem: tantumne licuisse Satanæ, vt in hac luce Euangelij suscitaret homines qui palam docerent & scriberent, idque sub pietatis obtentu, Ethnicis &*

infidelibus quibus Christus ne de nomine quidem notus est, cœli aditum tam patere, & salutem tam esse expositam quam quibus Christus prædicatur? Sed de his postea, Obiter tamē obseruandū est quomodo hic homo posita à se conuellat, & adiectione clausulæ absurdæ & impossibilis destruat quæ astruxerat. Dicit enim Ethnicis *non minus esse expositam salutem quam Christianis dummodo impleant conditiones sceleris*: hæ conditiones sunt fides & resipiscentia: At quomodo crederet in Christū qui Christū ignorat? quomodo resipisceret cui Deus non dedit spiritum regenerationis? Nempe sic lectori apertè illuditur.

V. Quid quod non modò affirmant Deum dare omnibus hominibus gratiam sufficientem viresque credendi, sed etiam pertendunt Deum teneri & astringi ad hanc gratiam dandam, Deoque ipsi leges figunt? ut iam periculum sit ne Deo iniustitiæ dica scribatur, aut ne ei suæ iustitiæ ratio non constet, nisi ex Arminij ludo aliquis eum saluari consilio iuuet. Arnoldus pag. 262. hæc habet. *Deus cum nouum fœdus gratiæ proponit & culpæ admissæ remissionem promittit sub nouæ obedientiæ conditione, TENETUR M. A. XI ME vires dare quibus homo conditionem istam possit implere*: alias enim non posset iudicari gratiam istam seriò offerre. Audacter sane, & satis pro imperio. Causam huius assertionis reddit pag. 443. *Deus* (inquit) *ostendit se nolle hac iniqua suspitione grauari quod aliquid à nobis exigat ad quod præstandum vires sufficientes dare nolit.* Hoc verò dicit à Deo ostendi cum docet se non colligere vbi non sparsit.

vires ad obsequendum, colligeret vbi non sparsit.  
 \* His assensum habet Vorstius Collationis cū Piscalatore, Scilicet. 19. V'el feri verba hæc sunt libro de Officio hominis Christiani. F. 3. Causa huius erroris est quod creditum fuit, nullā salutarē Christiani-  
 cantē sufficientem remissionem quāvis infidelium in Christi-  
 sū. Vide Berrum Discept. Epist. p. 73. & 76.



VI. Nec minor Vorstij audacia, Collationis cum Piscatore Sect. 8. *Deus* (inquit) *per legem suam naturam, hoc est naturalis iustitiae, bonitatis & providentiae suae, ea salutem bona hominibus velle semper tenetur, sine quibus isti aut homines esse, aut finem à Deo sibi propositum assequi simpliciter non possunt.* En homines paratos ferre sententiam in Deum ipsum, si quid gesserit præter æquum, aut contra regulam iustitiæ ab eis positam. Dici non potest quantum hæc absint à Christiana modestia. Profecto, etiam si vera essent quæcunque affirmant, erat tamen piorum atque prudentium hæc premere, ne vel aliquid Deo præscribere in salutis nostræ negotio, vel Deum officij submonere velle videantur.

VII. Duobus falsis principiis niritur hæc doctrina. I. Deum nihil exigere ab homine quod non possit ab homine præstari. II. Conditionem novi fœderis id est fidem, non præcipi lege, nec esse de debito naturali, nec vires credendi amissas esse lapsu Adami. Quorum principiorum prius quidem haustum est ex Pelagiana fæce, & à nobis refutatum est capitibus 34. & 35. Posterius verò evertimus toto capite 11. Lex est debitum naturale hominis. Hæc lex iubens Deum amari & coli, iubet quoque ei loquenti & promittenti credi. Cum ergo peccato Adami homo amiserit vires obsequendi Deo & eum amandi, amisit quoque vires credendi eius promissionibus. Hanc fidem cum Deus exigit ab homine, nihil exigit nisi quod homo debet: viresque credendi amissas non tenetur ei restituere. Nec si nō restituat, potest iniustitiæ accusari: nec hæc in re Arminiano-

rum legibus est obnoxius, aut aduersa eorum iudicia pertimescit.

VIII. At cum deuentum est ad explicandam naturam huius gratiæ sufficientis, mirè se produnt, & inueniuntur perexiguo discrimine à Pelagianis distare. Pelagius enim ne videretur aduersus esse gratiæ, quicquid boni operis sit ab homine adscribebat gratiæ: sed per gratiam intelligebat ipsam naturam, quippe quæ à Deo esset condita. At Arminio aliud quidem est natura, aliud gratia sufficiens: Veruntamen gratiam sufficientem vult omnibus & singulis contingere, nullique inesse naturam, quin ei dederit Deus gratiam sufficientem ad fidem adipiscendam, & per fidem, salutem. Vnde fit, vt iuxta Arminium, gratia sufficiens æque latè pateat ac natura. Pelagius naturam confundit cum gratia, sed Arminius naturam & gratiam sociat, vt nulli insit natura cui non contigerit gratia. Quæ gratia quam paruo discrimine distet à natura hinc apparet, quod Arminiani huius gratiæ rectum vsum, nihil aliud esse volunt quam rectum vsum lucis naturalis, & cognitionis quæ per creaturarum cōtemplationem & per legem naturæ omni homini insitam habetur: vt planè idem sit vsus idemque officium naturæ & gratiæ. Cum potius scriptura doceat verum vsum gratiæ positum esse in immutatione naturæ. Hæc si vera sunt, planè concidunt omnia veterum & nostrorum argumenta quibus per scripturam & per experientiam probant gratiam Dei esse aliquid diuersum à natura, idque quia natura datur omnibus, gratia verò Dei

est priuilegium quorundam. Arminius enim gratiam sufficientem ad fidem & per id ad salutem vult omnibus esse communem.

I X. Arnoldus pag. 418. gratiam illam sufficientem quæ omnibus datur vocat gratiam supernaturalem, ne videatur eam confundere cum natura, mox tamen addit, *quæritur an non omnibus præsto sit illa gratia qua lumine illo [naturæ] nondum integritati restituito seu reliquiis illius luminis rectè vii, hoc est pro mensura earundem Deum colere possint.* Audis omnibus præsto esse gratiam qua possint rectè vti natura & Deum colere? & præsto esse omnibus ac proinde & infidelibus & irrogenitis & Christum non cognoscentibus? vimque istius gratiæ quæ omnibus est communis positam esse in recto vsu naturæ? Idem pag. 405. *Generalis est gratia quod homines donis istis possint rectè vii.* Loquitur autem de donis naturæ.

X. Idem pag. 112. loquens de gratia vniuersali, dicit quandam vocationem esse communem, communiaque naturæ documenta quibus Deus omnes omnino homines ad sui notitiam aliquantulam vocat, & pro mensura vocationis dona relinquit.


XI. Ex hac tamen gratia communi & quæ omnibus datur, per quam omnes possunt rectè vti donis naturæ negat pag. 405. sequi, gratiam & naturam æquè latè extendi: nam (inquit) *licet sit generalis graua quod homines donis istis possint rectè vii, tamen quod actu rectè is vianatur à speciali gratia est. Potentia enim in actum non perducitur nisi per auxilium alterius gratiæ subsequens qua specialis est, quia non omnibus contingit.*

Ineptam

Ineptam sanè vir doctus causam assignauit cur gratia hæc communis & sufficiens non æquè latè extendatur ac natura, nempe quia hæc gratia communis opus habet auxilio gratiæ specialis. Perinde ac si dicerem facultatem visiuam in homine, non æquè latè patere ac naturam humanam, quia opus habet luce solari vt actu videat. Quasi verò id quod ope alicuius rei indiget non possit æquè latè patere ac natura: Vix vlla facultas naturalis potest agere sine ope alicuius alterius facultatis, aut auxiliij externi vel interni: & sic nihil planè erit naturale in homine. Mitto quod Arnoldus sese suis aculeis compungit. Dum enim dicit gratiam sufficientem non agere sine ope alterius gratiæ specialis, plane negat esse sufficientem.

*Conuelliur locis Scriptura gratia sufficiens vniuersalis.*

# CAP. XXXIX.

- I.  Ec doctrinā quæ ponit in homine irrogenito & infideli gratiam quæ vel mediātè vel immediātè sufficiat ad fidem vel salutem adipiscendam sine vlla cognitione Euangelij & fide in Christum, Christianam fidem à stirpe conuelli, & scripturæ ac experientiæ aduersatur.
- II. Principiò, necesse est concidat omnis doctrina in salutis negotio, quæ non niritur Scripturæ te-

testimonio: At nullibi scriptura dicit Deum teneri dare incrementa gratiæ illis qui luce naturali rectè vti fuerint. Nullibi dicit aliquem sine fide posse Deum rectè colere. Nullibi dicit Deum teneri omnibus dare mediata vel immediata vires ad credendum, & ad ea implenda quæ iubentur Evangelio. Nullibi dicit gratiam supernaturalem omnibus dari per quam possint rectè vti luce naturali. Nullibi dicit gentes quæ Christum ignorant agi à Spiritu sancto. Hæc sunt figmenta hominum otiosorum, quos improba ingenij prurigo, & disputandi cacoëthes inuasit.

III. Hæc doctrina refellitur omnibus scripturæ locis quibus probauimus hominem irregnitum carere libero arbitrio in iis quæ pertinent ad salutem. Hinc enim conficitur hominem irregnitum non habere vires credendi, nec posse Deum colere cultu qui Deo placeat, nec se disponere ad regenerationem.

IV. His adde testimonium Apostoli ad Ephes. cap. 2. v. 12. vbi loquens de Gentibus antequam verbum Dei eis innotuisset dicit *eos fuisse absque Christo, spem non habentes & Dei expertes in mundo*. Vides eos qui sunt absque Christo, nequidem habere Deum? quomodo autem possent dici esse sine Deo quos sectarij dicunt habere gratiam sufficientem cuius ope possunt credere, & Deum colere, & rectè vti luce naturæ? Hæc sane simul stare non possunt.

V. Idem Apostolus ad Romanos 10. vers. 14. *Quomodo ei credent de quo non audierunt? His verbis satis*

apertè docet Gentes quibus Christus non innotuit non posse credere. At Arminius vult omni homini dari mediatè vel immediatè vires credendi.

V I. Pergit Apostolus. *Quomodo credenti ei d: quo non audierint? quomodo ergo audient absque predicante? Quomodo autem predicabunt nisi missi fuerint?* Ponderentur hæc verba: Paulus censet non posse credi in Christum nisi Evangelium audiat: non posse autem audiri Evangelium nisi prædicatores mittantur. Hoc posito dico, Deum nihil facere frustra: frustra autem daret omnibus vires credendi Evangelio, nisi mitteret qui prædicarent Evangelium. At ad maximam partem hominum non mittit prædicatores Evangelij. Ergo non dat eis omnibus vires credendi, nec gratiam sufficientem ad credendum.

V II. Idem Apostolus 2. ad Timoth. cap. 1. dicit *Deum nos vocavisse vocatione sancta: non ex operibus nostris, sed ex suo proposito & gratia.* Falsò ergo Arminiani censent Deum dare lucem supernaturalem & cognitionem Evangelij iis qui per liberum arbitrium rectè vsi sunt gratia sufficiente & lumine naturali. Hoc enim si verum esset planè vocatio esset ex operibus, & secundum opera. Nam bonus vsus gratiæ sufficientis & lucis naturaliter homini insitæ est bonum opus, cuius intuitu Arminiani volunt Deum vocare hominem per Evangelium, & pleniori luce illustrare. Collatores Hagienfes Arminiani p. 86. dicunt *Deum mittere verbum suum quò ipsi visum fuerit, non secundum aliquod decretum, sed propter alias causas in homine latentes.* Hi homines volunt causam cur ad hos

potius quam ad illos Deus mittat verbum esse in ipso homine, non verò in Dei beneplacito. Quæ oratio plane facit hominẽ vocari ex operibus, & prout homo affectus est & aptus ad obsequendum vocanti. Cùm tamen experimento constet indignissimos quosq; & pessimè affectos sæpe vocatos esse verbo Euágelij, vt Romanos, Corinthios, &c. *Et ubi abundauit peccatum ibi abundasse gratiam*, Rom. 5. *Vt non esset volentis nec currentis sed miserationis Dei*. Rom. 9.

VII k. Christus Ioh. 15. v. 5. *absque me nihil potestis facere*. Quod Apostolis dicitur, omnibus dicitur: nam quotquot sumus, sine Christo nihil possumus. In hoc dictum Christi impingunt sectarij, cum docent eos qui Christum non norunt, & qui carent fide, posse credere & Deum colere cultu qui Deo placeat, & facere voluntatem patris.

IX. Quem Deus odit ab vtero, ei non dat gratiam sufficientem & salutarem. Hoc enim esset amare. At Deus Esau odit ab vtero: Rom. 9. v. 13. Ergo ei nõ dedit gratiã sufficientem & salutarem: Nam etsi Malachias hæc dicit de reiectione temporali, sufficit tamen ad rem præsentem quod hæc reiectionis, fatente Arminio, ponitur à Paulo vt typus reiectionis spiritualis. Ergo sunt quos Deus reiecit reiectione spirituali priusquam quicquam fecerint boni vel mali. Non igitur eis dat media sufficientia ad fidem vel ad salutem. Hoc enim cum odio non posset conciliari.

X. An Israëlita erant instructi à Deo sufficiente gratia, quibus Deus ipse Deuter. 29. v. 2. dicit se inter tot miracula non dedisse cor ad intelligendum nec

oculos ad videndum? *Iehoua non dedit vobis cor ad intelligendum, nec oculos ad videndum, nec aures ad audiendum, in hunc usque diem.* Arnoldus hic locus redegit ad incitas. Igitur præsidium petit ab audacia. Nam illa verba *Non dedi vobis cor ad intelligendum*, nihil aliud vult sonare, quam *cor non habuistis*: hæc verò verba, *Non dedi vobis*, penitus expungit. Mox tamen per infirmitatem frontis hac solutione absistens, addit, *Licet Deus tales oculos & aures non dederit, non sequitur hæc cum illis dare noluisse: sed Deum voluisse illis dare, eos autem sibi defuisse, per superbiam, ignorantiam, & torporum.* Sed neque sic se expedit, immo magis se implicat. Quæro enim an antequam se refractarios præbuisent, habuerint cor ad intelligendum & aures ad audiendum? Si nunquam habuerunt, vicinus: habemus enim luculentum exemplum hominum quibus nūquam datum cor nec oculi, ergo nec gratia sufficiens. Si verò Arnoldus vult eos habuisse inter initia sed postea amisisse, tunc sanè arguet Deum ipsum mendacij, qui disertè pronuntiat se nunquam eis dedisse cor nec oculos *ad hunc usque diem.*

XI. An Tyriis & Sidoniis data est gratia sufficiens: quibus Christus noluit prædicari Euangelium, quāvis essent minus alieni à pœnitentia Capernaitis, quibus Christus ipse prædicabat Euangelium?

XII. Interea observabit lector ridiculum acumen hominis *φωρομαχουτος*. Dicit Deum voluisse dare Israëlitis cor ad intelligendum, & oculos ad videndum, & paratum fuisse ad dandum, sed per Israelitas steterisse ne Deus eis daret: Ergo (si huic credi-



tur) poterant obsequi Deo antequam Deus eis dedisset cor: at illud ipsum obsequi est cor habere: ergo poterat cor habere antequam cor haberent: quæ sunt *ἀόρτα*. Perinde ergo agit ac si diceret, Deum non dedisse eis cor quia erant sine corde: veluti si medicus nollet sanare cæcum, quia noluit medicum venientem aspicere.

XIII. Quod si, ut censent Arminiani, Deus nihil iubet ad quod implendum non det gratiam sufficientem, velim mihi dicant an Deus iubens Pharaonem dimittere populum, ei dederit gratiam sufficientem qua posset mandato Dei obsequi: cum contra Scriptura testetur Deum obfirmasse cor eius ne dimitteret populum.

XIV. Et cum sint quidam quos Deus obdurat, idque (ut volunt Arminiani) irresistibiliter, an istis ita obduratis dat gratiam sufficientem implendi legem ad quam implendam omnis homo tenetur? An dat omni homini gratiam sufficientem ad perfectam impletionem legis? Minimè id quidem. Cur enim Christus fecit se obnoxium legi, nisi ut impleret pro nobis quod à nobis impleri non poterat? Rom. 8. 3.

XV. Christus Matth. 11. sic affatur discipulos, *vobis datum est nosse arcana regni celorum, illis autem non est datum*: Nonne dicit gratiam cognoscendi arcana regni celorum quibusdam prorsus nō dari? Sine qua tamen gratia omnis alia gratia est inutilis ad salutē. Hic ergo quæro an quibus non datum est nosse hæc arcana poterant illa cognoscere? Non potuisse patet ex verbis Christi: lidem tamen iuebantur hæc ar-

cana discere & cognoscere, & eis credere. Hic enim sermo est de iis quibus Euangelium annuntiabatur. Quod si non poterant ea cognoscere quia ipsis datum non erat, apparet gratiam sufficientem ad hæc cognoscenda & discenda non fuisse eis concessam.

XV. Apostolus Act. 14. dicit *Deum præteritis ætati-  
bus fuisse gentes suis ipsarum viis incedere*, Et Psal. 147. *de-  
claravit statuta sua Israël: Non idem fecit omnibus genti-  
bus: Ideoque non norunt eius statuta*. Et Matthæus cap.

4. dicit gentes quibus Euangelium nondum illuxerat, *iacuisse in tenebris, & in umbra mortis*. His quis ausit dicere gratiam sufficientem esse datam ad fidem adipiscendam? Exempli gratia an Macca-  
bæorum tempore Deus dabat gratiam sufficientem Mauris & Americanis ad credendum in Messiam, & ad salutem adipiscendam? Quo teste tandem aut qua ratione probabitur has gentes sufficiente gratia instructas, & salutari vocatione vocatas fuisse? Ob-

~~ver-~~servabatur eorum oculis liber naturæ, habebant impressas cordi notiones aliquas æqui & boni, sed offuscatas multa caligine: nec per hæc, nec per gratiam illam sufficientem fide destitutam quisquam unquam ad fidem peruenit, aut ad salutem: Nec potuerunt hætenus Arminiani asserere exemplum cuiusquam qui his adiumentis ad fidem peruenierit. Vorstius tamen frontem perfricat, Sectione enim 26. Collationis cum Piscatore, dicit hos populos non destitutos fuisse auxilio simpliciter necessario, & Deum eis micæ quasdam panis cœlestis, mediatè sufficiens indulgisse. Huius minutiloquij micæ

vir præposterius acuminis nobis inspergit, & nouam doctrinam inusitatis locutionibus vellit: quam quia sic profert vt sine probatione velit sibi credi, eadem facilitate qua ab eo asseritur à nobis reiicitur.

XVII. Non leue est nec perfûctoriè legendû illud Christi Ioh. 6. 44. *Nemo potest venire ad me nisi pater qui misit me traxerit eum.* Cui affine est illud vers. 65. *Nemo potest venire ad me nisi datum ei fuerit à patre.* Quibus ex locis sic argumentajur. Quicumq; sic non trahitur vt veniat non est instructus sufficiēte gratia ad veniendum. At multi sic non trahuntur. Ergo multi non sunt instructi sufficiente gratia ad veniendum. Maior probatur Christi verbis: *nemo potest venire ad me nisi pater traxerit eum.* Si enim oportet trahi vt venias, planum est iis qui non trahuntur deesse gratiam & vires quibus veniant: ac proinde eos non esse instructos gratia sufficiēte. Multos verò non trahi iisdem Christi verbis euincitur. Causam enim assignat cur Capernaitæ non venirent nec crederent, nempe quia non trahebantur. Perperam ergo Arminius in Perkinsum p. 219. quærit quasi dubitandum, *Quid si omnes trahantur?* Comminisci verò plura genera tractionis nihil hîc attinet. Sufficit enim ad quæstionem præsentem, hoc loco agi de tali tractione sine qua nemo venit ad Christum. Fingant sectarij quascunque volent tractiones, dum constet per eas neminem vnquam venisse ad Christum, & cum qui nõ trahitur tractione de qua Christus hîc loquitur, non esse instructum sufficiēte gratiâ. Quod ipsi Arminiani agnoscunt dum fatentur

gratiâ

gratiâ illâ sufficiente & salutari neminem conuerti, nisi alia gratia specialis accesserit. Vnde fit gratiam illam generalem non esse sufficientem.

*Eadem Gratia sufficiens, & vniuersalis rationibus  
impugnatur.*

## CAP. XL.

I. **P** Rincipio hoc dogma de gratia sufficiente manifestè Deo illudit, dum fingit Deum seriò & ex animo velle seruare omnes homines, & in eum finem dare omnibus gratiam sufficientem qua possint conuerti & credere: sed istam gratiam maximæ parti generis humani tam parcè administrare, vt nemo possit dari toto orbe qui per gratiam illam sufficientem seruatus sit: cum nemo destitutus fide & cognitione redemptoris vnquam rectè vsus sit naturalibus donis: aut Deum coluerit cultu qui Deo placeat. Nec Arminiani vllum adhuc exemplum potuerunt asserere: nec si possent vnum aut alterum exemplum proferre, per id maculam quam Deo inurunt abstergerent: De Deo enim malè sentit quicumque docet Deum velle seriò omnes homines seruari, & in eum finem dare omnibus gratiam sufficientem qua possint conuerti & credere: sed hanc gratiam maximæ parti hominum tam parcè administrare, vt de millicies mil-

V u

le myriadibus vix vnus aut alter per hanc gratiam sufficientem se conuerterit & ad fidem peruenerit.

II. Quid quod hæc doctrina temerario ausu Deo ipsi leges figit, eique præscribit modum & mensuram qua debet erogare sua dona, & gratiæ incrementa largiri? si quis enim ope gratiæ sufficientis donis naturalibus rectè vsus sit, statuunt Arminiani Deum teneri dare isti homini ampliorem gratiam, & quia bene vsus est naturali luce, ei dare lucem supernaturalem & cognitionem Euangelij. Ego verò puto creatorem erga creaturam nulla obligatione astringi. Immo si astringeretur, nostrum tamen non esset ei in os ingerere quid debeat, nec cum commone facere officij, quasi periculum esset ne fidem suam non liberet, aut peccet in leges quibus astringitur. Tum hoc pacto Dei beneficia minuuntur, & fiunt perexigua. Nam, si creditur sectariis, Deus dans alicui vires credendi nihil facit nisi quod debet, nihilque dat nisi quod dare teneretur.

III. Hæc eadem doctrina statuens gratiam sufficientem esse datam Gentibus quæ Christum non norunt, vt pro mensura eius Deum colant, aperte dicircultum aliquem sine Christo & sine fide posse esse Deo gratum. Et gratiam aliquam esse salutarem sine fide in authorem salutis. Neque id obscure fert Arnoldus, sed pagina 409. loquens de Ethnicis qui asperum vitæ genus consecrantur, vt Deo seruiant, vnde probaueris ( inquit ) tales aut perire aut manere experies Christi? Hic homo dum vult bene sperari de salute Ethnicorum quia asperum vitæ ge-

nus confectantur ut Deo seruiant, quamuis Christum prorsus ignorent, fidē Christianam *ἐκ πολλῶν* ut non necessariam, & aliquem posse per Christum seruari sine cognitione Christi occultē instillat. Nam etsi iniuriam sibi fieri sectarij occlament, quotiescunque ex eorum vlceribus pus exprimitur, quo tamen hæc verba pertineant, facile perspiciet qui totam illam dissertationem Arnoldi aliquot paginis contentam accuratē perleget.

I V. Pari errore censent Arminiani vires credendi & fidem adipiscendi dari homini sine spiritu regenerationis & adoptionis. Cum autem per fidem simus filij Dei, si sine spiritu regenerationis homo habet vires credendi, sine eodem spiritu habet vires efficiendi ut sit filius Dei.

V. Tum illud *ἀτοπov* & risu dignum, velle ut vires credendi in Christum dentur homini sine spiritu regenerationis: at ipsum credere non detur sine spiritu regenerationis: quasi ab alia causa essent vires credendi, ab alia verò usus & executio virium: & quasi non esset eiusdem facultatis posse agere, & agere: posse currere, & currere. Nam ad credendum actu aliam gratiam specialem dicunt requiri: ac proinde gratiam illam sufficientem, non esse sufficientem ad credendum actu. Hæc quidem mihi videntur similia ægorum somniis.

VI. At quam absurdum, & Dei sapientiæ aduersum, dicere Deum paratum esse dare maiorem gratiam lucemque Euangelij iis qui bene vsi fuerint lumine naturali. Sic enim Deus dicitur paratus esse

facere id quod scit se non facturum, & paratus esse cumulare hominem noua & maiore gratia sub conditione quam nemo vnquam impleuit nec implebit: nemo enim destitutus fide, & cognitione redemptoris, & spiritu regenerationis vnquam rectè vltus est lumine naturali, nec Deum coluit cultu qui Deo placuerit: quia quicquid sit sine fide peccatum est, & quicumque Filium non habet etiam Patrem non habet, immo est sine Deo in mundo vt docet scriptura.

VII. Immo verò quisquis omnium historiarum memoriam replicauerit, comperiet sapientissimos quosque inter Ethnicos quibus vita temperantior, & appetitus sedatiores, & qui iustitiam coluerunt, & de Deo multa præclara dixerunt aut scripserunt lógisimè abfuisse à regno cælorum. Id experientia comprobauit: quando enim cæpit Euangelium promulgari per gentes: non alios acriores hostes religio Christiana pertulit quam philosophos: hi ad infamandam crucem Christi ingenij sui solertiam conuerterunt, & ad crudelitatem & persecutionem facem acerrimam prætulerunt. Nam vt quisque virtutis ciuilis laudem affectat, & ingenium habet multa eruditione subactum, ita ei maximè sordet simplicitas Euangelij, & crucis Christi scandalo magis offenditur.

VIII. Mirum verò quo pacto documentis naturalibus & luce naturæ quisquam possit præparari ad fidem & regenerationem, cum ipso naturæ corrupte instinctu homo ad idololatriam instigetur. Insitum.

enim est homini velle habere obiectum aliquod præsens & visibile in quod intendat oculos dum preces fundit, & prudentia humana sæpe religionem pessundedit.

I X. Porro cum, fatente Arnol'do, primus effectus gratiæ sit nosse se in peccatis esse mortuum, & naturaliter maledictioni æternæ obnoxium: nec quicumquam possit hoc cognoscere nisi instructus verbo Dei, euanesceat quicquid Arminiani *ῥεμελολογουσι* de vniuersali gratia & sufficiente: cum per eam nequidem possit id acquiri quod est principium & primum elementum conuersionis, & à quo gratia necessariò incipit. Profectò qui euoluerit scripta Ethnicorum, nihil de morte in peccatis, nihil de viuificatione & regeneratione, nihil de necessitate supernaturalis gratiæ inueniet. Optimi quique Ethnicorum hanc Cynosuram posuerunt ad quam virtutis suæ cursum dirigerent, *Naturam sequi*: cum contra gratiæ Dei hoc munus sit, naturam restituere & immutare.

X. In designando verò tempore quo hæc gratia sufficiens primulum à Deo datur omni homini, Arminiani parum se explicant. Nam si omnes homines habent hanc gratiam ab utero, perperam à natura distinguitur: cum id naturale sit quod omnibus hominibus insitum est ab ortu & à natiuitate. Si verò hæc gratia datur tantum adultis, quo demum anno datur? an omnibus certa quadam & pari ætate? an aliis citius aliis serius? Quod si datur decimo aut duodecimo anno vitæ, quid fiet illis qui moriuntur,

Arn. pag.  
404.  
Deus pri-  
mo hoc a-  
git, vbi-  
mo intel-  
ligat sciri  
peccatis  
mortuū.



anno septimo aut nono? quid illis quos mors intercepit vno aut altero die ante hanc gratiam collatam? Tum si quis moritur statim post sufficientem illam gratiam datam, antequam ei detur otium bene vtendi hac gratia, quid fiet hoc homine? an exclusus temporis angustia à recto vsu gratiæ, excludetur ideo à regno cælorum? Profecto dum Deum legibus astringunt, ipsi se inextricabilibus vinculis implicant.

XI. Cùm autem Arminiani gratiam sufficientem quæ omnibus irrogenitis & infidelibus communis est dicant esse supernaturalem, difficile est vt qui primulùm motu hoc supernaturali & salutaritangitur, id non sentiat: Aut si eius initia sunt dubia & incerta, saltem necesse est temporis progressu sentiat. At nemo vnquam Ethnicorum vnquam se hanc gratiam sensisse professus est, nec eius vlla in eorum scriptis mentio.

XII. Sed & operæpretium esset cognoscere quibus gradibus homo Ethnicus sub Australi plaga aut in intima Tartaria bene vtens documentis naturalibus, tandem ad fidem in Christum possit peruenire. Hic enim necesse est sectarij multa fingant; & audacibus coniecturis & defultoria temeritate lasciuiant. Oportet enim fingant eiusmodi homini vel fundi oracula cælitus: vel ad eum allegari Angelos: vel Prophetam aliquem crinibus elatum eò aliunde transferri, qui hunc hominem fide Christiana imbuat. Nam vbi deest scriptura, oportet scripturæ locum supplere audacia.

XIII. Denique quid de hac gratia sufficiente sentiendum sit hinc potest iudicari quod ipsi Arminiani parum sibi constant, & sic eam astruunt vt destruant: Nam qui dicunt & magna vi asserunt Deum dare omnibus gratiam sufficientem, iidem subinde dicunt Deum paratum esse eam dare omnibus, quasi vellet quidem dare omnibus, sed stare per hominem ne id fiat. Tum iidem docent neminem conueri sine gratia speciali: quo dicto fatentur gratiam generalem non esse sufficientem. Denique cum gratiam illam diuidunt in sufficientem mediatè & sufficientem immediatè, fatentur aliquam gratiam esse sufficientem mediatè, quæ sit insufficientis immediatè: pluresque faciunt gradus gratiæ sufficientis, qui quot & quales sint nemo eorum explicauit.

---

*Refelluntur argumenta quibus Arminiani gratiam  
vniuersalem sufficientem tuentur.*

CAP. XLI.



Arminianorum pro gratia sufficiente vniuersali & salutari argumenta eadem fere sunt cum iis quæ pro libertate arbitrij in homine irrogenito solent afferre: quæ cum abundè sint refutata cap. 34. in excutiendis paucis quæ pro gratia sufficiente omnibus communi frequentius vsurpant haud magnus erit labor.

I: Pugnant loco Apostoli ad Romanos capite. 1.

vers. 19. vbi. Paulus de Gentibus sic loquitur. *Quod de Deo cognosci potest manifestum est in ipsis, Deus enim eis manifestum fecit.* Hic sanè nulla mentio gratiæ sufficientis, quam Arminiani censent esse supernaturalem: hic enim Apostolus loquitur de luce naturali, & de qualicunque cognitione Dei ex creaturis, quæ potest haberi sine supernaturali gratiâ: per quâ Apostolus non dicit hominem habere vires credendi in Christum, vel posse se disponere aut præparare ad regenerationem: sed tantum dicit potentiam & diuinitatem Dei ex creatione ab eis perspicui, ut sunt inexcusabiles. Sunt autem inexcusabiles non quod gratia ad salutem mediâtè vel immediâtè sufficiente abusi sunt, sed quòd luce naturali non sunt vsi quo vsque potuerunt, & insitam lucem præfocare conati sunt.

II. Obtendunt eiusdem Apostoli verba cap. 2. v. 14. *Gentes quæ legem non habent, naturâ quæ legi sunt faciunt.* Sed neque hic locus potest trahi ad stabilendam gratiam sufficientem, quam sectarij volunt esse supernaturalem. Agit enim tantum de impressionibus naturalibus æqui & boni & de actionibus externis ciuilitè honestis, quæ fiunt duce natura. Gratiæ enim mentionem nullam Paulus hic facit. Porro possunt fieri quæ sunt legis etiam ab eo qui legem violat. Opere enim externo potest facere res lege præceptas, nec tamen eas facere eo modo & in eum finem quem lex postulat: id est cum fide & ad Dei gloriam.

III. Non est ad rem, illud quod obijciunt ex cap.

14. A pto-

14. Actorum v. 17. vbi Paulus de populis Ethnicis sic loquitur. *Quaquam Deus non passus est se esse experiri testimonij.* Hoc testimonium perperam censent esse gratiam aliquam sufficientem, salutarem & supernaturalem, & legem cordibus naturaliter insculptam, quæ esset pædagogus ad Christum. Nam quale sit hoc testimonium Apostolus sequentibus verbis explicat, dicens Deum Dare cœlitus pluuias ac tempora fructifera, & implere corda cibo & gaudio. De gratiâ supernaturali nulla mētio. Legem verò seu scriptam seu cordi impressam nego posse esse pædagogum ad Christum iis qui Christum prorsus ignorant. Lex enim non ducit nos ad rem ignoram. Sed postquam Christi gratia oblata est per Euāgelium, ad eam amplectendam lex minis & terrore compellit: vt quod per legē non possumus assequi, inueniamus in Christo. Idcirco lex moralis poterat Israëlitis esse pædagogus ad Christum, quia lege ceremoniali Christus eis adumbrabatur, & prophetiis præmonstrabatur.

IV. Illud verò Esaiæ 5. 4. *Quid amplius faciendū fuit mea vinea quod non fecerim*, quo sensu debeat accipi docuimus cap. 37. Nihil sanè hinc potest exculpi pro gratia sufficiente quæ etiam communis sit iis quibus verbum Dei nunquam prædicatum est: Cum per hanc vineam intelligantur Iudæi quibus verbum Dei prædicabatur, & media ad salutem abundè suppeditabantur. Nec Esayas agit de gratiâ quæ datur singulis sed quæ toti genti simul sumptæ. Media verò quæ Esayas enumerat esse externa non verò interna ex eodem loco apparet, vbi Deus comparatur.

vinitori qui plātat vineam in solo vberi, fossam circumducit, sepem prætendit, prælum & turrin struit: at vegetationem & vitalem succum non infundit, nec solem aut tempestiuam pluuiam immittit. Deus ergo dicit se suppeditauiſſe quæcunque extrinsecus poſſunt adminiſtrari ad conuerſionem: Nam diſpoſitiones internas homo debet afferre de ſuo: Nec Deus tenetur has diſpoſitiones culpā hominis amiſſas ei reſtituere. Ibidem quidem Deus dicit, *expectaui vnas ecce autem labruſcas*. Sed expectatio humano more Deo tribuitur: expectare aliquid Deus dicitur ab homine cum ab eo aliquid expoſcit: & cum differt pœnam ſi quando fruſtus debiti non proferuntur, nec ſtatim adhibita ſecuri infelicē ficum ſtirpitus excindit, vt Chriſtus docet Luc. c. 13. v. 7. 8. & 9.

V. Frequenter ingerunt rancidum illud & uſu detritum, *habenti dabitur*, Matth. 25. 29. Quibus verbis volunt Chriſtum innuere, Deum cumulaturū maiori gratia cum qui luce naturali bene uſus fuerit. Nempe ſic imponunt ſcripturam equuleo vt ab inuita quidlibet extorqueant. Chriſtus ibi aſſert parabolam talentorum, & dicit talentum quod ſeruus nequam defoderat ei ablatum eſſe, & datum ſeruo qui quinque talentis geminatis heri rem auxerat: *Nam* (inquit) *habenti dabitur & augebitur: ei autem qui non habet, etiam quod habet adimetur*. Per talenta intelliguntur Dei dona, præcipuè verò Dei cognitio per Euangelium: quam cognitionem dicitur defodere, qui detinet veritatem in iniuſtitia, & premit veritatem cognitam. Hoc ergo talentum non poteſt eſſe

gratia sufficiens quæ infidelibus & irrogenitis contingat: sed gratia quam Deus seruis suis domesticis impetratur. Nec per *habentem* intelligitur homo in puris naturalibus, aut Ethnicus aliquis instructus gratia sufficiente, sed homo instructus cognitione Euangelij, quæ in eum finem alicui datur, ut ædificatio proximum eam latè spargat: & ut instar fœnebris pecuniæ quotidianis incrementis augeatur.

VI. Arnoldus pag. 368. hæc habet. *Est conueniens diuina iustitia & bonitati, ut omnibus pro quibus Christum in mortem dedit & à quibus fidem exigit, dei vel paratus sit dare media ad fidem necessaria: ita scilicet ut ex parte illius nihil obstat, quo minus omnes ad fidem perueniant.* Iam respondimus Deum non exigere fidem in Christum ab omnibus, sed ab ijs demum quibus Euangelium annuntiatur. Ijs verò omnibus quibus Euangelium annuntiatur, non tenetur dare media ad fidem necessaria, quia homo illa media suà culpa amisit. Deus enim exigens ab homine quod debet non tenetur restituere homini vires implendi quod iubet, quandoquidem homo has vires suà culpa amisit.

Ira quidem Dei manet super incredulis, ut subiicit Arnoldus, at nemo non futurus est incredulus, nisi Deus eius cor spiritu regenerationis immutet. Nouum sane cudit Euangelium Arnoldus dum putat quenquam sine spiritu regenerationis posse credere Euangelio.

*Arminianorum cum Sempelagianis consensus  
demonstratur.*

## CAP. XLII.

**S**cripsit Augustinus, aduersus Pelagium, Celestium & Iulianum libros quibus asseruit sanam fidem super peccato originis, prædestinatione, gratia & libero arbitrio, & electione secundum propositum. Eius argumentis ex sacra scriptura depromptis quasi validissimis arictibus Pelagianismus concussus & tandem euersus nunquam postea caput erexit. Debemus ergo, post Deum, viri tanti ingenio & industriæ quod exitialis hæc pestis ab Ecclesiæ visceribus depulsa est.

At Satan suo conatu excussus alias technas commentus est, per quas sic propugnat gratiam vt occultè impugnet: Non defuerunt enim varijs in locis, præcipuè verò in Aquitania & in tractu Massiliensi homines qui cum se à Pelagio alienos esse profiterentur, Augustini tamen scripta carperent, & eius doctrinam de electione absoluta insectarentur. Sic sopiri conscientias vt virijs indormiant, sic laxari habenas sceleribus, sic homines agi præcipientes in desperationem. Præcepta, exhortationes, minas esse superuacaneas si electorum numerus Dei consilio est definitus: aut si Dei decreto immutabili

hi ad fidem & salutem, illi ad damnationem sunt destinati : Denique liberum arbitrium constringi vinctulis necessitatis, quandoquidem sic electi non possunt non perseuerare. Censebant igitur mediam viam insistendam inter Pelagium & Augustinum. Docebant enim peccatum Adami fluxisse in posteros. Et humanam naturam esse corruptam viribusque naturæ ad salutem non posse perueniri. Sed gratiam quæ medeatur naturæ omnibus presto esse: & omnes, siue per legem naturalem, siue per scriptam, siue per Euangelium sic vocari, vt cuilibet liberum sit gratiam oblatam amplecti vel respuere, credere vel non credere. Christum enim omnibus hominibus impetrauisse reconciliationem. Deum vero æterno eos elegisse quos præsciuit credituros in Christum & in fide perseueraturos. Itaque numerum electorum non esse Dei decreto definitum. Sed emenso demum vitæ cursu certam esse electionem.

Hi sunt qui vulgò Semipelagiani appellantur. Differentes à Pelagio quod naturam peccato originali esse deprauatam agnoscunt: & quod naturam discernunt à gratia. At iisdem occulto Syncrētismo fauent Pelagio: quippe qui naturam volunt sic esse rem diuersam à gratia, vt tamen gratiam velint æquè latè patere ac natura. Tum gratiam talem statuunt cuius vsus à libero arbitrio dependeat.

Horum mentem qui pernosse voluerit, legat Epistolam Prosperi ad Augustinum, insertam septimo tomo operum Augustini, dignissimam sanè quæ legatur cum cura. Cum enim esset summus admira-



tor Augustini, & ab his Semipelagianis hoc nomine incēsseretur, poscit opem Augustini, & argumentis quibus se aduersus eos se tueatur cupit instrui. Ibi sane planè agnosces Arminianam venam, & Arminianissimum graphicè depictum. Quod nisi titulus Epistolæ & ipsa Epistola authorem & sæculum testaretur, iurares esse Epistolam alicuius qui Arminianorum aculeis compunctus & malè acceptus, opem doctioris imploret. Vt iam non possit esse dubium ex quibus lacunis sua hauserint, & quos veterum hæreticorum sibi imitandos proposuerint. Non multum morabor lectorem festinantem, si ipsorum Semipelagianorum verba protulerim, vt ab ipso Prospero recitantur.

*Hæc est (inquit Prosper) ipsorum definitio ac professio, omnem quidem hominem Adam peccante peccasse, & neminem per opera sua sed per Dei gratiam regeneratione saluari: vniuersitamen hominibus propitiationem quæ est in Sacramento sanguinis Christi sine exceptione esse propositam: vt quicumque ad fidem & ad Baptismum accedere voluerint, salui esse possint. Qui autem credituri sunt quique ea fide quæ deinceps per Dei gratiam sit. iuuanda mansuri sunt Deum præscisse ante mundi constitutionem: & eos prædestinasse in regnum suum quos gratis vocatos dignos futuros electione & de hac vita bono sine excessuros esse prauiderit. Ideoque omnem hominem ad credendum & operandum diuinis institutionibus admoneri, vt de apprehendenda vita æterna nemo desperet: cum voluntarie deuotioni remuneratio parata sit. Hoc autem propositum vocationis Dei quo vel ante*

*\* Id est mundi initium, vel in ipsa \* conditione generis humani creatione*

eligendorum & reijciendorum dicitur facta discretio, ut secundum quod placuit creatori alij vasa honoris alij vasa contumeliae sint creati, & lapsis curam resurgendi adimere, & factis occasionem torporis asferre, eo quod in vitamque partem superfluous labor sit, si neque reiectus vlla industria possit inirare, neque electus vlla negligentia possit excidere. Quoquo enim modo se egerint non posse aliud erga eos quam Deus definiuit accidere, & sub incerta spe cursum non posse esse constantem: cum si aliud habeat praeordinantis electio: cassa sit annitenti intentio. Remoueri itaque omnem industriam tollique virtutes si Dei constitutio humanas praeueniat voluntates: & sub hoc praeordinationis nomine fatalem quandam induci necessitatem. Hæc Semipelagiani, plane Arminianismo ἐμπερὶν & eiusdem notæ.

Ponderentur quoque sequentia: Definiunt ad hoc salutis donum omnes homines vniuersaliter siue per naturalem, siue per scriptam legem, siue per Euangelicam predicationem vocari: ut & qui voluerint fiant filij Dei, & inexcusabiles sint qui fideles esse noluerint: quia iustitia Dei in eo sit: ut qui non crediderint pereant: bonitas in eo appareat si neminem repellat à vita, sed indifferenter vniuersos velit saluos fieri, & in agnitionem veritatis venire. Pro vniuerso autem humano genere mortuum esse Dominum nostrum Iesum Christum: & neminem prorsus à redemptione sanguinis eius exceptum, etiam si omnem hanc vitam alienissima ab eo mente pertranscat. Et paulo post. Non acquiescunt praeordinatum electorū numerum nec augeri posse nec minui: ne locū apud infideles ac Prædicationis negligentes exhortantium incitamenta non habeant, &c. electionē Dei secundum præscientiam receperunt, ut ob hoc Deus alios vasa honoris alios

*contumelia fecerit, quia fidem unusquisque praevidet.* Hic quidem merus est Arminianismus, nisi quod Arminiani sua speciosius vestiunt & conquisitis coloribus fucant, & parcius utuntur voce meriti, quam nō modo Semipelagiani sed etiā Orthodoxi (verūm alio sensu quam hodie Pontificij) frequenter vsurpabant. Denique sic agunt ut qui pridianas & iam reiectas dapes nouo condimento asperso conuiuiis reponunt.

Huic Epistolæ subiecta est altera Hilarij Arelatensis Episcopi ad Augustinum, eiusdem argumenti, ubi Semipelagianis hæc tribuit. *Deus fidem eligit in præscientia ut quem crediturum esse præscit ipsum elegerit cui spiritum sanctum daret, ut bona operando etiam vitam æternam consequerentur.* Illam præscientiam sic accipiunt ut propter fidem futuram dicendi sint præsciti: nec cuiquam talem dari perseverantiam à qua non permittitur prævaricari, sed à qua possit sua voluntate deficere & infirmari. *Quicquid libet donatum sit prædestinatus id posse & amittere & retinere propria voluntate contendunt.* Quod tunc falsum esset si verum putarent eam quosdam perseverantiam percepisse ut nisi perseverantes esse non possint. Inde est quod & illud pariter non accipiunt, ut eligendorum reiiciendorumque esse definitum numerum velint. Nempe hi sunt quorum auctoritas plus fuit Arminio quam Augustini, immo quam Pauli. Sua enim omnia à Semipelagianis liberaliter & manifeste mutantur.

Sententia

*Sententia Arminianorum de modo operationis gratiæ, &  
de vi quæ irresistibilis ab eis dicitur. Et de suasionem morali.  
Nec non de viribus & actu credendi.*



## CAP. XLIII.

**Q**VI sint arcani motus Spiritus sancti, quæ efficacia, quibus gradibus regenerationem promoueat: quæ impedimenta ab homine obiciantur: quis sit conflictus carnis cum spiritu, & lucta noui hominis cum veteri, qui vt alter Esau iugum subinde excutit, & opus Dei quantum potest moratur, non puto posse à quoquam penitus cognosci, nec id ipsum perexiguum quod experimento cognoscimus idoneis verbis explicari. Merito sanè Christus Ioh. 3. spiritum authorem regenerationis comparat vëto, qui quò vult spirat, & cuius sonus auditur, sed nescitur vnde veniat, nec quò vadat. Itaque res est cuius experimentum magis est optandum, quàm explicanda efficacia. Multi sunt qui dum rimantur naturam operationis Spiritus sancti, ipsi aguntur spiritu reprobo. Et dum philosophantur super efficacia spiritus pacis, ipsi proni ad discordiam & inflati superbia satis produnt se agi illo spiritu qui effaciter agit in filiis rebellionis Ephes. 2.

Hæc quanquam ita sint. Et tutius sit Deum vocantem sequi quàm inquirere qua vi nos vocet & trahat, perucax tamen temeritas hominum quibuscum nobis

res est, nos cogit ad ista descendere. Nouatores enim ex Iesuitarum Hispanorum lacunis hauserunt nescio quas voces resistibilitatis & irresistibilitatis, quibus ingenia implicant: Quorum quidem scopus est instruere voluntatem humanam viribus quibus resistere possit Spiritui sancto, quantūvis efficacia in cordibus operetur: vt hoc pacto homo debeat suis viribus suam conuersionem, & salutis nostræ fiducia nixa siculneo adminiculo nuter, & in desperationem prolabatur.

*Collatio Hag. pa. 304. negat propositum Deo decreitūque esse, absolute hunc aut illum conuincere. Armin. in Perk. pag. 199. Fallum est Deū simpliciter & absolute velle vt alij credant & perscuerēt, &c. Quartus Articulus Re-monstr. in Collat. Hag. si: modus operationis gratiæ non est irresistibilis.*

Diserta sunt Arnoldi verba in Tilenum pag. 125. *Negatur discrimen gratiæ vocantis non tam in hominum arbitrio quàm in Dei voluntate positum esse.* Et vñ ore omnes asserunt Deum nō velle absolute vt hic aut ille credat, sed dare quidem gratiam sufficientem viresque credēdi, quibus homo pro suo arbitrio possit vti vel non vti: Et gratiam, vimque Spiritus sancti agentis in cordibus, etiam in sanctissimis quibusque & in electis, esse resistibilem, eiusque finalem effectum posse ab homine impediri: vnde colligunt electos posse reprobari. Vires quidem credendi dari irresistibiliter. Et intellectum sic cognitione imbui & affectus excitari, vt resisti non possit, at actum ipsum credendi dari resistibiliter contendunt, & esse penes liberum arbitrium vti gratia vel non vti; credere, vel non credere. Non enim putant libertatem arbitrij posse consistere, nisi possit electus finaliter resistere gratiæ & sic reprobari. Arnoldus contra Bogermannum pag. 263. & 274. *Positis omnibus operationibus gratiæ quibus ad conuersionem in nobis efficiendam Deus utitur, manet tamen ipsa conuersio ita in nostra potestate libera, vt possimus non conuerti, id est nosmetipsos vel conuincere*

# DE CONVERSIONE.

vel non conuertere Effectum enim gratiæ docent pendere  
ab hominis arbitrio: & liberū arbitrium esse partialem  
causam conuersionis: vsque adeo vt Greuinchouius in  
Amesiū p. 279. ausus sit hæc scribere *Dices in hoc operandi* Greuinc.  
p. 198. d.  
204. &  
208. &  
279.  
*modo Deum quodammodo à voluntate hominis dependere: Con-  
cedo, quoad actum determinationis liber.e.* Hoc quidem est  
Deum conspuere, & cum subijcere humano arbitrio.  
Nec dubitant dicere Deum seriò cupientem vt hic aut  
ille saluetur, voto suo & desiderio frustrari, ideoque do-  
lere & grauiter ferre, & id ipsum quod iurauerat se fa-  
cturum non perficere: vt supra à nobis probatum est.  
His nempe tibicinibus viri boni Christianam fidem  
nutantem suffulciunt.

Modum verò quo gratia Dei eiusque spiritus in no-  
bis operatur, hunc esse definiunt. Dicunt intellectum  
hominis illustrari irresistibiliter, & eius affectus irresi-  
stibiliter excitari & sensu gratiæ affici: sed assensum vo-  
luntatis manere liberum. Idem censent Deum dare ir-  
resistibiliter homini vires credendi & se conuertedi, at  
actum ipsum credendi & se conuertendi posse fieri vel  
impediri ab humana voluntate: & sensum irresistibili-  
ter dari, sed non assensum: volunt enim inesse volunta-  
ti essentialem indifferentiam & indeterminationem ad  
gratiam recipiendam aut respuendam, quasi posita in  
æquilibrio neutram in partem vergeret: quippe quæ  
lapsu Adami nulla spiritualia dona amiserit, quia ne-  
que ante lapsum hæc dona habuit. Collatores Hagien-  
ses pag. 307. *Etsi statuendum sit infusionem virium fieri per  
vim irresistibilem, vt ne res eat in infinitum: tamen fieri non  
potest vt actus ipse, hoc est ipsum credere & conuertere irresi-  
stibiliter efficiantur.* Coll. itaq.  
p. 272. il-  
lumina-  
tionē in-  
tellectus  
fieri per  
vim irre-  
sistibilem  
in cōfesso,  
est.  
In VVa-  
lacr.  
pag. 66.

Fidem verò actualem, actumque credendi planè negant esse donum Dei. Nam etsi id aliquando præ se ferunt, & plenis buccis intonant fidem esse à Deo; toto tamè disputationis filo apertè produnt se alienissimos esse ab hac sententia. Negant enim fidem infundì à Deo cordibus hominum, sed Deum dare vires facultatemque credendi. Nec Deum aliter actum credendi dare, quàm quia mēs imbuitur cognitione, & affectus excitari voluntatem extimulant, quod quidem non est dare fidem sed ad fidem instigare: Immo ex eorum sententia certum est Deum non dare vires credendi in Christum, sed tantum illustrare mentem vt cognoscat Christum, & appetitus illicere blanda suasionem. Nam qui tantum lucem præfert & viatorem hortatur ad incedendum, non dat ei vires incedendi. Collatorum Hagiensium Arminianorum verba hæc sunt pag. 275. *Negamus fidem appellari donum Dei respectu actualis infusionis in corda nostra, sed ita appellatur respectu potestatis perueniendi ad ipsam.* Hoc quidem est circuitione non vti & fatis apertè proloqui.

Iidem p. 306. profitentur se credere actum ipsum credendi esse à Deo, mox tamen quod concesserant retrahunt: loca enim scripturæ omnia quibus conamur probare fidem actumque credendi esse à Deo, euertūt: Nostri id probauerāt verbis Christi Ioh. 6. v. 65. *Nemo potest venire ad me nisi ei donetur à Patre.* Respondēt Arminiani, locum Iohānis nō agere nisi de facultate ea qua quis potest credere. Quocirca ad rem nō facere, quādoquidem probandum est ipsum illum actum credendi esse donum Dei. An vellent id à nobis probari, & argumētis euinci,

si id crederent & serio profiterentur? nempe simulata erat ista confessio, ideoque eam paulo post rescindunt & reuocant. Ibidem locum illum eximium Apostoli Ephes. 2. *Gratia seruati estis per fidem, idque non ex vobis. donum Dei est*, quo & salus & fides donum Dei appellantur, peruersè corrumpūt. Negant enim fidem ibi vocari donū Dei, sed salutem. Vestram fidem, sectarij? quid vestra hoc interest, aut cur tantopere metuitis ne fides ab Apostolo donum Dei appelletur? Hoc quidem est summum cacoethes, aut aperta confessio qua produnt se sentire fidem non esse donum Dei. Parilicentia ibidem ludunt in deprauandis verbis Apostoli ad Timotheum Epist. 2. cap. 2. v. 25. *ecquando det eis Deus vt resipiscentes agnoscant veritatem*. Nostri attulerant hunc locum vt probarent conuersionē actumque resipiscendi esse à Deo: at sectarij quasi per ludibriū reiiciunt hunc locum, vt qui de resipiscencia loquatur vt de re incerta, & quæ potest contingere: Nimirum non placet Arminianis actum conuersionis esse donum Dei. Et quamuis verbis ambiguus & fallacibus dicant eam à Deo dari, censent tamen nullo scripturæ loco id posse probari: Cū tamen scriptura dicat, *Deum operari in nobis efficaciter velle & perficere*. Phil. 2. *& datum nobis esse in Christum credere*. Philip. 1. Sane hac verba velle, perficere, credere, designant actum ipsum volendi & credendi, non verò vires quibus possumus velle, aut non velle, credere aut non credere.

Sed nulla alia in re plus aperiunt mentē suam quā dum negant fidem cordibus infundi à Deo, sed tantum homines ad fidem instigari & allici blanda suasiōe &



inuitatione, quam vocant moralem, & resistibilem, eodem modo quo puer trahitur oblato pomo, aut porcus proposito fursure. Hoc si verum est, & si efficacia Spiritus sancti non aliter fidem imprimit quàm suadendo, planum est fidem non esse donum Dei. Neque enim qui suadet credere dat fidem, si tantum suadet. Arminius in Perkinsum pag. 57. hæc habet, *fidem & penitentiam nisi dante Deo haberi non posse, planissimum est in scripturis. At eadem scriptura, immo & natura viriusque doni clarissimè docet dationem illam fieri per modum suasionis* Hæc quidem sunt ἀπορία: nam per modum suasionis nihil datur: qui me ad currendum instigat, hoc ipso nec dat ipsum currere, nec vires currendi. Idem pag. 211. *Deus statuit saluare credentes per gratiam, id est lenem & suauem liberoque ipsorum arbitrio conuenientem seu congruam suasionem: non per omnipotentem actionem seu motionem cui resistere nec velint. nec possint, nec velle possint,* Vorstius Parasc. ad Piscatorem pag. 4. *Quæ Deus libere prorsus & contingenter à nobis fieri vult, ea potentius aut efficacius quàm per modum voti & desiderij velle non potest.* Collatores quidem Hagienfes Arminiani; in vindicatione sui quarti articuli, profitentur nolle se definire quomodo Deus in nobis agat, nec in hæc arcana, velle irrumperè: iidē tamē loca omnia scripturæ quæ dicunt nos trahi à Deo, & Deum efficaciter & potenter in nobis agere, restringunt ad meram suasionem & illectionem per modum obiecti. Et Greuinchouius pag. 232. & 233. nullam aliam quam moralem motionem agnoscit.

Collat.  
Hag. p.  
283.

Hoc etiam est inter scita Arminianorum, hominem viuificari primò ministerio Legis, postea verò ministe-

sterio Euāgelij: censent enim aliquam viuificationem esse sine fide Christi. Hanc etiam laciniam assuunt, neminem vocari extrinsecus, qui non vocetur intrinsecus, & liberum esse homini aperire Deo pulsanti vel non aperire.

Et si autem gratiam Dei nullam esse censent cui non possit resisti ab homine, fatentur tamen Deum aliquos ita certo vocare vt infallibiliter sequantur: nempe eos quos modo & tempore congruo sic vocat & tali efficacia & lucis mensura vt certissimè cōuertantur. Arminius p. 57. in Perkinsum, internā Spiritus sancti suasionem ait esse in omnibus quibus verbum prædicatur: Hanc suasionem esse duplicem, vnam sufficiētem, alteram efficacem. Quasi suasio possit esse sufficiens quæ non est sufficientis efficacix. Pergit, *Illam qua potest velle & credere & conuerii cūm adhibetur: Illam qua vult, credit, & conuertitur cui accommodatur*: Censet enim eum in quo Spiritus Dei non agit efficaciter, posse tamen credere & se conuertere, etiam si nunquam conuertatur. Addit; *Illa adhibetur decreto prouidentia, cum certa præscientia fore vt reijciatur à libero arbitrio hominis: ista ex decreto prædestinationis administratur cum certa præscientia fore vt re ipsa velit, credat, & conuertatur ille cui accommodatur & adhibetur*: propterea quod ita accommodatur prout Deus nouit congruum esse persuadendo & conuertendo illi cui adhibetur. Eadem habet pag. 245. & Arnoldus in Tilenum pag. 79. Denique familiare est Arminianis docere, quosdam vocari à Deo modo incongruo, quo qui vocatur nunquam sequuntur, et si possunt sequi: quosdam modo & tempore congruo, quo qui vocantur certissimè sequuntur, idque ex

decreto prædestinationis quæ falli non potest. Quo dogmate orsa à se detexunt, & irresistibilitatem quam totis viribus impugnant, apertè stabiliunt.

Hæc est illa ingeniorum vstrina & laniena atque tormentum quo homines infelicitè acuti & se & alios sic cruciant, vt iam vocibus irresistibilitatis, & Physicæ necessitatis, & suasionis moralis non modo scholæ Belgij perstrepât, sed & plateæ, conltrinæ, & popinæ. Minori labore Augiæ stabulum purgaueris, quàm hanc errorum Lernam: quorum tamen bonam partem superioribus capitibus excussimus: Quod superest deinceps, cum bono Deo, excutietur.

*Sententia Ecclesiæ Orthodoxæ super conuersione hominis  
& conuersionis modo ac certitudine.*

CAP. XLIV.

**S**ententia nostra non est ea quàm nobis affingunt sectarij, quos malè habet quod non loquimur absurda & impia, vt in noui inuehendi campus latior eis aperiatur. Arminiani Hagienſes in defensione quarti articuli nobis hæc affigunt, *Deum velle quosdam seruare, sine assentiatur ipsorum liberum arbitrium sine non assentiatur.* Hæc fœda est calumnia. Quemcunque enī Deus seruat, eius voluntatem flectit vt sponte agat, & Deo obsequatur. Ibidem pag. 268. sic nobiscum agut quasi doceremus fidem à Deo in nobis sine nobis efficere & qua

& quasi doceremus voluntates nostras cogi, & nos trahi vt truncos in conuersione. Hæc illi suo more nobis tribuunt, satis quidem liberaliter: Immutant genuinum schema quæstionis, gnari nostram sententiam non posse euerri nisi prius immutetur.

Sic ergo statuimus: Electionem Dei esse immutabilem, & scriptos in libro vitæ non posse induci, nec Dei decreta conuelli. Quapropter quoscunque Deus elegit ad salutem, necessario elegit ad fidem & respiscētiā, quandoquidem sine his non est salus. Vnde fit vt impossibile sit quin electi fidem adipiscantur & conuertantur. Quod cum fiat in aliis citius, in aliis tardius, & diuersis horis diei ad vineam Domini vocentur operarii, certum est tamen eum non fuisse electum qui saltem in morte non credidit Christo. Hoc nobis est firmamentum veritatis quod nulla arte subrui, nulla vi labefactari potest. Quicumque vocantur ex proposito certissime sequuntur, ne Deus proposito suo excidat. *Et quoscunque Deus predestinauit eos vocauit, quoscunque vocauit iustificauit, quoscunque iustificauit glorificauit* Rom. 8.

Si ergo necesse est vt omnes electi ad fidem Christi perueniant, huius certitudinis firmamentū non est humanum arbitrium sed Dei voluntas. Fluxo enim & instabili fundamento res immutabilis & æterna non potest inniti.

Non tamen dicimus hominem trahi à Deo vi irresistibili. Est enim vis irresistibilis cui cum velis resistere, non possis. Quomodo enim traheremur gratia Dei irresistibili, cum id ipsum quod nolumus Deo resistere, eique sponte morem gerimus, sit ipsa Dei gratia? Sic cum cu-

piamus omnes liberè & tamen necessariò esse felices, nemo tamen nisi impos mentis dixerit nos ad id viresistibili compelli. Non dicimus electos quantumcunsiue velint resistere Deo vocanti, tamen non posse: Sed dicimus electos certò & infallibiliter & sponte secuturos tandem Deum vocantem, vt electio Dei impleatur. Nempe hic status est quæstionis: *An possit fieri vt electus nunquam conuertatur & Deo vocanti ad finem vsque resistat: aut gratiæ Dei sic resistat vt ea finaliter excidat.*

Neque verò hic opus est anxie disputare an etiam cum electus nò resistit gratiæ, possit ei resistere, & nolle quod vult. Nobis nò vacat esse tam acutis. Sufficit enim ad defensionem certitudinis electionis, statuerè impossibile esse vt electus nunquam conuertatur, & finaliter resistat: & necesse esse vt electus tandè aliquando Deo vocanti sponte obsequatur. Hoc si obtinemus facile patimur Arminianos vmbratili velitatione in otio confingere, & disputare an possit fieri quod nunquam factum est nec fiet: & an tortores potuerint frangere crura seruatoris, quæ impossibile erat frangi, quia De decretum obstabat. Hæ enim sunt vitiligationes hominum otiosorum, qui ipsi sibi facessunt negotium v aliis creent molestiam. Miro & arcano modo voluntates humanæ sic flectuntur à Deo, vt ea ad quæ agend: vires naturales suppetunt impossibile sit vt homo veli agere: & cum naturaliter possit homo resistere, impossibile tamen sit vt velit finaliter resistere: Et ea cert & inuitabiliter accidunt quæ fiunt ab hominibus volentibus & prudentibus, & habetibus naturaliter vires resistendi. Non ergo disputamus de viribus resistene

gratiæ, quam sanè inesse piis & fidelibus nostro damno sæpe experimur: sed de impossibilitate euentus: & per-  
tendimus fieri non posse vt electus finaliter resistat, &  
per incredulitatem ad finem vsque vitæ Deo obni-  
tatur.

Ea verò accidere necessariò & sic decernente Dei  
prouidentia, quæ fiunt ab hominibus volentibus & si-  
ne coactione, & sine physica necessitate, & impulsu  
causæ externæ vim faciētis humano arbitrio, scriptura  
clamat & experiētia testatur. Nam Christi mortē à Deo  
fuisse decretam, & nō potuisse fieri quin decretum Dei  
impleretur ipsi Arminiani agnoscunt, cum tamē mors  
illa contigerit scelere Iudæorum qui ad hoc facinus  
sponte sua agebantur. Prouerb. 21. Deus flectit corda  
regum & quo vult ducit non secus ac aquilex riuulum  
παροχνητέει, Sine coactione Deus subito immutauit  
animum Esau, Genes. 33. Et Saulis, Samuel 19. com. 23.  
Et Ægyptiorum Psal. 105. v. 25. Quæ cum ineuirabiliter  
acciderent, sponte tamen fiebant & non per vim irresi-  
stibilem, & illibata humani arbitrij libertate. Quod si  
hoc verum est in improbis, quantò magis in probis &  
fidelibus? An trahuntur inuiti quibus Deus dat cor car-  
neum ex lapideo? An ij quibus Deus promittit se effe-  
cturum vt ambulent in viis Domini? Ezech. 36. v. 37.

Resistibilitatis vero & irresistibilitatis voces, quan-  
tumcumque inficetas & absonas facile admitteremus  
nisi alio detorquerētur quam ad id quod sonant. Nam  
resistibile id vocant quod potest impediri & auerti &  
superari: cum tamen aliud sit resistere aliud superare.  
Vis irresistibilis est in oppugnabilis, non vero iusupera-

bilis: resistentia denotat pugnam non victoriam. Nam resisti ab homine efficaciam spiritus, nemo hactenus quod sciam, negavit. Nec quisquam est cuius in animo pietas tam altè sedeat, qui non sentiat intrinsicam luctam, & contrariis sæpe cupiditatibus distrahatur. At ut electus ita resistat gratiæ ut eam aut nunquam admittat, aut semel admissam, penitus ac finaliter excutiat, nihilo plus fieri potest quàm Dei decreta possunt rescindi. Neque enim fidei vim insuperabilem quam Deus dat suis electis ponimus in gradu fidei, & in perfectione ipsius virtutis ac robore: sed in certo Deo auxilio quod suis electis ex proposito suppeditat. Nulla enim fides est tam proeecta aut roborata quæ non labascatur si Deus auxilium suum tantisper subduxerit. Non secus ac cum bimulus puer primum ponens vestigia, patris manu sustentatur: is quidem etsi tremulus, certò tamen non cadet, quia pater firmiter apprehensum sustinet. Quod si Deus interdum patitur electos titubare & labi, eosdem mox erigit: unde fit ut cautiore sint, & Dei curam magis agnoscant, & ex ipso casu vires colligant. non secus ac cum ossis fracti partes sic coalescunt de novo, & callus obducitur, ut ea parte qua fractum fuit firmitus fiat quàm antè fuerat. tum si fides sit debilis, sed tamen seria & luctans cum dubitationibus, subleuat pater benignus infirmitates nostras, neque arundinem quasi satam coterit. Nam quemadmodum lippi & lusi intuentes serpentem æneum, non minus sanabantur quam qui erant oculis integris & perspicacibus: quia non sanabantur vi facultatis suæ visuæ, nec per oculorum suorum perspicaciam, sed per vim diuinam quam

Deus per hoc serpentis instar exerebat: sic non saluamur merito perfectionis nostræ fidei, sed Dei beneficio in Christo redemptore.

Quæ verò & quanta sit vis illa flexanima spiritus sancti agentis in cordibus electorum, & quibus momentis & gradibus opus suum promoueat, nequidem explicare possunt ij ipsi qui eam sentiunt: Non secus ac mulier grauida ignorat quibus modis foetus vitalis conformetur, & crescat. Esse tamen eius maximam vim Scriptura testatur, vt deinceps probabitur.

Quantacumque autem sit hæc efficacia, non tamen Deus nos trahit vt stipites sed vt homines. Trahit nolentes vt velimus: prosequitur volentes ne frustra velimus. Et dum volentes facit de nolentibus, libertatem voluntatis non modo non tollit, sed & restituit: quia vltro & cum gaudio seruire Deo libertas est. Incrementa autem fidei & regenerationis sic promouet, vt plerunq; non sentiamus nos crescere, sed post aliquod temporis spatium agnoscamus nos creuisse: non secus ac plantas non videmus crescere sed creuisse. Verbum Euāgelij aure acceptum & corde conceptum modus est ordinarius quo Deus afficit corda, & regenerationem inchoat, & promouet, ei vires occultas inspirans erga eos quos seruare decreuit: Quocirca à Petro semen incorruptibile appellatur, 1. Pet. 1. A Paulo potentia Dei ad salutem: Rom. 1. Ab Apostolo ad Hebræos, cap. 4. & initio Apocalyp. gladius anceps & peracutus. A Ieremia cap. 23. v. 29. ignis & malleus conterens petram, quia duritiem cordium frangit & cogitationes captiuas ducit ad obedientiam Christi 2. Cor. 10. 5. Cuius



nouæ vitæ scintillas cælitus cordibus illapasas flabello Spiritus Deus suscitatur, & gemitus ἀλαλήτης elicit, occultis aculeis lancinans præcordia, mentem illustrans, appetitus regens, voluntatem flectens, quam etiam, *velit* nolit Arminius, necesse est refingi, & veluti lignum curuum in contrariam partem intorqueri: quia non est (ut volunt sectarij) ad bonum & malum ἀμφιπρόπτης & pariter procliuis, sed tota in malum propendet in hominibus irrogenitis.

Hæc mutatio cum non possit fieri nisi per contrarios habitus, necesse est vitiis naturaliter insitis succedant contrarij habitus fidei, spei, charitatis, humilitatis, patientiæ, &c. qui habitus non acquiruntur usu & actionibus ut censent Arminiani in Vvalachrianos pag. 65. sed à Spiritu Dei imprimuntur & infunduntur, qui actiones ciet & motus sanctos, qui fidem & charitatem roborant & augent exercitatione: Neque enim homo adiutus Spiritu sancto sibi dat fidem aut charitatem, aut exercitatione & industria eas acquirit: sed à Deo dantur, & actionibus voluntariis & spontaneis à Deo inspiratis aluntur & augentur.

Voluntatem verò esse sedem virtutum, potius quam appetitus sensitivos ipsa ratio clamat: Appetitum enim rationalem, & qui homini peculiaris est, ornatum esse virtutibus magis est consentaneum, quam appetitum qui nobis cum belluis communis est. Qui si esset sedes virtutum, iustitiæ, sanctitatis, charitatis, cessante post mortem facultate sensitiva cessaret quoque virtus: & voluntas animæ separatæ planè esset expers iustitiæ, & sanctitatis. Quod si quis arbitratur appetitus dici iustos

*Per Sp.  
sanctiope  
rationem  
vires ho-  
mini dā-  
tur ad eli-  
ciendos  
actus cō-  
uersionis:  
concomi-  
tāte por-  
ro spiritu  
creditur  
bene agit  
homo: cre-  
bris fidei  
suis, cha-  
ritatis pa-  
tentiæ  
actibus  
habitu  
fidei, spei  
&c. sibi  
cōparat.*

subiectiuè, eosque esse subiectum iustitiæ & sanctitatis, quia obsequuntur menti à Deo illustratæ, nulla est causa cur voluntas eidem suasioni se vltro subiiciens iusta quoque & sancta & iustitiæ ac sanctitatis subiectum eodem modo non debeat appellari. Et cum viri cordati & pij recta voluntas soleat affectibus imperare, eosque in legis diuinæ gyrum compellere, quis non videt ei potius inesse virtutem quæ recta imperat affectibus, quam affectibus qui sancto huic imperio segnitè plerunque obtemperant? Fateor quidem virtutes Christianas ad appetitus sensitiuos aliquatenus pertinere. Sed eodem modo quo ars equestris quæ residet propriè in equite, aliquatenus pertinet ad equum, quæ equisonis industria fregit in gyros, docuitque se mouere motu composito. Nullane poterat inueniri commodior ratio asserendi libertatem humanæ voluntatis, quam exuendo eam omni virtute? Strenuos sanè patronos libertatis arbitrij Arminiani se præstant, si voluntatem spoliant virtutibus vt sit libera; & vincula sanctorum habituum à voluntate excutiant ne nimium constringatur. Quemadmodum enim docent voluntatem ante lapsum non fuisse præditam donis spiritualibus, ne putetur per lapsum inquinata vitiis; & in locum donorum spiritualium amissorum putentur contraria vitia & naturalis prauitas successisse: sic quoque negant habitus fidei, charitatis, &c. à Deo infundi voluntati, ne infusione illa voluntas immutata, vim amittat resistendi finaliter Spiritui sancto. Putant enim iniuriam fieri voluntati si ei adimatur libertas se præcipitandi in Tartara: quæ sane infelix est libertas & in cuius defensio-

nem sectarij non debuerant totis viribus incumbere. Quasi nostra magnopere interfit sic esse liberos vt possimus Deo ad finem vsque obniti & ipsi nos perdere. Nec erat hæc causa idonea faciendi voluntatem *μὴ ὀφείλουσιν* neque vitiis neque virtutibus naturaliter imbutam, sed rem trusatilem & pendulam, & instar primæ materiæ cuiusuis impressionis capacem : cum contra voluntas hominis naturaliter mala sit, & vitiis incocta : vt abundè probauimus cap. 33. & per voluntatem homines præcipuè sint vel boni vel mali.

Statuimus ergo virtutes Christianas non acquiri vsu & industria, sed à Deo infundi menti & voluntati. Qui quidem non solum dat vires credendi, sed & ipsum credere : & actualement fidem in nobis efficit. Vt pote qui certo & absoluto consilio decreuit his quos seruare decreuit dare fidem qua saluentur. Cuius gratiæ effectum statuimus non pendere à libero arbitrio ; nec esse pœnes nos conuerti & credere si velimus : cum contra Deus det electis vt velint conuerti & credere, dans eis velle & perficere pro suo beneplacito.

*Ventilatur questio de suasionem morali, & an omni  
suasione possit resisti.*

## CAP. XLV.



Efficaciam Spiritus Dei agentem in cordibus Arminiani definiunt suasionem morali. Nam habitus ipsos fidei, charitatis, & spei, negant à Deo

à Deo cordibus infundi, ne violetur libertas arbitrii, & ne conuersio fiat vi irresistibili & ineluctabili necessitate, sed potius blanda inuitatione cui homo possit vel renitivel obsequi.

Hoc eorum dogma nititur falso hoc principio: nullam esse suasionem cui non possit sic resisti, vt eius effectus tandem impediatur. Hoc principium falsum esse contendimus. Est enim quædam suasio tam efficax vt hominem necessario trahat in assensum: cui cum possis resistere si velis, non potes tamen velle. Si quis in ardente siti porrigit sitienti potum suauem & salubrem, cumque ad bibendum inuitet amica suasionem: & ex aduerso nihil dissuadeat nec impediat, dico fieri nō posse quin sitiens ille potum oblatum sumat. Inciderit aliquis in manus hostium, qui eum catenis onerent, in carcerem compingant, cum ad supplicium propediem producturi: ingrediatur autem aliquis eundem carcerem, qui soluat catenas, ianuam aperiat, viam certam effugij commonstret, cum hortetur vt fugam capestat & se præsentis periculo eripiat, non puto talem hominem posse à se impetrare vt tali suasioni non obsequatur. Quod si in rebus humanis multæ sunt eiusmodi suasionem, quibus non possis velle resistere: quanto minus resistetur suasioni, quando ad euidentiam & certitudinem suasionis, & ad præstantiam bonorum celestium quæ Euangelium nobis offert, & ad periculi instantis cognitionem, potètia insuper diuina accesserit, & vis illa vorticordia Spiritus sancti, cuius efficacia est inexplicabilis. Est sanè quædam *πειρασμός*, & suasio potentior imperio, quæ sic flectit volentes, vt malint quid-

libet pati quam nolle quod volunt.

His fidem astringit ipsa ratio, & natura humanæ voluntatis, cui insitum est se mouere ad præscriptum & suasionem mētis, nisi cum affectus indociles repugnāt rationi. At quotiescunque ratio cum affectibus conspirat, impossibile est quin voluntas eo se moueat, quo mens suadet, & appetitus instigant. Nam quid eam auocaret, cum nullo alio possit moueri impulsu?

Nec dubium est quin Deus qui animas nostras pernouit, & cōmodissimas *αἰετὰς* quibus anima apprehēsa non resistat vocāti, & sciat qua parte sit flexibilior, non possit tali luce mentem perfundere, phantasīæ (cuius in appetitus naturale est imperium) tam lucidam imaginem imprimere: propositis pœnis ita conscientiam perterrefacere, obiectis præmiis æternis ita excitare, ita blandē inuitare, ita appositē suadere, ut illico omnis pugna cesset, & obsequentia concedat.

Quapropter Arnoldus in Tilenum pag. 251. parum consideratē locutus est, cum dixit in eo positam esse libertatem voluntatis ut positis & præsentibus omnibus quæ ad actionem requiruntur voluntas possit actionem suspendere. Debuerat dicere positam esse in eo libertatem voluntatis ut ad ea quæ intellectus & appetitus suadent sese spontaneo & libero motu applicet, aut si appetitus cum ratione discordat & diuersa obiecta proponantur, quamcunque volet in partem se moueat, libera electione. Exemplo sint animæ quæ in cœlis fruuntur Dei aspectu, quibus utique omnia suppetunt quæ ad incitandam voluntatem ad amandum Deum requiruntur, quarum tamen voluntas non potest actionem

istam suspendere, nec actum amoris quo Deum amant inhibere aut auertere. Nec verò dici potest (quanquam id ad rem presentem parum refert) eas nò posse Deum odisse, quia defunt occasiones odij, & incitamenta peccandi: Nam nec Angelis ante lapsum maior fuit occasio: Eadè occasione peccandi quæ Angelos pessunderunt nunquam deerunt. Admiratio sui ipsorum nimia, & amor impensior: & per id remissior contemplatio Dei, & amor segnior, præstantissimas creaturas præcipientes egerunt & ad rebellionem impulerunt.

Est quidem voluntas affecta ad duo aut plura, & inter duo obiecta proposita liberè eligit, nisi cum ultimus finis expetitur. Sed ipsa se sæpe ad vnum aliquid tam firmiter quâdoque applicat vt ipsa sibi non possit resistere. Quod si Spiritus sancti efficacia *græ iuxta pios* agens in electis insuper accesserit, & quæ habenas affectuum sic tractet & moderetur vt voluntatem sponte sequentem flectat, quid mirum si talis infessor non possit finaliter excuti, etiamsi cupiditates tantisper obniantur, & ægrè cedant imperio quod præter ius & fas inuasent?

Hæc omnia eo pertinent vt doceamus non inde fieri incertum euentum conuersionis, aut (vt loquuntur nouatores) resistibilem, etiamsi Deus sola suasionem morali moueret corda, & congrua inuitatione voluntatem alliceret.

Veruntamè quisquis Scripturam audiet, aut descendet ad exempla & ad experimèta, comperiet efficaciam Spiritus sancti agentis in cordibus non debere restringi ad suasionem moralem. Difficile enim est concipere

animo, qua suafione Deus vsus fit in conuerfione Pauli, qui quasi fulmine deiectus est, & cuius recalcitrantis aduersus stimulos fracta est contumacia.

*ei* Idem ~~dici~~ potest dici de latrone, cui inter cruciatus & in ipso mortis agone Deus inexplicabili modo fidem infudit. Quid enim? an putant sectarij, cum adeptum esse fidem vsu & frequentibus actionibus pietatis? Id sane dici non potest: cum vno momento à summa incredulitate & perditissimis moribus ad firmissimam fidem peruenerit. An inuitatus est blâda suafione? ne id quidē. Nam quæcunq; ~~ob~~uersabantur erant totidē dissuafiones: cæque vsque adeo potentes vt ipsorū Apostolorum fides tunc labasceret. Illi ipsi cruciatus quos misellus homo tunc patiebatur, facile potuerunt istius illectationis & suafionis sensum adimere, nisi vis arcana Spiritus Christi omnia obstantia perrupisset.

An Polus Apaustolus Ephes. 1. vers. 19. & 20. & ad Coloss. 2. vers. 12. potentiam illam Dei qua efficaciter operatur in cordibus credentium diceret eandem esse cum illa qua Christum excitauit à mortuis, si sola suafione morali, & blanda inuitatione corda conuerteret?

Saul certus Dauidem tollere de medio, venit Najoth quo se Dauid fuga subduxerat. 1. Sam. 19. Sed simul ac couenit, Dauidis immemor, prophetico afflatu corripitur. Vbi hic suasio moralis aut inuitatio? Si ergo sine suafione morali Deus immutat animos improborum, cur eandem virtutem erga electos suos non exeret?

Quomodo verò locutiones creandi nouum cor, & suscitandi hominem ex mortuis, & dandi nouam vitam, quibus Scriptura nostram cōuersionem exprimit

sint accommodatæ ad denotandam suasionem moralem, non equidem video. Non creatur nouus homo suasionem, sed infusione nouæ vitæ. Ac planè necesse est accedat aliquid supernaturale, nec homini explicabile.

Quod si mera suasionem & inuitationem Deus hominem alliceret ad credendum, Deus non esset causa efficiens fidei. Qui enim tantum hortatur & suadet vt credamus, non dat ipsum credere: immo nec suggerit vires credendi, vt ante diximus. Sed mouet metaphoricè & intèntionaliter, quemadmodum mouemur ab obiectis, & à fine cognito.

Hic verò esse aliquid præter suasionem hinc colligere est, quod videas quosdam parua suasionem vehementer accendi, quosdam vicissim veritatis gnaros inter euidentissimas & certissimas suasionem frigere tamen & ne minimum quidem affici. Multos martyres illiteratos & doctrina Euangelij leuiter imbutos prisca ætas tulit & nostra: At Origenes ille *χαλκείπερος*, qui scripturam ad vnguem callebat, maluit thus adolere diabolo, impar martyrio. Multi inter miracula & in media Euangelij luce sunt increduli, vt Capernaitæ: aut sunt ventri dediti & gulæ, vt fidem faciunt quotidiana experimenta. Neque verò hoc ideo fit quod irrogenitorum sit alius alio suasionis moralis capacios, cū omnes sint planè auersi à Deo & in peccatis mortui. Et cum videas pessimos quosque & pessimè affectos conuertere ad fidem Christi, vt Romanos Corinthios, &c. & Deū stulta mundi elegisse & vbi abundauit peccatū ibi abundasse gratiam: Vicissim verò alios minus malè dispositos, vt Tyrios & Sydonios nequidem vocari prædicatione





Euangelij, qua nulla alia salubrior suasio. Quædam fluunt sæcula quibus ianua Ecclesiæ latè patet, estque ad eam magnus populorum concursus: vt docet Apostolus 1. Cor. 16. 9. *Ostium mihi magnum apertum est & efficax.* & 2. epistola cap. 2. *Quum venissem Troadem ad prædicandum Euangelium ostium mihi apertum est per Dominum.* Ex aduerso sunt quædam tempora quibus aditus ad Ecclesiam quasi obstructus est, & imminuta videtur efficacia Euangelij: Tunc pastores Ecclesiæ experiuntur maximam contumaciam in populo, & callum obductum consciètiis, ad cuius duritiem mucro prædicationis retunditur. Id quidem non accidit quia certis quibusdam sæculis homines nascantur meliores: aut quòd Deus aliis rationibus & documentis vratur ad hos erudiendos, quàm ad illos: sed quia Deo visum est horum mollire corda, eisque reuelare brachium suum, & potentiam suam ad salutem: & verbi Dei gladium maiori vi in animos eorum infigere: idque pro suo beneplacito & electione gratuita: per quam credunt quotquot sunt ordinati ad vitam æternam. Act. 13. Hoc aculeo Deus ipse Pauli agentis Corinthi animum stimulabat & ad ἐλπίδες ἡμετέρας hortabatur: *Ne time (inquit) sed loquere & ne tacueris. Nam ego sum tecum, & nemo te inuadet vt tibi noceat, quia populus est mihi multus in hac vrbe.*

Es. 53.  
Rom. 1.

*Probatur certitudo conuersionis electorum & finalis  
insuperabilitas gratiæ.*

## CAP. XLVI.

I. **R**æcipuum sententiæ nostræ de certitudine conuersionis electorum, & de gratia Dei insuperabili firmamentum ponimus in certitudine immutabili electionis Dei. Cum enim Deus certo & definito decreto certos quosdam homines destinauerit ad salutem, vt prolixè probauimus, necesse est eos quos destinauit ad finem destinauerit ad media sine quibus nemo seruetur, nempe ad fidem & resipiscen-  
tiam. Hoc decretum cum non possit impediri, certum est fidem electorum non posse sic impediri vt finaliter excidant. Cuius doctrinæ veritatem dum impugnant sectarij, se præcipitant in dogmata absurda & enormia, qualia hæc sunt. *Electionem non esse irreuocabilem nec peremptoriam ante mortem. Electos posse reprobari. Electorum numerum non esse Dei decreto & voluntate certum & definitum: sed eorum numerum augeri posse & minui. Omnes homines esse conditionaliter electos. Deum sæpe frustrari sua intentione & voto ac desiderio: quæ somnia plena febriculosa subtilitatis, & inania deliria, ne quid dicam grauius, à nobis abundè, ni fallor, confutata sunt.*

II. Iam audiuius Paulum Eph. i. v. 3. & 4. docentem: gratiam Dei dari secundum electionem. Hinc apparet:

gratiam Dei quæ electis datur nihilo plus posse impediri quam electionem : causæ enim immutabilis effecta non possunt esse nisi certissima. Cassa & inanis esset electio quæ mediis destitueretur sine quibus non est salus. Obserua autem Paulum loqui de sanctis & fidelibus Ephesiis, ne Arminianus aliquis dicat Apostolum agere de vniuersali electione. Denique quotquot sunt loca scripturæ docentia eos demum credere qui sunt ordinati ad vitam æternam Act. 13. & eos solos venire, id est credere, qui dati sunt Christo à patre, id est electi ad salutem in Christo Ioh. 6. Et omnes prædestinatos vocari, iustificari, glorificari, Rom. 8. Et Deum nos elegisse ad sanctitatem, Eph. 1. nō verò ex sanctitate, aut ob sanctitatem, planè euincunt fidem & sanctitatem sic pendere ab electione, & cum ea coherere, vt fieri non possit quin electus tandem aliquando conuertatur. Non potest fides electorum plane obliterari, & finaliter extinguī, quin electio quoque Dei expungatur & intercidat. Quoscumque Deus vocauit ex proposito omnino venient, quia Deus nunquam proposito suo excedit.

III. His affinia sunt eiusdem Apostoli verba Rom. 8. 14. *Quotquot aguntur spiritu Dei sunt filij Dei.* Hic quæro an possibile sit vt qui filius est Dei fiat filius diaboli. Si quid frontis eis superest non audebunt id apertè proloqui, quanquam ex eorum sententia qua statuunt electos posse reprobari, id satis apertè sequitur. Hoc ergo posito, Dei filios non posse fieri filios diaboli, peto vnde ista impossibilitas defectionis, & cur qui agitur spiritu Dei qui vocatur spiritus adoptionis non possit fieri

fieri filius diaboli: oportet istius impossibilitatis causa sit vel electio Dei, vel humanum arbitrium: At non humanum arbitrium, vt prolixè probauimus: ergo Dei electio, per quam si vt impossibile sit vt fides electorum finaliter concidat & extinguatur.

I V. Quantâ verò efficacia Deus agat in cordibus docet Apostolus Ephes. 1. v. 19. vbi optat notum fieri Ephesiis *quam sit excellens illa magnitudo potentia ipsius in nobis qui credimus pro efficacia foris roboris ipsius.* Apostolus *ἐντιμὴς* congerit verba emphatica quibus potentiam illam & robur efficax prædicet, longè distantia ab Arminij phrasi: apud quem passim hæc occurrunt, *Deum nolle vti sua omnipotentia ad conuersionem hominis, sed blanda inuitatione quæ conueniat libero arbitrio.* Ac ne quis in voce potentia & roboris quærat effugia, hanc potentiam restringens ad suasionem efficacem, idem Apostolus ibidem docet hanc potentiam eandem esse cum ea qua Christum excitauit à mortuis, vbi suasio non habet locum: mox enim subiungit, *pro efficacia foris roboris ipsius, quam exeruit in Christo, cum excitauit eum à mortuis.* Sic & ad Coloss. cap. 2. vers. 12. loquens de nostra regeneratione per fidem, *Cum Christo (inquit) resurrexistis per fidem Dei efficaciter agentis qui excitauit eum à mortuis.* Innuens Christi resurrectionem nostramque regenerationem eadem vi & potentia perfici.

V. Idè Apostolus 2. Thess. c. 1. v. 11. orat vt Deus in Thessalonicensibus compleat opus fidei potenter. Et ad Rom. 1. vers. 16. Euangelium vocatur *potentia Dei ad salutem*, quia per Euangelium Deus potentiam suam salutarem exerit. Et 2. Cor. 10. v. 4 dicit *arma sua*, id est verbum Dei

D d

cui adiuncta est spiritus efficacia, *valida esse ad subuersionem munitionum, ratiocinationes eueriendo, omnemque sublimitatem quæ sese extollit aduersus cognitionem Dei, & in captiuitatem redigendo omnem cogitationem ad obediendum Christo*: En quàm sæpe & sedulò Apostolus potentiam illam quam Deus adhibet ad conuersionem hominis extollat: Quàm selectas & energeticas voces congerat quibus animos nostros trahat in admirationem potentia illius stupendæ & arcanæ. Affine est illud Christi Lucæ 11. v. 22. vbi eiectionem Satanæ regnum obtinentis in homine, vimque maiorem Spiritus Dei cum extrudentis his verbis depingit. *Quandiu validus quispiam armatus custodit aulam suam, in pace sunt ea quæ habet, Postquam verò quispiam eo validior inuadens vicerit eum, eius προπρία auferi quæ confidebat, & spolia distribuit.*

V I. Multa hic causantur sectarij, multa fingūt. Primò dicunt hanc potentia quantacunque sit esse resistibile, neq; negamus: sed quæstio est an sit finaliter superabilis: neque enim consentaneum est Deum velle exerere potens illud robur & efficaciam erga hominem quem vult saluare, vt ab homine superetur; & homo tandè sit potètiôr Deo. Enimuero eo ipso loco Apostol. 2. Cor. 10. quo potentiam illam splendida oratione extollit, meminit tamen resistentiæ quæ insurgit in Dei cognitionem eique reluctatur: sed quæ tandem fracta dat manus, & felicibus vinculis vltro constringitur.

V I I. Ad Pauli locum 2. Thes. c. 1. quo rogat vt Deus perficiat in Thessalonicensibus opus fidei potenter, respondent Hagienes pag. 295. Apostolum non loqui de initio fidei sed de complemento in incremento & perseue-

*rantia fidei.* Quo dicto ipsi se iugulant: nam sitanto robore & potentia Dei opus est ad promouenda fidei incrementa, quanto magis ad initia fidei, & ad indendam fidem homini incredulo, in quo nihil est quod non Deo aduersetur?

VIII. Addunt, per opus fidei hic intelligi patientiam. Ineptè: non enim solâ ærumnarum tolerantia opus fidei completur. Tum verba præcedentia Apostoli hanc interpretationem respuunt: Dicit enim *Preca-mur pro vobis vt vos digneur ista vocatione Deus noster. Et compleat omnem sue bonitatis gratuitam beneuolentiam & opus fidei potenter.* Improbè agit qui vocationem Dei & effecta beneuolentiæ Dei gratuitæ restringit ad solam patientiam.

IX. Ibidem subodorantur hoc complementum esse adeptionem gloriæ: Frustra. Nam gloria non est perfectio nec complementum operis fidei, sed complementum mercedis & præmij quod fide apprehendimus: Immò verò opus fidei tunc cessabit, tantum abest vt perficiatur.

X. Nostri pugnant loco Petri 2. epist. cap. I. vers. 3. *Di- uina potentia omnia nobis donauit quæ ad vitam & pietatem pertinent per agnitionem illius qui vocauit nos ad gloriam ac virtutem.* Si Deus omnia nobis dat quæ ad vitæ & pietatem pertinent, ergo dat nobis non resistere finaliter, & Deo vocanti obtemperare: Respondent Arminiani Petrum non hic agere de collatione fidei, nec docere fidem nobis dari à Deo, sed ea tantum quæ dat iam credentibus. Hæc responsio est extra rem, neque vllam partem nostri argumenti attingit. Quod tamen dicere

Petro Deum nobis dare OMNIA quæ ad salutem pertinent, nolunt sub hac voce [ *Omnia* ] fidem comprehendere, sincerè agunt & candidè. Nam qui alibi dicunt fidem esse donum Dei, hîc satis apertè testantur non hoc à se serio dictum esse: Ac profecto nullum locum nostri afferunt ex Scriptura ad probandum fidem esse donum Dei, quem non corrumpant Arminiani, & ei tenebras offundant: quippe qui fidei habitum negant à Deo homini infundi, aut cordibus imprimi: sed eam non aliter dari nobis à Deo contendunt, quam suadendo, & dando vires quibus credere possimus, si voluerimus. Quod quidem non est dare fidem, sed adminicula & incitamenta, quibus obsequi & ea in usum convertere sit penes liberum arbitrium. Ad fraudis cumulum Petri verba corrumpunt. Petrus dicit *Deum nobis donasse omnia quæ ad vitam & pietatem pertinent*: Illi per *donare* volunt intelligi *offerre* & *proponere*. Quæ longè distant. Nam cum, fatentibus Arminianis, vita æterna sit etiam reprobis proposita, dicendum erit, reprobis vitam eternam esse datam, si proponere & offerre idem est quod donare.

XI. Fidem & resipiscentiam esse à Deo scriptura clamat. Fidem esse donum Dei docet Paulus Ephes. 2. v. 8. *Gratia estis servati per fidem, idque nõ ex vobis, Dei donum est*: Illud donum de quo Paulus hic agit neque sola est salus neque sola fides. Sed hoc donum est *Gratia saluatum esse per fidem*. unde apparet sub hoc dono tam fidem quàm salutem comprehendere. Quòd si salus sola hîc donum Dei appellaretur, inde tamen fidem esse donum Dei necessario conficeretur. Nam qui dat salutem oportet

etiam dei media sine quibus non est salus. Idem Apostolus ad Philip. cap. i. v. 29. *Vobis datum est in Christi negotio non solum in eum credere sed etiam pro eo affligi.* Vides nobis dari non modò posse credere, sed & ipsum credere actumque credendi? Resipiscentiam esse donum Dei Petrus testatur Act. 5. v. 31. *Christum Deus dextra sua euectum constituit principem & servatorem ut dei resipiscentiam Israël & remissionem peccatorum.* Et 2. Timot. 25. *ecquando dei eis Deus ut resipiscant.* Paulus ad Rom. cap. 5. dicit *charitatem Dei effusam esse in cordibus nostris per Spiritum sanctum qui datus est nobis: nempe quia Spiritus sanctus imprimat cordibus nostris certam fiduciam nos amari à Deo: hæc ergo fiducia à Deo est.* Denique in omni bono opere & virtute Christiana idem Apostolus ad Philip. cap. 2. v. 13. dicit *Deum esse qui efficit in nobis ipsum velle & perficere pro suo beneplacito:* Hic vides à Deo dari non solas vires volendi & faciendi, sed & ipsum velle & facere. Cum ergo quotquot sunt virtutes Christianæ sint totidem Dei dona; eadèmq; virtutes sint habitus, oportet isti habitus sint à Deo, non ergo insiti à natura, quod ne quidem Pelagius dixerit: nec acquisiti vsu & actionibus adiuuante Dei gratia, ut volunt Arminiani, sic enim homo ipse fidem aut totam aut saltem ex parte sibi ipse daret, eamque deberet suo labori & industriæ: Enimuero si Deus dat quidem vires credendi; actum verò credendi non dat eo modo quo vires: quia vires credendi (ut censent sectarij) Deus dat irresistibiliter, actum vero credendi dat tantum suadendo, & inuitando idque suasionem cui possumus obsequi vel resistere, annuere vel renuere, nihil

*Arminiani in  
V. alabr.  
fidem &  
charita-  
tē dicunt  
esse habi-  
tus.*



tam clarum est quam ipsum actum credendi ac proinde & fidem non esse à solo Deo, nec à mera Dei gratia: sed partim Deo deberi partim humano arbitrio: Quam esse sententiam Arminianorum, & eos censere gratiam non esse causam totalem fidei sed partialem supra probauimus. Quibus adde quod dicunt Deum dare fidem non aliter quam suadendo & blanda inuitatione: quod si verum est, dicendum quoque erit Deum nec dare vires nec actum credendi: Nam qui tantum suadet & hortatur ad currendum, vel si omnes artis oratoriae facies accendat, nunquam tamen dicetur dare vires ad currendum, nec ipsum currere.

XII. Cum ergo habitus fidei sit donum Dei, oportet à Deo cordibus infundatur & imprimatur. Quod si ita est, impossibile est hanc infusionem in electis impediri. Quid enim impediret? An mutabilitas & instabilitas decreti diuini? At eius decreta nec conuelli possunt nec mutari. An mala affectio cordis hominis? At nemo non malè affectus est antequam fidem à Deo acceperit. An præfracta quorundam durities? at hæc durities recepta fide mollietur: quod & Deus promissit se facturum, Ezech. 36. v. 26.

XIII. Hæc Dei promissio, & aliæ eiusmodi quibus promittit se daturum cor carneum, eique inscripserum suam legem, & se effecturum vt incedamus in vijs suis, promittunt certitudinem infallibilem conuersionis electorum, & gratiam Dei quam impossibile sit finaliter deficere: Quid enim posset impedire ne Deus stet promissis, & quod certo & absolute promissit impleat? An durities cordis humani? At id ipsum est quod Deus

promittit, se cor saxum mollefacturum. An prauitas hominis? At nemo non prauus est antequam Deus eum conuertat. An in certis quibusdam hominibus maior solito contumacia? At *ubi abundauit peccatum ibi abundauit & gratia*. Denique nullum impedimentum potest obiici quod Deus non possit amoliri aut sum- mouere: nihil tam intricatum ex quo sapiens Dei bo- nitas facile sese non expediat: Ac proinde quibus pro- misit se daturum spiritum nouum, eis ablaturum cor lapideum, & se effecturum vt in vijs eius ambulent, hos impossibile est non conuerti, aut finaliter deficere. Nec ipsi Arminiani eunt inficias, etsi videntur summa con- tentione contraniti. Collationis enim Hagienfis pag. 268. fatentur his Dei verbis apud Ezechielem *inducari Dominum tam efficaciter velle operari vt actualis obedientia consecutura sit: sed* (inquiunt) *fit ne id irresistibiliter?* quasi vero in eo sit controuersia: Satis est quod certissimè & infallibiter & inuitabiliter, quantumuis homo ad tempus resistat, & Deo vocanti, id est, suę ipsius saluti aduersetur. Nam quę adiunguntur opera pietatis hanc immutationē cordium consecutura, non ponuntur vt conditiones sub quibus futura sit hæc immutatio: sed vt fructus & effecta hanc immutationem cordis con- secutura.

XI V. Aliud *χρησις* & *υπακοή* comminiscuntur sectarij, di- cendo promissionem hanc de dando nouo corde fieri toti genti, non singulis hominibus. Sed frustra sunt: cordis enim immutatio & regeneratio donum est quod fit singulis. Nec vera esset hæc promissio si toti genti fieret, in qua semper fuerunt plurimi contuma-

ces & rebelles. Hæc ergo promissio pertinet ad eos solos qui veri fideles futuri sunt.

XV. Nihilò acutius disputant cum dicunt Collationis pag. 269. his locis promitti, nò primum gratiæ præuenientis principium sed maiorem exuberantiam & progressum. Ego verò progressum quoque promitti non negauerim, sed pertendo initia quoque conuersionis promitti. Id euincit vox ipsa *cordis noui*. Tunc enim verè & propriè cor nouum est, cum incipit immutari. Nec sanè credibile est promitti incrementa sine principio.

XVI. Id insuper quæro an promissio illa qua Deus promittit se effecturum vt in viis suis ambulemus, ad finem vsque vitæ extendatur, an ad tempus breue. Si non ad finem vsque, inanis est promissio, immo & absurda, quippe qua Deus polliceretur se tantisper eis daturum hanc gratiam donec retrahat, & eos in æternum perdat. Tum ipsa hæc verba testantur agi de perpetua gratia. Deus enim promittit se effecturum ne recedant à viis suis : quibus verbis finalis perseuerantia promittitur.

XVII. Quod si gratia Dei in omnibus & singulis potest finaliter impediri, poterat accidere vt in omnibus impediretur : Et sic nullus esset electus, nulla Ecclesia, & Christus fuisset frustra mortuus. Nihil enim potest fingi absurdius, quàm arbitrari Deum decreuisse vt aliqui credant & seruentur, idque fiat irresistibiliter, & tamen id non decreuisse de quoquam, nec de vlla singulari persona : Nihil absurdius quàm statuere necesse esse vt aliqui saluentur, & tamen nemo

fit

fit qui non possit damnari. Quo tādē modo ex multis incertis aliquid certi conficeretur? An credibile est aut consentaneum Dei quidem decretum, quod ad totam Ecclesiam, non posse eludi, sed posse frustrari in singulis membris Ecclesiæ?

XVIII. Nec parum præsidij inuenit veritas in verbis Christi Iohan. 6. vers. 44. & 45. *Nemo potest venire ad me nisi pater qui misit me traxerit eum, ego verò suscitabo eum ultimo die. Est scriptum in Prophetis, Erant omnes docti à Deo, Quisquis ergo audiuit à Patre & didicit venit ad me.* Quot verba tot fulmina. Arminiani censent multos audire & discere à Patre qui non veniunt nec sequuntur. Pugnat hæc ex diametro cum Christi verbis, *Quisquis audiuit à patre & didicit venit ad me.* Loquitur enim de quodam audiendi & discendi modo qui electis est peculiaris, & qui in cordibus efficit quod iubet. Iidem Arminiani asserunt, multos trahi qui tamen non perueniunt ad salutem. At hîc quoque in verba Christi impingunt, quibus dicit, *Nemo potest venire ad me nisi pater traxerit eum, & ego suscitabo eum ultimo die.* Loquitur enim de certo quodam genere attractionis & obsequij, quo quicumque trahuntur & veniunt suscitabuntur à Christo ultimo die. Loquitur ergo de quadam tractione cui finaliter resisti non potest.

XIX. Ex eodem loco conditur hoc argumentum. *Quisquis audiuit & didicit à patre venit. Quisquis trahitur audiuit & didicit. Ergo quicumque trahitur venit.*

XX. Ex eodem loco refellitur Arminianum dogma, quo docent omnes trahi, & gratiam sufficientem omnibus dari. Scopus enim Christi est causam assignare

Ec

cur Iudæi Capernaitæ non veniant, nempe quia à patre non tracti sunt; vt ex opposito doceat eos venturos si tracti fuissent: quibus verbis non obscurè docet, omnes qui trahuntur venire.

XXI. Hæ probationes ex hoc loco deductæ, non nituntur voce trahendi, quam scimus sæpè laxius accipi, & quandoque vsurpari pro inuitatione cui non obtemperatur: sed nituntur tota huius loci *συνεχία*, & sermonis filo, quod certo certius demonstrat hic agi de tractione quadam qua quicumque trahuntur veniunt. Quo sensu vsurpatur vox trahendi initio Canticorum.

*Trahe me, & curremus post te.* Quod & Augustinus agnoscit lib. i. contra duas epistolas Pelagianorum, vbi cum monuisset lectorem, Christum non dixisse, *duxerit*, sed *traxerit*, subiicit *Quis trahitur si iam volebat? & tamen nemo venit nisi velit.* Trahitur ergo mirus modus vt velit, ab illo qui non it intus in ipsis hominum cordibus operari, non vt homines (quod fieri non potest) nolentes credant, sed vt volentes ex nolentibus fiant.

XXII. Nec sane credibile est gratiam esse finaliter resistibilem cuius præcipuum munus est finalem resistantiam tollere. Sic enim non faceret id ad quod est comparata.

XXIII. Quòd si qua est certitudo salutis & sanctorum *ἀνεξαρτία* oportet gratia Dei in eis & erga eos sit insuperabilis, & finaliter inextinguibilis. Alioquin cassa & fallax esse hæc certitudo. Nam quomodo certus esse posset de salute, qui credit gratiam Dei posse impediri & aboleri finali resistantia? Et ex parte Dei nullam esse absolutam electionem & peremptoriam nisi

curfu iam peracto? ex parte verò hominis, humanum arbitrium in sanctissimis quibusque esse viribus instructum quibus possit spiritum Dei prorsus excutere?

XXIV. At Scriptura sexcentis locis certam de salute fiduciam docet & iubet. Paulus ad Romanos 8. v. 16. *Spiritus testatur vnà cum Spiritu nostro nos esse filios Dei.* An vllus dabitur certior testis & magis *αἰτιολογῶν* quàm Spiritus Dei? Profectò, quàm sit certum hoc testimonium intrinsecum Scriptura clarè testatur dum vocat sigillum promissiones Dei cordibus nostris altè imprimens, & arrhabonem hæreditatis nostræ Ephes. 1. 13. Et 4. cap. v. 30. Et 2. Corinth. cap. 1. Sic 1. Iohan. 5. 10. *Qui credit in filium Dei, habet testimonium Dei in se ipso.* Hoc quidem testimoniū est omni exceptione maius: quod quicumque non experitur in se, debet potiùs de se malè sentire, quàm cæteros homines suo pede metiri, & de aliorum fiducia ex sua incredulitate iudicare.

XXV. Apostolus ad Hebræos, cap. 3. vers. 6. iubet nos tener: *firmam ad finem vsque fiduciam & spem de qua gloriamur.* Et cap. 10. vers. 22. *Accedamus cum vero corde & certa persuasione fidei.* Et Ephes. 3. 12. *In Christo habemus libertatem & adiutum cum fiducia, per fidem ipsius.* Et 1. Iohan. 5. vers. 13. *Hæc scripsi vobis qui creditis in nomen filij Dei, vt SCITATIS vos vitam æternam habere.*

XXVI. Ipse Seruator promittit se omnia nobis daturum quæ petierimus in eius nomine: Iohan. 14. 13. Si ergo petimus gratiam insuperabilem, & inextinguibilem, & perseverantiam in fide, Christus spondet nos accepturos quod petimus.

Ee ij

XXVII. An loquitur Dauid vt dubitans de salute, Psal. 17. *Videbo faciem tuam in iustitia, & satiabor tua similitudine?* An Simeon sic loquens Lucæ 2. *Nunc dimittis seruum tuum Domine in pace, iuxta verbum tuum?* An Stephanus qui circumfrendentibus inimicis, & iam certus mortis clamabat, *video celos apertos & Filium hominis ad dextram Dei?* An in eiusmodi hominibus gratia Dei erat superabilis à libero arbitrio? an eorum fiducia erat fallax & labilis, & Dei decretum de eorum salute adhuc reuocabile, vt loquuntur sectarij?


XXVIII, Quid Paulum dicam? qui cupiens dissolui & esse cum Christo, plenus fidei sic loquitur 2. ad Timoth. cap. 4. vers. 7. & 8. *Eripiet me Dominus ab omni opere malo seruabitque in regnum suum celeste.* Et ibidem post exantlatos tot labores, hoc quasi *ἔκτασις* pronuntiat, *Certamen præclarum decertaui, cursum consummaui, fidem seruaui. Quod superest, reposta est mihi iustitia corona, Nec minori cum fiducia loquitur suo & nostro nomine diu ante finem certaminis.* Rom. 8. 38. *Mihi persuasum est neque moriem, neque vitam &c. neque vllam aliam creaturam posse nos separare à charitate Dei quæ est in Christo Iesu Domino nostro.*

XXIX. At sectariis modestia & humilitate suffar cinatis placet dubitatio de salute. Eorum verba aduersus V Valachrianos pag. 76. hæc sunt *virum quis certus esse possit se perseueraturum in fide non dixerimus, immo de hoc dubitare & laudabile milui Christiano, & ad excitandum vternum & torporem animæ in religionis negotio perquam vtile arbitramur.* Solam certitudinem ibidem admittunt qua quis scit *Deum & sufficiens auxilium ei non defu-*

*iturum dummodo ipse sibi non desit: quæ sanè certitudo potest esse in quolibet reprobo. Hæc quidem speciosè instillant, sub obtentu instigationis ad bona opera, vt quasi per cuniculos fidei fundamenta occultè subruant: Quasi verò nulla esset via excitanditorporem,quàm fidei dispendio. Profana est modestia quæ facit incredulos:& sub specie humilitatis docet Deo diffidere. At illi ipsi qui hæc docent, gloriatur sibi reddi à Deo quod debet, immo & Deum teneri ipsis dare gratiam sufficientem: vt appareat sub affectata humilitate plus inesse superbix.*

*Augustini de hac controuersia iudicium.*

## CAP. XLVI.

I. ERTITVDO perseuerantiæ potest bifariam accipi: vel pro certitudine decreti diuini, quo Deus eis quos elegit ad salutem decreuit dare perseuerantiam in fide. Vel pro fiducia qua quis certò sibi persuadet se à Deo nunquam desertum iri. Ex electione absoluta, & quæ non est ex præuisa fide, necessariò deducitur prior certitudo, at non posterior. Quia multa Deus de nobis decernit, quorum plenam notitiam nobis nondum dedit.

II. Fidelium *παρηγορία* non nititur reuelatione aliqua, qua Deus arcana sui Consilij nobis pate-

Ee iij



fecerit, sed promissionibus Euangelij, & sensu interno quo quis seipsum explorans sentit se seriò in Christum credere, & testimonio intrinseco Spiritus restantis in cordibus nostris nos esse filios Dei. Possunt tamen esse multi, iique probi & pii, qui ad hanc plenam fiduciam nondum perueniunt, quamvis ad electionem Dei pertineant.

III. Augustinus ad huius quæstionis limam tritus & crebris Pelagianorum còcertationibus exercitus, prioris certitudinis est assertor acerrimus; & ex electione Dei secundù propositù colligit electos nunquam deserìà Deo, & gratiam eis dari quæ nunquam intercidat, & per quam certò sunt perseveraturi. Multa apud eum præclara in hanc rem, sed nullibi apertiùs loquitur quàm libro de correptione & gratia què scripsit in extrema senectute: Is cap. 12. hæc habet. *Sanctus in regnum Dei per Dei gratiam prædestinatus non tantùm tale adiutorium gratiæ datur, sed tale ut eius perseverantia ipsa donetur, non solùm ut sine isto dono perseverantes esse non possint, verùm etiam ut per hoc donum non nisi perseverantes sint. Non solùm enim dixit, Sine me nihil potestis facere: verùm etiam dixit, Non vos me elegistis sed ego elegi vos, & posui vos ut eatis & fructum afferatis, & fructus vester maneat. Quibus verbis eis non solùm iustitiam, verùm etiam in illa perseverantiam se dedisse monstravit. Christo enim sic eos ponente ut eant & ferant fructum, & fructus eorum maneat, quis audeat dicere, forsitan non manebit? Sine penitentia enim sunt dona & vocatio Dei: sed vocatio eorum qui secundum propositum vocati sunt. Pro his ergo interpellante Christo, ne*


deficiat fides eorum, sine dubio non deficiet usque in finem, ac per hoc perseverabit usque in finem, nec eam nisi manentem vita huius inuenit finis.

Et paulò pòst, Tantum quippe Spiritu sancto accenditur voluntas eorum ut ideo possint quia sic volunt. Ideo sic velint quia Deus operatur ut velint. Nam si in tanta infirmitate vite huius, in qua tamen propter elationem reprimendam perfici virtutem oportebat, ipsis relinqueretur voluntas sua, ut in adiutorio Dei sine quo perseverare non possent manerent si vellent, nec Deus in eis operaretur ut velint: inter tot & tantas tentationes infirmitate sua voluntas ipsa succumberet, & ideo perseverare non possent quia deficientes infirmitate nec vellent, aut non ita vellent infirmitate voluntatis ut possent. Subuentum est ergo infirmitati voluntatis humanæ, ut diuinâ gratiâ INDECLINABILITER ET INSEPARABILITER ageretur, & ideo quamvis infirma, non tamen deficeret neque aduersitate vlla vinceretur. Adamo fortissimo dimisit atque permisit facere quod vellet: infirmus seruauit in ipso donante INVICTISSIME quod bonum est vellent, nec hoc deferere inuictissime nollent. Obserua voces, Indclinabiliter, Inseparabiliter, Inuictissime: voce irresistibilitatis non usus est, quam Iesuitæ nondum procuderant: sed usus est vocibus quæ non minus habent virium ad designandam vim gratiæ diuinæ certissimæ & finaliter insuperabilis & inuictæ, in eis qui sunt electi secundum propositum. Idem tamen verbum resistendi adhibet cap. 14. ubi sic loquitur. Deo volenti saluum facere, nullum hominum resistit arburium. Sic enim velle vel nolle in volentis aut nolentis est: potestate, ut diuinam voluntatem non impediat, nec superet.

*potestatem. Præclare, quantumvis reclamet Arminius.*

*Ipsos Arminianos Irresistibilitatem quam impugnant, aperte stabilire.*

### CAP. XLVIII.

I.  Rresistibilitas pingitur ab Arminianis vt monstrum cui barbam vellicât & quod acu & stilo compungunt. Illos quidem ἀερόβατον & pingere cucurbitas, & sua ipsorum somnia impugnare iam docuimus. Irresistibilitatem enim qualem fingunt nullam agnoscimus.

II. Sed illud maximè mirum quod irresistibilitatem quam nobis affingunt, & pro virili impugnant, ipsi tamen altruunt & passim stabiliunt. Andabatas dices qui pugnantes clausis oculis aërem cédunt, & se ipsi vulnerant.

III. Arminiani in Vvalachrianos pag. 68. negant à se dici *Spiritum sanctum in voluntatem non alio modo agere quàm cui resisti possit. Verùm* (inquiunt) *hac non nisi ad ordinarium conuersionis modum quem ὡς ἐπὶ τὸ πλεῖστον usurpat Spiritus restricta volumus: non diffidentes extraordinaria interdum ratione huius vel illius conuersionem operari. Hic quidem habemus confitentes reos. Hoc enim dicto quicquid ædificauerunt, à fundamento subuer.*

subuertunt. Sienim Deus conuertit quosdā irresistibiliter, eisque dat fidem voluntate præcisa & absoluta, impossibile est hos esse electos ex fide præuisa, & electione quæ innitatur præuisioni fidei. Nam qui absolutè destinatus est ad fidem & irresistibiliter, oportet absolutè destinatus sit ad salutem. Ineptè ageret qui Deum fingeret sic decernentem, *Ego quidem hunc decreui saluare si credet : Sed fidem ei dabo irresistibiliter.* Electio non potest dependere ex præuisione conditionis quam Deus certo & infallibiliter facere decreuit. Sic Deus non decreuit vt Philippus uiuat si habiturus est respirationem : sed certò decreuit ei dare respirationem vt uiuat.

IV. Hinc apparet quæquitatem sectarij nobiscum agant : Nobis enim affingētes irresistibilitatem, clamant sic cogi humanas voluntates, nec posse dici obediētiā ad quam homo irresistibiliter compellatur. Idem tamē censent quosdam extraordinario modo & irresistibiliter conuerti, quos non putant per id cogi : & quorum conuersionem non negant esse obediētiā.

V. His adde dogma inter Arminianos tritissimum, & quod in eorum scriptis nullibi non occurrit. Deum vocare quosdam modo non congruo, quo modo qui vocantur nunquam sequuntur vocantem, etsi possint sequi. Quosdam vicissim à Deo vocari, modo, statu, mensura, & tempore congruo, quo pacto quicunque vocantur, certò & infallibiliter sequuntur vocantem : quin & supra cap. 4. 4. attulimus ipsius Arminij verba quibus statuit eiusmodi voca-

tionem fieri ex Dei decreto, & certa eius prædestinatione administrari. Et merito; Nam cur Deus hunc statum aptum, hoc tempus accommodatum, hunc modum congruum eligeret, quo qui vocantur certo & infallibiliter sequuntur, nisi quia vult ut infallibiliter & certo sequantur? Hæc sanè irresistibilitatem ponūt qualis à nobis creditur, id est euentum certum & infallibilem ex Dei præordinatione. Conantur quidem suam sententiam mollire assuendo hanc clausulam, *Eos quos Deus vocat modo congruo, ceriò quidem & infallibiliter conuersti, sed ita ut possint etiam non conuersti.* Nempe (si fides Arminio) possunt facere quod nunquam fuit neque erit: & quod Deus non futurum ceriò præsciuit, & quod si fieret, Dei consiliùm & præordinatio, quam Arminius hîc agnoscit, fieret irrita.

VI. Idem irresistibilitatem statuunt, dogmate illo suo trito quo docent Deum in conuersione intellectum irresistibiliter illustrare, & affectus excitare. Iam aliquid est quod partem conuersionis & regenerationis fatentur fieri irresistibiliter, nempe illustrationem mentis & excitationem affectuum. Sed pertendo insuper, illustratione ista irresistibili mentis, si fuerit clara & euidens, & excitatione affectuum si fuerit vehemens, voluntatem necessario affici, & ad assensum spontaneum pertrahi: ut prolixè probauimus.

VII. Non minus se iugulant, cum docent vires credendi dari irresistibiliter. Nam quæ tandem sunt vires credendi nisi per fidem? habitus enim sunt cau-

sæ efficientes operationum, vt primi actus secundorum. Aut quæ tandem possunt esse vires credendi sine fide? Si ergo vires credendi dantur irresistibiliter, planum est fidem quoque, ac proinde & assensum voluntatis dari irresistibiliter: cum in ipsa fide formaliter positæ sint vires & facultas credendi.

Hagienſes Arminiani, Collationis pag. 269. concedunt Deum irresistibiliter facere vt semper sint aliqui credentes. Qua concessione res suas planè conſturbant. Nam qui sunt hi ALIQUI? nonne certæ quædam personæ? Ergo Deus irresistibiliter efficit vt certæ personæ credant. An est consentaneum Deum facere irresistibiliter vt aliqui credant, quoniam verò illi sint non statuisse? Ita enim fieret Deum aliquos destinasse ad irresistibiliter credendum & neminem. An possibile est vt Deus faciat irresistibiliter vt aliqui credant: & hi ipsi tamè non credant irresistibiliter? Perinde ac si dicerem Deum facere certò vt aliqui moriantur, qui tamè certò non moriuntur. Et cum ex sententia Arminij nemo non sit electorum qui non possit reprobari, & efficere vt Deus sua intentione frustretur, mirum quomodo Deus faciat irresistibiliter vt aliqui credant, cum eorum qui credunt & conuertuntur nemo non possit finaliter resistere, & sic perire? Quodcunque potest accidere singulis potest & omnibus. Nec Dei consilium potest esse certum de faciendo irresistibiliter vt aliqui conuertantur, nisi aliqui irresistibiliter conuertantur. Quemadmodum Dei consilium non potest esse certum de faciendo vt aliqui mergantur, quin aliqui


certò mergantur.

Iidem Collationis pag. 292. dicunt *ad conuersionem requiri vim, quæ omnem creatam vim multis partibus excedat, tametsi non operetur irresistibiliter. Nam vt natura efficaciter conuertatur, requiritur aliquid quod ipsa sit potentius.* Hæc mihi videntur *ἀσβήτα*: vim spiritus qua conuertimur multis partibus excedere vires naturæ, & tamen ei à naturâ posse sic resisti vt superetur, & finaliter impediatur: de tali enim resistentia hic agitur.

Non est ergo metuendum ne Arminianorum argumentis irresistibilitas impulsæ corruat, cum altrinsecus ipsi eam nutantem sustineant, & tibicinibus suffulciant. Quibus tamen obiectionibus eam vrgeant operæpretium est cognoscere.

*Obiectiunculæ Arminianorum aduersus irresistibilitatem, id est certitudinem infallibilem conuersionis electorum, diluuntur.*

## CAP. XLIX.

I.  Aufæ suæ firmamentum præcipuum ponunt sectarij in suo illo falso dogmate & iam à nobis cōfutato, Deū non administrare media ad conuersionem & fidem, ex decreto aliquo absoluto & præciso: Nam si Deus vocans homines, nullius conuersionem absolute &

præcisè intendit, non est necesse vt suppeditationem istorum mediorum conuersio cuiusquam præcisè sequatur. Hoc eorum fundamentum cum fuerit à nobis subrutum & disiectum, cætera quæ volunt superstruere concidant necesse est.

II. Collatores Hagienſes Arminiani multa perperam congerunt ad quæ euertenda non est opus magna contentione. In fronte aciei collocant locum illum Act. 7. v. 51. quo Stephanus exprobrat Iudæis rebellibus eos semper reſtitisse Spiritui sancto. Vnde inferunt Spiritum sanctum quando agit in homine non operari conuersionem irresistibiliter.

III. Sed ineptè id probant quod non controuertitur. Irresistibilitatè enim quam nobis tribuunt non docemus, nõ agnoscimus. Conclusio hæc igitur nobis non officit, qui vltro fatemur Spiritum sanctum non semper sic agere in cordibus vt omnem resistetiam tollat. Accedit quod rem falsissimam supponunt vt veram & concessam. Nempe Spiritum sanctum egisse in Iudæis istis, eosq; operationi intrinsecè spiritus reſtitisse. Stephanus Iudæis exprobrat eos testimonio euidenti Spiritus sancti loquētis per prophetas semper reſtitisse. Id sequentia verba Stephani demonstrant, *Quem prophetarum non sunt persequuti patres vestri?* &c. Neque si Stephanus ageret de Spiritu sancto in Iudæis incredulis & impiis habitante (quod tamen à vero abest longissimè) inde sequeretur eum loqui de spiritu adoptionis, & gratia electis peculiari, quæ in eis solis conuersionem & fidem certò & infallibiliter efficit.



I V. Cum hoc loco pariter concidunt loca quibus scriptura dicit Psal. 78. & Es. 63. Matt. 23. 37. Prou. I. 24. &c. Iudæos tentauisse Deum, cumque exacerbauisse, & contristasse Spiritû sanctitatis eius: noluisse pullos congregari: vocatos renuisse, &c. Hæc (inquam) omnia nihil ad rem. Ibi Scriptura loquitur de impiis & rebellibus: at in hac quæstione agitur de fidelibus & electis: & quæritur an possit fieri ut nunquam couertantur, & finaliter resistent Spiritui adoptionis. Ad hoc probandum testimonia agentia de reprobis, quos fatemur Deo vocanti finaliter resistere, & qui carerent spiritu adoptionis, planè sût extra rem. Denique sectarij non probant his omnibus locis agi de finali resistentia, de qua sola hîc agitur.

V. At (inquiunt) Deus Ezechielis 18. 31. iubet Israëlitas sibi facere cor nouum & Spiritum nouum. Vnde colligunt hominem posse præstare quod iubetur, aut resistere Deo iubenti: Pudet veteris natiuitatis, & Pelagianę crambis sexcéties iam appositæ, & toties reiectæ. Principiò quid opus est probare hominem irrogenitum posse non obsequi huic mandato de faciendo sibi cor nouum, cum hoc vnum possit, nempe non obsequi? & non possit obsequi? Hominem verò posse quęcunque Deus iubet, hæresis est Pelagianorum, a nobis iam confutata. Dei præcepta non sunt mensura nostrarum virium, sed regula officij, summa debiti, materia petitionum, scopus contentionis. Sed de his *κατασπας*.

V.I. Quarto obtendunt illud Esayæ 5. *Quid vltra faciendum vineæ meæ quod non fecerim ei?* Vnde inferunt

gratiam Dei non peragere in homine conuersionem irresistibiliter. Prodigiosa hæc est consecutio: Tum si bonâ esset, conclusio tamen neque quæstionem attingit, neque nos: qui fatemur in electis ipsis conuersionem non fieri sine aliqua resistantia. His adde quod ad quæstionem in qua agitur de conuersione singulorum ineptè affertur locus agens de uocatione totius gentis. Nec debuerant asserere locum agentem de rebellionem gentis incredulæ, ubi agitur de certitudine conuersionis electorum. Denique sic agunt ut qui id operam dant ne quid dicant quod faciat ad rem.

VII. Obiter notabit lector, phrasæ *aux ego* & humanitus dictas non debere accipi ut propriè dictas: Figuratè Deus dicitur optauisse fructus & expectauisse à sua vite. In Deum non cadunt desideria, nec dolores quasi frustra consumpto labore sine proposito excidisset. Cum Deus optat conuersionem hominū, ut Pf. 81. v. 14. nihil aliud innuit quàm conuersionem hominum Deo gratam esse. Sic cum dicitur expectare fructus à vite aut à ficu, id est ab Ecclesia vel à singulis, & ubi vitis spem mèrita est, eam non statim stirpitis euellere: intellige Deum obedientiam postulare & exposcere, & quando non sit quod debetur non statim ad pœnam accingi, sed eam differre. Lucæ 13. v. 9. Deus non expectat euentus quos præscit non euenturos. Multominus in piis expectat euentus quos ipse effecturus est.

VIII. In eundem lapidem impingunt cum citant

illud Ezech. cap. 12. 2. *Fili hominis tu habitas in medio domus rebellis qui oculos habent ad videndum & non vident, &c.* Vnde inferunt hominem quidem habere oculos & aures, viresque se conuertendi, sed posse resistere. Ineptè: nam quis negat hominem posse resistere? immo ex suâ naturâ nihil aliud potest. Cur in quæstione quâ quæritur an fieri possit vt electus finaliter sic resistat grâtiæ vt ea excidar, ingerunt nobis exempla reproborum & malorum? Meminerit obiter lector, de hoc eodem populo cui tribuuntur hîc aures, & oculi, Deum sic loqui Deut. 29. 4. *Iehona non vobis dedit cor ad intelligendum, neque oculos ad videndum, neque aures ad audiendum in hanc vsque diem.* Nimirum duo sunt genera oculorû, quidam qui solis fidelibus contingunt, nempe oculi fidei: quidam verò qui possunt contingere reprobis, qui videntes volentes pereunt, qui videndo non cernunt, & auribus grauius audiunt Matth. 13. v. 26. & 27. horum oculi sunt carnales, & nebulosi: his duce ratione naturali, contingit cognitio *ἡπιολάζσα*, quæ cor non afficit, aut si aliquid diuinæ lucis eis obortum est, potius præstinguit oculos quàm illustrat: Immo id ipsum quod habent cognitionis conantur præfocare, vltro excutientes in clara luce.

I X. Eodem vitio laborant loca quæ subiiciunt Zachar. 7. v. 11. Es. 6. v. 9. Matt. 13. 14. Act. 28. v. 25. & 26. Quibus locis nihil aliud potest probari quam reprobos & rebelles posse respuere gratiam Dei & Deo monenti resistere. Quod fatemur vltro: Sed quid hoc ad finalem resistantiam in electis?

X. Spe-

**X.** Speciosè ostendant Christi verba Matth. II. v.

21. *Va tibi Corazim, va tibi Bethsaida, nam si in Tyro & Sydone edita fuissent virtutes quæ editæ apud vos. olim cum sacco & cinere resipuissent.* Similem locum habes Ezech.

3. 6. Ex Matthæi loco sic argumentantur.

*Gratia per quam alij quibus facta est non sunt conuersi, alij verò conuersi fuissent: si eadem ipsis obligasset, non agerent irrefistibiliter.*

*Atqui gratia conuersionis est talis.*

*Ergo gratia conuersionis non agit irrefistibiliter.*

Non erat cur tantopere desudarent in vtraque propositione probanda, cum conclusionem vltro admittamus: Scimus electos ipsos resistere gratiæ Dei etsi non perpetuò, nec ita vt gratia Dei finaliter impediat. Quæstio est, An possit fieri vt electi gratiæ Dei sic resistant, vt nunquam conuertantur, vel vt eam extinguant & finaliter impediant. Hanc quæstionem viri boni non attingunt, sed aliò vagantur.

**XI.** Sed neque duas propositiones commodis probationibus fulciunt. Maiorem sic probant. Si gratia conuersionem efficeret in homine per vim irresistibilem semper & ubique pari efficacia ageret. Ego verò nego id sequi. Nam etiam si gratia efficeret conuersionem irrefistibiliter in omnibus hominibus qui conuertuntur, posset tamen fieri vt in quibusdam maiori efficacia ageret, nempe in eis qui sic afficiuntur vt statim & sine cunctatione sequuntur vocantem, & maiori zelo & ardore inflammanantur quam cæteri, qui tardius obsequuntur & segnius.

**XII.** Minorem probant exemplo Tyriorum: Sed

Gg

supponūt sine probatione Christum hoc loco agere de vera conuersione qua conuertūtur quibus Deus dat veram fidem & resipiscenciam. Quod certe magnum est *αἴτιμα*. Cum enim Tyrij & Sydonij non pertinerent ad electionem Dei, quippe qui nunquam conuersi sunt, si coram eis facta fuissent miracula quæ facta sunt coram Corazinis, potuissent reuerentia tangi, & sensu peccatorum affici, & illa pœnitentia deiici quæ nascitur ex metu pœnæ: qualis fuit pœnitentia Achabi 1. Reg. 21. & maximè patris Niniuitarum, vt indicat ruina Niniues mox consecuta, vt discimus ex Nahum. 1. 1. & ex Tobia ultimo capite. Qua in re Tyrij laudabiliores fuissent Corazinis, qui inter tot miracula ne minimum quidem doloris aculeum senserunt, aut dederunt ulli signa pœnitentiæ. At pernego fuisse penes Tyrios adipisci veram fidem, & in ea perseuerare. Sine quâ tamen nulla est vera pœnitentia. Ac mihi quidem videntur Arminiani Deum incusare inuidiæ subdola & maleuolentiæ, quippe qui sciret Tyrios ita esse affectos vt si ad eos miracula peruenissent, seriò respuissent, & ad salutem peruicissent, eis tamen hoc beneficium inuiderit, quod tamen largitus est populis quos sciebat nec miraculis, nec prædicatione esse conuertendos.

XIII. Septimo loco sic argumentantur.

*Qui sermoni gratia & saluti possunt resistere, ij quoque possunt resistere spiritui resipiscentiæ.*

*Atqui possunt homines sermoni gratiæ & salutis resistere. Ergo possunt quoque ijdem resistere spiritui resipiscentiæ.*

Admittimus conclusionem, eo sensu quo sæpe dixi. Minorem probat exemplis reproborum, quos scimus finaliter resistere. At hic agitur de electis, & queritur an possit fieri ut ita resistent gratiæ ut gratia superetur & finaliter extinguatur. Hoc quod est *ἡ ἀντιστάσις* & status quæstionis relinquunt intactum.

XIV. Excussi Scriptura, confugiunt ad rationes: & sic Syllogismum instituunt

*Quod à nobis in Euangelio exigitur pro debita & filiali obedientia id in nobis non efficitur per vim irresistibilem.*

*Atqui conuersio & fides requiruntur à nobis in Euangelio pro debita & filiali obedientia.*

*Ergo non efficiuntur à nobis per vim irresistibilem.*

Minor non opus habet probatione. Maiorem sic probant, quia *id quod in homine ab alio tantum fit ita ut ipse se in eo tantum passiuè se habeat non potest dici obedientia.*

Hæc omnia nituntur geminâ calumniâ, quarum prima est qua fingunt nos docere conuersionem agi in nobis irresistibiliter: altera qua nobis tribuunt conuersionem & fidem fieri à Deo, sine nobis: & homines in conuersione passiuè tantum se habere. Nos quidem conuersionem talem nullam agnoscimus, in qua homo nihil agat, sed tantum patiatur: Scimus hominem suavi & efficaci motione sic trahi, & voluntatem eius sic flecti, ut ex nolente fiat volens. & sponte agat atque moueatur. Scimus hominem ipsum credere & resipiscere, non autem Deum. Sed dicimus Deum dare homini ut possit & velit credere & resipiscere: Non secus ac embryon ipse se mo-

uet in vtero : id verò ipsum quod se mouet, & quod vires habet se mouendi, habet à Deo. Satis est ad obedientiam quod homo voluntariè obsequitur Deo.

- XV. Hic verò lectorem rogamus vt hic paulisper gradū sistat, & agnoscat quam parū consideratè Arminiani hic agāt, & quam ipsi sibi aduersentur. Negant conuersionem posse vocari obedientiam si homo in ea passiuè tantum se habeat. At ipsi docent hominem tantum passiuè se habere in conuersionis initio, quam tamen omnes Arminiani agnoscunt esse obsequium. Verba eorum hæc sunt in epistola aduersus Vvalachrianos p. 69. & 70. *Siue per præuias intellectus operationes moueri solummodo voluntatem à Spiritu dicamus, siue nouam quandam qualitatem ἐπεψηχρὼ in eam infundi, prius semper moueri statuitur voluntas, hoc est passiuè se habere, quam se ipsam actiuè in bonum promoueat.* Hæc illi. Sed illud longe præcipuum, quod Arminiani vno ore docent intellectum à Deo illustrari irresistibiliter : id est cognitionem & intelligentiam à Deo sic dari vt resisti non possit : cum tamen ista cognitio & intelligentia sit obsequium quoddam. Quippe cum passim Scriptura nos iubeat cognoscere & intelligere. Psal. 2. v. 10. Matt. 13. 10. & 2. Timoth. 2. 7. Nonne Angelorum ardens alacritas ad obeunda Dei mandata est obedientia? Attamen non possunt resistere Deo iubenti, nec possunt velle resistere.

XVI. Postremò congerunt absurda quæ ex vi quam vocant irresistibilem censent posse deduci.

Dicunt inde sequi non alios posse conuerti quam qui reipsa conuertuntur. Nec quenquam posse ante conuerti quam reapse conuertatur. At hoc tantum abest vt absurdum videri debeat, vt contrà impium sit credere quenquam posse conuerti & regenerari nisi quem Deus conuertit & regenerat & cui dat fidem & spiritum adoptionis, aut quemquam posse ante conuerti quam Deus eum conuertat. Nam si sumus omnes nostrâ naturâ in peccatis mortui: certum est non alios posse resurgere ex hac morte spiritali quam qui re vera resurgunt. Quod si fides & spiritus adoptionis est donum Dei ex mera eius gratia profectum: planum est eos demum posse conuerti quibus Deus dat gratiâ qua actu conuertâtur. Cumque ita simus comparati vt nemo non resistat Deo vocanti, apparet neminem posse conuerti, nisi in quo Deus resistantiam tandem abstulerit, & duritiem fregerit. Viderint noui Semipelagiani qua frôte asserere audeant, hominem irreginitû habere vires sese conuertendi, antequam Deus actu eum conuertat, & quomodo aduersus tot loca Scripturæ & rationes quas attulimus cap. 33. sese tueantur. An quenquam ex omni memoria nobis proferent qui per eas dotes quæ omnibus hominibus, etiam Ethnicis & irreginitis contingunt, fidem adeptus sit & salutem?

XVII. Neminem verò se posse conuettere antequam à Deo conuertatur & trahatur Scriptura passim testatur. *Conuertere nos & conuertermur.* Ierem. 31. 18. *Thren. 5. 21. Trahe me & curremus post te.* Cantic. 1. 4.



An latro potuit se conuertere, antequam Christus miro & ineffabili modo cor eius immutasset, inter tot occasiones dubitandi, & in Apostolorum ipsorum fuga & trepidatione? An Paulus potuit se conuertere antequam à Christo cœlitus vocaretur? Hoc sane dogma est piis auribus insolens, & Pelagianæ venæ. Hoc pacto rescinditur Dei decretum quo statuerat vti confessione miraculosa latronis ad demonstrandam efficaciam mortis Christi, virtutemque eius diuinâ in ipsa dolorum & opprobrij ἀκμή: & ad specimen insigne electionis gratuitæ. His finibus Deus potuisset frustrari si se latro aliquot ante annis conuertere potuisset. Deus quidem non obstitit ne conuerteretur: sed cum omnes ex se & suapte natura inhabiles sint ad conuersionem, de iis quos decreuit conuertere statuit apud se quo tempore & modo eos sit conuersurus.

XVIII. *At (inquiunt) si nemo potest conuerii nisi quem Deus actu & re ipsa conueriit, inde sequetur ceteros qui vocantur frustra vocari, & Deum simulatè agere & insipienter qui eos vocet ad salutem, & tamen media ad salutem comparandam necessaria velut subducere.*

Respondeo vocem illam *subducendi* satis arguere quam agant mala fide. Nemo enim nostrum sentit Deum iis qui non conuertuntur subducere media necessaria ad salutem. Nam si subduceret eis, adimeret eis quod habuissent. At nemo irrigenitus vnquam habuit omnia media necessaria ad salutem. Aliud est subducere media necessaria ad salutem, aliud non dare: Aliud eruere oculos cæco, aliud non

fanare cæcum. Deum non dare omnibus media omnia necessaria ad salutem satis constat. Nam infiniti sunt populi ad quos non mittit prædicatores Euangelij. Plurimis verò quibus annuntiatur Euangeliam non dat spiritum adoptionis & fidem. Sed ij demum credunt qui præordinati sunt ad vitam æternam Act. 13. Quæ omnia superioribus capitibus abundè probata sunt. Neque tamen idcirco Deus potest insipientiæ aut simulationis insimulari, qui vocet quos scit non venturos, & quibus non dat vires veniendi. Non enim agit simulate nec insipienter qui exigit ab homine quod non potest, si id debet: & si ipse homo sibi causa est impotentiae. Neque enim per hominis prauitatem Deus ius suum amisit: neque tenetur omnibus suggerere media soluendi quod debent, & præstandi quod iubentur. Non insipienter nec simulate vocat virgines carentes oleo quamuis oleum eis non administret de quo ipsæ sibi maturè debuerant prospicere. Nec dubium est quin Deus ab omni homine, immo & ab ipsis Ethnicis, postulet perfectam obedientiam legis, quam tamen perfectè posse ab eis impleri, ne Arminiani quidem nisi timide & ambigüe audent affirmare. Non frustra Deus vocat eos quos scit non secuturos, quia non frustra agit qui id exigit quod iustitia postulat. Nec est æquum vt quamuis in promiscua turba multi sint reprobi, id circo verbū non annuntietur isti turbæ, & malorum prauiras fraudi sit bonis; & electorum commodis inde aliquid decedat aut detrahatur. Nec frustra contumacibus an-

*Ezech.  
c.3.*

nuntiatur Euangelium, cum ex illa ipsa eorum contumacia & consequentibus pœnis pij salutariter contremiscant, & ad preces agnitionemque misericordiae Dei erga ipsos conuertantur. Non frustra Deus misit Moſem ad Pharaonem, & Ezechielem ad Iudæos: quamuis Pharaonem non obtemperatum Deo, nec Iudæos Ezechieli, Deus ipſe præmonuerit. Nulla ergo hic eſt abſurditas, quantumuis odioſe id exagitent. Naſuti homines, vt nobis conſent inuidiam hæc iactant apud imperitam plebem, & bullas excitant in ſinipulo quæ minimo ſtatu facile diſſantur.

XIX. Superingerunt calumnias, affingentes nobis quæ non credimus. Videlicet, Deum vocare eos qui non conuertuntur ad id ſolum, & datâ opera, vt ſiant inexcûſabiles. Quod abſit vt à nobis dicatur. Dicimus quidem id accidere, ſed non dicimus hunc ſolum finem eſſe Deo propoſitum; Non putamus ad id tantum vocari reprobos vt ſiant inexcûſabiles, quamuis ex ſpreta vocatione grauiorem ſibi damnationem accerſant. Deus quidem offert Euangelium reiecturis, ſed non vt reiſciant. Finis Deo propoſitus in vocandis iis quos ſcit non obtemperaturos eſt expoſcere quod debet, & declarare quid ſibi gratum ſit. An & eos vocat, monet, minatur, vt ſaltem tantisper cohibeantur metu ne noceant bonis? & vt exemplo contumaciæ non inultæ, pij diſcant timere? & componendo ſuam conditionem cum iis quos Deus pari gratia non dignatus eſt, ob prærogatiuam ſibi conſeſſam Deum ament impenſius?

XX. Re-

gerunt ſectarij *hoc modo materiam quibusdam ſuppedi-*  
*tari ad ſecuritatem, & contemptum mediourum quæ Deus*  
*adhibere ſolet ad efficiendam conuerſionem, vi ſunt prædica-*  
*tio, &c. Nam ſi ante tractionem iſtiusmodi irrefiſtibilem ne-*  
*mo ſe conuertere poteſt, & ſimul atque irrefiſtibiliter trahitur*  
*eum proinus conuerſi neceſſe eſt, iam irrita eſt atque inutilis*  
*omnis cura noſtra & ſollicitudo. In alius verò ſuppeditur*  
*materia perpetuarum dubitationum quantiſper ipſi talem*  
*tractionem non ſentiunt.*

Iam monuimus falſo nobis hanc ſententiam af-  
finḡi, Deum trahere hominē irrefiſtibiliter. Tātūm  
dicimuselectos vtcunque diu reſiſtant, tandē tamen  
obtemperare Deo vocanti, eorumque conuerſio-  
nem voluntariam fieri certò & infallibiliter : nec  
fieri poſſe vt nunquam conuertantur, vel conuerſi  
finaliter excidant, & gratia Dei à reſiſtentia carnis  
tandem extingatur & finaliter ſuperetur.

XXI. Ex tali tractione negamus poſſe ſequi ſe-  
curitatem aut contemptum verbi, cum ipſamet illa  
gratia creet in nobis curam & ſollicitudinem. Vide  
obſecro quam parūm hæc quadrent, & quām ineptè  
dicatur gratia Dei impedire piam ſollicitudinem,  
cum ipſa illa ſollicitudo ſit pars gratiæ. Nam quo-  
modo gratia per quam homo regeneratur eum cor-  
rumperet? Aut quomodo gratia per quam excitatur  
& ſtimulatur eum daret in languorem? Sic ergo a-  
gunt ac ſi dicerem reſurrectione aliquem necari, aut  
dealbatione denigrari. Nam per gratiam creatricem  
piæ ſollicitudinis dicunt afferri negligentiam.

XXII. Nec verò dubium eſt quin idem abſur-

Hh

dum possit deduci ex sententia Arminij qua censet quosdam trahi à Deo modo & tempore congruo, quo qui trahuntur certissimè sequuntur. Possum enim dicere hac doctrina conscientias alto veterno sopiri: erunt enim qui sic loquentur: Quid attinet esse sollicitos? Irritus est noster conatus, si non trahimur modo congruo. Hoc autem modo an trahar dubito. Inde negligentia, & fides fluctuans in incerto.

XXIII. Nihilo meliora sunt quæ addunt. *In aliis suppediari materiam perpetuarum dubitationum quâtiſſer ipsi talem tractionem non sentiunt.* Hoc quidem absurdū perabsurdè vrgetur ab Arminianis qui certitudinem salutis totis viribus impugnant, dum iubent dubitari de perseverantia. Fingamus enim ex hac nostra doctrina subnasci dubitationes de salute: An in nobis damnant quod in se ipsis probant? Non negamus obrepere interdum dubitationes piis & probis, quas tamen quò magis afficiuntur sensu gratiæ Dei, & prout fides augetur, sensim minui necesse est. Sed non est necesse ut qui iam conuersus est & credit sentiat se irresistibiliter trahi, id est ira trahi ut non possit resistere. Nam certitudinem infallibilem conuersionis ponimus nò in sensu hominis qui sentiat se non posse resistere, sed in Dei decreto per quod necesse est veniant ad Christum quos elegit ad salutem. Sic infrangibilitas ossium Christi non erat in ipsorum ossium duritie sed in consilio Dei fractionem ab eis prohibente. Ideoque potest accidere ut eis qui certò Dei decreto saluabuntur nondum pla-

nè sit explorata sua salus, & assilientibus subinde dubitationibus agitentur. Sunt quibus post multos vitæ annos piè actos & sobriè, fiducia salutis in morte demum datur. Nec opus est vt fidelis se exploret an trahatur vi irresistibili, sed an post seriam pœnitentiam totus sic conquiescat in morte Christi & promissione Dei, vt inde ad pietatem & amorem Dei accendatur. Quicumque se sentit ita affectum esse, non debet momenta efficaciz spiritus Dei & gratiz insuperabilis scrupulosè pensitare: sed ita se componere vt dubitationes assultantes, precatione & recordatione promissionum Dei comprimat, & colubrinam vim cupiditatum resistentium spiritui Dei elidat & conterat.

XXIV. Quod si quis secus facit, non ij sumus qui possumus omnibus malis occurrere, aut vitiis mederi: Gnari ex optimis quibusque documentis posse capi occasionem peccandi, & optima quæque in sequiorem partem posse detorqueri.

XXV. Mitto quod Sectarij iungunt infociabilia: & ex oppositis rebus faciunt appositas: Fingunt enim aliquem habentem veram fidem, posse dubitare an seriò sit conuersus. Quod sanè impossibile est: vera enim fides suscitatur in homine seriam respicientiam & Dei amorem, qui non potest esse in homine quin sentiatur.

XXVI. Denique incommoda quæ sectarij ex nostra doctrina eliciunt vitari possunt: at Arminianorum doctrina inuitabilibus malis conscientias implicat. Hinc enim hominem inflat superbia, do-

cens hominem se ipsum discernere: se ipsum conuertere: posse se conuertere antequam à Deo actu conuertatur: Hominem habere de quo gloriatur. Deum teneri dare ei gratiam sufficientem: Deum reddere homini quod debet: Gratiam Dei non esse causam totalem fidei. Dei gratiam humano arbitrio subiici. Virtutem quæ sit in homine, nempe fidem, priorem esse electione Dei. Altrinfecus verò Arminianismus anxia dubitatione conscientias torquet. Quis enim potest esse certus de sua salute, si ne quidem salus nostra certa est ex Dei electione & consilio? & si numerus electorum ex Dei voluntate non est certus? Aut si Deus neminem præcisè elegit nisi consideratum ut mortuum? Aut si certitudo salutis nititur viribus liberi arbitrij penes quod sit perseuerare, aut non perseuerare? credere aut non credere? facere ut Deus sit compos voti, aut sine proposito excidat? Huic sane exitiali doctrinæ si locus est, perit fides, & humilitas Christiana. Necesse enim est ut maximè dubij pendeant qui maximè superbia inflantur. Oportet suspensa sit expectatio hominum qui voluntatem humanam, rem fluxam & instabilem, faciunt spei suæ firmamentum. Ideo nimirum Satan inflat homines fastu ut disrumpantur, & sursum attollit ut ex alto impulsos præcipitet & grauius elidat.

XXVII. Ad illam vero nostram obiectionem qua dicebamus, Si Deus agit in nobis tantum per modum suasionis, Deum non esse causam efficientem fidei, sed tantum excitantem per modum ob-

iecti: vt ipse Satan indicio est, qui non est causa efficiens peccati hominum, quantumcunque excitet, & instiget & agat efficaciter in filiis rebellionis, nihil respondent Arminiani: Sed contra obiiciunt *Si Deus* (inquiunt) *suos irresistibiliter conuertit, qui sunt longè pars inferior, & Satan resistibiliter potissimam partem auertit, in eo Satã plus Deo valet, qui minoribus & inferioribus auxiliis suum consilium in multo pluribus hominibus potest exequi.* Viri boni illud suum *irresistibiliter* semper ponunt pro certo & *infallibiliter*. Sed ad rem, nego eos quos Deus trahit & efficaciter conuertit pauciores esse quam quos Satan auertit. Non dubium quidem est quin quidam in suæ conuersionis primordiis Satanæ artibus dimoueantur ab incœpto; Sed hi pauci sunt præ iis qui nulla vnquam senserunt tentamenta nec stimulos penitentiae: Hos Satan non auertit, cum sua naturâ sint auersi. Quodecunque verò Satan agit leue est præ efficacia Spiritus Dei in electis: nam Satan inuenit homines pronos ad peccatum, & ruêtes impellit; nec dubium est quin reprobis non tam Satanæ impulsu agantur quàm suo. Profectò maius est sanare paucos lethaleriter faucios, quam multorum vulnera exacerbare, & acutū vlceri affundere: Longè facilius est impellere vltro ruentes quam lapsos excitare: occidere decem moribundos quàm vni mortuo vitam restituere.

XXVII. Hic verò exclamant eueriti naturam humanam dum necessario ad vnum determinatur: Respondeo si necessitatis voce non coactio, nec Physica, necessitas qualis est *põn* grauium ad cen-



trum intelligatur, sed certitudo infallibilis, eaque voluntaria & spontanea, tali necessitate naturam non euerit. Natura Angelorum necessariò determinata est ad bonum, nec ideo eueritur. Nostra natura, necessariò determinata est ad expectendam felicitatem, nec ideo tamen natura humana destruitur. Israëlitarum voluntas quorum Deus cor tetigit ut Sauli adhærerent 1. Sam. 10. 26. Esau voluntas subita mutatione in amplexus fratris effusi, Genes. 33. Voluntas latronis cum Christo crucifixi, & Pauli in ipso cōuersionis puncto, ad vnum erant determinatæ: nec tamen ideo vis illata est eorum libero arbitrio, aut natura eorum destructa. Sitientis impetus mouentis se ad potum oblatum, ad hoc vnum est determinatus, nec tamen ideo desit esse homo, aut natura eius euerfa est. Deus habet arcanos quosdam & imperceptibiles modos quibus flectat humanam voluntatem illibatâ eius libertate.

# ADDITAMENTVM AD CAPVT

XIII. CONTINENS LOCA QVÆDAM  
 excerpta ex Confessione Ecclesiarum Gallica-  
 rum, & ex præcipuis huius aui Doctori-  
 bus, super obiecto prædestinationis.



ONFESSIONIS Ecclesiæ Gallica-  
 næ, articulus XII. hic est. Credimus  
 Deum ex ista corruptione & maledictione  
 generali in quam omnes homines demersi  
 sunt liberare eos quos in æterno suo consi-  
 lio & immutabili eligit, ex mera sua boni-  
 tate & misericordia, in Domino nostro Iesu Christo, absque  
 consideratione operum : Cateros relinquens in eadem corru-  
 ptione & damnatione ad demonstrandam in his suam iusti-  
 tiam ; in illis verò diuitias suæ misericordiæ. Neutri enim sunt  
 alteris meliores donec Deus eos discreuerit, &c.

Iohannes Calvinus Commentario in I X. caput  
 Epistolæ ad Romanos, loquens de Iacob & Esau in  
 utero, hæc habet. Deus in vitata hominis naturâ qualis in  
 homine fuit nihil potest considerare quo ad benefaciendum  
 inducatur. Quum ergo dicit virumque nihil boni aut mali  
 tunc egisse, simul addendum est quod ille præsumit, virumque  
 scilicet esse filium Adæ, naturæ peccatorem, nulla iustitia mi-  
 ca prædium. Merito reiectus fuit Esau quia naturaliter erat  
 filius iræ ; Ne quis tamen maneat scrupulus, ac si vilius culpæ  
 aut viii intuitu deterior eius conditio fuisset, non minus pec-  
 cata quam virtutes excludi vtile fuit. Verum quidem est

propinquam reprobationis causam esse quia sumus omnes in Adam maledicti.

Editionis  
Genevæ  
sis anno  
1576.

Idem Calvinus libro de æterna Dei prædestinatione, initio Epistolæ quæ libro præfixa est. *Electio Dei gratuita est qua sibi ex perduto damnatoque hominum genere quos visum est adoptat.*

Pag. 955. probat sententiam Augustini sic loquentis. *Qui perseveraturi non sunt, non sunt à massa illa perditionis præscientia Dei & prædestinatione discreti, & ideo nec secundum propositum vocati.*

Pag. 961. Scire velim si communi naturæ relictis forent Esau & Iacob quid bonorum operum in secundo magis quàm in priore Deus reperisset. Pæraque sanè ambo lapidei cordis duritia oblatam salutem repulissent.

Ibid. *Quum Paulus pro confesso sumeret quod bonis istis Theologis est incredibile, omnes ex æquo esse indignos, æquam naturæ in omnibus esse corruptionem, securè inde constituit Deum gratuito suo proposito eligere quoscunque eligit.*

Ibidem. *Verissimum est illud Augustini, Sola gratia redemptos discerni à perditis, quos ad perditionem concreuerat ab eadem origine ducta massa communis.*

Pag. 965. Preparasse Deum vasa misericordiæ in gloriam testatur: si hoc speciale est electus, reliquos ad interitum aptatos esse constat, quia naturæ suæ relictis certò iam exitio devoti sunt.

Pap. 970. *Monendi sunt lectores pæraque à Pighio vtrumque damnari, Deum ab initio cum adhuc integer foree hominis status quod postea futurum esset decrevisse: & nunc ex perditâ massa eligere quos voluerit. Augustinum rideat eiusque*

eiusque similes, hoc est pios omnes, qui Deum imaginantur postquam vniuersalem generis humani ruinam in persona *Adæ* præsciuerat, alios ad vitam alios ad interitum destinasse.

Idem institutionis Christianæ lib. 3. cap. 22. §. 1.  
*Paulus* quum docet nos in Christo electos fuisse ante mundi creationem, omnem certè dignitatis nostræ respectum tollit; perinde enim ac si diceret, quoniam in vniuerso *Adæ* semine nihil electione sua dignum reperiēbat cælestis pater, in Christum oculos conuertisse, ut tanquam ex eius corpore membra eligeret quos in vitæ consortium sumpturus erat. Valeat igitur apud fideles hæc ratio, ideo nos in Christo fuisse in cælestem hereditatem adoptatos quia in nobis ipsis non eramus tanta excellentia capaces.

Et §. 7. Si quis roget vnde Deus elegerit, alibi respondet, ex mundo, quem à precibus suis excludit vbi discipulos patri commendat.

Et cap. 23. §. 3. Si quis nos huiusmodi verbis aggrediatur cur ab initio Deus ad mortē aliquos prædestinavit qui quum nondum essent, mereri iudicium mortis nondum potuerant: Nos responsionis loco vicissim eos rogemus quid Deum homini debere existiment si eum à natura sua æstimare velit. Qualiter peccato vitiiati sumus omnes, nō possumus non esse Deo odiosi: idque non tyrannica sæuitia, sed aq̃uissima iustitiæ ratione. Quod si iudicio mortis obnoxij sunt omnes naturali conditione quos ad mortem Dominus prædestinat, de qua obsecro eius iniquitate erga se conquerantur? Veniant omnes filij *Adam*, cum suo creatore contendant ac disceptent quòd æterna illius providentia ante suam generationem perpetuæ calamitati addicti fuerint, quid obstrepere aduersus hanc

defensionem poterant, ubi Deus illos ad sui recognitionem contra vocabit? **EX CORRUPTA MASSA** si desumpti sunt omnes, non mirum si damnationi subiacerent.

Hieronymus Zanchius Miscellaneorum lib. 3. Tractatu de Prædestinatione Sanctorum sub finem primi, capitis hæc habet. *Generalis, hoc est omnium hominum prædestinatio est æternum, sapientissimum, immutabileque Dei decretum quo apud se ab æterno constituit primum quidem omnes homines tum creare ad sui imaginem & similitudinem iustos atque sapientes, tum ut in peccatum à Satana tentati suo libero arbitrio laberentur permittere: atque in foueam æternæ mortis tanquam stipendium peccati iustissimum ruere: deinde horum alios è fouea peccati & mortis gratis per Christum certis mediis liberare, & liberatos spiritu suo comitari: & tandem æterna vita donare: alios verò hac gratia non dignari: Sed cum Satana potius excæcare atque indurare, tum æterno exitio perdere, &c.*

Idem ibidem. *Specialis electorum prædestinatio est æternum, sapientissimum, immutabileque decretum, quo apud se ab æterno constituit certos quosdam homines in altissimam peccati atque mortis foueam unà cum aliis omnibus lapsos, secundum beneplacitum voluntatis suæ gratis per Christum eripere, &c.*

Idem lib. 5. de Natura Dei cap. 2. Quæst. 4. *Hoc ordine ascendendo ab effectis ad causas, & à causis ad effecta descendendo, considerari à nobis potest & debet electio ac reprobatio. Nimirum Deum ab æterno, firmo decreto constituisse, primum quidem creare omnes homines, deinde eos in peccatum labi & propter peccatum morti æternæ obnoxios*

fieri permittere : postremò aliquos inde per Christum, ea qua fecit ratione liberare, & aeterna vita donare, reliquos vero ab hac gratia reijcere, & in suis peccatis relictos tandem aeterno supplicio propter peccata afficere.

Bucerus in nonum caput ad Romanos. *Qui Verbum Dei sequi simpliciter volunt ex his se facile expediunt. Primum enim firmè inharèt in eo quod Deus ipse de se testatur, se ex perditò à primo parente genere hominum quosdam eligere sibi refingendos ad vitam nouam & beatam: reliquos habere organa ire suæ.*

Philippus Melanchthon in locis Theologicis loco de prædestinatione, non semel hac repetit. *Causam reprobationis certum est hanc esse, videlicet peccatum in hominibus:*

Vuolfgangus Musculus, Loco de electione cap. 5. *Constat electionem nostri haudquaquam esse aliquo qualitatis nostræ respectu factam. Neesse est igitur vt respectum electionis nostræ in Deo eligente nos queramus. Huc enim nos cogit propria vilitatis & deprauationis sensus. Dauid dixit, quid est homo quod memor es eius, & filius hominis quod prædestinasti eum, cum malum ac deprauatum fore præscires?*

Dauid Paræus, Commentario in nonum caput ad Romanos pag. 816. *Iacob & Esau vult à Deo eligente consideratos vt peccatores. Causa (inquit) fuit æternum Dei propositum quo constituit tale discrimen eorum facere. Prauus fuit Esau, non minus etiam Iacob. Vterque enim conceptus in peccato: & tamen hunc dilexit Deus, illum odio habuit: non utique ob discrimen aliquod inharèns*

aut prauisum, sed *καὶ ἐκ τούτου* qua unum elegit alterum non elegit.

Idem pag. 819. *Arbitrium seu voluntas Dei vocantis est propositum secundum electionem in Christo: hoc est, consilium Dei, quo ex perdita massa humana alios ab aliis differens, eligendo hos, relinquendo alios: quod propositum vocatur prædestinatio, electionem & abiectionem sub se continens.*

Pastores Ecclesiarum Vvalacrianarum, in sua epistola vno ore Prædestinationem sic definiunt. *Eorum qui veteri receptæque Ecclesiarum nostrarum Confessione hærent sententia hæc est, Deum ab æterno secundum beneplacitum immutabile voluntatis sue aliquos ex corrupto hominum genere mera benignitate in Christo Iesu segregatos seruare decreuisse, &c.*


Iohannes Piscator rigidissimus assertor prædestinationis ex massa integra, & reprobationis sine intuitu peccati, nouissimè edidit tractatum in decem Aphorismos digestum; quorum secundus his verbis conceptus est. *Prædestinatio hæc habet duas species, quarum vna electio altera reprobatio per Metonymiam effecti nominatur. Nam electio & reprobatio proprie referuntur ad genus humanum iam conditum & lapsum: metonymicè vero sic nominatur ipsum eligendi aut reprobandi decretum. Vidit tandem vir doctus necesse esse ut in electione & reprobatione homo consideretur ut iam lapsus & in massa corrupta. Sed commentus est aliud decretum sublimius quo Deus nec eligit nec reprobat, sed tantum decernit eligere & reprobare. Cuius decreti in Scripturis nulla fit mentio.*

Denique Synodus Dordracena Canone VII. electionem sic definit. *Electio est immutabile propositum Dei quo ante iacta mundi fundamenta ex uniuerso genere humano certum numerum hominum, non quidem meliorum aut digniorum, sed in communi cum aliis miseria iacentium, & ex originali iustitia, propria ipsorum culpa prolapsorum in peccatum & corruptionem, secundum liberum beneplacitum voluntatis suae, ex mera gratia elegit ad salutem in Christo, &c.*

Iidem Patres Canone XV. de Reprobatione sic loquuntur. *Aeternam hanc & impromeritam gratiam electionis indicat & commendat nobis sacra Scriptura, praecipue quando insuper testatur, non omnes homines esse electos, sed quosdam esse non electos, siue in aeterna Dei electione praeteritos. Videlicet eos quos Deus iuxta liberum, iustum, irreprehensibile & immutabile beneplacitum decreuit in communi miseria relinquere, in quam se ipsos propria sua culpa praecipitarunt, & saluifica fide & gratia conuersionis non donare, &c.*

FINIS.





QVÆDAM OMISSA, SVIS  
LOCIS ADDENDA.

**P**agina 79 linea 7. *hæc sunt addenda.* Et electus poterit damnari & reprobus saluari: Quod etiam asserunt sectarij.

Pag. 99. lin. 7. *hæc adde.* Invidiæ verò cum insimulare hominis esset vecordis & impij.

Pag. 115. lin. 13. *post hæc verba*, NON CRUCIFIXISSENT, *adde quæ sequuntur.* Ac profecto dici non potest Iudam & Caipham fuisse electos ad salutem sub conditione credendi in mortem Christi, cum ad id ipsum essent destinati, ut per eorum incredulitatem & scelus Christus morti traderetur. Quod si Iudas & Caiphæ credidissent in Christum, Christus non fuisset traditus ad mortem, ac proinde hoc decretum quo Arminiani volunt Deum elegisse Iudam & Caiphæ & Pilatum sub conditione si in Christum essent credituri implicat contradictionem: Perinde enim agunt ac si introducerent Deum sic loquentem. *Statui saluare Iudam & Caiphæ si credent in mortem Christi: verumtamen si credent & futuri sunt fideles, Christus non tradetur in mortem, nec crucifigetur.*

Sed & quatuor Arminianorum decretorum duo priora inter se pugnant. Primo enim decreto Deus decrevit uti Iudæ incredulitate & perfidia ad Christum morti tradendum. Secundo verò decreto Deus elegit Iudam sub conditione fidei in mortem Chri-

sti. Itaque priori decreto Iudas consideratur absolute ut incredulus & reprobus, secundo vero consideratur ut conditionaliter electus. His portentis & Chimeris inter se pugnantibus Arminiana schola circumpecta est, quæ risum mouerent nisi per hæc turbaretur Ecclesia, & Dei sapientia exponeretur opprobrio.

Pagin. 124. lin. 16. *post hæc verba* PRESTANTIA INTELLIGATUR, *adde quæ sequuntur.* Nam etsi electus pro præstanti possit accipi, electionem tamen accipi pro præstantia nunquam inuenies.

Pag. 262. lin. 23. *post hæc verba.* ET CAVENDI MALVM, *adde quæ sequuntur.* & hominem posse cauere malum & abstinere à peccato etiam si Deus non impediat.

Pag. 263. lin. 5. *post hæc verba* CAUSA PARTIALIS, *adde quæ sequuntur.* & pag. 211. *Gratiam & arbitrium coniungimus... ut causas partiales.*

Pag. 283. lin. 28. *post hæc verba.* MISERENTIS DEI, *adde quæ sequuntur.* Nouatores ut se tueantur aduersus illud Pauli, *Quis te discernit*, pertendunt Paulum agere de discretionem qua qui pluradona acceperunt ab iis discernuntur qui pauciora acceperunt. Quod lubens accipio: Nam si per solam Dei gratiam, maioribus donis præditi discernuntur à fidelibus qui pauciora acceperunt, quanto magis per solam dei gratiam discernentur qui multis donis sunt instructi, ab iis qui prorsus sunt expertes fidei, & cognitionis Dei.

Pag. 304. *ad finem paginae, ad finem capituli XXXV.*

adde quæ sequuntur.

XVII. Quonam verò tendat hæc doctrina de concursu liberi arbitrij cum gratia, & de facultate qua homo potest credere & gratia uti si vult, vel non credere & gratiam respuere, fideique causa totalis assignatur non gratia sola, sed gratia cum libero arbitrio, quò inquam tendat hæc doctrina ex Semipelagianorum lacunis hausta non est difficile cognoscere. Eo enim tendit ut merita humana quasi per cuniculos insinuentur. Quanquam enim sectarij prima fronte videntur præ se ferre odium meritum, plusculis tamen in locis ea stabiliunt. Epistola adversus Valachrianos pag. 44. hæc habet, *Quos vocat Deus & prædicationis gratia primitus dignatur, ut plurimum tales esse fateamur ut nihil minus ipsorum virtutes quam hanc donorum indebitam largitionem mereantur.* En aliquos qui merentur largitionem donorum Dei, idque ante regenerationem. Arnoldus pag. 328. *Deus creatura obedientiam præstanti quod suum est tribuit.* Arminius in Perkinsum pag. 218. *Deus ex promisso & debito dat vitam operanti.* Et Arnoldus pag. 433. loquitur de quibusdam qui gratiæ auxilio non se reddunt indignos, & non merentur ut spiritus in illis operari desinat.

XVIII. Lubet pro corollario hic apponere insignè sententiam Augustini ad Simplicium q. 2. *Illud manifestum est frustra nos velle nisi Deus misereatur: illud autem nescio quo modo dicatur, frustra Deum misereri nisi nos velimus. Si enim Deus miseretur, etiam volumus. Ad eandem quippe misericordiam pertinet ut velimus. Deus est enim qui operatur in nobis velle & operari pro bona volumus.*

*Ibid. Non potest effectus misericordiae Dei esse in hominū potestate, ut frustra ille misereatur si homo nōlit, quia si vellet etiam ipsorum misereri, posset ita vocare quo modo illis aptum esset ut & mouerentur, & intelligerent & sequerentur.*

Pag. 4. lin. 20. post illa verba *APERTE PROLO-  
QUI. adde quae sequuntur.* Dicunt enim Deum non infundere fidem cordibus, sed dare media ad perueniendum ad fidem, quibus mediis utamur si velimus, hoc enim esse in potestate liberi arbitrij.

Pag. 34. lin. 24. post haec verba, *EST COMPARA-  
TA* adde quae sequuntur. Præcipuè cum Christus dicat Iohannis 4.v.14. *Qui bibit de aqua quam ipsi dabo nunquam sitiet; sed aqua quam ei dabo fiet in eo fons saliens in vitam æternam.* Liquidò enim apparet hic agi de quadam gratia quæ semel probè admissa & corde recepta nunquam amittitur, sed quæ manet in vitam æternam, & quæ instar fontis perennis nunquam arefit. Nec minus diserta sunt Christi verba eiusdem Iohannis cap. 6.v.35. *Qui credit in me nunquam sitiet.* & vers. 51. *Qui edet de hoc pane vivet in æternum.* Quæ omnia falsa essent si vera fides quæ Christum seriò apprehendit posset excuti & finaliter amitti. Essent enim qui post manducationem panis cælestis perirent in æternum.

#### EMENDANDA.

**P**agina 6. linea 16. lege *videntur habere rationem boni aut mali, nec facere ad Dei,* pag. 9. lin. 30. *euentus for-*

K k

uitos. pa. 10. li. 17. lege iubendo, vetado. pa. 25. li. 7. *Ad cuius.* pag. 26. lin. 5. *intendit* & lin. 26. *intentione, multo consilium.* pag. 29. lin. 24. *tempore fieri posterior-* pag. 32. lin. 4. *credendi* & lin. 15. & 16. *vehementer affici,* & lin. 25. *certissima patebat.* pag. 34. lin. 6. *luit stabilire.* pag. 40. lin. 20. *qua possent.* pag. 45. lin. 14. *ut docet.* pagin. 47. lin. 26. *infecit: at concupiscentia.* Et lin. 28. *repugnat, at peccatum,* pagin. 54. lin. 19. *quia (inquit) in parentibus,* pagin. 63. lin. 1. *fiet ex animis:* Et lin. 26. *peccati à parentibus.* pagin. 66. 1. lin. 9. *amissa sint.* pagin. 73. lin. 1. *maledictioni.* Et lin. 16. *induit, ut hoc.* pagin. 74. lin. 3. *Hebr.* pagin. 88. lin. 19. *aliquos elegisse.* pagin. 95. lin. 4. *fide.* *At certe.* pag. 96. lin. 27. *cedentibus.* pag. 97. lin. 1. *lus hic nec.* pag. 99. lin. 9. & 10. *audacia.* *Is aduersus Tilenum* & lin. 12. *nori, sic.* pag. 101. lin. 6. *penes quod.* pa. 102. *hoc decretum electionis.* pag. 114. lin. 8. *agitur non.* & lin. 9. *consequente)* *Quis.* pa. 129. lin. 18. & 19. *χρηστούμεν.* & lin. 27. *ἡμεῖς.* pag. 130. lin. 2. *ἀφωρομένοι.* pag. 146. lin. 29. *Pereandem.* pag. 147. lin. 5. *quoque certo dare.* & lin. 23. *¶ III.* *Quid quod.* pa. 155. li. 25. *alibi.* *Hoc tamen loco,* pag. 160. li. 24. *sancto illo viro,* pa. 162. lin. 8. *Hanc suam falsam & ineptā sen-* pa. 164. li. 10. & 11. *decernere ut quis amis-* *sam sanitatem recuperet, & tamen decernere ut medicinam* *sumat, & opem medici impetret* *xxiv.* *Idem.* pag. 165. lin. 11. *in Arnolfo inuenerunt.* & lin. 14. *tia Arnoldus vult,* pag. 168. lin. 9. *imminutionem.* & lin. 27. *dele XXX.* pa. 183. lin. 17. *Christum.* pag. 185. lin. 17. *satisfactione iustitie.* pag. 198. lin. 6. *nostrarum.* & lin. 19. *salutaris posse esse* pag. 210. lin. 29. *iudicauerit.* pag. 214. *Ergo intercessio ne-* *cessario praeceedit sacrificium.* *Addit Armi-* pag. 218. lin. 8.

interficiat. pag. 225. lin. 28. pertinet. pag. 227. li. 18. Diabolorum. pag. 235. lin. 10. proportionem. pag. 238. lin. 18. predicetur. pag. 247. lin. 24. saltem ibi. pag. 248. li. 5. eis a decess. pag. 250. lin. 2. profuturus. & li. 8. efficacem, ideo quæ actu efficiat, sine qua tamen. pag. 258. lin. 12. enervat. pag. 259. lin. 8. homo resistere possit. pag. 264. lin. 8. arbitrium sic. & lin. 30. discerno: pag. 270. lin. 28. adac. pag. 272. lin. 16. nos amavit. pag. 279. lin. 14. tenebris immergi. pag. 282. lin. 28. nera irrogenitorum. Si ex Scriptura pag. 284. lin. 28. magno conatu. pag. 287. lin. 16. hic agitur. pag. 297. lin. 3. necessariò, etiam cum. pag. 301. lin. 10. Ioëlis. 2. pag. 306. lin. 4. πέσις. & lin. 8. metum excitantur. pag. 308. lin. 20. unquam. pag. 309. lin. 14. & 15. Scriptura ad evertendam hanc sententiam congerere. pag. 310. li. 11. Capernaitas peius fuisse. & lin. 17. dictam, antequam. pag. 312. lin. 27. afficiente. pag. 356. lin. 9. argumentamur.

Pag. 11. lin. 16. παρὰ χεῖρ' αὐτῶν & lin. 20. stibilem, sed illibata pag. 12. lin. 11. Dei auxilio. pag. 17. lin. 11. porrigat. & lin. 16. compingant, cum ad. & li. 29. inexplicabilis? pag. 20. lin. 4. Idem potest dici de & lin. 11. quacunque ei obversabantur, & lin. 17. Paulus Apostolus. pag. 25. lin. 3. arbitrium, ut prolixè. & lin. 4. per quam fit ut. pag. 25. lin. 22. & 23. ipso loco secunda ad Corinthios quo Apostolus potentiam. pag. 31. lin. 25. χρηστέον. pag. 34. lin. 27. fallax effect hac, pag. 44. lin. 6. αὐτὰρ.

Emendanda in marginalibus notis.

Pag. 99. lin. 4. catorem. pag. 101. lin. 14. Arnel. pag. 294. lin. 3. αὐτὰρ. pag. 14. lin. 17. spei, cha-











2



2



ba

a6

2

